



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

### Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

### About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

**A** 470243



878

C5

R83

1854







3251 a,  
Q. VALERII CATULLI

VERONENSIS

LIBER.

---

RECOGNOVIT

AUGUSTUS ROSSBACH




LIPSIÆ

SUMPTIBUS ET TYPIS B. G. TEUBNERI

MDCCCLIV.







*ferbylanorum et editionis principis lectiones* in meum usum verti. Jam vero primum de his libris pauca disputabo, deinde adnotationem criticam apponam.

Scripsi Tubingae a. d. V Id. Mart. MDCCCLIV.

*Augustus Rossbach.*

## DE LIBRIS CATULLIANIS

brevis disputatio.

Praeter librum THUANEUM (T), nunc in bibliotheca regia Parisiensi n. 8071 servatum, qui inter alia latina carmina etiam Catullianum LXII continet quique saeculo X scriptus perhibetur, nullus extat liber Catullianus qui medium saeculum XIV superet. Hi libri qui quidem integri collati sunt et in meam venerunt notitiam, in duo genera dividendi sunt, aetate disparia, auctoritate nisi quod interpolatis nulla fere fides habenda est paene paria, neque enim ullus codex tantopere praestantia sua reliquos vincit, ut hi plane postponendi sint, quin etiam ne interpolatis quidem prorsus carere possis, quoniam ad stirpem suam relati, duobus libris non interpolatis, de lectione aliqua vel scribendi errore dubitantem confirmant et in rectam viam deducunt.

### I. Ad prius genus referendi sunt hi libri.

GERMANENSIS (G) olim in bibliotheca S. Germanensi n. 1165, nunc in regia Parisiensi, membranaceus forma IV maiori. Is inter omnes libros qui adhuc collati sunt longe est antiquissimus, scriptus enim est anno 1375. Ad marginem et inter lineas manus non minus antiqua lectionum varietates adscripsit, quae maximam partem cum iis, quas e Laurentiano enotavit Lachmannus, consentiunt. In extremo libro post „*versus domini Benevenuti de Campeyanis de Vicencia de resurrectione Catulli poetae Veronensis*“ quos infra ponam, haec leguntur: *Tu lector quicumque, ad cuius manus hic libellus obvenit, scriplori da veniam, si tibi corruptus videbitur, quoniam a corruptissimo exemplari transcripsit. Non enim quodpiam aliud extabat, unde posset libelli*

*huius habere copiam exemplandi: et ut ex ipso salebroso aliquid tamen suggereret, decrevit potius tamen corruptum habere quam omnino carere., sperans adhuc ab aliquo alio fortuito emergente hunc posse corrigere. Valebis, si ei imprecatus non fueris. 1375 mense octobri XIX quando Casignorius laborabat in extremis. Paulo vetustior liber extat Vicetiae in bibliotheca della pietà del monte, scriptus 1360. Cf. Fr. Blumii bibliotheca librorum manuscriptorum italica p. 234.*

COLBERTINUS (C) in bibliotheca regia Parisiensi n. 8234, membranaceus forma IV scriptus saeculo quinto decimo, continet Tibullum et Catullum.

LIBER LAURENTII SANTENII (L, non confundendus cum Laurentiano), nunc in bibliotheca regia Berolinensi inter copias Santenianas, quem integrum exhibuit in sua editione Lachmannus. — Hi libri tres plerisque locis consentiunt, ita tamen ut L propius ad Colbertinum accedat, a quo ubi differt nihil fere habet auctoritatis.

In eodem genere sunt interpolati quatuor:

PARISINUS 7989 (P<sub>1</sub>) chartaceus forma IV maiori, anno 1423 die 20 novemb. scriptus, continet Tibullum, Propertium, Catullum, Ovidii epistolam Sapphus ad Phaonem, Petronii Arbitri fragmenta, Virgilii Moretum. Is quamquam hic illic interpolatus est, antiquas tamen aliquot lectiones habet, quae cum Germanensi ex eodem fonte fluxerunt. Nonnulla ex eo enotaverat Santenius, quae in editione sua protulit Lachmannus, interdum hunc librum cum aliis Parisinis confundens.

MEMMIANUS (M) nunc Parisinus n. 8233, membranaceus forma VIII, Catullum, Tibullum, Propertium continens. Scriptus est *Florentiae 1465* a Gherardo Cerasio Florentino, eodem scriba, qui *Laurentianum* Lachmanni exaravit.

GUDIANI 283 et 332 (Gu<sub>1</sub>, Gu<sub>2</sub>), nunc in bibliotheca Guelferbytana, quorum alter solum Catullum, alter Tibullum et Catullum continet, uterque membranaceus forma VIII minori, recentioris aetatis.

Denique in libros non interpolatos referendus est

DRESDENSIS. Reg. D. 136 (Dr), membranaceus forma IV, saeculo quinto decimo in Italia scriptus, quem Silligius in editione sua exhibuit. Is singularem tenet locum inter libros qui ad prius

genus pertinent et peculiarem quasi huius familiae stirpem constituit, cuius reliqui agnati aut interierunt aut nondum resuscitati sunt. Etenim libri septem quorum supra fecimus mentionem, ex uno codice, quem littera A consignabimus, licet variis viis deducti sunt; Dresdensis vero, quamquam ad idem genus pertinet, ex alio libro (B) descendit, qui illi A, ex quo alii septem propagati sunt, ita cognatus est, ut inter se fraterno quasi gradu coniuncti fuisse videantur: quod qui Dresdensis libri lectiones cum reliquis comparaverit, statim intelliget. Itaque fit ut saepe inter Dresdensem et Datanum aliqua similitudo intercedat, neque vero inde concludendum est, Dresdensem ad posterius librorum genus referendum esse: idemque de Gu<sub>2</sub> dicendum. Quare ubi Dr et D concinunt, semper fere antiquissimam lectionem servarunt estque in eo consensu maxima auctoritas et fides.

## II. Ad *posterius genus* referendi sunt hi libri.

DATANUS (D), olim Caroli Dati, tum Nicolai Heinsii, nunc inter copias Santenianas in bibliotheca regia Berolinensi. Hunc librum in primario loco Lachmannus collocavit eumque totum exhibuit. Scriptus est anno 1463, novem annis ante editionem principem impressam, sed in hoc Catullianorum librorum genere antiquissimus neque interpolationibus foedatus. Inde fit ut licet plenus sit corruptelarum scribendique errorum, tamen multis locis vera lectio ex eo eruenda sit.

Ex eodem fonte tres libri interpolati fluxerunt.

PARISINUS 7990 (P<sub>2</sub>) membranaceus forma VIII, Tibullum, Catullum, Propertium continens.


PUTEANUS (Pu), inter regios Parisienses 8232, chartaceus forma VIII, in quo scripta sunt praeter Catulli carmina etiam Priapeia et Galli elegiae, quibus secunda et tertia manus alia quaedam carmina adiecit. Hi libri P<sub>2</sub> et Pu recens scripti inter se et cum EDITIONE PRINCIPE quae prodiit anno MCCCCLXXII ita consentiunt, ut nulla dubitatio esse possit quin omnes ex eodem libro descripti sint, qui nobis littera E designabitur multasque continuit interpolationes, quae nunc pariter in P<sub>2</sub>, Pu et Ed. Pr. leguntur.

Restat FURLANUS (F), nunc Parisiensis 8236, chartaceus, continet Propertium, Tibullum, Catullum et Priapeia. Is liber

ita interpolatus, ut omnino nihil ad emendanda Catulli carmina conferat, nisi quod interdum Datani, quocum eodem fere tempore scriptus est, lectiones confirmat.

Vix dignus est qui nominetur Guelferbytanus 65 z cuius primum folium suppletum est, Catullum, Tibullum Propertium continens, teterrimis interpolationibus inquinatus, vix ut dici possit, utri generi sit adscribendus.

Hi codices integri collati sunt; alios ex quibus hic illic aliquid delibatum est quique in Catalogis bibliothecarum commemorantur praetermitto. Stemma librorum illorum, de quibus modo disputavimus, hoc est interpolatis asterisco notatis.



## ANNOTATIO CRITICA

potissimum lectionis Lachmannianae discrepantiam continens.

---

I, 2. *Arida*] *arido* libri omnes et Lachmannus, *arida* vulgo auctore Servio ad Aen. 12, 587. — Lachmannus etiam ante v. 9 lacunam esse arbitratus est. Totus hic locus fortasse sic restituendus:

Quare habe tibi quicquid hoc libelli,  
qualecunque, quod (en patrona virgo)  
plus uno maneat perenne saeculo.

*Quod en* de coniectura scripsi idque in libris delitescit, quorum alii *quidem* D Gu<sub>1</sub> Pu F Ed pr, alii *quod* G C L Dr M P<sub>1</sub> P<sub>2</sub> Gu<sub>2</sub> tradunt, utrumque corruptum ex eo quod suspicatus sum *quod en*; certe in pronominum cumulatione nihil quidquam offensionis est.

II, 8. Versus lacunosi potius quam depravati, etenim post verba *acquiescet ardor* unus vel plures versus excidisse videntur.

Vers. 11—14. Fragmentum carminis cuius initium periit. In codicibus omnibus et editione principe cum carmine II et III in unum coaluit.

III, 7. *Ipsam* G C Dr M P<sub>1</sub> Pu Gu<sub>1</sub>, *ipsa* L F Lachmannus.

IX, 4. *Senemque* Froehlichius, *suamque* libri plerique, *sanamque* P<sub>1</sub>, *tuamque* F Guelferbyt.

X, 8. *Et quonam* libri omnes, *ecquonam* Statius et Lachmannus. — Post 27 Lachmannus versum unum interiisse putat.

XI, 7. *Sive quae* libri fere omnes, *sive qua* Gu<sub>2</sub> Guelferb. margo F Lachmannus. — 23 *Posquam* D Bergkiius, *postquam* ceteri libri, vulgo.

XII, 17. *Et Veranniolum* libri omnes, *ut Veranniolum* Lachmannus.

XVI, 8. 9. *Sunt...possunt*] *Sunt* Plin. epist. 4, 14 P<sub>2</sub> Gu<sub>2</sub> M, *sint* ceteri libri. *Possunt* G C P<sub>1</sub> M Dr D P<sub>2</sub> Pu Gu<sub>1</sub> Gu<sub>2</sub>, *possint* L F Lachmannus. — 12 *Quei* in libris latet; *qui* G C L P<sub>2</sub> Pu, *que* D M Gu<sub>1</sub> Gu<sub>2</sub>, *quod* Dr P<sub>1</sub> F vulgo.

XVII, 6. *Salisubsali* Bergkii, *sali subsali* D, *sali subscyli* Gu<sub>2</sub>, *salii vel subsalii* Dr P<sub>2</sub> Guelf, *salii vel scili* Pu, *salii subscili* M, *salisubsili* G C L.

XXI, 1. *Essuritionum* pariter v. 10 *essurire* et XXIII, 14 *esuritione* Bergkii, *exuritionum* . . . *exurire* . . . *exuritione* D, *exuritionum* Gu<sub>1</sub>, *esuritione* . . . *esurire* . . . *esuritione* ceteri libri. Cf. Ritschelii prolegg. in Plaut. p. CII. — 6. *Haerens* libri omnes, *haeres* editiones pleraeque. — *Experiris* Gu<sub>1</sub>, vulgo; fortasse *experibis* forma ut videtur vetusta, quae est in ceteris omnibus libris, sic *comperior* et *comperio*, largiar et *illargibo*. — 11. *Mi meus* conieci, *Ncmaeus* P<sub>2</sub>, *Nemeus* M, *Meme* G C, *Me me* L Dr D P<sub>1</sub> Pu Gu<sub>2</sub>, *Meus iam* Gu<sub>1</sub>, *Meusmet* Bergkii.

XXIII, 14. *Essuritione* cf. ad XXI, 1. — 27. *Satis beatus* Bergkii, *satis beatus* libri omnes, *sat es beatus* editiones pleraeque.

XXIV, 4. *Midae* Vossius, *mi* G L D, *mihi* C M Gu<sub>1</sub> Gu<sub>2</sub>.

XXV, 5. *Aves* C L Dr M D P<sub>2</sub> Pu Gu<sub>1</sub> Gu<sub>2</sub> F, margo G, margo P<sub>1</sub>, *alios* G P<sub>1</sub> margo Gu<sub>2</sub>, *aries* margo G, *arios* margo L, *alites* vulgo, *munerarios* coniecit Lachmannus. Verba corrupta.

XXIX, 20. *Hunc Galliae timetis et Britanniae* vulgo, *timet et Britanniae* G C P<sub>1</sub> D, *timent et Britanniae* L Gu<sub>2</sub>, *timet terra et Britanniae* P<sub>2</sub> Pu F Edpr, *timet. . . et M. Time Britannia, hunc timete Galliae* proponit Lachmannus.

XXX, 1. *Alfene* cf. tab. fratr. Arval. *Alphene* libri, vulgo. — 4 5. ad finem carminis relegavit Lachmannus, ut strophae quaternorum versuum efficerentur. Ego redii ad eum ordinem, qui est in libris. — 9. *Inde* C L D cf. 76, 11, *idem* G M P<sub>1</sub> P<sub>2</sub> Pu Gu<sub>1</sub> Gu<sub>2</sub> vulgo.

XXXI, 13. *Lydiae* libri, corruptum, neque enim cogitandum est de Tuscis: *limpidae* Avantius, *Libuae* Lachmannus cf. Liv. 21, 38; 33, 37.

XXXV, 13. 18. *Incohata* . . . *incohata*] *indotata* omnes libri praeter F, in quo est *inchoata*, et vulgo; *incohata* D Gu<sub>2</sub> Edpr, *inchoata* libri ceteri et vulgo.

XXXVI, 12. *Surosque apertos* Vossius h. e. Syriam coelen, *Utriosque aperios* G D, *Uriosque apertos* ceteri libri, *Uriosque portus* Nic. Heinsius.



XXXVII, 11. *Nam mi* vulgo, *nam me* libri; fortasse *namque*, non enim obstat iteratio particulæ.

XLIV, 12. *Legi* libri omnes, Bergkii, *legit* vulgo. — 13. *Hic* libri, *hinc* Bergkii. — 20. *Frigus* libri, Bergkii coniecit *virus*. — 21. *Legi* Bergkii et Hauptii, *legit* libri, vulgo.

XLV, 9. *Dextram* ... *approbationem* P<sub>1</sub> Dr, *dextra* ... *approbationem* Gu<sub>1</sub>, *dextram* ... *approbatione* Gu<sub>2</sub>, *dextra* ... *approbatione* ceteri libri. 18. *Dextram* ... *approbationem* libri plerique, *dextra* ... *approbatione* P<sub>2</sub> Pu Gu<sub>1</sub>. *Dextra* ... *approbationem* Lachmannus. Mutavi interpunctionem et codices meliores secutus sum. Sententia hæc est: Amor, ut ante fecerat, a sinistra ad dextram sternuit, quæ fuit dextra approbatio vel omen secundum.

LI. Post stropham tertiam lacuna videtur esse. Bergkii stropham quartam ad aliud carmen pertinere censet.

LIV. In duo carmina divisi, utrumque est lacunosum. omnes hi versus in libris superiori carmini iuncti sunt, duo extremi in Gu<sub>1</sub>, Gu<sub>2</sub>, P<sub>2</sub> subsequenti. — In lacuna, quam post versum primum indicavi, codices et editio princeps hos versus posuerunt: *Hoc iucunde tibi poema feci Ex quo perspiceres meum dolorem*. — 2. *Et eri* G Gu<sub>2</sub>, *et heri* plerique libri, *heri* Pu, *et heu* F. — 5. *Suffitio* libri, *Fuffitio* vel *Fufitio* vulgo, fortasse recte.

LV, 1. *Molestum est* P<sub>1</sub> P<sub>2</sub> Gu<sub>2</sub> M F vulgo, *molestus es* G C L D Gu<sub>1</sub>, hinc conieci *molestu's*. — Vers. 23—33, qui in libris post LVIII leguntur, collocavi cum Lachmanno post vers. 13. Magna versuum interpunctionisque conturbatio. Incidi in eandem versuum transpositionem quam Muretus commendaverat. Etenim in libris et editionibus hi versus sic leguntur

Non custos si fingar ille Cretum

non si Pegaseo ferar volatu.

non Ladas ego pennipesve Perseus

non Rhesi niveae citaeque bigae.

Protasis incipit a versu 23 *Non custos si fingar*, apodosis a versu 30 *Defessus tamen*. — *Nivea citaque biga* de coniectura scripsi, *bigam* Tacitus aliique dixerunt, vetustas formas imitati, *niveis citisque bigis* Muretus.

LVII, 6. *Gemelli utrique* deleta commate cum verbis quæ sequuntur *uno in lectulo* coniunxi.

LXI, 46. *Amatis* libri omnes, nisi quod est *amaris* in Gu<sub>1</sub>.

Conieci *in malis*. — 80. Hunc versum collocavit Lachmannus post 106, ego codices secutus sum, versum illum ex naufragio unius vel plurium stropharum servatum esse ratus, locum tamen suum videtur mutasse. Margo F haec habet: *Superest unus versus vel deficiunt quam plures* (lege *complures*). Versus intercalares, quos ante Lachmannum editiones post 78 et 80 inseruerunt, in omnibus libris desunt. — 83. *Arunculeia* G C L P<sub>1</sub> M D Pu, *Arviculeia* P<sub>2</sub> Edpr. *Aurunculeia* vulgo. Cf. Bergk. Anacr. p. 31. 130 *Talassio*] *talasio* G C M P<sub>1</sub> D, *talassio* Pu, *thalasio* Gu<sub>1</sub> F, *thalassio* P<sub>2</sub> Gu<sub>2</sub> vulgo, *Ταλάσιος* Plut. Q. R. 31, Rom. 15, Pomp. 4. — 179. *Adeat* D Pu P<sub>1</sub> Dr Gu<sub>1</sub>, *adeant* G C L M Gu<sub>2</sub> Lachmannus. — 182. *Vos unis senibus bonae*] *Bonae* vel *bone senibus unis* libri omnes, nisi quod *uvis* L solus. Fuerunt qui *unis* expellerent, at necesse est retineatur ea vox, etenim pronubae univirae esse debebant. Quare transposui verba et *vos* inserui, ut iam ante me factum est. — 183. *Bene*] *berve* G, *bone* Pu, *bene* Gu<sub>1</sub>, *verne* margo Gu<sub>2</sub>, *breve* ceteri libri. — 228. 229. *At bonei coniuges, bene vivite* et P<sub>1</sub> P<sub>2</sub> Pu Gu F, nisi quod *boni* scriptum est; *ad bonei* D et margo G, *ad bolnei* G C L, *bone vite* et G M, *bone vitei* et D, *bonae vitae* C L Gu<sub>1</sub>.

LXII, 7. *Oeteos...ignes*] *Oetheos...ignes* Pu, *oeteos...imbres* T, *eos...imbres* F Guelferb, *hoc eos...imber* G C L M P<sub>1</sub> Gu<sub>1</sub> Gu<sub>2</sub> D, *hoc eos...hymber* P<sub>2</sub> Edpr. *Oetheos* pariter atque *ignes* ex coniectura profectum videtur, licet *Oeteos* in codice Thuaneo traditum sit. Ego conieci

Nimirum *Orcipas* ostendit noctifer umbras.

Oportet enim virgines contraria iis dicant quae dixerunt iuvenes: iuvenibus vesper laeta lumina nuntiat, virginibus caligines, quibus ingruentibus rapitur nova nupta. — 8. *Certest* Hauptius quaest. Catull., *certe est* Statius; post *certe* in G *est* erasum, *certes* T, *certe* reliqui libri. — 14 Eiecit hunc versum Lachmannus. — 20. *Fertur* Dr D Gu<sub>1</sub> Gu<sub>2</sub> margo L, *potuit* L, hinc Bergk. *patuit* coniecit, *lucet* G C M P<sub>1</sub> Pu, *ludet* P<sub>2</sub>. — 33. Locum lacunosum esse iam diu est intellectum. sed alii aliter iudicarunt. Lachmannus sexaginta versus interiisse arbitratus est, refutavit eum Hauptius, qui ipse triginta versus excidissee contendit. Propius ad verum accessit G. Hermannus in Jahnii annalibus XXII p. 309, carmen ita constituens

## XII

prooemium	prood.	mesodus						epod.
5 5	9	6 6	n n	11 11				9
iuv. virg.	iuv.	v. i. v.	i. i.	v. i.				iuv.

Sed ne is quidem rem profligavit. Mea sententia res ita se habet: Carmen compositum est e strophis et quaternorum et quinatorum versuum; accedunt versus intercalares vel ἐπιφανήματα ibi tantum cantata, ubi hemichoria virginum et iuvenum se excipiunt, quare ad eurhythmiam carminis nil conferunt, sed extra stropharum concinnitatem collocata sunt. Schema totius carminis apponam

II str. amoeb.  
quaternorum v.  
1—10

II str. iuv.  
quaternorum v.  
11—19

VIII str. amoeb.  
quinatorum v.  
20—58

II str. iuv.  
quaternorum v.  
59—66.

*Medium carmen*, quo virgines Vesperum accusant, iuvenes defendunt, continet VIII strophas quinatorum versuum, quas virgines et iuvenes alternatim cantant. Eae sic dispositae sunt: str. α', ant. α', str. β', ant. β', str. γ', str. δ', ant. γ', ant. δ', ita ut strophas puellae, antistrophas pueri canant. *Praecedunt et sequuntur* binae strophae quaternorum versuum a solis iuvenibus cantatae. *Orditur* totum carmen a duabus strophis quaternorum versuum, quibus iuvenes et virgines ad certamen se exhortantur. — Versum 33 *Namque tuo adventu vigilat custodia semper* ego tribui virginibus, quibus est consentaneus, namque exoriente Hespero cavendum esse dicunt virgines, ne furta fiant. Ante et post hunc versum lacuna est, nec certo diiudicari potest, quem locum in stropha virginum versus ille tenuerit. Hoc tamen certum exploratumque puto, non plures in hac stropha quam tres versus et intercalarem excidisse. In antistropha, quam iuvenes canunt, deest versus primus, ceteri bene servati sunt. — Post vers. 41 unum versum interiisse arbitror cum Froehlichio, post 42 Hauptius. — In stropha paenultima unum versum deesse to-

tius earminis dispositio ostendit. Sed dubitari potest, utrum is exciderit initio strophae an sub finem. mihi quidem illud probabilius visum est. Hauptius sub finem totius carminis unum versum interceptum esse statuit. — 63. *Tertia pars patrist, pars est data tertia matris*. Sic Hauptius et Bergkii, libri Thuanei vestigia seculi: *tertia patris pars est data tertia matri*, similiter Froehlichius *tertia pars patri, pars est data tertia matri*.

LXIII, 10. *Tauri* vulgo, *taurei* Lachmannus, *tauri et* codices omnes. — 13. *Pecora*] *pectora* libri, quod correxit iam F et Edit princ. Cf. v. 53 *Ut apud nivem et ferarum gelida stabula forem et earum omnia adirem furibunda latibula*, pariterque v. 71. — *Executae* G C L P, P, Gu, M F, *excute* Dr, *excute* Gu, *exe tute* D. Bergkii mavult *secutae*, simplex enim verbum sequendi hac significatione solum fere esse usitatum. — 15. *Rapidum*] Bergkii *rabidum*: etsi enim *mare rapidum* dicatur, tamen aptius videri *rabidum*, quippe quod rabiem maris Gallae tulerint. — 16. *Pelage* scripsi cf. Lucret. 6, 619. Idem coniecit Hauptius. *pelagi* omnes libri. — 28. *Streptantibus*] *trepitantibus* D, quod correxi, *trepidantibus* ceteri libri, vulgo. — 45. *Ipsa* omnes libri, *ipsa* Lachmannus. Mutatione non est opus, etenim inest in vicissitudine masculini et feminini generis lepidus quidam et elegans lusus. — 47. *Aestuante rusum*] Redintegravi formam vetustam, cuius vestigia in omnibus libris delituerunt: *estuanter usum* G C, *aestuanter usum* L Dr Gu, *extuanter usum* P, *aestuanter usum* Gu, *extuanter visum* D, *extuantem* P, *estuantem* Pu. Furianus ex interpolatione *rursus*, ad marginem tamen adscriptum est *usum*. Vulgo *rursum*. — 51. *Miser* omnes libri, *misera* Bergkii. — 61. *Anime*] Sic conieci mutata interpunctione; *anime* codices et editiones omnes. Saepenumero praesertim in fine versuum i decidit. — 68. *Ego nunc* Santenius, *egonec* G M, *ego nec* D L C P, Gu, Gu, *egone* P, *egon ah* Lachmannus. — 74. *Sonus editus*] *Roseis ut hinc labellis sonitus adiut* libri; *palam* inseruit P, Pu Gu, idemque in margine habent G C M; *propalam sonitus abut* vulgo, *sonitus abut celer* Lachmannus, *sonus citus* Bergkii, *sonus editus* Froehlichius. Pro *hinc* quod est in libris omnibus, vulgo *huic*, sed illud fortasse verum est cf. 68, 10. — 76. *Vincta* codices omnes, quod retinui, *iuncta* omnes editiones. — 88. 89.

*Tenerumque...ille]* Sic codices omnes, *teneramque...illa* Lachmannus.

LXIV, 14. *Freti* Schraderus, *feri* libri, quod defendit Huschkus, coniungens *monstrum feri vultus* i. e. puppim feris figuris pictam. — 16. *Illa atque haud alia* Bergkii, *illa atque alia* G C L D P<sub>1</sub> Pu Gu<sub>1</sub> Gu<sub>2</sub>, *illaque atque alia* P<sub>2</sub>, *illa atque alia* superscripto que M, *illas atque alia* Dr. *Illaque haudque alia* Avantius, *illa si qua alia* Lachmannus, quod fortasse confirmat Dresdensis. — 17. *Oculis* G C L Dr M Gu<sub>1</sub> Gu<sub>2</sub> P<sub>1</sub> D, *oculi* P<sub>2</sub> Pu Edpr vulgo. — 21. *Sanxit* ex coniectura Pontani, *sensit* libri. — Post 23 unus versus deest in codicibus, cuius initium traditum est a Servio ad Aen. 5, 80: *Salvete, deum gens, o bona matrum Progenies, salvete iterum.* Libri: *genus o bona mater. adspirate canenti* de coniectura supplevi. — 24. Bergkii *vos carmine* in *post carmine* mutandum censet, ut est in hymnis Graecis ἐσὺςκαρπον. — 28. *Neptunine]* *Nectine* G C L, *neptine* G margo, *neptunne* D, *nectumine* Dr, *neptunine* Gu<sub>1</sub> Gu<sub>2</sub> P<sub>1</sub> P<sub>2</sub> Pu M F Edit pr vulgo, *Nereine* coniecit Hauptius. — 35. *Cieros* ex Meineckii coniectura cf. Vindic. Strab. p. 152. 153. *Syros* G D, *schiros* Gu<sub>1</sub>, *scyros* reliqui libri. *Phthiotica tempe]* *Phthiotica*, *Tempe* vel *Phthiotida*, *Tempe* Lachmannus, sed vide quae illo loco disputavit Meineckius. *Heloria tempe* Ovid. fast. 4, 477, *Heliconia tempe* amor. 1, 1, 5, *Μηδὶνὰ τέμπεα* Dionys. Per. 1017. — 36. *Crannonisque* vulgo, vid. Meineckium l. l., *Cranonisque* Lachmannus, *Gravinonisque* G C L P<sub>1</sub> D, *Granonisque* Gu<sub>2</sub>, *Grajugenasque* vel *Graigenasque* reliqui libri. — 61. *Eheu]* *heue* G L P<sub>2</sub> Pu, *eue* Gu<sub>1</sub>, *heuhe* D Dr M P<sub>1</sub> Gu<sub>2</sub>, inde transpositis litteris coniecit Bergkii *eheu*. Lachmannus *euho*, vulgo *evoe*. — 68. Sic conieci, si G C L D, *sed* reliqui libri, vulgo, *set* Lachmannus. — 77. *Androgeoneae]* Ante hoc verbum in G C L M P<sub>1</sub> Dr D Gu<sub>1</sub> Gu<sub>2</sub> legitur *cum* vel *quom*, deest in P<sub>2</sub>, Pu. Critici expulerunt, at forsitan remanserit e versu qui interiit, ita ut lacuna sit inter 76. 77.

Nam perhibent olim crudeli peste coactam  
cum . . . . .

Androgeoneae poenas exsolvere caedis. -

— 102. Post hunc versum plene interpunxi, Lachmannus comma posuit. — 104. *Suscepit* vulgo, *succendit* libb., quod retinuit Lachmannus. — 107. *Indomitum turben]* *indomitum turbo* D, *indomitus*

*turbo* ceteri libri. Recte Froehlichius *indomitum turben* restituit, Servio auctore, qui ad Aen. 7, 378 haec tradidit: *Catullus hoc turben dicit ut hoc carmen*, cuius rei vestigia delituerunt in Datano. — 108. *Radicitus* G C L M D Pu F, *radicibus* P<sub>1</sub> P<sub>2</sub> Gu<sub>1</sub> Gu<sub>2</sub> Dr Lachmannus. — 109. *Lateque et cominus*] *lateque cum eius* G C L Dr Gu<sub>1</sub> Gu<sub>2</sub>, *latequae cum eius* P<sub>1</sub>, *lateque tumicius* D, *tum eius* Riccardianus. Ex parte emendatum iam in codicibus interpolatis *lateque cominus* P<sub>2</sub> Pu F et in rasura M. Manifestum est et resedissee in corruptela *tumicius tum eius*; *com* in corruptela *cum eius*: conflatis his lectionibus verum nascitur. Lachmannus scribendum coniecit *late qua est impetus*. — 109. *Omnia* G C L D F Edpr, *obvia* Dr P<sub>1</sub> P<sub>2</sub> M Gu<sub>1</sub> Gu<sub>2</sub>, margo G, vulgo. — 110. Post hunc versum lacunam esse vidi, etenim deest nomen, quocum verba *saevum . . . iactantem* coniungi queant. — 111. Plene interpunxi. — 119. *Laetabatur* coniecit Lachmannus, *laeta* vel *leta* libri. Ego conieci *luctabatur*. — 155. *Spumantibus*] Fortasse *e spumantibus*; *expumantibus* D, *spumantibus* ceteri libri. — 164. *Conquerar* omnes libri, *conqueror* vulgo: mutatione opus non est. — 174. *In Creta* D P<sub>2</sub> Dr, *in Cretam* reliqui et editiones omnes. — 177. *Nitar*] *nitor* codices plerique et Lachmannus, superscripto *a* Gu<sub>2</sub> correctum in Pu F. — 190. *Mulctam* G L P<sub>1</sub> Gu<sub>2</sub> Dr D P<sub>2</sub> Pu F, pariter v. 192 *mulctantes*; vulgo *multam* et *multantes*. — 206. *Contremuere*] *contrumuere* D, *contremuere* Dr, *contremuerunt* ceteri libri et editiones omnes. Hiatus in fine versus legitimus cf. 229, 231, 236, 247 et saepissime. — 214. *Complexum*] *complexo* codices plerique et optimi, recte fortasse cf. Nonium s. h. v. — 247. *Minoae* vel *Minoiae* h. e. *Μινώα*, trium syllabarum] *Minoida* G C P<sub>1</sub> P<sub>2</sub> Gu<sub>1</sub>, *mynoida* M, *minoyda* D, *Minoidi* F interpolatus et vulgo, *Minoia* Dr Gu<sub>2</sub> Pu, hinc *Minoiae* restitui cf. Ovid. in Ibin 511. Stat. Achill. 1, 192. Dispondeus in extremo versu frequentissimus apud Catullum, ut vers. 3, 9, 15, 20, 24, 28, 36, 44, 67, 71, 74, 78, 79, 80, 83, 91, 96, 98 et cet. *Quali Minoida luctu* i. e. luctui Dorvillius et Bergkii. — 253. 254. Inter hos versus lacunam esse vidit Bergkii idemque *quae tum alacres* restituit, *quantum* P<sub>2</sub> Pu, *qui tum* ceteri libri. — 255. *Evoe . . . evoe*] *Evohe . . . evohē* G P<sub>1</sub>, *euche . . . euche* C L D, in quibus *c* ortum ex *o*, *heu hoe . . . heu hoe* M Gu<sub>1</sub> P<sub>2</sub> Pu, *heu he . . . heu hoe* Gu<sub>2</sub>, *euhoe* Lachmannus. — 256. *Hurum* libri omnes, Bergkii, *horum* vulgo, *o*

superscriptum in Gu<sub>2</sub>. — 261. *Aliae* libri omnes, Bergk<sup>ius</sup>, *alii* vulgo, *alii* Lachmann<sup>us</sup>. — 273. *Leviterque sonant]* *leniterque sonant* Dr, *leviterque sonant* P<sub>2</sub> Pu F, *leviter sonant* G C L P<sub>1</sub> D, *leviter resonant* Gu<sub>2</sub>, *leni resonant* vulgo. *leviter solent* Gu<sub>1</sub>. — 276. *Sic tum ibi]* *tam* G, *tum* P<sub>1</sub> P<sub>2</sub> Gu<sub>1</sub> Gu<sub>2</sub> Pu M F vulgo, *cum* Dr, *tibi* C L D margo G, *ibi* Bergk<sup>ius</sup> coniecit: conflatis hisce scripsi *tum ibi*, nam quod est in codicibus nonnullis *tibi*, id sine ulla dubitatione ortum est elisione *t(um) ibi*. — 280. *Quot Thessala* Haupt<sup>ius</sup>, quos libri plerique et vulgo, *quod* Dr. — 283. *In distinctis* G C P<sub>1</sub> P<sub>2</sub> Gu<sub>2</sub> F vulgo, *indistinctis* D L Pu M Gu<sub>1</sub> Lachmann<sup>us</sup>. — 285. *Peneios* scripsi cum D Dr M Gu<sub>2</sub>, *penies* aut *penios* reliqui libri. — 288. *Non vacuos* Bergk<sup>ius</sup>, *Non acuos* G C L, *Non acrios* P<sub>1</sub> M Gu<sub>2</sub> D P<sub>2</sub> Pu, *Non acrius* Gu<sub>1</sub>, *non vacuus* vulgo. — 303. *Posquam* D Bergk<sup>ius</sup>, *postquam* vulgo. — *Niveis]* fortasse *niveos*. — 309. *Roseo niveae]* *ambrosio* Vulpi<sup>us</sup>, *annoso* E. Schulzi<sup>us</sup>, *roseae niveo* Doering<sup>ius</sup> h. e. residebant purpureae vittae vertice senili. — 320. *Vellentes vellera]* *pellentes* libri et editiones, *vellentes* Bergk<sup>ius</sup>. — 330. *Quae tibi flexo animo mentis...* *amorem* libri omnes, *flexanimo mentem...* *amore* vulgo, *quae te flexanimo mentis* proponit Lachmann<sup>us</sup>. — 344. *Campi* Pu, margo L, vulgo, lacuna in D, *tenen* G C L, *teuc* Gu<sub>1</sub>, *trunci* P<sub>1</sub> G<sub>2</sub>, *teucri* M P<sub>2</sub>, *rivi* F. — 353. *Praecerpens* Pu vulgo, *procernens* D Dr, *praecernens* vel *precernens* G C L M P<sub>1</sub> Gu<sub>1</sub>. Fortasse *prosternens* Gu<sub>2</sub> ut versu 355. — 355. *Prosternens* G C L D P<sub>2</sub>, *posternens* Gu<sub>1</sub>, *prosternet* P<sub>1</sub> Pu M Gu<sub>2</sub>. Post hunc versum spatium vacuum unius versus est in P<sub>2</sub>. — 363. *Terrae ex celso* Asti<sup>us</sup> et Bergk<sup>ius</sup>, *teres excelso* libri et editiones. — 368. *Mutescent]* *mitescent* D F, *modescant* G C M P<sub>1</sub> P<sub>2</sub> Dr, *madescant* Gu<sub>1</sub>, *madefient* ex coniectura vulgo et Gu<sub>2</sub>. Conieci *mitescent*: nam expugnata Troia vox audita est e tumulo Achillis praedae partem sibi flagitans iussitque Calchas vates Polyxenam immolari, quo facto *obmutuit* illa vox vel, ut Catullus ait, obmutuerunt sepulcra unde audita est. Fabulam tradidit Serv. ad Aen. 3, 322. — 371. 372. Inter hos versus meo quidem arbitratu lacuna est unius versus. — 378. Versum intercalarem uncis inclusi, Bergk<sup>ius</sup> quoque spurium eum esse arbitratur. Constant enim strophae ex quaternis versibus, quibus subiungitur versus intercalaris, nisi quod bis ordo

versuum conturbatus est. Neque enim dubito quin hi versus sic sint transponendi

333 languidosque paret tecum coniungere somnos

332 (currите ducentes subtegmina, currите fusi)

334 levia substernens robusto brachia collo.

pariterque

366 Nam simulac fessis dederit fors copiam Achivis

365 (currите ducentes subtegmina, currите fusi)

376 urbis Dardaniae Neptunia solvere vincla.

De qua re, ne quis me audaciae et temeritatis arguat, conferendum est carmen Theocriteum II et Catull. LXI, 154—157. Excidisse unum versum inter 355. 356 pariterque inter 371. 372 iam diximus. Hac ratione stropharum concinnitas restituta est. In ipso tamen textu nihil quidquam mutavi nisi quod libris est confirmatum. — 389. *Procumbere tauros* ex coniectura Itolorum, *procumbere currus* G C L Dr D P<sub>2</sub>, *procumbere cursus* Pu, *procurrere currus* P<sub>1</sub> M Gu<sub>2</sub>, *procurrile currus* Gu<sub>1</sub>. — Vers. 400—404 fortasse sic transponendi

Perfudere manus fraterno sanguine fratres,

401 optavit genitor primaevi funera nati,

400 destitit extinctos natus lugere parentes

liber ut innuptae poteretur flore novercae,

ignaro mater substernens se impia nato

impia non verita est divos scelerare parentes.

LXV. Quos versus Lachmannus post 8 partim ex carminibus LXVIII<sub>a</sub> et LXVIII<sub>b</sub> petitos, partim coniectura fictos intulit, eieci. — Vers. 9 deest in G C L, mihi suppositicius videtur. Inter verba *tua loquentem* spatium vacuum in D P<sub>1</sub>, *tua verba loquentem* Dr P<sub>2</sub> Pu sec. man. P<sub>1</sub>, *tua dicta loquentem* M, *tua fata loquentem* Gu<sub>2</sub> F Mediolanensis, *tua facta loquentem* Gu<sub>1</sub>. Ceterum vers. 10—14 aliunde huc illatos esse arbitror, quare eos uncis includendos puto. Licet enim eleganter scripti sint nec ulla sit dubitatio quin ab ipso Catullo sint profecti, tamen orationis cursum nimis retardant et interrumpunt.

Vers. 19 et qui sequuntur seiunxi ab iis quae praecesserunt, continent enim fragmentum carminis Callimachei, quod latine vertit Catullus, praeter hos versus prorsus intercepti. Plura mi-

CATULLUS.

b



# XVIII

sisse carmina poetam Orfalo apparet ex versu 16 (cf. 116, 2). In libris omnibus carmen LXVI in unum coaluit cum carmine LXV, in qua re sententiae meae praesidium esse quivis intelliget.

LXVI, 8. *E Beroniceo* Orellius, Bergkii cf. ejusdem anthol. lyric. Callim. fr. 99. *E beronicaeo* Gu<sub>2</sub>, *E bore niceo* libri plerique, *E boreniceo* P<sub>1</sub>, *E bore niteio* P<sub>2</sub>, *E bore nilaeo* Dr, *E bereniceo* F vulgo. Maluerim *E Beronicaeo* quod est in Gu<sub>2</sub>, cf. Galli frg. de sept. sor. 8. — 27. *Adepta's*] *adeptus* libri omnes nisi quod in Dr est *adeptos*, in Gu<sub>2</sub> *adept's*, littera o eadem manu superscripta; *adepta es* F interpol. et vulgo. — 42. *Maximum* Itali, *maxima* libri. In oris non est mutandum. — 45. *Prop(ul)ere* conieci, *propere* libri: *pro* in verbo propellendi modo producitur, modo corripitur. *Fodere* Bergkii. — 54. *Cypridos* e Bergkii coniectura cf. Annal. antiq. 1846 p. 472, *claridos* Dr P<sub>2</sub> Pu, *daridos* D, *elocridicos* G C L M P<sub>1</sub>. *Locridos* vulgo. — 58. *Canopeis* Silligii *canopicis* libri, *Canopieis* Lachmannus. — 59. *Hi dii ven ibi vario* G L M, *hi dii ven id vario* C, *ni dii ven ibi vario* P<sub>1</sub> P<sub>2</sub> Ed pr, omisso *ven* D, om. *hi dii ven ibi* Pu. Bergkii coniecit *litoribus*, *sidereis vario*, G. Hermannus in Jahnii annalib. XXII p. 312 *sidereis ut vario ne sola in lumine caeli*. — 63. *Fluctu*] fortasse *fletu*, quod est in F. — 66. *Callisto iuxta Lycaoniam*] Sic correxi cf. Callimach. in Jov. 41 *Ανταονίης ἄρκτοιο*; *iuxta lycaonia* vel *licaonia* G C L M Dr D P<sub>2</sub> Pu, *iuxta Lychaonia* P<sub>1</sub>, *iuncta Lycaonidi* vel *iuncta Lycaoniae* vulgo, *iuxta Lycaonida* Lachmannus. — 76. Plene interpunxit Lachmannus. — 78. *Unguentis* libri, *unguentorum* F, *unguenti si* mutata interpunctione Lachmannus, *unguenti Assyrii* Auratus et Passeratius, *unguenti Syrii* Hauptius. — 79. *Quas* correxit F Guelferb., *quem* G C L D P<sub>1</sub> P<sub>2</sub> Pu Gu<sub>1</sub>, *qu'm* Gu<sub>2</sub>, *quae* M, *quam* Lachmannus. — 82. *Quam* libri, *quin* Lachmannus.

LXVII, 5. *Noto servisse maligne* Dr, inde correxi *nato servisse maligne*, idem Froehlichius, *voto . . . maligne* Gu<sub>2</sub>, *voto . . . maligno* libri plerique, vulgo. — 6. *Postquam est porrecto tacta marita sene*] *Est* libri, *es* Lachmannus. *tacta* conieci, *facta* libri cf. v. 20 *non illam vir prior attigerit*. Nurus tacta est a Balbo; socero senili, cuius filius Caecilius, maritus illius, qui tum tenebat domum, sterilis fuit. *porrecto sene* non est mortuo, sed *accubante*. — Vers.

9—18 fortasse sic scribendi atque inter Ianuam et Catullum dividendi:

IAN. Non (ita Caecilio placeam, cui tradita nunc sum)  
10 culpa mea est, quamquam dicitur esse mea,  
nec peccatum a me quisquam pote dicere quicquam.

CAT. Verum istud populi, ianua, quisque facit.

IAN. Qui? Quacunque aliquid reperitur non bene factum,  
ad me omnes clamant: ianua, culpa tua est?

15 CAT. Non istud satis est uno te dicere verbo,  
sed facere ut quivis sentiat et videat.

IAN. Qui possum? Nemo quaerit nec scire laborat.

CAT. Nos volumus, nobis dicere ne dubita.

Vers. 12 sic traditus est in libris: *Verum istius populi ianua qui te facit* G, et sic fere omnes, nisi quod *istis populi* D P<sub>2</sub> Pu, *huius populo* Dr, *isti populi* C L Gu<sub>1</sub> Gu<sub>2</sub>, *isto populi* P<sub>1</sub>, *isti populo* M, *qui te* G C L P<sub>1</sub> Dr D Gu<sub>1</sub> Gu<sub>2</sub>, *quire* P<sub>2</sub> Pu M. *Verum istud populi fabula Quinte facit* coniecit Lachmannus. — 13. *Qui libri* cf. XXIV, 7. *Qui? non est homo bellus? inquires.* — 17. *Quid libri, qui* Lachmannus. — 27. *Ut quaerendum aliunde foret nervosius illud* conieci, cf. LXI, 152. 153. *Et quaerendus ut unde foret nervosius illud* D Pu Gu<sub>2</sub>, *quaerendum ut unde* Dr, *quaerendus et unde* P<sub>2</sub>, *quaerendus unde* G C L M Gu<sub>1</sub>, et superscripto P<sub>1</sub>. *quaerendus is unde* Lachmannus. — 33 34 recte videtur Silligius uncis inclusisse. — 37. *Quid* G C L M Dr D P<sub>2</sub> Pu, *quod* L solus, *qui* Lachmannus. — Versus 29—40 Catullo tribui, 41—48 Ianuae: vulgo 29. 30 Catullo, ceteri omnes Ianuae tribuuntur.

LXVIII. Hoc carmen cum Froehlichio in duo carmina dividendum esse censeo, quorum prius ad Manlium scriptum est, 1—40, posterius ad Allium. — 11. 30. *Manli* libri et editiones pleraeque, *Mani* Lachmannus de coniectura scripsit, ne *Allius* duo nomina gentilicia haberet. — 29. *Tepefacit* Lachmannus de coniectura, *tepefacit* G C L P<sub>1</sub> D Gu<sub>1</sub>, *tepefecit* M P<sub>2</sub> Guelferb., *tepscit* Pu Gu<sub>2</sub>, *tepefiunt* F, *tepefactet* coniecit Bergkiius.

56. 62. Mutavi interpunctionem. — 66. *Implorata* P<sub>2</sub> Gu<sub>2</sub> M F, *implorate* G C L D Gu<sub>1</sub>, *implorante* Pu, *implorato* P<sub>1</sub>. — 68. *Allius* conieci, *Mallius* P<sub>2</sub> Gu<sub>2</sub>, *Manlius* libri plerique, *Manius* de coniectura scripsit Lachmannus. Corruptela vetustissima, inde orta quod duo carmina in unum coaluerunt: hinc *Allii* nomen

modo obscuratum est [ut vers. 41 *quam fallius in re* C L Pu, *fallius ire* G, *quam fallimus* D Gu<sub>2</sub> M, *quae fallius* Dr, *quam fallius* P<sub>1</sub>, *quam filius* Gu<sub>1</sub>, *qua Manlius in re* F; vers. 49 *in deserto aliis* Dr M D P<sub>2</sub> Pu Gu<sub>1</sub> F, *ali G* C L, *alii* P<sub>1</sub> Gu<sub>2</sub>; vers. 150 *pro multis aliis* libri omnes], modo commutatum cum Manlii nomine, ad quem prius carmen scriptum est, ut hoc loco. — 91. *Quae vetet id* libri omnes, *quae vel et id* conieci, *quae vel sic* h. e. vel *diruta Troia* Bergkius. — 101. *Simul* deest in libris plerisque, interpolatum in P<sub>2</sub> F, *vaga* Pu, *ut undique* Gu<sub>1</sub>. — 139. *Flagrantem quotidiana* libri omnes, *f. continet iram* Santenius, *f. concoquit iram* Lachmannus. At coniecturis carere facile possumus, locum potius lacunosum esse arbitror: post illum versum exciderunt duo versus vel, quod minus probabile videtur, post vers. 140. — 155—158 transposui hoc modo: 157. 158. 155. 156. — 157. *Auctor* conieci, *aufert* libri. — 158. *Bona* C M P<sub>1</sub> P<sub>2</sub> F vulgo, *bon<sup>2</sup>* Gu<sub>2</sub>, *bono* G L Dr D Pu Gu<sub>1</sub>.

LXXI, 1. Dedi corruptam librorum scripturam G C L M Gu<sub>1</sub> Gu<sub>2</sub> P<sub>1</sub> D Pu, *bello* P<sub>2</sub>, *bona* F.

4. *Fato* vulgo de coniectura, *a te* libri, *Ate* h. e. *Ἄτῃ* coniecit Hauptius quaest. Catull. p. 94.

LXXIII, 4. *Stetque magisque magis* C L M P<sub>1</sub> Dr Gu<sub>1</sub> D-P<sub>2</sub> Pu F, *obestque magisque magis* G Gu<sub>2</sub>, margo L, *estque magisque magis* P<sub>1</sub>, *si fit obestque magis* Lachmannus. Bergkius coniecit *stat magis atque magis id mihi* vel *hoc mihi* h. e. in temporum decursu *magis magisque* id mihi persuasum habeo.

LXXVI, 11. *Teque istinc usque reducis* aliquot editiones, *atque instinct<sup>2</sup>que* r. Gu<sub>2</sub>, *teque instinctuque reducis* D, *atque instinctoque reducis* G C M Gu<sub>1</sub> P<sub>1</sub> P<sub>2</sub> Pu, *ilaque istinc teque reducis* Lachmannus.

LXXV, 1. *Huc* libri omnes praeter Pu, in quo est *nunc*. Scaliger, quem secutus est Lachmannus, hoc carmen cum LXXXVII coniunxit.

LXXVII, 4. *Sic* D Dr Gu<sub>1</sub> margo F, *si* G C L, *mi* P<sub>1</sub> M Pu Gu<sub>2</sub> F vulgo, *me* P<sub>2</sub>, *ei* coniecit Lachmannus. Mutavi interpunctionem.

LXXIX, 4. *Suavia* D Dr Gu<sub>1</sub> Gu<sub>2</sub>, *savia* vulgo.

LXXXII, 4. *Sei* Bergkius, *seu* libri omnes, Lachmannus, *si* vulgo.

LXXXIII, 2. *Haec* Dr, *hec* G D Laurent. Riccard. A<sup>o</sup> Gu<sub>2</sub>, *hoc* G L M Gu<sub>1</sub> P<sub>1</sub> P<sub>2</sub> Pu vulgo. — 11. *Posquam* D Bergkii, *postquam* vulgo.

LXXXVII et LXXV male coniunxit Scaliger, quem Lachmannus secutus est.

LXXXVIII, 7. *Quod* D Dr Gu<sub>2</sub> Pu F, *quo* G C L M P<sub>1</sub> Gu<sub>1</sub> vulgo.

XCI, 5. *Sed neque quod libri, sed quod nec* Guarinus, Bergkii.

XCII, 3. Recte fortasse Froehlichius : *Quia sentio idem : nam deprecor illam.*

XCV, 9. 10 coniunxi cum antecedentibus, disiunxerat Lachmannus. *Sodalis* deest in libris, inseruit Avantius.

XCVII, 3. Sic coniecit Lachmannus. *Nihilo mundius hoc nobisque immundius illud* G C L P<sub>1</sub>, nisi quod *Nilo* est in G, *Nil* est P<sub>1</sub>, *Nihilo mundius hoc nihilo hoc immundius illud* Dr, *Nihilo mundior hoc nihilo immundior illo* D, *Nihil est mundius hoc nobisque immundius illo* F, *Mundius hoc nihil est nobisque immundius illud* Pu P<sub>2</sub>. — 5. *Delevi est*, quod libri habent post *dentibus*, interpunctionem mutavi. *Dentis hos sesquipedalis* D, *dentis os sesquipedalis* Riccardianus, *dentis sesquipedalis* vel *seseque pedalis* ceteri libri, editiones omnes. — 7. *Diffissus* Statius ex coniectura, *defessus* libri. — 9—12 coniunxi cum praecedentibus, ut libri et editiones ante Lachmannum.

XCIX, 9. *Contractum*] fortasse contactum.

CI, 7. *In terra hac prisco*] *interea prisco* D P<sub>2</sub> Pu, *interea hoc prisco* G C L, *interea haec pr.* M P<sub>1</sub> F; hinc conieci *in terra hac prisco* i. e. in hac peregrina terra.

CVIII, 1. *Populi arbitrio tua* F Statius, *populari arbitrio tua* G C L M P<sub>1</sub> Gu<sub>1</sub>, *arbitrio populari tua* Dr Gu<sub>2</sub> P<sub>2</sub> Pu, *arbitrio . . . tua* D, *arbitrio populari* omisso *tua* Lachmannus.

CX, 3. Bergkii metri causa interpunxit post *promisti*. Idem *Saepe* v. 4 mutavit in *saeva* et Versu 7 coniecit *officiis*: *efficit* G L Gu<sub>1</sub>, *effecit* C M Gu<sub>2</sub> P<sub>1</sub> Dr P<sub>2</sub> Pu, *effici* Riccardianus, deest in D. Ipse conieci *fictis*.

CXI, 1. *Contentam* G C L D F, *contenta est* P<sub>2</sub> Pu, *contentus* Dr P<sub>1</sub> Lachmannus. — 4. *Concipere* de coniectura inserui, in

libris lacuna, *efficere* insertum M P<sub>2</sub> Pu F. *Fratres* h. e. conso-  
brinos, qui fratrum loco sunt cf. Augustin. de civ. dei 15, 16.

CXIII, 4. *Singula* vulgo, *singulum* libri.

CXV, 1. *Habet libri, habes* Lachmannus. — *Noster* Mure-  
tur, *inster* D, *instar* ceteri libri, vulgo. — 5. *Latasque paludes*  
conieci, *altasque paludes* D, *saltusque paludes* Dr P<sub>2</sub> F, *saltusque*  
*paludesque* ceteri libri. *Salsasque paludes* coniecit Bergkian. —  
8. *Ipsest*] *ipse es* Lachmannus, *ipse et* D Dr, *ipse si* G C L Gu<sub>1</sub> P<sub>1</sub>,  
*ipse est* Gu<sub>2</sub> M P<sub>2</sub> Pu F.

**Q. VALERII CATULLI**

**C A R M I N A.**

---

**VERSUS DOMINI BENEVENUTI DE CAMPEXANIS DE VICENCIA  
DE RESURRECTIONE CATULLI POETAE VERONENSIS.**

**Ad patriam venio longis a finibus exul.  
Causa mei reditus compatriota fuit,  
Scilicet a calamis, tribuit cui Francia nomen,  
Quique notat turbae praetereuntis iter.  
Quo licet ingenio vestrum celebrate Catullum,  
Cuius sub modio clausa papyrus erat.**

Hi versus leguntur in fine G, initio M, P<sub>1</sub>, Gu<sub>1</sub>, Pu, P<sub>2</sub> in quo haec verba superscripta sunt: *Hexichum Guarini Veronensis oratoris clarissimi in libellum Valerii Catulli eius concivis.*

# Q. CATULLI

VERONENSIS

LIBER.

---

## I.

Quoi dono lepidum novum libellum  
Arida modo pumice expolitum?  
Corneli, tibi: namque tu solebas  
Meas esse aliquid putare nugas  
5 Iam tum cum ausus es unus Italorum  
Omne aevum tribus explicare chartis  
Doctis, Iuppiter, et laboriosis.  
Quare habe tibi quicquid hoc libelli,  
Qualecunque quidem . . . . .  
. . . . . patrona virgo,  
10 Plus uno maneat perenne saeclo.

---

## II.

Passer, deliciae meae puellae,  
Quicum ludere, quem in sinu tenere,  
Quoi primum digitum dare adpetenti  
Et acris solet incitare morsus,  
5 Cum desiderio meo nitenti  
Carum nescio quid libet iocari  
Et solatiolum sui doloris,  
\* Credo ut cum gravis acquiescet ardor:  
Tecum ludere sicut ipsa possem  
10 Et tristis animi levare curas!

---



II<sup>b</sup>.

\* \* \*

Tam gratum est mihi quam ferunt puellae.  
 Pernici aureolum fuisse malum,  
 Quod zonam soluit diu ligatam.

## III.

- Lugete, o Veneres Cupidinesque,  
 Et quantum est hominum venustiorum.  
 Passer mortuus est meae puellae,  
 Passer, deliciae meae puellae,  
 5 Quem plus illa oculis suis amabat:  
 Nam mellitus erat suamque norat  
 Ipsam tam bene, quam puella matrem  
 Nec sese a gremio illius movebat,  
 Sed circumsiliens modo huc modo illuc  
 10 Ad solam dominam usque pipilabat.  
 Qui nunc it per iter tenebricosum  
 Illuc, unde negant redire quenquam.  
 At vobis male sit, malae tenebrae,  
 Orci, quae omnia bella devoratis:  
 15 Tam bellum mihi passerem abstulistis.  
 O factum male! io miselle passer,  
 Tua nunc opera meae puellae  
 Flendo turgiduli rubent ocelli.

## IV.

- Phaselus ille, quem videtis, hospites,  
 Ait fuisse navium celerrimus,  
 Neque ullius natantis impetum trabis  
 Nequisse praeterire, sive palmulis  
 5 Opus foret volare sive linteo.  
 Et hoc negat minacis Adriatici  
 Negare litus insulasve Cycladas  
 Rhodumque nobilem horridamque Thraciam  
 Propontida trucemve Ponticum sinum,

- 10 Ubi iste post phaselus antea fuit  
 Comata silva: nam Cytorio in iugo  
 Loquente saepe sibilum edidit coma.  
 Amastri Pontica et Cytore buxifer,  
 Tibi haec fuisse et esse cognitissima
- 15 Ait phaselus: ultima ex origine  
 Tuo stetisse dicit in cacumine,  
 Tuo imbuisse palmulas in aequore,  
 Et inde tot per impotentia freta  
 Herum tulisse, laeva sive dextera
- 20 Vocaret aura, sive utrunque Iuppiter  
 Simul secundus incidisset in pedem;  
 Neque ulla vota litoralibus diis  
 Sibi esse facta, cum veniret a mare  
 Novissime hunc ad usque limpidum lacum.
- 25 Sed haec prius fuere: nunc recondita  
 Senet quiete seque dedicat tibi,  
 Gemelle Castor et gemelle Castoris.

## V.

- Vivamus, mea Lesbia, atque amemus,  
 Rumoresque senum severiorum  
 Omnes unius aestimemus assis.  
 Soles occidere et redire possunt:
- 5 Nobis, cum semel occidit brevis lux,  
 Nox est perpetua una dormienda.  
 Da mi basia mille, deinde centum,  
 Dein mille altera, dein secunda centum,  
 Deinde usque altera mille, deinde centum.
- 10 Dein, cum millia multa fecerimus,  
 Conturbabimus illa, ne sciamus,  
 Aut ne quis malus invidere possit,  
 Cum tantum sciat esse basiorum.

## VI.

Flavi, delicias tuas Catullo,  
 Nei sint inlepidae atque inelegantes,

- Velles dicere, nec tacere posses.  
 Verum nescio quid febriculosi  
 5 Scorti diligis: hoc pudet fateri.  
 Nam te non viduas iacere noctes  
 Nequicquam tacitum cubile clamat  
 Sertis ac Syrio fragrans olivo,  
 Pulvinusque peraeque et hic et ille  
 10 Attritus, tremulique quassa lecti  
 Argutatio inambulatioque.  
 \*Nam in ista praevalet nihil tacere.  
 Cur? non tam latera ecfututa pandas,  
 Nei tu quid facias ineptiarum.  
 15 Quare, quicquid habes boni malique,  
 Dic nobis. volo te ac tuos amores  
 Ad caelum lepido vocare versu.

---

 VII.

- Quaeris, quot mihi basiationes  
 Tuae, Lesbia, sint satis superque.  
 Quam magnus numerus Libyssae arenae  
 Laserpiciferis iacet Cyrenis,  
 5 Oraclum Iovis inter aestuosi  
 Et Batti veteris sacrum sepulcrum,  
 Aut quam sidera multa, cum tacet nox,  
 Furtivos hominum vident amores,  
 Tam te basia multa basiare  
 10 Vesano satis et super Catullo est,  
 Quae nec pernumerare curiosi  
 Possint nec mala fascinare lingua.

---

 VIII.

- Miser Catulle, desinas ineptire,  
 Et quod vides perisse perditum ducas.  
 Fulsero quondam candidi tibi soles,  
 Cum ventitabas quo puella ducebat  
 5 Amata nobis quantum amabitur nulla.

- Ibi illa multa tum iocosa fiebant,  
 Quae tu volebas nec puella nolebat.  
 Fulsero vere candidi tibi soles.  
 Nunc iam illa non vult: tu quoque impotens noli  
 10 Nec quae fugit sectare, nec miser vive,  
 Sed obstinata mente perfer, obdura.  
 Vale, puella. iam Catullus obdurat,  
 Nec te requiret nec rogabit invitam:  
 At tu dolebis, cum rogaberis nulla.  
 15 Scelesta, ne te. quae tibi manet vita!  
 Quis nunc te adibit? cui videberis bella?  
 Quem nunc amabis? cuius esse diceris?  
 Quem basiabis? cui labella mordebis?  
 At tu, Catulle, destinatus obdura.

## IX.

- Veranni, omnibus e meis amicis  
 Antistans mihi milibus trecentis,  
 Venistine domum ad tuos Penates  
 Fratresque unanimos senemque matrem?  
 5 Venisti. o mihi nuntii beati!  
 Visam te incolumem audiamque Hiberum  
 Narrantem loca, facta, nationes,  
 Ut mos est tuus, applicansque collum  
 Iocundum os oculosque suaviabor.  
 10 O quantum est hominum beatiorum,  
 Quid me lactius est beatiusve?

## X.

- Varus me meus ad suos amores  
 Visum duxerat e foro otiosum,  
 Scortillum, ut mihi tum repente visum est,  
 Non sane inlepidum neque invenustum.  
 5 Huc ut venimus, incidere nobis  
 Sermones varii, in quibus, quid esset  
 Iam Bithynia, quo modo se haberet,

- Et quonam mihi profuisset aere.  
 Respondi id quod erat, nihil neque ipsis  
 10 Nec praetoribus esse nec cohorti,  
 Cur quisquam caput unctius referret,  
 Praesertim quibus esset irrumator  
 Praetor, non facerent pili cohortem.  
 'At certe tamen,' inquiunt 'quod illic  
 15 Natum dicitur esse, comparasti  
 Ad lecticam homines.' ego, ut puellae  
 Unum me facerem beatlorem,  
 'Non' inquam 'mihi tam fuit maligne,  
 Ut, provincia quod mala incidisset,  
 20 Non possem octo homines parare rectos.'  
 At mi nullus erat neque hic neque illic,  
 Fractum qui veteris pedem grabati  
 In collo sibi collocare posset.  
 Hic illa, ut decuit cinaediorum,  
 25 'Quaeso' inquit 'mihi, mi Catulle, paulum  
 Istos commoda: nam volo ad Serapim  
 Deferri.' 'mane me' inquit puellae,  
 'Istud quod modo dixeram me habere,  
 Fugit me ratio: meus sodalis  
 30 Cinna est Gaius, is sibi paravit.  
 Verum, utrum illius an mei, quid ad me?  
 Utor tam bene quam mihi pararim.  
 Sed tu insulsa male ac molesta vivis,  
 Per quam non licet esse negligentem.'

---

 XI.

- Furi et Aureli, comites Catulli,  
 Sive in extremos penetrabit Indos,  
 Litus ut longe resonante Eoa  
 Tunditur unda,  
 5 Sive in Hyrcanos Arabesque molles,  
 Seu Sacas sagittiferosque Parthos,  
 Sive quae septemgeminus colorat  
 Aequora Nilus,

- Sive trans altas gradietur Alpes,  
 10 Caesaris visens monimenta magni,  
 Gallicum Rhenum horribilesque ultimosque Britannos,  
 Omnia haec, quaecunque feret voluntas  
 Caelitum, temptare simul parati,  
 15 Pauca nuntiate meae puellae  
 Non bona dicta.  
 Cum suis vivat valeatque moechis,  
 Quos simul complexa tenet trecentos,  
 Nullum amans vere, sed identidem omnium  
 20 Illa rumpens:  
 Nec meum respectet, ut ante, amorem,  
 Qui illius culpa cecidit velut prati  
 Ultimi flos, praetereunte posquam  
 Tactus aratro est.

## XII.

- Marrucine Asini, manu sinistra  
 Non belle uteris in loco atque vino:  
 Tollis linteum negligentiorum.  
 Hoc salsum esse putas? fugit te, inepte:  
 5 Quamvis sordida res et invenusta est.  
 Non credis mihi? crede Pollioni  
 Fratri, qui tua furta vel talento  
 Mutari velit: est enim leporum  
 Disertus puer ac facetiarum.  
 10 Quarè aut hendecasyllabos trecentos  
 Expecta, aut mihi linteum remitte,  
 Quod me non movet aestimatione,  
 Verum est mnemosynum mei sodalis.  
 Nam sudaria Saetaba ex Hiberis  
 15 Miserunt mihi muneri Fabullus  
 Et Verannius: haec amem necesse est  
 Et Veranniolum meum et Fabullum:

## XIII.

- Cenabis bene, mi Fabulle, apud me  
Paucis, si tibi dii favent, diebus,  
Si tecum attuleris bonam atque magnam  
Cenam, non sine candida puella  
5 Et vino et sale et omnibus cachinnis.  
Haec si, inquam, attuleris, venuste noster,  
Cenabis bene: nam tui Catulli  
Plenus sacculus est aranearum.  
Sed contra accipies meros amores  
10 Seu quid suavius elegantiusve est:  
Nam unguentum dabo, quod meae puellae  
Donarunt Veneres Cupidinesque,  
Quod tu cum olfactes, deos rogabis,  
Totum ut te faciant, Fabulle, nasum.

## XIV.

- Nei te plus oculis meis amarem,  
Iocundissime Calve, munere isto  
Odissem te odio Vatiniano:  
Nam quid feci ego quidve sum locutus,  
5 Cur me tot male perderes poetis?  
Isti dii mala multa dent clienti,  
Qui tantum tibi misit impiorum.  
Quod si, ut suspicor, hoc novum ac repertum  
Munus dat tibi Sulla litterator,  
10 Non est mi male, sed bene ac beate,  
Quod non dispereunt tui labores.  
Dii magni, horribilem et sacrum libellum  
Quem tu scilicet ad tuum Catullum  
Misti, continuo ut die periret,  
15 Saturnalibus, optimo dierum!  
Non non hoc tibi, salse, sic abibit:  
Nam, si luxerit, ad librariorum  
Currani scrinia, Caesios, Aquinos,  
Suffenum omnia colligam venena,  
20 Ac te his suppliciis remunerabor.

Vos hinc interea (valete) abite  
 Illuc, unde malum pedem attulistis,  
 Saecli incommoda, pessimi poetae.

XIV<sup>b</sup>.

Si qui forte mearum ineptiarum  
 25 Lectores eritis manusque vestras  
 Non horrebitis ammovere nobis,

\* \* \*

## XV.

Commendo tibi me ac meos amores,  
 Aureli. veniam peto pudentem,  
 Ut, si quicquam animo tuo cupisti,  
 Quod castum expeteres et integellum,  
 5 Conserves puerum mihi pudice,  
 Non dico a populo: nihil veremur  
 Istos, qui in platea modo huc modo illuc  
 In re praetereunt sua occupati:  
 Verum a te metuo tuoque pene  
 10 Infesto pueris bonis malisque.  
 Quem tu qua lubet, ut lubet, moveto  
 Quantum vis, ubi erit foris, paratum:  
 Hunc unum excipio, ut puto, pudenter.  
 Quod si te mala mens furorque vecors  
 15 In tantam impulerit, sceleste, culpam,  
 Ut nostrum insidiis caput lacessas,  
 Ah tum te miserum malique fati,  
 Quem attractis pedibus patente porta  
 Percurrent raphanique mugilesque.

## XVI.

Paedicabo ego vos et irrumabo,  
 Aureli pathice et cinaede Furi,  
 Qui me ex versiculis meis putastis,



- Quod sunt molliculi, parum pudicum.  
 5 Nam castum esse decet pium poetam  
 Ipsum, versiculos nihil necesse est,  
 Qui tum denique habent salem ac leporem,  
 Si sunt molliculi ac parum pudici  
 Et quod pruriat incitare possunt,  
 10 Non dico pueris, sed his pilosis,  
 Qui duros nequeunt movere lumbos.  
 Vos, quei milia multa basiorum  
 Legistis, male me marem putatis?  
 Paedicabo ego vos et irrumabo.

## XVII.

- 0 Colonia, quae cupis ponte ludere magno,  
 Et salire paratum habes, sed vereris inepta  
 Crura ponticuli assulis stantis in redivivis,  
 Ne supinus eat cavaque in palude recumbat;  
 5 Sic tibi bonus ex tua pons libidine fiat,  
 In quo vel Salisubsali sacra suscipiantur:  
 Munus hoc mihi maximi da, Colonia, risus.  
 Quendam municipem meum de tuo volo ponte  
 Ire praecipitem in lutum per caputque pedesque,  
 10 Verum totius ut lacus putidaeque paludis  
 Lividissima maximeque est profunda vorago.  
 Insulsiissimus est homo, nec sapit pueri instar  
 Bimuli tremula patris dormientis in ulna.  
 Quoi cum sit viridissimo nupta flore puella  
 15 (Et puella tenellulo delicatior haedo,  
 Asservanda nigerrimis diligentius uvis),  
 Ludere hanc sinit ut lubet, nec pili facit uni,  
 Nec se sublevat ex sua parte, sed velut alius  
 In fossa Liguri facit supper nata securi,  
 20 Tantundem omnia sentiens quam si nulla sit usquam,  
 Talis iste meus stupor nil videt, nihil audit,  
 Ipse qui sit, utrum sit an non sit, id quoque nescit.  
 Nunc eum volo de tuo ponte mittere pronum,  
 Si pote stolidum repente excitare veterum

- 25 Et supinum animum in gravi derelinquere caeno,  
 Ferream ut soleam tenaci in voragine mula.

## XXI.

- Aureli, pater essuritionum,  
 Non harum modo, sed quot aut fuerunt  
 Aut sunt aut aliis erunt in annis,  
 Paedicare cupis meos amores.  
 5 Nec clam: nam simul es, iocaris una,  
 Haerens ad latus omnia experiris.  
 Frustra: nam insidias mihi instruentem  
 Tangam te prior irrumatione.  
 Atque id si faceres satur, tacerem:  
 10 Nunc ipsum id doleo, quod essurire  
 Mi meus puer et sitire discet.  
 Quare desine, dum licet pudico,  
 Ne finem facias, sed irrumatus.

## XXII.

- Suffenus iste, Vare, quem probe nosti,  
 Homo est venustus et dicax et urbanus,  
 Idemque longe plurimos facit versus.  
 Puto esse ego illi milia aut decem aut plura  
 5 Perscripta, nec sic ut fit in palimpsesto  
 Relata: chartae regiae, novei libri,  
 Novi umbilici, lora rubra, membrana  
 Directa plumbo, et pumice omnia aequata.  
 Haec cum legas tu, bellus ille et urbanus  
 10 Suffenus unus caprimulgus aut fossor  
 Rursus videtur: tantum abhorret ac mutat.  
 Hoc quid putemus esse? qui modo scurra  
 Aut siquid hac re tritius videbatur,  
 Idem infaceto est infacetior rure,  
 15 Simul poemata attigit, neque idem unquam  
 Aequae est beatus ac poema cum scribit:  
 Tam gaudet in se tamque se ipse miratur.

- Nimirum idem omnes fallimur, neque est quisquam,  
 Quem non in aliqua re videre Suffenum  
 20 Possis. suus cuique attributus est error:  
 Sed non videmus, manticae quod in tergo est.

## XXIII.

- Furei, cui neque servus est neque arca  
 Nec cimex neque araneus neque ignis,  
 Verum est et pater et noverca, quorum  
 Dentes vel silicem comesse possunt,  
 5 Est pulchre tibi cum tuo parente  
 Et cum coniuge lignea parentis.  
 Nec mirum: bene nam valetis omnes,  
 Pulchre concoquitis, nihil timetis,  
 Non incendia, non graves ruinas,  
 10 Non facta impia, non dolos veneni,  
 Non casus alios periculorum.  
 Atqui corpora sicciora cornu  
 Aut siquid magis aridum est habetis  
 Sole et frigore et essuritione.  
 15 Quare non tibi sit bene ac beate?  
 A te sudor abest, abest saliva,  
 Mucusque et mala pituita nasi.  
 Hanc ad munditiem adde mundiorem,  
 Quod culus tibi purior salillo est,  
 20 Nec toto decies cacas in anno,  
 Atque id durius est faba et lapillis,  
 Quod tu si manibus teras fricesque,  
 Non unquam digitum inquinare posses.  
 Haec tu commoda tam beata, Furi,  
 25 Noli spernere nec putare parvi,  
 Et sestertia quae soles precari  
 Centum desine: nam satis beatus.

## XXIV.

- O qui flosculus es Iuventiorum,  
 Non horum modo, sed quot aut fuerunt

- Aut posthac aliis erunt in annis,  
 Mallem divitias Midæ dedisses  
 5 Isti, quos neque servus est neque arca,  
 Quam sic te sineres ab illo amari.  
 'Qui? non est homo bellus?' inquires. est:  
 Sed bello huic neque servus est neque arca.  
 Hoc tu quam lubet ab illece elevaque:  
 10 Nec servum tamen ille habet neque arcam.

## XXV.

- Cinaede Thalle, mollior cuniculi capillo  
 Vel anseris medullula vel imula auricilla  
 Vel pene languido senis situque araneoso,  
 Idemque Thalle turbida rapacior procella,  
 5 \*Cum diva munerarios ostendit oscitantes,  
 Remitte pallium mihi meum, quod involasti,  
 Sudariumque Saetabum catagraphosque Thynos,  
 Inepte, quæ palam soles habere tanquam avita.  
 Quæ nunc tuis ab unguibus reglutina et remitte,  
 10 Ne laneum latusculum manusque mollicellas  
 Inusta turpiter tibi flagella conscribissent,  
 Et insolenter aestues velut minuta magno  
 Deprensa navis in mari vesaniente vento.

## XXVI.

- Furi, villula nostra non ad Austri  
 Flatus opposita est neque ad Favoni  
 Nec saevi Boreae aut Apeliotæ,  
 Verum ad milia quindecim et ducentos.  
 5 O ventum horribilem atque pestilentem!

## XXVII.

Minister vetuli puer Falerni  
 Inger mi calices amariores,  
 Ut lex Postumiae iubet magistrae  
 Ebriosa acina ebriosioris.

- 5 At vos quo lubet hinc abite, lymphae  
 Vini pernicles, et ad severos  
 Migrate: hic merus est Thyonianus.

## XXVIII.

- Pisonis comites, cohors inanis  
 Aptis sarcinulis et expeditis,  
 Veranni optime tuque mi Fabulle,  
 Quid rerum geritis? satisne cum isto  
 5 Vappa frigoraque et famem tullistis?  
 Ecquidnam in tabulis patet lucelli  
 Expensum, ut mihi, qui meum secutus  
 Praetorem refero datum lucello  
 'O Memmi, bene me ac diu supinum  
 10 'Tota ista trabe lentus irrumasti.'  
 Sed, quantum video, pari fuistis  
 Casu: nam nihilo minore verpa  
 Farti estis. pete nobiles amicos.  
 At vobis mala multa dii deaeque  
 15 Dent, obprobria Romulei Remique.

## XXIX.

- Quis hoc potest videre, quis potest pati,  
 Nisi impudicus et vorax et aleo,  
 Mamurram habere quod Comata Gallia  
 Habebat ante et ultima Britannia?  
 5 Cinaede Romule, haec videbis et feres?  
 Et ille nunc superbus et superfluens  
 Perambulabit omnium cubilia  
 Ut albulus columbus aut Adoneus?  
 Cinaede Romule, haec videbis et feres?  
 10 Es impudicus et vorax et aleo.  
 Eone nomine, imperator unice,  
 Fuisti in ultima occidentis insula,  
 Ut ista vestra diffututa mentula  
 Ducenties comesset aut trecenties?

- 15 Quid est alid sinistra liberalitas?  
 Parum expatratum an parum elluatum est?  
 Paterna prima lancinata sunt bona:  
 Secunda praeda Pontica: inde tertia  
 Hibera, quam scit amnis aurifer Tagus.
- 20 Hunc Galliae timetis et Britanniae.  
 Quid hunc malum fovetis? aut quid hic potest,  
 Nisi uncta devorare patrimonia?  
 Eone nomine urbis, opulentissime  
 Socer, generque, perdidistis omnia?

## XXX.

- Alfene inmemor atque unanimis false sodalibus,  
 iam te nil miseret, dure, tui dulcis amiculi?  
 iam me prodere, iam non dubitas fallere, perfide?  
 \*Nec facta impia fallacum hominum caelicolis placent:
- 5 Quae tu negligis, ac me miserum deseris in malis.  
 Eheu quid faciant, dic, homines, cuive habeant fidem?  
 Certe tute iubebas animam tradere, inique, me  
 Inducens in amorem, quasi tuta omnia mi forent.  
 Inde nunc retrahis te ac tua dicta omnia factaque
- 10 Ventos irrita ferre ac nebulas aerias sinis.  
 Si tu oblitus es, at dii meminerunt, meminit Fides,  
 Quae te ut paeniteat postmodo facti faciet tui.

## XXXI.

- Paeninsularum, Sirmio, insularumque  
 Ocelle, quascunque in liquentibus stagnis  
 Marique vasto fert uterque Neptunus,  
 Quam te libenter quamque laetus invisio,
- 5 Vix mi ipse credens Thyniam atque Bithynos  
 Liquisse campos et videre te in tuto!  
 O quid solutis est beatius curis,  
 Cum mens onus reponit, ac peregrino  
 Labore fessi venimus larem ad nostrum
- 10 Desideratoque acquiescimus lecto.

Hoc est, quod unum est pro laboribus tantis.  
 Salve, o venusta Sirmio, atque hero gaude:  
 Gaudete vosque, o \* Lydiae lacus undae:  
 Ridete, quicquid est domi cachinnorum.

---

 XXXII.

Amabo, mea dulcis Ipsithilla,  
 Meae deliciae, mei lepores,  
 Iube ad te veniam meridiatum.  
 Et si iusseris illud, adiuvato,  
 5 Nequis liminis obseret tabellam,  
 Neu tibi lubeat foras abire,  
 Sed domi mancas paresque nobis  
 Novem continuas fututiones.  
 Verum, siquid ages, statim iubeto:  
 10 Nam pransus iaceo et satur supinus  
 Pertundo tunicamque palliumque.

---

 XXXIII.

O furum optime balneariorum  
 Vibenni pater, et cinaede fili,  
 (Nam dextra pater inquinatiore,  
 Culo filius est voraciore)  
 5 Cur non exilium malasque in oras  
 Itis, quandoquidem patris rapinae  
 Notae sunt populo, et natís pilosas  
 Fili, non potes asse venditare.

---

 XXXIV.

Dianae sumus in fide  
 Puellae et pueri integri:  
*Dianam pueri integri*  
 Puellaeque canamus.  
 5 O Latonia, maximi  
 Magna progenies Iovis,

- Quam mater prope Deliam  
 Deposivit olivam,  
 Montium domina ut fores  
 10 Silvarumque virentium  
 Saltuumque reconditorum  
 Amniumque sonantum.  
 Tu Lucina dolentibus  
 Iuno dicta puerperis,  
 15 Tu potens Trivia et notho es  
 Dicta lumine Luna.  
 Tu cursu, dea, menstruo  
 Metiens iter annuum  
 Rustica agricolae bonis  
 20 Tecta frugibus explēs.  
 Sis quocunque tibi placet  
 Sancta nomine, Romulique,  
 Antiquē ut solita es, bona  
 Sospites ope gentem.

## XXXV.

- Poetae tenero, meo sodali  
 Velim Caecilio, papyre, dicas,  
 Veronam veniat, Novi relinquens  
 Comi moenia Lariumque litus:  
 5 Nam quasdam volo cogitationes  
 Amici accipiat sui meique.  
 Quare, si sapiet, viam vorabit,  
 Quamvis candida milies puella  
 Euntem revocet manusque collo  
 10 Ambas inilciens roget morari,  
 Quae nunc, si mihi vera nuntiantur,  
 Illum deperit inpotente amore:  
 Nam quo tempore legit incohatam  
 Dindymi dominam, ex eo misellae  
 15 Ignes interiorem edunt medullam.  
 Ignosco tibi, Sapphica puella



Musa doctior: est enim venuste  
Magna Caecilio incohata mater.

## XXXVL

- Annales Volusi, cacata charta,  
Votum solvite pro mea puella:  
Nam sanctae Veneri Cupidinique  
Vovit, si sibi restitutus essem  
5 Desissemque truces vibrare iambos,  
Electissima pessimi poetae  
Scripta tardipedi deo daturam  
Infelicibus ustulanda lignis,  
Et hoc pessima se puella vidit  
10 Iocose lepide vovere divi.  
Nunc, o caeruleo creata ponto,  
Quae sanctum Idalium Surosque apertos  
Quaeque Ancona Cnidumque arundinosam  
Colis quaeque Amathunta quaeque Golgos  
15 Quaeque Durrachium Adriae tabernam,  
Acceptum face redditumque votum,  
Si non inlepidum neque invenustum est.  
At vos interea venite in ignem,  
Pleni ruris et inficetiarum  
20 Annales Volusi, cacata charta.

## XXXVII.

- Salax taberna vosque contubernales,  
A pileatis nona fratribus pila,  
Solis putatis esse mentulas vobis,  
Solis licere, quicquid est puellarum,  
5 Confutuere et putare ceteros hircos?  
An, continenter quod sedetis insulsi  
Centum an ducenti, non putatis ausurum  
Me una ducentos irrumare sessores?  
Atqui putate: namque totius vobis  
10 Frontem tabernae scorpionibus scribam.

- Puella nam mi, quae meo sinu fugit,  
 Amata tantum quantum amabitur nulla,  
 Pro qua mihi sunt magna bella pugnata,  
 Consedit istic. hanc boni beatique  
 15 Omnes amatis, et quidem, quod indignum est,  
 Omnes pusilli et semitarii moechi;  
 Tu praeter omnes une de capillatis,  
 Cuniculosae Celtiberiae fili  
 Egnati, opaca quem bonum facit barba  
 20 Et dens Hibera defricatus urina.

## XXXVIII.

- Malest, Cornifici, tua Catullo,  
 Malest, me hercule! et laboriose,  
 Et magis magis in dies et horas.  
 Quem tu, quod minimum facillimumque est,  
 5 Quae solatus es allocutione?  
 Irascor tibi. sic meos amores?  
 Paulum quid lubet allocutionis,  
 Maestius lacrimis Simonideis.

## XXXIX.

- Egnatius, quod candidos habet dentes,  
 Renidet usque quaque. sei ad rei ventum est  
 Subsellium, cum orator excitat fletum,  
 Renidet ille. si ad pii rogum fili  
 5 Lugetur, orba cum flet unicum mater,  
 Renidet ille. quicquid est, ubicunque est,  
 Quodcunque agit, renidet. hunc habet morbum,  
 Neque elegantem, ut arbitror, neque urbanum.  
 Quare monendum te est mihi; bone Egnati.  
 10 Si urbanus esses aut Sabinus aut Tiburs  
 Aut parvus UMBER aut obesus Etruscus  
 Aut Lanuvinus ater atque dentatus  
 Aut Transpadanus, ut meos quoque attingam,  
 Aut qui lubet, qui puriter lavit dentes,

- Villa malamque pectore expuli tussim,  
 Non inmerenti quam mihi meus venter,  
 Dum sumptuosas appeto, dedit, cenas.
- 10 Nam, Sestianus dum volo esse conviva,  
 Orationem in Antium petitorem  
 Plenam veneni et pestilentiae legi.  
 Hic me gravido frigida et frequens tussis  
 Quassavit usque dum in tuum sinum fugi
- 15 Et me recuravi otioque et urtica.  
 Quare refectus maximas tibi grates  
 Ago, meum quod non es ulta peccatum.  
 Nec deprecor iam, si nefaria scripta  
 Sesti recepso, quin gravedinem et tussim
- 20 Non mihi, sed ipsi Sestio ferat frigus,  
 Qui tunc vocat me, cum malum librum legi.

---

 XLV.

- Acmen Septimius suos amores  
 Tenens in gremio 'mea' inquit 'Acme;  
 Ni te perditte amor atque amare porro  
 Omnes sum assidue paratus annos
- 5 Quantum qui pote plurimum perire,  
 Solus in Libya Indiaque tosta  
 Caesio veniam obviis leoni.  
 Hoc ut dixit, Amor sinistra, ut ante,  
 Dextram sternuit approbationem.
- 10 At Acme leviter caput reflectens  
 Et dulcis pueri ebrios ocellos  
 Illo purpureo ore saviata  
 'Sic,' inquit 'mea vita Septumille,  
 Huic uni domino usque serviamus,
- 15 Ut multo mihi maior acriorque  
 Ignis mollibus ardet in medullis.'  
 Hoc ut dixit, Amor sinistra, ut ante,  
 Dextram sternuit approbationem.  
 Nunc ab auspicio bono profecti
- 20 Mutuis animis amant amantur.

- Unam Septimius misellus Acmen  
 Mavult quam Syrias Britanniasque:  
 Uno in Septumio fidelis Acme  
 Facit delicias libidinesque.  
 25 Quis ullos homines beatiores  
 Vidit, quis Venerem auspicatorem?

## XLVI.

- Iam ver egelidos refert tepores,  
 Iam caeli furor aequinoctialis  
 Iocundis Zephyri silescit aureis.  
 Linquantur Phrygii, Catulle, campi  
 5 Nicaeaeque ager uber aestuosae:  
 Ad claras Asiae volumus urbes.  
 Iam mens praetrepidans avet vagari,  
 Iam laeti studio pedes vigescunt.  
 O dulces comitum valete coetus,  
 10 Longe quos simul a domo profectos  
 Diversae variae viae reportant.

## XLVII.

- Porci et Socraton, duae sinistrae  
 Pisonis, scabies famesque mundi,  
 Vos Veranniolo meo et Fabullo  
 Verpus praeposuit Priapus ille?  
 5 Vos convivia lauta sumptuose  
 De die facitis? mei sodales  
 Quaerunt in trivio vocationes?

## XLVIII.

- Mellitos oculos tuos, Iuventi,  
 Siquis me sinat usque basiare,  
 Usque ad milia basiem trecenta,  
 Neq unquam videar satur futurus,  
 5 Non si densior aridis aristis  
 Sit nostrae seges osculationis.

## XLIX.

- Disertissime Romuli nepotum,  
 Quot sunt quotque fuere, Marce Tulli,  
 Quotque post aliis erunt in annis,  
 Gratias tibi maximas Catullus  
 5 Agit pessimus omnium poeta,  
 Tanto pessimus omnium poeta  
 Quanto tu optimus omnium patronus.
- 

## L.

- Hesterno, Licini, die otiosi  
 Multum lusimus in meis tabellis,  
 Ut convenerat esse delicatos.  
 Scribens versiculos uterque nostrum  
 5 Ludebat numero modo hoc modo illoc,  
 Reddens mutua per iocum atque vinum.  
 Atque illinc abii tuo lepore  
 Incensus, Licini, facetisque,  
 Ut nec me miserum cibus iuaret,  
 10 Nec somnus tegetet quiete ocellos,  
 Sed toto indomitus furore lecto  
 Versarer cupiens videre lucem,  
 Ut tecum loquerer, simulque ut essem.  
 At defessa labore membra postquam  
 15 Semimortua lectulo iacebant,  
 Hoc, iocunde, tibi poema feci,  
 Ex quo perspiceres meum dolorem.  
 Nunc audax cave sis, precesque nostras,  
 Oramus, cave despuas, ocelle,  
 20 Ne poenas Nemesis reposcat a te.  
 Est vehemens dea: laedere hanc caveto.
- 

## LI.

- Ille mi par esse deo videtur,  
 Ille, si fas est, superare divos,

Qui sedens adversus identidem te  
Spectat et audit

- 5 Dulce ridentem, misero quod omnis  
Eripit sensus mihi: nam simul te,  
Lesbia, aspexi, nihil est super mi

- .....  
Lingua sed torpet, tenuis sub artus  
10 Flamma demanat, sonitu suoapte  
Tintinant aures, gemina teguntur  
Lumina nocte.

\* \* \*

- Otium, Catulle, tibi molestum est:  
Otio exultas nimiumque gestis.  
15 Otium et reges prius et beatas  
Perdidit urbes.

---

LII.

Quid est, Catulle? quid moraris emori?  
Sella in curuli Struma Nonius sedet,  
Per consulatum peierat Vatinius:  
Quid est, Catulle? quid moraris emori?

---

LIII.

- Risi nescio quem modo e corona,  
Qui, cum mirifice Vatiniana  
Meus crimina Calvos explicasset,  
Admirans ait haec manusque tollens,  
5 'Dii magni, salaputium disertum!'

---

LIV.

- Othonis caput oppido est pusillum  
.....  
.....  
\*Et eri rustice semilauta crura,  
Subtile et leve peditum Libonis.

LIV<sup>b</sup>.

Si non omnia displicere vellem  
 5 Tibi et sufficio seni recocto

\*

\*

\*

Irascere iterum meis iambis  
 Immerentibus, unice Imperator.

## LV.

Oramus, si forte non molestum est,  
 Demostres, ubi sint tuae tenebrae.  
 Te campo quaesivimus minore,  
 Te in circo, te in omnibus libellis,  
 5 Te in templo summi Iovis sacrato.  
 In Magni simul ambulatione  
 Femellas omnes, amice, prendi,  
 Quas vultu vidi tamen serenas.  
 Ah vel te sic ipse flagitabam,  
 10 'Camerium mihi, pessimae puellae.'  
 Quaedam inquit nudum reduce . . .  
 'En hic in roseis latet papillis.'  
 Sed te iam ferre Herculei labos est.  
 23 Non custos si fingar ille Cretum,  
 25 Non Ladas ego pinnipesve Perseus,  
 24 Non si Pegaseo ferar volatu,  
 26 Non Rhesi nivea citaque biga,  
 Adde huc plumipedes volatilesque,  
 Ventorumque simul require cursum:  
 Quos iunctos, Cameri, mihi dicares,  
 30 Defessus tamen omnibus medullis  
 Et multis langoribus peresus  
 Essem te mihi, amice, quaeritando.  
 14 Tanto te in fastu negas, amice?  
 Dic nobis ubi sis futurus, ede  
 Audacter, committe, crede lucel.  
 Num te lacteolae tenent puellae?  
 Si linguam clauso tenes in ore,  
 Fructus proicies amoris omnes:

- 20 **V**erbosa gaudet Venus loquella.  
 Vel si vis, licet obseres palatum,  
 Dum vostri sim particeps amoris.
- 

## LVI.

- O** rem ridiculam, Cato, et iocosam  
 Dignamque auribus et tuo cachinno.  
 Ride, quicquid amas, Cato, Catullum:  
 Res est ridicula et nimis iocosa.  
 5 **D**eprendi modo pupulum puellae  
 Trusantem: hunc ego, si placet Dionae,  
 Protelo rigida mea cecidi.
- 

## LVII.

- P**ulchre convenit improbis cinaedis,  
 Mamurrae pathicoque Caesarique.  
 Nec mirum: maculae pares ntrisque,  
 Urbana altera et illa Formiana,  
 5 **I**mpressae resident nec cluentur:  
 Morbosi pariter, gemelli utrique  
 Uno in lectulo, erudituli ambo,  
 Non hic quam ille magis vorax adulter,  
 Rivales, socii et puellularum.  
 10 **P**ulchre convenit improbis cinaedis.
- 

## LVIII.

- C**aeli, Lesbia nostra, Lesbia illa,  
 Illa Lesbia, quam Catullus unam  
 Plus quam se atque suos amavit omnes,  
 Nunc in quadriviis et angiportis  
 5 **G**lubit magnanimos Remi nepotes.
- 

## LIX.

**B**ononiensis Rufa Rifulum fellat,



Uxor Meneni, saepe quam in sepulcretis  
 Vidistis ipso rapere de rogo cenam,  
 Cum devolutum ex igne prosequens panem  
 5 Ab semiraso tunderetur ustore.

---

 LX.

Num te leaena montibus Libystinis  
 Aut Scylla latrans infima inguinum parte  
 Tam mente dura procreavit ac tetra,  
 Ut supplicis vocem in novissimo casu  
 5 Contemptam haberes ah nimis fero corde?

---

 LXI.

Collis o Heliconii  
 Cultor, Uraniae genus,  
 Qui rapis teneram ad virum  
 Virginem, o Hymenae Hymen,  
 5 O Hymen Hymenaeae,  
 Cinge tempora floribus  
 Suave olentis amaraci,  
 Flammeum cape, laetus huc  
 Huc veni niveo gerens  
 10 Luteum pede soccum,  
 Excitusque hilari die  
 Nuptialia concinens  
 Voce carmina tinnula  
 Pelle humum pedibus, manu  
 15 Pineam quate taedam.  
 Namque Vinia Manlio,  
 Qualis Idalium colens  
 Venit ad Phrygium Venus  
 Iudicem, bona cum bona  
 20 Nubet alite virgo,  
 Floridis velut enitens

Myrtus Asia ramulis,  
Quos Hamadryades deae  
Ludicrum sibi rosido

25 Nutriunt humore.

Quare age huc aditum ferens  
Perge linquere Thespieae  
Rupis Aonios specus,  
Nympha quos super irrigat

30 Frigerans Aganippe,

Ac domum dominam voca  
Coniugis cupidam novi,  
Mentem amore revinciens,  
Ut tenax hedera huc et huc

35 Arborem implicat errans.

Vosque item simul, integrae  
Virgines, quibus advenit  
Par dies, agite in modum  
Dicite 'o Hymenaeae Hymen,

40 O Hymen Hymenaeae,'

Ut lubentius, audiens  
Se citarier ad suum  
Munus, huc aditum ferat  
Dux bonae Veneris, boni

45 Coniugator amoris.

Quis deus magis \* amatis  
Est petendus amantibus?  
Quem colent homines magis  
Caelitum? o Hymenaeae Hymen,

50 O Hymen Hymenaeae.

Te suis tremulus parens  
Invocat, tibi virgines  
Zonula soluunt sinus,  
Te timens cupida novos

55 Captat aure maritus.

Tu fero iuveni in manus  
 Floridam ipse puellulam  
 Dedis a gremio suae  
 Matris, o Hymenae Hymen,  
 60 O Hymen Hymenae.

Nil potest sine te Venus,  
 Fama quod bona comprobet,  
 Commodi capere: at potest  
 Te volente. quis huic deo  
 65 Compararier ausit?

Nulla quit sine te domus  
 Liberos dare, nec parens  
 Stirpe vincier: at potest  
 Te volente. quis huic deo  
 70 Compararier ausit?

Quae tuis careat sacris,  
 Non queat dare praesides  
 Terra finibus: at queat  
 Te volente. quis huic deo  
 75 Compararier ausit?

Claustra pandite ianuae,  
 Virgo ades. viden ut faces  
 Splendidas quatiant comas?  
 Tardet ingenuus pudor:  
 80 [Quem tamen magis audiens]  
 Flet, quod ire necesse est.

(86) Flere desine. non tibi,  
 Arunculeia, periculum est,  
 Nequa femina pulchrior

85 Clarum ab Oceano diem  
 (90) Viderit venientem.

Talis in vario solet  
 Divitis domini hortulo  
 Stare flos hyacinthinus.

90 Sed moraris, abit dies:

*Prodeas, nova nupta.*

Prodeas, nova nupta, si

Iam videtur, et audias

Nostra verba. vide ut faces

95 Aureas quatiant comas:

*Prodeas, nova nupta.*

Non tuus levis in mala

Deditus vir adultera

Proca turpia persequens

100 A tuis teneris volet

Secubare papillis,

Lenta qui velut adsitas

Vitis implicat arbores,

Implicabitur in tuum

105 Complexum. sed abit dies:

*Prodeas, nova nupta.*

. . . . .

O cubile, quod omnibus

110 . . . . .

Candido pede lecti,

Quae tuo veniunt hero,

Quanta gaudia, quae vaga

Nocte, quae medio die

115 Gaudeat! sed abit dies:

*Prodeas, nova nupta.*

Tollite, o pueri, faces:

Flammeum video ventre.

Ite, concinite in modum

120 'Io Hymen Hymenacee io,

Io Hymen Hymenacee.'

Ne diu taceat procax

Fescennina locutio,

Nec nuces pueris neget  
 125 Desertum domini audiens  
 Concubinus amorem.

Da nuces pueris, iners  
 Concubine: satis diu  
 Lusisti nucibus: lubet  
 130 Iam servire Talassio.  
 Concubine, nuces da.

Sordebant tibi villicae,  
 Concubine, hodie atque heri:  
 Nunc tuum cinerarius  
 135 Tondet os. miser ah miser  
 Concubine, nuces da.

Diceris male te a tuis  
 Unguentate glabris marite  
 Abstinere: sed abstine.  
 140 Io Hymen Hymenaeae io,  
 Io Hymen Hymenaeae.

Scimus haec tibi quae licent  
 Sola cognita: sed marito  
 Ista non eadem licent.  
 145 Io Hymen Hymenaeae io,  
 Io Hymen Hymenaeae.

Nupta, tu quoque, quae tuus  
 Vir petet, cave ne neges,  
 Ni petitum aliunde eat.  
 150 Io Hymen Hymenaeae io,  
 Io Hymen Hymenaeae.

En tibi domus ut potens  
 Et beata viri tui,  
 Quae tibi sine fine erit  
 155 (Io Hymen Hymenaeae io,  
 Io Hymen Hymenaeae)  
 Usque dum tremulum movens

Cana tempus anilitas  
 Omnia omnibus annuit.  
 160 Io Hymen Hymenaeae io,  
       Io Hymen Hymenaeae.

Transfer omine cum bono  
 Limen aureolos pedes,  
 Rasilemque subi forem.  
 165 Io Hymen Hymenaeae io,  
       Io Hymen Hymenaeae.

Aspice, unus ut accubans  
 Vir tuus Tyrlo in toro  
 Totus immineat tibi.  
 170 Io Hymen Hymenaeae io,  
       Io Hymen Hymenaeae.

Illi non minus ac tibi  
 Pectore uritur intimo  
 Flamma, sed penite magis.  
 175 Io Hymen Hymenaeae io,  
       Io Hymen Hymenaeae.

Mitte brachiolum teres,  
 Praetextate, puellulae:  
 Iam cubile adeat viri.  
 180 Io Hymen Hymenaeae io,  
       Io Hymen Hymenaeae.

Vos unis senibus bonae  
 Cognitae bene feminae,  
 Collocate puellulam.  
 185 Io Hymen Hymenaeae io,  
       Io Hymen Hymenaeae.

Iam licet venias, marite:  
 Uxor in thalamo tibi est  
 Ore floridulo nitens,  
 190 Alba parthenice velut  
       Luteumve papaver.

At, marite, (ita me iuvent  
Caelites) nihilo minus  
Pulcher es, neque te Venus  
195 Negligit. sed abit dies:  
Perge, ne remorare.

Non diu remoratus es,  
Iam venis. bona te Venus  
Iuverit, quoniam palam  
200 Quod cupis capis et bonum  
Non abscondis amorem.

Ille pulveris Africei  
Siderumque micantium  
Subducatur numerum prius,  
205 Qui vestri numerare volt  
Multa millia ludei.

Ludite ut lubet, et brevi  
Liberos date. non decet  
Tam vetus sine liberis  
210 Nomen esse, sed indidem  
Semper ingenerari.

Torquatus volo parvulus  
Matris e gremio suae  
Porrigens teneras manus  
215 Dulce rideat ad patrem  
Semihiantem labello.

Sit suo similis patri  
Manlio et facile inscieis  
Noscitur ab omnibus  
220 Et pudicitiam suae  
Matris indicet ore.

Talis illius a bona  
Matre laus genus approbet,  
Qualis unica ab optima  
225 Matre Telemacho manet

## Fama Penelopeo.

Claudite ostia, virgines:  
 Lusimus satis. at, bonei  
 Coniuges, bene vivite et  
 230 Munere assidue valentem  
 Exercete iuventam.

## LXII.

## IUVENES.

Vesper adest, iuvenes, consurgite: Vesper Olympo  
 Expectata diu vix tandem lumina tollit.  
 Surgere iam tempus, iam pingues linquere mensas,  
 Iam veniet virgo, iam dicetur hymenaeus.

5 Hymen o Hymenae, Hymen ades o Hymenae!

## VIRGINES.

Cernitis, innuptae, iuvenes? consurgite contra;  
 Nimirum Oetaeos ostendit noctifer ignes,  
 Sic certest; viden ut pernicious exilure?  
 Non temere exilure, canent quo visere par est.

10 Hymen o Hymenae, Hymen ades o Hymenae!

## IUVENES.

Non facilis nobis, aequales, palma parata est,  
 Adspicite, innuptae secum ut meditata requirunt.  
 Non frustra meditantur, habent memorabile quod sit,  
 Nec mirum, penitus quae tota mente laborent.

15 Nos alio mentes, alio divisimus aures,  
 Iure igitur vincemur, amat victoria curam.  
 Quare nunc animos saltem committite vestros,  
 Dicere iam incipient, iam respondere decebit.

Hymen o Hymenae, Hymen ades o Hymenae.



## VIRGINES.

- 20 **H**espere, qui caelo fertur crudelior ignis?  
 Qui natam possis complexu avellere matris,  
 Complexu matris retinentem avellere natam  
 Et iuveni ardenti castam donare puellam.  
 Quid faciunt hostes capta crudelius urbe?

- 25 Hymen o Hymenaeæ, Hymen ades o Hymenaeæ!

## IUVENES.

- Hespere, qui caelo lucet iocundior ignis?  
 Qui desponsa tua firmes connubia flamma,  
 Quae pepigere viri, pepigerunt ante parentes  
 Nec iunxere prius quam se tuns extulit ardor.  
 30 Quid datur a divis felici optatius hora?  
 Hymen o Hymenaeæ, Hymen ades o Hymenaeæ!

## VIRGINES.

Hesperus e nobis, aequales, abstulit unam  
 .....  
 .....  
 Namque tuo adventu vigilat custodia semper  
 .....

Hymen o Hymenaeæ, Hymen ades o Hymenaeæ!

## IUVENES.

- .....  
 Nocte latent fures, quos idem saepe revertens,  
 35 Hespere, mutato comprehendis nomine eosdem.  
 At libet innuptis ficto te carpere quaestu.  
 Quid tum, si carpunt, tacita quem mente requirunt?  
 Hymen o Hymenaeæ, Hymen ades o Hymenaeæ!

## VIRGINES.

- Ut flos in septis secretus nascitur hortis,  
 40 Ignotus pecori, nullo contusus aratro,  
 Quem mulcent auræ, firmat sol, educat imber  
 .....

Multi illum pueri, multae optavere puellae:

Idem cum tenui carptus defloruit ungui,  
Nulli illum pueri, nullae optavere puellae:

- 45 Sic virgo, dum intacta manet, dum cara suis est;  
Cum castum amisit polluto corpore florem,  
Nec pueris iucunda manet, nec cara puellis.

Hymen o Hymenaeae, Hymen ades o Hymenaeae!

#### IUVENES.

Ut vidua in nudo vitis quae nascitur arvo

- 50 Nunquam se extollit, nunquam mitem educat uvam,  
Sed tenerum prono deflectens pondere corpus  
Iam iam contingit summum radice flagellum,  
Hanc nulli agricolae, nulli coluere iuveni:

At si forte eadem est ulmo coniuncta marito,

- 55 Multi illam agricolae, multi accoluere iuveni:  
Sic virgo dum intacta manet, dum inculta senescit;  
Cum par connubium maturo tempore adepta est,  
Cara viro magis et minus est invisae parenti.

At tu ne pugna cum tali coniuge virgo,

.....

- 60 Non aequom est pugnare, pater cui tradidit ipse,  
Ipse pater cum matre, quibus parere necesse est.

Virginitas non tota tua est, ex parte parentum est,  
Tertia pars patrist, pars est data tertia matri,  
Tertia sola tua est: noli pugnare duobus,

- 65 Qui genero sua iura simul cum dote dederunt.

Hymen o Hymenaeae, Hymen ades o Hymenaeae!

---

#### LXIII.

Super alta vectus Attis celeri rate maria  
Phrygium ut nemus citato cupide pede tetigit  
Aditque opaca silvis redimita loca deae,

- Stimulatus ibi furenti rabie, vagus animis,  
 5 Devolvit ile acuto sibi pondere silicis.  
 Itaque ut relictâ sensit sibi membra sine viro,  
 Etiam recente terrae sola sanguine maculans  
 Nivels citata cepit manibus leve typanum,  
 Typanum, tubam Cybebes, tua, matèr, initia,  
 10 Quatiensque terga tauri teneris cava digitis  
 Canere haec suis adorta est tremebunda comitibus.  
 'Agite ite ad alta, Gallae, Cybeles nemora simul,  
 Simul ite, Dindymenae dominae vaga pecora,  
 Aliena quae petentes velut exules loca  
 15 Sectam meam executae duce me mihi comites  
 Rapidum salum tulistis truculentaque pelage.  
 Et corpus evirastis Veneris nimio odio,  
 Hilarate aere citatis erroribus animum.  
 Mora tarda mente cedat: simul ite, sequimini  
 20 Phrygiâ ad domum Cybebes, Phrygia ad nemora deae,  
 Ubi cymbalum sonat vox, ubi tympana reboant,  
 Tibicen ubi canit Phryx curvo grave calamo,  
 Ubi capita Maenades vi faciunt ederigeræ,  
 Ubi sacra sancta acutis ululatibus agitant,  
 25 Ubi suevit illa divae volitare vaga cohors,  
 Quo nos decet citatis celerare tripudiis.'  
 Simul haec comitibus Attis cecinit notha mulier,  
 'Thiasus repente linguis strepitantibus ululat,  
 Leve tympanum remugit, cava cymbala recrepant,  
 30 Viridem citus adit Idam properante pede chorus.  
 Furibunda simul anhelans vaga vadit animam agens  
 Comitata tympano Attis per opaca nemora dux,  
 Veluti iuvenca vitans onus indomita iugi:  
 Rapidæ ducem sequuntur Gallae properipedem.  
 35 Itaque, ut domum Cybebes tetigere lassulae,  
 Nimio e labore somnum capiunt sine Cerere.  
 Piger his labante langore oculos sopor operit:  
 Abit in quiete molli ravidus furor animi.  
 Sed ubi oris aurei Sol radiantibus oculis  
 40 Lustravit aethera album, sola dura, mare ferum,  
 Pepulitque noctis umbras vegetis sonipedibus,

- Ibi Somnus excitam Attin fugiens citus abiit:  
 Trepidante eum recepit dea Pasithea sinu.  
 Ita de quiete molli rapida sine rabe
- 45 Simul ipse pectore Attis sua facta recoluit,  
 Liquidaque mente vidit sine quois ubique foret,  
 Animo aestuante rusum reditum ad vada tetulit.  
 Ibi maria vasta visens lacrimantibus oculis,  
 Patriam allocuta maestast ita voce miseriter.
- 50 'Patria o mei creatrix, patria o mea genetrix,  
 Ego quam miser relinquens, dominos ut herifugae  
 Famuli solent, ad Idae tetuli nemora pedem,  
 Ut apud nivem et ferarum gelida stabula forem  
 Et earum omnia adirem furibunda latibula,
- 55 Ubinam aut quibus locis te positam, patria, reor?  
 Cupit ipsa pupula ad te sibi dirigere aciem,  
 Rabie fera carens dum breve tempus animus est.  
 Egone a mea remota haec ferar in nemora domo?  
 Patria, bonis, amicis, genitoribus abero?
- 60 Abero foro, palaestra, stadio et gymnasiis?  
 Miser ah miser, querendum est etiam atque etiam  
 animei.  
 Quod enim genus figuraest, ego non quod habuerim?  
 Ego mulier, ego adolescens, ego ephebus, ego puer,  
 Ego gymnasi fui flos, ego eram decus olei:
- 65 Mihi ianuae frequentes, mihi limina tepida,  
 Mihi floridis corollis redimita domus erat,  
 Linquendum ubi esset orto mihi Sole cubiculum  
 Ego nunc deum ministra et Cybeles famula ferar?  
 Ego Maenas, ego mei pars, ego vir sterilis ero?
- 70 Ego viridis algida Idae nive amicta loca colam?  
 Ego vitam agam sub altis Phrygiae columinibus,  
 Ubi cerva silvicultrix, ubi aper nemorivagus?  
 Iam iam dolet quod egi, iam iamque paenitet.  
 Roseis ut huic labellis sonus editus abiit,
- 75 Geminas deorum ad aures nova nuntia referens,  
 Ibi vincta iuga resolvens Cybele leonibus  
 Laevumque pecoris hostem stimulans ita loquitur.  
 'Agedum' inquit 'age ferox i, face ut hunc furor agitet,

- Face uti furoris ictu reditum in nemora ferat,  
 80 Mea libere nimis qui fugere imperia cupit.  
 Age caede terga cauda, tua verbera patere,  
 Face cuncta mugienti fremitu loca retonent,  
 Rutilam ferox torosa cervice quate iubam.  
 Ait haec minax Cybebe religatque iuga manu.  
 85 Ferus ipse sese adhortans rapidum incitat animo,  
 Vadit, fremit, refringit virgulta pede vago.  
 At ubi humida albicantis loca litoris adiit,  
 Tenerumque vidit Attin prope marmora pelagi,  
 Facit impetum: ille demens fugit in nemora fera:  
 90 Ibi semper omne vitae spatium famula fuit.  
 Dea, magna dea, Cybebe, dea, domina Dindymeï,  
 Procul a mea tuus sit furor omnis, hera, domo:  
 Alios age incitatos, alios age rabidos.

---

 LXIV.

- Peliaco quondam prognatae vertice pinus  
 Dicuntur liquidas Neptuni nasse per undas  
 Phasidos ad fluctus et fines Aeetaeos,  
 Cum lecti iuvenes, Argivae robora pubis,  
 5 Auratam optantes Colchis avertere pellem  
 Ausi sunt vada salsa cita decurrere puppi,  
 Caerula verrentes abiegnis aequora palmis.  
 Diva quibus retinens in summis urbibus arces  
 Ipsa levi fecit volitantem flamine currum,  
 10 Pinea coniungens inflexae texta carinae.  
 Illa rudem cursu prima imbuit Amphitriten.  
 Quae simul ac rostro ventosum proscidit aequor,  
 Tortaque remigio spumis incanduit unda,  
 Emergere freti candenti e gurgite vultus  
 15 Aequoreae monstrum Nereides admirantes.  
 Illa, atque haud alia, viderunt luce marinas  
 Mortales oculis nudato corpore Nymphas  
 Nutricum tenuis extantes e gurgite cano.  
 Tum Thetidis Peleus incensus fertur amore,  
 20 Tum Thetis humanos non desepxit hymenaeos,

- Tum Thetidi pater ipse iugandum Pelea sanxit.  
 O nimis optato saeculorum tempore nati  
 Heroes, salvete, deum genus, o bona matrum  
 Progenies, salvete iterum . . . . .  
 Vos ego saepe meo vos carmine compellabo,  
 25 Teque adeo eximie taedis felicibus aucte  
 Thessaliae columnen Peleu, cui Iuppiter ipse,  
 Ipse suos divum genitor concessit amores.  
 Tene Thetis tenuit pulcherrima Neptunine?  
 Tene suam Tethys concessit ducere neptem,  
 30 Oceanusque, mari totum qui amplectitur orbem?  
 Quae simul optatae finito tempore luces  
 Advenere, domum conventu tota frequentat  
 Thessalia, oppletur laetanti regia coetu:  
 Dona ferunt prae se, declarant gaudia vultu.  
 35 Deseritur Cieros, linquunt Phthiotica tempe,  
 Crannonisque domos ac moenia Larisaea,  
 Pharsalum coeunt, Pharsalia tecta frequentant.  
 Rura colit nemo, mollescunt colla iuvenis,  
 Non humilis curvis purgatur vinea rastris,  
 40 Non glebam prono convellit vomere taurus,  
 Non falx attenuat frondatorum arboris umbram,  
 Squalida desertis rubigo infertur aratris.  
 Ipsius at sedes, quacunque opulenta recessit  
 Regia, fulgenti splendent auro atque argento.  
 45 Candet ebur solis, collucent pocula mensae,  
 Tota domus gaudet regali splendida gaza.  
 Pulvinar vero divae geniale locatur  
 Sedibus in mediis, Indo quod dente politum  
 Tincta tegit roseo conchyli purpura fuco.  
 50 Haec vestis priscis hominum variata figuris  
 Heroum mira virtutes indicat arte.  
 Namque fluentisq[ue] prospectans litore Diae  
 Thesea cedentem celeri cum classe tuetur  
 Indomitos in corde gerens Ariadna furores,  
 55 Neodum etiam sese quae visit visere credit,  
 Ut pote fallaci quae tum primum excita somno  
 Desertam in sola miseram se cernat arena.

- Inmemor at iuvenis fugiens pellit vada remis,  
Irrita ventosae linquens promissa procellae.
- 60 Quem procul ex alga maestis Minois ocellis,  
Saxea ut effigies bacchantis, prospicit, eheu,  
Prospicit et magnis curarum fluctuat undis,  
Non flavo retinens subtilem vertice mitram,  
Non contacta levi velatum pectus amictu,
- 65 Non tereti strophio lactentis vincta papillas,  
Omnia quae toto delapsa e corpore passim  
Ipsius ante pedes fluctus salis alludebant.  
Sic neque tum mitrae neque tum fluitantis amictus  
Illa vicem curans toto ex te pectore, Theseu,
- 70 Toto animo, tota pendebat perdita mente.  
Ah misera, assiduis quam luctibus externavit  
Spinosas Erycina serens in pectore curas  
Illa tempestate, ferox quo ex tempore Theseus  
Egressus curvis e litoribus Piraei
- 75 Attigit iniusti regis Gortynia tecta.  
Nam perhibent olim crudeli peste coactam  
Androgeoneae poenas exolvere caedis  
Electos iuvenes simul et decus innuptarum  
Cecropiam solitam esse dapem dare Minotauro.
- 80 Quis angusta malis cum moenia vexarentur,  
Ipse suum Theseus pro caris corpus Athenis  
Proficere optavit potius quam talia Cretam  
Funera Cecropiae nec funera portarentur,  
Atque ita nave levi nitens ac lenibus auris
- 85 Magnanimum ad Minoa venit sedesque superbas.  
Hunc simul ac cupido conspexit lumine virgo  
Regia, quam suavis expirans castus odores  
Lectulus in molli complexu matris alebat,  
Quales Eurotae progignunt flumina myrtus
- 90 Aurave distinctos educit verna colores,  
Non prius ex illo flagrantia declinavit  
Lumina, quam cuncto concepit corpore flammam  
Funditus atque imis exarsit tota medullis.  
Heu misere exagitans immitti corde furores
- 95 Sancte puer, curis hominum qui gaudia mises,

- Quaeque regis Golgos quaeque Idalium frondosum,  
 Qualibus incensam iactastis mente puellam  
 Fluctibus in flavo saepe hospite suspirantem!  
 Quantos illa tulit languenti corde timores!  
 100 Quanto saepe magis fulgore expalluit auri!  
 Cum saevum cupiens contra contendere monstrum  
 Aut mortem oppeteret Theseus aut praemia laudis.  
 Non ingrata tamen frustra munuscula divi  
 Promittens tacito suscepit vota labello.  
 105 Nam velut in summo quatientem brachia Tauro  
 Quercum aut conigeram sudanti cortice pinum  
 Indomitum turben contorquens flamine robur  
 Eruit (illa procul radicitus exturbata  
 Prona cadit, lateque et cominus omnia frangens),  
 110 Sic domito saevum prostravit corpore Theseus  
 . . . . .  
 Nequicquam vanis iactantem cornua ventis.  
 Inde pedem sospes multa cum laude reflexit  
 Errabunda regens tenui vestigia filo,  
 Ne labyrinthis e flexibus egredientem  
 115 Tecti frustraretur inobservabilis error.  
 Sed quid ego a primo digressus carmine plura  
 Commemorem, ut linquens genitoris filia vultum,  
 Ut consanguineae complexum, ut denique matris,  
 Quae misera in gnata deperdita laetabatur,  
 120 Omnibus his Thesei dulcem praeoptavit amorem,  
 Aut ut vecta ratis spumosa ad litora Diae,  
 \* Aut ut eam devinctam lumina somno  
 Liquerit immemori discedens pectore coniunx?  
 Saepe illam perhibent ardenti corde furem  
 125 Clarisonas imo fuisse e pectore voces,  
 Ac tum praeruptos tristem conscendere montes,  
 Unde aciem in pelagi vastos protenderet aestus,  
 Tum tremuli salis adversas procurrare in undas  
 Mollia nudatae tollentem tegmina surae,  
 130 Atque haec extremis maestam dixisse querelis,  
 Frigidulus udo singultus ore cientem.  
 'Siccine me patriis avertam, perfide, ab oris,



- Perfide, deserto liquisti in litore, Theseu?  
Siccine discedens neglecto numine divum  
135 Inmemor ah devota domum periuria portas?  
Nullane res potuit crudelis flectere mentis  
Consilium? tibi nulla fuit clementia praesto,  
Inmite ut nostri vellet miserescere pectus?  
At non haec quondam nobis promissa dedisti  
140 Voce: mihi non haec miserae sperare iubebas,  
Sed connubia laeta, sed optatos hymenaeos,  
Quae cuncta aerii discerpunt irrita venti.  
Tum iam nulla viro iuranti femina credat,  
Nulla viri speret sermones esse fideles;  
145 Quis dum aliquid cupiens animus praegestit apisci,  
Nil metuunt iurare, nihil promittere parcunt:  
Sed simul ac cupidae mentis satiata libido est,  
Dicta nihil metuere, nihil periuria curant.  
Certe ego te in medio versantem turbine leti  
150 Eripui, et potius germanum amittere crevi,  
Quam tibi fallaci supremo in tempore deessem.  
Pro quo dilaceranda feris dabor alitibusque  
Praeda, neque injecta tumulabor mortua terra.  
Quaenam te genuit sola sub rupe leaena,  
155 Quod mare conceptum spumantibus expuit undis,  
Quae Syrtis, quae Scylla rapax, quae vasta Cha-  
rybdis,  
Talia qui reddis pro dulci praemia vita?  
Si tibi non cordi fuerant connubia nostra,  
Saeva quod horrebas prisci praecepta parentis,  
160 At tamen in vestras potuisti ducere sedes,  
Quae tibi iocundo famularer serva labore  
Candida permulcens liquidis vestigia lymphis  
Purpureave tuum consternens veste cubile.  
Sed quid ego ignaris nequicquam conquerar auris,  
165 Externata malo, quae nullis sensibus auctae  
Nec missas audire queunt nec reddere voces?  
Ille autem prope iam mediis versatur in undis,  
Nec quisquam apparet vacua mortalis in alga.  
Sic nimis insultans extremo tempore saeva

- 170 Fors etiam nostris invidit questibus auris.  
 Iuppiter omnipotens, utinam ne tempore primo  
 Gnosia Cecropiae tetigissent litora puppes,  
 Indomito nec dira ferens stipendia tauro  
 Perfidus in Creta religasset navita funem,  
 175 Nec malus hic celans dulci crudelia forma  
 Consilia in nostris requiesset sedibus hospes!  
 Nam quo me referam? quali spe perdita nitar?  
 Idomeneosne petam montes? ah gurgite lato  
 Discernens pontum truculentum ubi dividit aequor?  
 180 An patris auxilium sperem? quemne ipsa reliqui  
 Respersum iuvenem fraterna caede secuta?  
 Coniugis an fido consoler memet amore?  
 Quine fugit lentos incurvans gurgite remos?  
 Praeterea nullo litus, sola insula, tecto,  
 185 Nec patet egressus pelagi cingentibus undis:  
 Nulla fugae ratio, nulla spes: omnia muta,  
 Omnia sunt deserta, ostentant omnia letum.  
 Non tamen ante mihi languescent lumina morte,  
 Nec prius a fesso secedent corpore sensus,  
 190 Quam iustam a divis exposcam prodita mulctam,  
 Caelestumque fidem postrema comprecser hora.  
 Quare facta virum mulctantes vindice poena,  
 Eumenides, quibus anguino redimita capillo  
 Frons expirantis praeportat pectoris iras,  
 195 Huc huc adventate, meas audite querelas,  
 Quas ego, vae miserae, extremis proferre medullis  
 Cogor inops, ardens, amenti caeca furore.  
 Quae quoniam verae nascuntur pectore ab imo,  
 Vos nolite pati nostrum vanescere luctum,  
 200 Sed quali solam Theseus me mente reliquit,  
 Tali mente, deae, funestet seque suosque.  
 Has postquam maesto profudit pectore voces,  
 Supplicium saevis exposcens anxia factis,  
 Annuit invicto caelestum numine rector,  
 205 Quo tunc et tellus atque horrida contremuere  
 Aequora concussitque micantia sidera mundus.  
 Ipse autem caeca mentem caligine Theseus

- Constitus oblito dimisit pectore cuncta,  
 Quae mandata prius constanti mente tenebat,  
 210 Dulcia nec maesto sustollens signa parenti  
 Sospitem Erechtheum se ostendit visere portum.  
 Namque ferunt olim, classi cum moenia divae  
 Linquentem gnatum ventis concrederet Aegeus,  
 Talia complexum iuveni mandata dedisse.  
 215 'Gnate mihi longa locundior unice vita,  
 Gnate, ego quem in dubios cogor dimittere casus,  
 Reddite in extrema nuper mihi fine senectae,  
 Quandoquidem fortuna mea ac tua fervida virtus  
 Eripit invito mihi te, cui languida nondum  
 220 Lumina sunt gnati cara saturata figura,  
 Non ego te gaudens laetanti pectore mittam,  
 Nec te ferre sinam fortunae signa secundae,  
 Sed primum multas expromam mente querelas,  
 Canitiem terra atque infuso pulvere foedans,  
 225 Inde infecta vago suspendam lintea malo,  
 Nostros ut luctus nostraeque incendia mentis  
 Carbasus obscurata decet ferrugine Hibera.  
 Quod tibi si sancti concesserit incola Itoni,  
 Quae nostrum genus ac sedes defendere Erechthei  
 230 Annuit, ut tauri respergas sanguine dextram,  
 Tum vero facito ut memori tibi condita corde  
 Haec vigeant mandata, nec ulla oblitteret aetas,  
 Ut simul ac nostros invisent lumina collis,  
 Funestam antennae deponant undique vestem,  
 235 Candidaque intorti sustollant vela rudentes,  
 Quam primum cernens ut laeta gaudia mente  
 Agnoscam, cum te reducem aetas prospera sistet.'  
 Haec mandata prius constanti mente tenentem  
 Thesea ceu pulsae ventorum flamine nubes  
 240 Aerium nivei montis liquere cacumen.  
 At pater, ut summa prospectum ex arce petebat,  
 Anxia in assiduos absumens lumina fletus,  
 Cum primum inflati conspexit lintea veli,  
 Praecipitem sese scopulorum e vertice iecit,  
 245 Amissum credens immiti Thesea fato.

- Sic funesta domus ingressus tecta paterna  
 Morte ferox Theseus qualem Minoae luctum  
 Obtulerat mente inmemori talem ipse recepit.  
 Quae tamen aspectans cedentem maestata carinam  
 250 Multiplices animo volvebat saucia curas.  
 At parte ex alia florens volitabat Iacchus  
 Cum thiaso Satyrorum et Nysigenis Silenis,  
 Te quaerens, Ariadna, tuoque incensus amore.  
 . . . . .  
 Quae tum alacres passim lymphata mente furebant  
 255 Euhoe bacchantes, euhoe capita inflectentes.  
 Harum pars tecta quatiebant cuspide thyrsos,  
 Pars e divulso iactabant membra Iuvenco,  
 Pars sese tortis serpentibus incingebant,  
 Pars obscura cavis celebrabant orgia cistis,  
 260 Orgia, quae frustra cupiunt audire profani,  
 Plangebant aliae proceris tympana palmis  
 Aut tereti tenuis tinnitus aere ciebant,  
 Multis raucisonos efflabant cornua bombos  
 Barbaraque horribili stridebat tibia cantu.  
 265 Talibus amplifrice vestis decorata figuris  
 Pulvinar complexa suo velabat amictu.  
 Quae postquam cupide spectando Thessala pubes  
 Expleta est, sanctis coepit decedere divis.  
 Hic, qualis flatu placidum mare matutino  
 270 Horrificans Zephyrus proclivas incitat undas  
 Aurora exoriente vagi sub limina Solis,  
 Quae tarde primum clementi flamine pulsae  
 Procedunt leviterque sonant plangore cachinni,  
 Post vento crescente magis magis increbrescunt  
 275 Purpureaque procul nantes a luce refulgent,  
 Sic tum ibi vestibuli linquentes regia tecta  
 Ad se quisque vago passim pede discedebant.  
 Quorum post abitum princeps e vertice Pelei  
 Advenit Chiron portans silvestria dona:  
 280 Nam quotcunque ferunt campi, quot Thessala magnis  
 Montibus ora creat, quot propter fluminis undas  
 Aura parit flores tepidi fecunda Favoni,  
 CATULLUS.

- Hos in distinctis plexos tulit ipse corollis,  
Quo permulsa domus iucundo risit odore.  
285 Confestim Peneios adest, viridantia Tempe,  
Tempe, quae silvae cingunt super impendentes,  
\* Minosim linquens doris celebranda choreis,  
Non vacuos: namque ille tulit radicitus altas  
Fagos ac recto proceras stipite laurus,  
290 Non sine nutanti platano lentaque sorore  
Flammati Phaethontis et aëria cupressu.  
Haec circum sedes late contexta locavit,  
Vestibulum ut molli velatum fronde vireret.  
Post hunc consequitur sollerti corde Prometheus,  
295 Extenuata gerens veteris vestigia poenae,  
Quam quondam silici restrictus membra catena  
Persolvit pendens e verticibus praeruptis.  
Inde pater divum sancta cum coniuge natisque  
Advenit caelo, te solum, Phoebe, relinquens  
300 Unigenamque simul cultricem montibus Idri:  
Pelea nam tecum pariter soror aspernata est  
Nec Thetidis taedas voluit celebrare iugalis.  
Qui posquam niveis flexerunt sedibus artus,  
Large multiplici constructae sunt dapē mensae,  
305 Cum interea infirmo quatientes corpora motu  
Veridicos Parcae coeperunt edere cantus.  
His corpus tremulum complectens undique vestis  
Candida purpurea talos incinxerat ora,  
At roseo niveae residebant vertice vittae,  
310 Aeternumque manus carpebant rite laborem.  
Laeva cūm molli lana retinebat amictum,  
Dextera tūm leviter deducens fila supinis  
Formabat digitis, tūm prono in pollice torquens  
Libratum tereti versabat turbine fusum,  
315 Atque ita decerpens aequabat semper opus dens,  
Laneaque aridulis haerebant morsa labellis,  
Quae prius in levi fuerant extantia filo:  
Ante pedes autem candentis mollia lanæ  
Vellera virgati custodibant calathisci.  
320 Hæc tūm clariora vellentes vellera voce

Talla divino fuderant carmine fata,  
 Carmine, perfidiae quod post nulla arguet aetas.

O decus eximium magnis virtutibus augens,  
 Emathiae tutamen opis, clarissime nato,  
 325 Accipe, quod laeta tibi pandunt luce sorores,  
 Veridicum oraculum. sed vos, quae fata sequuntur,  
 Currite ducentes subtegmina, currite, fusi.

Adveniet tibi iam portans optata maritis  
 Hesperus, adveniet fausto cum sidere coniunx,  
 330 \*Quae tibi flexo animo mentis perfundat amorem  
 Languidulosque paret tecum coniungere somnos  
 Levia substernens robusto brachia collo.  
 Currite ducentes subtegmina, currite, fusi.

Nulla domus tales unquam contextit amores,  
 335 Nullus amor tali coniunxit foedere amantes,  
 Qualis adest Thetidi, qualis concordia Peleo.  
 Currite ducentes subtegmina, currite, fusi.

Nascetur vobis expers terroris Achilles,  
 Hostibus haud tergo, sed forti pectore notus,  
 340 Qui persaepe vago victor certamine cursus  
 Flammea praevertet celeris vestigia cervae.  
 Currite ducentes subtegmina, currite, fusi.

Non illi quisquam bello se conferet heros,  
 Cum Phrygii Teucro manabunt sanguine campi  
 345 Troicaque obsidens longinquo moenia bello  
 Periuri Pelopis vastabit tertius heres.  
 Currite ducentes subtegmina, currite, fusi.

Illius egregias virtutes claraque facta  
 Saepe fatebuntur gnatorum in funere matres,  
 350 Cum in cinerem canos solvent a vertice crines  
 Putridaque infirmis variabunt pectora palmis.  
 Currite ducentes subtegmina, currite, fusi.

Namque velut densas praecerpens cultor aristas  
 Sole sub ardenti flaventia demetit arva,

355 Troiugenum infesto prosternens corpora ferro

Currite ducentes subtegmina, currite, fusi.

Testis erit magnis virtutibus unda Scamandri,  
Quae passim rapido diffunditur Hellesponto,  
Cuius iter caesis angustans corporum acervis

360 Alta tepefaciet permixta flumina caede.

Currite ducentes subtegmina, currite, fusi.

Denique testis erit morti quoque reddita praeda,  
Cum terrae ex celso concervatum aggere bustum  
Excipiet niveos percussae virginis artus.

365 Currite ducentes subtegmina, currite, fusi.

Nam simul ac fessis dederit fors copiam Achivis  
Urbis Dardaniae Neptunia solvere vincla,  
Alta Polyxenia mutescant caede sepulcra,  
Quae, velut ancipiti succumbens victima ferro,

370 Proliciet truncum summisso poplite corpus.

Currite ducentes subtegmina, currite, fusi.

Quare agite optatos animi coniungite amores.  
Accipiat coniunx felici foedere divam,  
Dedatur cupido iam dudum nupta marito.

375 Currite ducentes subtegmina, currite, fusi.

Nam illam nutrix orienti luce revisens  
Hesterno collum poterit circumdare filo,  
[Currite ducentes subtegmina, currite, fusi]  
Anxia nec mater discordis maesta puellae

380 Secubitu caros mittet sperare nepotes.

Currite ducentes subtegmina, currite, fusi.

Talia praefantes quondam felicia Pelei  
Carmina divino cecinerunt pectore Parcae.  
Praesentes namque ante domos invisere castas

385 Heroum et sese mortali ostendere coetu

Caelicolae nondum sprete pietate solebant.  
Saepe pater divum templo in fulgente revisens,  
Annua dum festis venissent sacra diebus,

- Conspexit terra centum procumbere tauros.  
 390 Saepe vagus Liber Parnasi vertice summo  
 Thyiadas effusis euantis crinibus egit,  
 Cum Delphi tota certatim ex urbe ruentes  
 Acciperent laeti divum fumantibus aris.  
 Saepe in letifero belli certamine Mavors  
 395 Aut rapidi Tritonis hera aut Rhamnusia virgo  
 Armatas hominum est praesens hortata catervas.  
 Sed postquam tellus scelere est imbuta nefando,  
 Iustitiamque omnes cupida de mente fugarunt,  
 Perfudere manus fraterno sanguine fratres,  
 400 Destitit extinctos natus lugere parentes,  
 Optavit genitor primaevi funera nati,  
 Liber ut innuptae poteretur flore novercae,  
 Ignaro mater substernens se impia nato  
 Impia non verita est divos scelerare parentes,  
 405 Omnia fanda nefanda malo permixta furore  
 Iustificam nobis mentem avertere deorum.  
 Quare nec talis dignantur visere coetus,  
 Nec se contingi patiuntur lumine claro.

## LXV.

- Etsi me assiduo confectum cura dolore  
 Sevocat a doctis, Ortale, virginibus,  
 Nec potis est dulcis Musarum expromere fetus  
 Mens animi, (tantis fluctuat ipsa malis:  
 5 Namque mei nuper Lethaeo gurgite fratris  
 Pallidulum manans alluit unda pedem,  
 Troia Rhoeteo quem subter litore tellus  
 Ereptum nostris obterit ex oculis.  
 \*Alloquar, audiero nunquam tua loquentem,  
 10 Nunquam ego te, vita frater amabilior,  
 Aspiciam posthac. at certe semper amabo,  
 Semper maesta tua carmina morte canam,  
 Qualia sub densis ramorum concinit umbris  
 Daulias absumpti fata gemens Itylei)  
 15 Sed tamen in tantis maeroribus, Ortale, mitto



Haec expressa tibi carmina Battiadae,  
 Ne tua dicta vagis nequicquam credita ventis  
 Effluxisse meo forte putes animo.

---

 LXV<sup>b</sup>.

\*            \*            \*

Ut missum sponsi furtivo munere malum  
 Procurrit casto virginis e gremio,  
 Quod miserae oblitae molli sub veste locatum,  
 Dum adventu matris prosilit, excutitur:  
 Atque illud prono praeceps agitur decursu,  
 Huic manat tristi conscius ore rubor.

---

 LXVI.

- Omnia qui magni dispexit lumina mundi,  
 Qui stellarum ortus comperit atque obitus,  
 Flammeus ut rapidi solis nitor obscuretur,  
 Ut cedant certis sidera temporibus,  
 5 Ut Triviam furtim sub Latmia saxa relegans  
 Dulcis amor gyro devocet acrio,  
 Idem me ille Conon caelesti numine vidit  
 E Beroniceo vertice caesariem  
 Fulgentem clare, quam multis illa dearum  
 10 Levia protendens brachia pollicita est,  
 Qua rex tempestate novo auctus hymenaeo  
 Vastatum finis iverat Assyrios,  
 Dulcia nocturnae portans vestigia rixae,  
 Quam de virgineis gesserat exuviis.  
 15 Estne novis nuptis odio Venus? anne parentum  
 Frustrantur falsis gaudia lacrimulis,  
 Ubertim thalami quas intra limina fundunt?  
 Non, ita me divi, vera gemunt, iuerint.  
 Id mea me multis docuit regina querelis  
 20 Invisente novo praelia torva viro.  
 At tu non orbum luxti deserta cubile,  
 Sed fratris cari flebile discidium?  
 Cum penitus maestas exedit cura medullas!

- Ut tibi tunc toto pectore sollicitae  
 25 Senibus ereptis mens excidit! at te ego certe  
 Cognoram a parva virgine magnanimam.  
 Anne bonum oblita es facinus, quo regium adeptas  
 Coniugium, quo non fortius ausit alis?  
 Sed tum maesta virum mittens quae verba locuta es!  
 30 Iuppiter, ut tristi lumina saepe manu!  
 Quis te mutavit tantus deus? an quod amantes  
 Non longe a caro corpore abesse volunt?  
 Atque ibi me cunctis pro dulci coniuge divis  
 Non sine taurino sanguine pollicita es,  
 35 Si redditum tetulisset. is haut in tempore longo  
 Captam Asiam Aegypti finibus addiderat.  
 Quis ego pro factis caelesti reddita coetu  
 Pristina vota novo munere dissoluo.  
 Invita, o regina, tuo de vertice cessi,  
 40 Invita: adiuro teque tuumque caput,  
 Digna ferat quod si quis inaniter adiuravit:  
 Sed qui se ferro postulet esse parem?  
 Ille quoque eversus mons est, quem maximum in oris  
 Progenies Thiae clara supervehitur,  
 45 Cum Medi propulere novum mare, cumque iuventus  
 Per medium classi barbara navit Athon.  
 Quid facient crines, cum ferro talia cedant?  
 Iuppiter, ut Chalybum omne genus pereat,  
 Et qui principio sub terra quaerere venas  
 50 Institit ac ferri frangere duritiem!  
 Abiunctae paulo ante comae mea fata sorores  
 Lugebant, cum se Memnonis Aethiopis  
 Unigena impellens nutantibus aera penulis  
 Obtulit Arsinoes Cypridos ales equos,  
 55 Isque per aetherias me tollens advolat umbras  
 Et Veneris casto collocat in gremio.  
 Ipsa suum Zephyritis eo famulum legarat,  
 Graia Canopieis incola litoribus.  
 \*Hi dii ven ibi vario ne solum in lumine caeli  
 60 Ex Ariadneis aurea temporibus  
 Fixa corona foret, sed nos quoque fulgeremus

- Devotae flavi verticis exuviae,  
 Uvidulum a fluctu cedentem ad templa deum me  
 Sidus in antiquis diva novum posuit:  
 65 Virginis et saevi contingens namque leonis  
 Lumina, Callisto iuxta Lycaoniam,  
 Vertor in occasum, tardum dux ante Booten;  
 Qui vix sero alto mergitur Oceano.  
 Sed quanquam me nocte premunt vestigia divum,  
 70 Lux autem canae Tethyi restituit,  
 (Pace tua fari hic liceat, Rhamnusia virgo,  
 Namque ego non ullo vera timore tegam,  
 Nec si me infestis discerpent sidera dictis,  
 Condita quin verei pectoris evoluam):  
 75 Non his tam lactor rebus, quam me afore semper,  
 Afore me a dominae vertice discrucior,  
 Quicum ego, dum virgo quondam fuit omnibus expers,  
 \* Unguentis una millia multa bibi.  
 Nunc vos, optato quas iunxit lumine taeda,  
 80 Non post unanimis corpora coniugibus  
 Tradite nudantes reiecta veste papillas,  
 Quam iucunda mihi munera libet onyx,  
 Vester onyx, casto petitis quae iura cubili.  
 Sed quae se impuro dedit adulterio,  
 85 Illius ah mala dona levis bibat irrita pulvis:  
 Namque ego ab indignis praemia nulla peto,  
 Sed magis, o nuptae, semper concordia vostras  
 Semper amor sedes incolat assiduus.  
 Tu vero, regina, tuens cum sidera divam  
 90 Placabis festis luminibus Venerem,  
 Unguinis expertem non siris esse tuam me,  
 Sed potius largis affice muneribus.  
 Sidera corruerint utinam, coma regia flam,  
 Proximus Hydrochoi fulgeret Oarion!

## LXVII.

- 0 dulci iucunda viro, iucunda parenti,  
 Salve, teque bona Iuppiter auctet ope,

- Ianua, quam Balbo dicunt servisse benigne  
 Olim, cum sedes ipse senex tenuit,  
 5 Quamque ferunt rursus nato servisse maligne,  
 Postquam est porrecto tacta marita sene.  
 Dic agetum nobis, quare mutata feraris  
 In dominum veterem deseruisse fidem.  
 'Non (ita Caecilio placeam, cui tradita nunc sum)  
 10 Culpa mea est, quanquam dicitur esse mea,  
 Nec peccatum a me quisquam pote dicere quicquam:  
 \* Verum isti populi ianua qui te facit,  
 Qui, quacunque aliquid reperitur non bene factum,  
 Ad me omnes clamant: ianua, culpa tua est.'  
 15 Non istuc satis est uno te dicere verbo,  
 Sed facere ut quivis sentiat et videat.  
 'Qui possum? nemo quaerit nec scire laborat.'  
 Nos volumus: nobis dicere ne dubita.  
 'Primum igitur, virgo quod fertur tradita nobis,  
 20 Falsum est, non illam vir prior attigerit,  
 Languidior tenera cui pendens sicula beta  
 Nunquam se mediam sustulit ad tunicam:  
 Sed pater illius gnati violasse cubile  
 Dicitur et miseram conscelerasse domum,  
 25 Sive quod impla mens caeco flagrabat amore,  
 Seu quod iners sterili semine natus erat,  
 Ut quaerendum aliunde foret nervosius illud,  
 Quod posset zonam solvere virgineam.'  
 Egregium narras mira pietate parentem,  
 30 Qui ipse sui gnati minxerit in gremium.  
 Atqui non solum hoc se dicit cognitum habere  
 Brixia \* Chinae suppositum specula,  
 Flavus quam molli percurrit flumine Mella,  
 Brixia Veronae mater amata meae,  
 35 Sed de Postumio et Corneli narrat amore,  
 Cum quibus illa malum fecit adulterium.  
 Dixerit hic aliquis: quid? tu isthaec, ianua, nosti?  
 Cui nunquam domini limine abesse licet,  
 Nec populum auscultare, sed hic suffixa tigillo  
 40 Tantum operire soles aut aperire domum?

- 'Saepe illam audiui furtiva voce loquentem  
 Solam cum ancillis haec sua flagitia,  
 Nomine dicentem quos diximus, ut pote quae mi  
 Speret nec linguam esse nec auriculam.  
 45 Praeterea addebat quendam, quem dicere nolo  
 Nomine, ne tollat rubra supercilia.  
 Longus homo est, magnas quoi lites intulit olim  
 Falsum mendaci ventre puerperium.'

---

 LXVIII.

- Quod mihi fortuna casuque oppressus acerbò  
 Conscriptum hoc lacrimis mittis epistolium,  
 Naufragum ut eiectum spumantibus aequoris undis  
 Sublevem et a mortis limine restituam,  
 5 Quem neque sancta Venus molli requiescere somno  
 Desertum in lecto caelibe perpetitur,  
 Nec veterum dulci scriptorum carmine Musae  
 Oblectant, cum mens anxia pervigilat,  
 Id gratum est mihi, me quoniam tibi dicis amicum,  
 10 Muneraque et Musarum hinc petis et Veneris:  
 Sed tibi ne mea sint ignota incommoda, Manli,  
 Neu me odisse putes hospitis officium,  
 Accipe, quis merseer fortunae fluctibus ipse,  
 Ne amplius a misero dona beata petas.  
 15 Tempore quo primum vestis mihi tradita pura est,  
 Iucundum cum aetas florida ver ageret,  
 Multa satis lusi: non est dea nescia nostri,  
 Quae dulcem curis miscet amaritiem:  
 Sed totum hoc studium luctu fraterna mihi mors  
 20 Abstulit. o misero frater adempte mihi,  
 Tu mea tu moriens fregisti commoda, frater,  
 Tecum una tota est nostra sepulta domus,  
 Omnia tecum una perierunt gaudia nostra,  
 Quae tuus in vita dulcis alebat amor.  
 25 Cuius ego interitu tota de mente fugavi  
 Haec studia atque omnis delicias animi.  
 Quare, quod scribis Veronae turpe Catullo

- Esse, quod hic quisquis de meliore nota  
 Frigida deserto tepefaxit membra cubili,  
 30 Id, Manli, non est turpe, magis miserum est.  
 Ignosces igitur, si, quae mihi luctus ademit,  
 Haec tibi non tribuo munera, cum nequeo.  
 Nam, quod scriptorum non magna est copia apud me,  
 Hoc fit, quod Romae vivimus: illa domus,  
 35 Illa mihi sedes, illic mea carpitur aetas:  
 Huc una ex multis capsula me sequitur.  
 Quod cum ita sit, nolim statuas nos mente maligna  
 Id facere aut animo non satis ingenuo,  
 Quod tibi non utriusque petenti copia facta est:  
 40 Ultro ego deferrem, copia siqua foret.

LXVIII<sup>b</sup>.

- Non possum reticere, deae, qua me Allius in re  
 Iuverit aut quantis iuverit officiis:  
 Nec fugiens saeculis obliviscentibus aetas  
 Illius hoc caeca nocte tegat studium:  
 45 Sed dicam vobis, vos porro dicite multis  
 Millibus et facite haec charta loquatur anus  
 . . . . .  
 Notescatque magis mortuus atque magis,  
 Nec tenuem texens sublimis aranea telam  
 50 In deserto Alli nomine opus faciat.  
 Nam, mihi quam dederit duplex Amathusia curam,  
 Scitis, et in quo me corruerit genere,  
 Cum tantum arderem quantum Trinacria rupes  
 Lymphaque in Octaeis Malia Thermopylis,  
 55 Maesta neque assiduo tabescere lumina fletu  
 Cessarent tristique imbre madere genae.  
 Qualis in aerii perlucens vertice montis  
 Rivus muscoso prosilit e lapide,  
 Qui cum de prona praeceps est valle volutus,  
 60 Per medium densi transit iter populi,  
 Dulce viatori lasso in sudore levamen,  
 Cum gravis exustos aestus hiulcat agros:

- Hic, velut in nigro iactatis turbine nautis.  
Lenius aspirans aura secunda venit  
65 iam prece Pollucis, iam Castoris implorata,  
Tale fuit nobis Allius auxilium.  
Is clausum lato patefecit limite campum,  
Isque domum nobis isque dedit dominam,  
Ad quam communes exerceremus amores.  
70 Quo mea se molli candida diva pede  
Intulit et trito fulgentem in limine plantam  
Innixa arguta constituit solea,  
Coniugis ut quondam flagrans advenit amore  
Protesilaeam Laodamia domum  
75 Inceptam frustra, nondum cum sanguine sacro  
Hostia caelestis pacificasset heros.  
Nil mihi tam valde placeat, Rhamnusia virgo,  
Quod temere invitis suscipiatur heris.  
Quam ieiuna plium desideret ara cruorem,  
80 Docta est amisso Laodamia viro,  
Coniugis ante coacta novi dimittere collum,  
Quam veniens una atque altera rursus hiems  
Noctibus in longis avidum saturasset amorem,  
Posset ut abrupto vivere coniugio,  
85 Quod scibant Parcae non longo tempore abisse,  
Si miles muros isset ad Iliacos:  
Nam tam Helenae raptu primores Argivorum  
Coeperat ad sese Troia cedere viros,  
Troia (nefas) commune sepulcrum Asiae Europae-  
que,  
90 Troia virum et virtutum omnium acerba cinis,  
Quae vel et id nostro letum miserabile fratri  
Attulit. hei misero frater adempte mihi,  
Hei misero fratri iucundum lumen ademptum,  
Tecum una tota est nostra sepulta domus,  
95 Omnia tecum una perierunt gaudia nostra,  
Quae tuus in vita dulcis alebat amor.  
Quem nunc tam longe non inter nota sepulcra  
Nec prope cognatos compositum cineres,  
Sed Troia obscena, Troia infelice sepultum

- 100 Detinet extremo terra aliena solo.  
Ad quam tum properans fertur simul undique pubes  
Graeca penetrans deseruisse focos,  
Ne Paris abducta gavisus libera moecha  
Otia pacato degeret in thalamo.
- 105 Quo tibi tum casu, pulcherrima Laodamia,  
Ereptum est vita dulcius atque anima  
Coniugium: tanto te absorbens vertice amoris  
Aestus in abruptum detulerat barathrum,  
Quale ferunt Graii Pheneum prope Cylleneum
- 110 Siccare emulsa pingue palude solum,  
Quod quondam caesis montis fodisse medullis  
Audit falsiparens Amphitryoniades,  
Tempore quo certa Stymphalia monstra sagitta  
Perculit imperio deterioris heri,
- 115 Pluribus ut caeli tereretur ianua divis,  
Hebe nec longa virginitate foret.  
Sed tuus altus amor barathro fuit altior illo,  
Qui divum domitum ferre iugum docuit:  
Nam neque tam carum confecto aetate parenti
- 120 Una caput seri nata nepotis alit,  
Qui, cum divitiis vix tandem inventus avitis  
Nomen testatas intulit in tabulas,  
Impia derisi gentilis gaudia tollens  
Suscitat a caeno volturium capiti:
- 125 Nec tantum niveo gavisus est ulla columbo  
Compar, quae multo dicitur improbius  
Oscula mordenti semper decerpere rostro,  
Quanquam praecipue multivola est mulier.  
Sed tu horum magnos vicisti sola furores,
- 130 Ut semel es flavo conciliata viro.  
Aut nihil aut paulo cui tu concedere digna  
Lux mea se nostrum contulit in gremium,  
Quam circumcursans hinc illinc saepe Cupido  
Fulgebat crocina candidus in tunica.
- 135 Quae tamen etsi uno non est contenta Catullo,  
Rara verecundae furta feremus herae,  
Ne nimium simus stultorum more molesti.



Saepe etiam Iuno, maxima caelicolum,  
Coniugis in culpa flagrantem quotidiana,  
.....

- 140 Noscens omnivoli plurima furta Iovis.  
At, quia nec divis homines componier aequum est,  
.....

- Ingratum tremuli tolle parentis onus.  
Nec tamen illa mihi dextra deducta paterna  
Fragrantem Assyrio venit odore domum,  
145 Sed furtiva dedit mira munuscula nocte,  
Ipsius ex ipso dempta viri gremio.  
Quare illud satis est, si nobis is datur unus,  
Quem lapide illa diem candidiore notat.  
Hoc tibi, quod potui, confectum carmine munus  
150 Pro multis, Alli, redditur officiis,  
Ne vestrum scabra tangat rubigine nomen  
Haec atque illa dies atque alia atque alia.  
Huc addent divi quam plurima, quae Themis olim  
Antiquis solita est munera ferre piis,  
157 Et qui principio nobis terram dedit auctor,  
A quo sunt primo omnia nata bona.  
155 Sitis felices et tu simul et tua vita  
Et domus ipsa, in qua lusimus et domina,  
159 Et longe ante omnes mihi quae me carier ipso est,  
Lux mea, qua viva vivere dulce mihi est.

---

LXIX.

- Noli admirari, quare tibi femina nulla,  
Rufe, velit tenerum supposuisse femur,  
Non si illam rarae labefactes munere vestis  
Aut perluciduli deliciis lapidis,  
5 Laedit te quaedam mala fabula, qua tibi fertur  
Valle sub alarum trux habitare caper.  
Hunc metuunt omnes. neque mirum: nam mala valde  
est

- Bestia, nec quicum bella puella cubet.  
 Quare aut crudelem nasorum interfice pestem,  
 10 Aut admirari desine cur fugiunt.

## LXX.

Nulli se dicit mulier mea nubere malle  
 Quam mihi, non si se Iuppiter ipse petat.  
 Dicit: sed mulier cupido quod dicit amanti,  
 In vento et rapida scribere oportet aqua.

## LXXI.

- \* Si qua viro bono sacrorum obstitit hircus,  
 Aut si quem merito tarda podagra secat,  
 Aemulus iste tuus, qui vestrum exercet amorem,  
 Mirifice est fato nactus utrunque malum.  
 5 Nam quotiens fuit, totiens ulciscitur ambos:  
 Illam affligit odore, ipse perit podagra.

## LXXII.

- Dicebas quondam solum te nosse Catullum,  
 Lesbia, nec prae me velle tenere Iovem.  
 Dilexi tum te non tantum ut vulgus amicam,  
 Sed pater ut gnatos diligit et generos.  
 5 Nunc te cognovi: quare etsi impensius uror,  
 Multo mi tamen es vilior et levior.  
 Qui potis est? inquis. quod amantem iniuria talis  
 Cogit amare magis, sed bene velle minus.

## LXXIII.

- Desine de quoquam quicquam bene velle mereri  
 Aut aliquem fieri posse putare pium.  
 Omnia sunt ingrata, nihil fecisse benigne:  
 Immo etiam taedet, \* stetque magisque magis  
 5 Ut mihi, quem nemo gravius nec acerbius urget,  
 Quam modo qui me unum atque unicum amicum  
 habuit.

## LXXIV.

- Gellius audierat patrum obiurgare solere,  
 Siquis delicias diceret aut faceret.  
 Hoc ne ipsi accideret, patrum perdepsit ipsam  
 Uxorem et patrum reddidit Harpocratem.  
 5 Quod voluit fecit: nam, quamvis inrumet ipsum  
 Nunc patrum, verbum non faciet patruus.

## LXXV.

- Huc est mens deducta tua, mea Lesbia, culpa,  
 Atque ita se officio perdidit ipsa suo,  
 Ut iam nec bene velle queat tibi, si optima fias,  
 Nec desistere amare, omnia si facias.

## LXXVI.

- Siqua recordanti benefacta priora voluptas  
 Est homini, cum se cogitat esse pium,  
 Nec sanctam violasse fidem, nec foedere in ullo  
 Divum ad fallendos numine abusum homines,  
 5 Multa parata manent in longa aetate, Catulle,  
 Ex hoc ingrato gaudia amore tibi.  
 Nam quaecunque homines bene cuiquam aut dicere  
 possunt  
 Aut facere, haec a te dictaque factaque sunt,  
 Omnia quae ingratae perierunt credita menti.  
 10 Quare iam te cur amplius excrucies?  
 Quin tu animo affirmas teque istinc usque reduces,  
 Et deis invitis desinis esse miser?  
 Difficile est longum subito deponere amorem.  
 Difficile est, verum hoc qua lubet efficias:  
 15 Una salus haec est, hoc est tibi pervincendum:  
 Hoc facias, sive id non pote sive pote.  
 O dii, si vestrum est misereri, aut si quibus un-  
 quam  
 Extremam iam ipsa morte tulistis opem,  
 Me miserum aspiciate (et, si vitam puriter egi,

- 20 Eripite hanc pestem perniciemque mihi),  
 Hei mihi surrepens imos ut torpor in artus  
 Expulit ex omni pectore laetitia.  
 Non iam illud quaero, contra ut me diligat illa,  
 Aut, quod non potis est, esse pudica velit:  
 25 Ipse valere opto et tetrum hunc deponere morbum.  
 O dii, reddite mi hoc pro pietate mea.

## LXXVII.

- Rufe mihi frustra ac nequicquam credite amico  
 (Frustra? immo magno cum pretio atque malo),  
 Siccine subrepsi mei, atque intestina perurens  
 Sic misero eripuisti omnia? nostra bona  
 5 Eripuisti, heu heu nostrae crudele venenum  
 Vitae, heu heu nostrae pestis amicitiae.  
 Sed nunc id doleo, quod purae pura puellae  
 Savia conminxit spurca saliva tua.  
 Verum id non impune feres: nam te omnia saecula  
 10 Noscent, et qui sis fama loquetur anus.

## LXXVIII.

- Gallus habet fratres, quorum est lepidissima coniunx  
 Alterius, lepidus filius alterius.  
 Gallus homo est bellus: nam dulces iungit amores,  
 Cum puero ut bello bella puella cubet.  
 5 Gallus homo est stultus nec se videt esse maritum,  
 Qui patruus patrum monstret adulterium.

## LXXIX.

- Lesbius est pulcher: quid ni? quem Lesbia malit  
 Quam te cum tota gente, Catulle, tua.  
 Sed tamen hic pulcher vendat cum gente Catullum,  
 Si tria natorum suavia reppererit.

## LXXX.

- Quid dicam, Gelli, quare rosea ista labella  
 Hiberna fiant candidiora nive,  
 Mane domo cum exis et cum te octava quiete  
 E molli longo suscitatur hora die?  
 5 Nescio quid certe est: an vere fama susurrat  
 Grandia te mediis tenta vorare viri?  
 Sic certe est: clamant Victoris rupta miselli  
 Ilia, et emulso labra notata sero.

## LXXXI.

- Nemone in tanto potuit populo esse, Iuventi,  
 Bellus homo, quem tu diligere inciperes,  
 Praeterquam iste tuus moribunda a sede Pisauri  
 Hospes inaurata pallidior statua,  
 5 Qui tibi nunc cordi est, quem tu praeponere nobis  
 Audes, et nescis quod facinus facias.

## LXXXII.

- Quinti, si tibi vis oculos debere Catullum  
 Aut aliud si quid carius est oculis,  
 Eripere ei noli, multo quod carius illi  
 Est oculis sei quid carius est oculis.

## LXXXIII.

- Lesbia mi praesente viro mala plurima dicit:  
 Haec illi fatuo maxima laetitia est.  
 Mule, nihil sentis. si nostri oblita taceret,  
 Sana esset: nunc quod gannit et obloquitur,  
 5 Non solum meminit, sed, quae multo acrior est res,  
 Irata est, hoc est, uritur et loquitur.

## LXXXIV.

- Chommoda dicebat, si quando commoda vellet  
 Dicere, et insidias Arrius hinsidias,

- Et tum mirifice sperabat se esse locutum,  
 Cum quantum poterat dixerat hinsidias.  
 5 Credo, sic mater, sic Liber avunculus eius,  
 Sic maternus avus dixerat atque avia.  
 Hoc misso in Syriam requierant omnibus aures:  
 Audibant eadem haec leniter et leviter,  
 Nec sibi postilla metuebant talia verba,  
 10 Cum subito affertur nuntius horribilis,  
 Ionios fluctus, posquam illuc Arrius isset,  
 Iam non Ionios esse, sed Hionios.

## LXXXV. ~

- Odi et amo. quare id faciam, fortasse requiris.  
 Nescio sed fieri sentio et excrucior.

## LXXXVI.

- Quintia formosa est multis, mihi candida, longa,  
 Recta est. haec ego sic singula confiteor,  
 Totum illud formosa nego: nam nulla venustas,  
 Nulla in tam magno est corpore mica salis.  
 5 Lesbia formosa est, quae cum pulcherrima tota est,  
 Tum omnibus una omnes surripuit Veneres.

## LXXXVII.

- Nulla potest mulier tantum se dicere amatam  
 Vere, quantum a me Lesbia amata mea es.  
 Nulla fides nullo fuit unquam foedere tanta,  
 Quanta in amore tuo ex parte reperta mea est.

## LXXXVIII.

- Quid facit is, Gelli, qui cum matre atque sorore  
 Prurit et abiectis pervigilat tunicis?  
 Quid facit is, patrum qui non sinit esse maritum?  
 Ecqui scis quantum suscipiat sceleris?  
 5 Suscipit, o Gelli, quantum non ultima Tethys

Nec genitor Nympharum abluit Oceanus:  
 Nam nihil est quicquam sceleris, quod prodeat ultra,  
 Non si demisso se ipse voret capite.

## LXXXIX.

Gellius est tenuis: quid ni? cui tam bona mater  
 Tamque valens vivat tamque venusta soror  
 Tamque bonus patruus tamque omnia plena puellis  
 Cognatis, quare is desinat esse macer?  
 5 Qui ut nihil attingat, nisi quod fas tangere non est,  
 Quantumvis quare sit macer invenies.

## XC.

Nascatur Magus ex Gelli matrisque nefando  
 Coniugio et discat Persicum aruspicum:  
 Nam Magus ex matre et gnato gignatur oportet,  
 Si vera est Persarum impia religio,  
 5 Gnatus ut accepto veneretur carmine divos  
 Omentum in flamma pingue liquefaciens.

## XCI.

Non ideo, Gelli, sperabam te mihi fidum  
 In misero hoc nostro, hoc perduto amore fore,  
 Quod te cognossem bene constantemve putarem  
 Aut posse a turpi mentem inhibere probro,  
 5 Sed neque quod matrem nec germanam esse videbam  
 Hanc tibi, cuius me magnus edebat amor.  
 Et quamvis tecum multo coniungerer usu,  
 Non satis id causae credideram esse tibi.  
 Tu satis id duxti: tantum tibi gaudium in omni  
 10 Culpa est, in quacunque est aliquid sceleris.

## XCII.

Lesbia mi dicit semper male nec tacet unquam  
 De me: Lesbia me dispeream nisi amat.

\* Quo signo? quia sunt totidem mea: deprecor illam  
Assidue, verum dispeream nisi amo.

---

XCIII.

Nil nimium studeo, Caesar, tibi velle placere,  
Nec scire utrum sis albus an ater homo.

---

XCIV.

Mentula moechatur. moechatur mentula certe.  
Hoc est, quod dicunt, ipsa olera olla legit.

---

XCV.

Zmyrna mei Cinnae nonam post denique messem  
Quam coepta est nonamque edita post hiemem,  
Millia cum interea quingenta Hortensius uno  
.....  
5 Zmyrna cavas Satrachi penitus mittetur ad undas,  
Zmyrnam cana diu saecula pervoluent.  
At Volusi annales Paduam morientur ad ipsam  
Et laxas scombris saepe dabunt tunicas.  
Parva mei mihi sint cordi monumenta sodalis,  
10 At populus tumido gaudeat Antimacho.

---

XCVI.

Si quicquam mutis gratum acceptumve sepulcris  
Accidere a nostro, Calve, dolore potest,  
Quo desiderio veteres renovamus amores  
Atque olim missas flemus amicitias,  
5 Certe non tanto mors immatura dolori est  
Quintilliae, quantum gaudet amore tuo.

---

XCVII.

Non (ita me dii ament) quicquam referre putavi,  
Utrum os an culum olfacerem Aemilio.



- Nihilò mundius hoc, nihiloque immundior ille,  
 Verum etiam culus mundior et melior:  
 5 Nam sine dentibus hic: dentis os sesquipedalis,  
 Gingivas vero ploxemi habet veteris,  
 Praeterea rictum qualem diffissus in aestu  
 Meientis mulae cannus habere solet.  
 Hic futuit multas et se facit esse venustum,  
 10 Et non pristino traditur atque asino?  
 Quem siqua attingit, non illam posse putemus  
 Aegroti culum lingere carnificis?

---

 XCVIII.

- In te, si in quenquam, dici pote, putide Victi,  
 Id quod verbosis dicitur et fatulis.  
 Ista cum lingua, si usus veniat tibi, possis  
 Culos et crepidas lingere carbatinas.  
 5 Si nos omnino vis omnes perdere, Victi,  
 Hiscas: omnino quod cupis efficies.

---

 XCIX.

- Surripui tibi, tum ludis, mellite Iuventi,  
 Suaviolum dulci dulcius ambrosia.  
 Verum id non impune tuli: namque amplius horam  
 Suffixum in summa me memini esse cruce,  
 5 Dum tibi me purgo nec possum fletibus ullis  
 Tantillum vestrae demere saevitiae.  
 Nam simul id factum est, multis diluta labella  
 Abstersti guttis omnibus articulis,  
 Ne quicquam nostro contractum ex ore maneret,  
 10 Tanquam conmixtae spurca saliva lupae.  
 Praeterea infesto miserum me tradere Amori  
 Non cessasti omnique excruciare modo,  
 Ut mi ex ambrosia mutatum iam foret illud  
 Suaviolum tristi tristius helleboro.  
 15 Quam quoniam poenam misero proponis amori,  
 Nunquam iam posthac basia surripiam.
-

## C.

- Caelius Aufleum et Quintius Aufilenam**  
**Flos Veronensum depereunt iuvenum,**  
**Hic fratrem, ille sororem. hoc est, quod dicitur, illud**  
**Fraternum vere dulce sodalitiū.**  
 5 **Cui faveam potius? Caeli, tibi: nam tua nobis**  
**\* Perfecta exigitur unica amicitia,**  
**Cum vesana meas torreret flamma medullas.**  
**Sis felix, Caeli, sis in amore potens.**
- 

## CI.

- Multas per gentes et multa per aequora vectus**  
**Advenio has miseras, frater, ad inferias,**  
**Ut te postremo donarem munere mortis**  
**Et mutam nequicquam alloquerer cinerem,**  
 5 **Quandoquidem fortuna mihi tete abstulit ipsum,**  
**Heu miser indigne frater adempte mihi.**  
**Nunc tamen in terra hac prisco quae more parentum**  
**Tradita sunt tristis munera ad inferias,**  
**Accipe fraterno multum manantia fletu,**  
 10 **Atque in perpetuum, frater, ave atque vale.**
- 

## CII.

- Si quicquam tacito commissum est fido ab amico,**  
**Cuius sit penitus nota fides animi,**  
**Meque esse invenies illorum iure sacratum,**  
**Corneli, et factum me esse puta Harpocratem.**
- 

## CIII.

- Aut sodes mihi redde decem sestertia, Silo,**  
**Deinde esto quamvis saevus et indomitus:**  
**Aut, si te nummi delectant, desine quaeso**  
**Leno esse atque idem saevus et indomitus.**
-

## CIV.

Credis me potuisse meae maledicere vitae,  
 Ambobus mihi quae carior est oculis?  
 Non potui, nec, si possem, tam perditae amarem:  
 Sed tu cum Tappone omnia monstra facis.

---

## CV.

Mentula conatur Pipleum scandere montem:  
 Musae furcillis praecipitem eliciunt.

---

## CVI.

Cum puero bello praeconem qui videt esse,  
 Quid credat, nisi se vendere discupere?

---

## CVII.

Si quicquam cupido optantique obtigit unquam  
 Insperanti, hoc est gratum animo proprie.  
 Quare hoc est gratum nobis quoque carius auro,  
 Quod te restituis, Lesbia, mi cupido.  
 5 Restituis cupido atque insperanti ipsa refers te  
 Nobis. o lucem candidiore nota!  
 Quis me uno vivit felicior, aut magis . . . .  
 Optandus vita dicere quis poterit?

---

## CVIII.

Si Comini populi arbitrio tua cana senectus  
 Spurcata impuris moribus intereat,  
 Non equidem dubito quin primum inimica bonorum  
 Lingua execta avido sit data vulturio,  
 5 Effossos oculos voret atro gutture corvus,  
 Intestina canes, cetera membra lupi.

---

## CIX.

Iucundum, mea vita, mihi proponis amorem  
 Hunc nostrum inter nos perpetuumque fore.

Dii magni, facite ut vere promittere possit,  
 Atque id sincere dicat et ex animo,  
 5 Ut liceat nobis tota perducere vita  
 Aeternum hoc sanctae foedus amicitiae.

---

## CX.

Auflena, bonae semper laudantur amicae:  
 Accipiunt pretium, quae facere instituunt.  
 Tu, quod promisti, mihi quod mentita inimica es,  
 Quod nec das nec fers, saepe facis facinus.  
 5 Aut facere ingenuae est, aut non promisse pudicae,  
 Auflena, fuit: sed data corripere  
 Fraudando officiis plus quam meretricis avarae,  
 Quae sese toto corpore prostituit.

---

## CXI.

Auflena, viro contentam vivere solo,  
 Nuptarum laus e laudibus eximiis:  
 Sed cuius quamvis potius succumbere par est,  
 Quam matrem fratres concipere ex patruo.

---

## CXII.

Multus homo est Naso nec tecum multus homo \* sed  
 Descendit: Naso, multus es et pathicus.

---

## CXIII.

Consule Pompeio primum duo, Cinna, solebant  
 \* Mecilia: facto consule nunc iterum  
 Manserunt duo, sed creverunt millia in unum  
 Singula. fecundum semen adulterio.

---

## CXIV.

Firmanus saltu non falso Mentula dives  
 Fertur, qui tot res in se habet egregias,

- Aucupium, omne genus piscis, prata, arva ferasque.  
Nequicquam: fructus sumptibus exuperat.  
5 Quare concedo sit dives, dum omnia desint.  
Saltum laudemus, dum modo ipse egest.
- 

## CXV.

- Mentula habet noster triginta iugera prati;  
Quadraginta arvi: cetera sunt maria.  
Cur non divitiis Croesum superare potis sit,  
Uno qui in saltu totmoda possideat,  
5 Prata, arva, ingentes silvas latasque paludes  
Usque ad Hyperboreos et mare ad Oceanum?  
Omnia magna haec sunt, tamen ipse es maximus ultro,  
Non homo, sed vero mentula magna minax.
- 

## CXVI.

- Saepe tibi studioso animo venante requirens  
Carmina uti possem mittere Battladae,  
Qui te lenirem nobis, neu conarere  
Telis infestum mittere in usque caput,  
5 Hunc video mihi nunc frustra sumptum esse laborem,  
Gelli, nec nostras hic valuisse preces.  
Contra nos tela ista tua evitamus amictu:  
At fixus nostris tu dabi supplicium.
-

## FRAGM E N T A.

---

### I.

At non effugies meos lumbos.

*Commentator Horat. Crug. carm. 1, 16, 24.*

### II.

Hunc lucum tibi dedico consecroque, Priape.  
Qua domus tua Lampsaci est quaque . . . Priape.  
Nam te praecipue in suis urbibus colit ora  
Hellespontia ceteris ostrisior oris.

*Terentianus Maurus v. 2755. Atilius Fortun. p. 2675 seq.  
2697. Marius Victorinus p. 2567. 2598 seqq. Censorinus  
fr. de metr. p. 2727.*

### III.

de meo ligurrire libido est,  
Catullus Priapo (Priapeo); *Nonius* 2, 507.

### IV.

[Animula miserula properiter abiit.]

*Nonius* 11, 63. *Sereno* ascribit *Diomedes* p. 513.

### V.

Lucida qua splendent summi carchesia mali.

*Nonius* 15, 28. *Cinna*, Lucida confulgent alti carchesia mali:  
*Isidorus orig.* 19, 2.

### VI.

Falleret indepreensus et irremeabilis error.

Est autem versus Catulli. *Servius ad Virgil. Aen.* 5, 591.

## VII.

*Cannabia exc* . . . . . *carbasus Euros*

*Umbrosa c* . . . . . *an* . . . .

*Carbasus* et masculino et feminino genere dictus est. *Catullus: Interp<sup>t</sup>. Virgil. Veron. ad Aen. 8, 34.*

## VIII.

Quo te carmine dicam, *Rhaetica*? Hanc uvam Cato praecipue laudat in libris quos scripsit ad filium: contra *Catullus* eam vituperat et dicit nulli rei aptam esse, miraturque cur eam laudaverit Cato. *Servius ad georg. 2, 95.*

## IX.

Hinc *Theocriti* apud Graecos, *Catulli* apud nos proximeque *Virgilii* incantamentorum amatoria imitatio. *Plinius hist. nat. 28, 2. s. 4.*

## X.

Hinc etiam *Catullus* cavere dixit. *Servius ad Aen. 4, 409.*

## XI.

Notandum sane etiam de iride arcum genere masculino dicere *Virgilium*: *Catullus* et alii genere feminino ponunt. *Servius ad Aen. 5, 610.*

---

# ALBII TIBULLI

LIBRI QUATTUOR.

---

RECOGNOVIT

AUGUSTUS ROSSBACH.



LIPSIAE

SUMPTIBUS ET TYPIS B. G. TEUBNERI

MDCCCLXVI.



## DOMITII MARSI.

Te quoque Virgilio comitem non aequa, Tibulle,  
Mors iuvenem campos misit ad Elysios,  
Ne foret, aut elegis molles qui fleret amores  
Aut caneret forti regia bella pede.

---

Albius Tibullus eques Romanus, insignis forma cultuque corporis observabilis, ante alios Corvinum Messalam oratorem dilexit, cuius et contubernalis Aquitanico bello militaribus donis donatus est. Hic multorum iudicio principem inter elegiographos obtinet locum, epistolae quoque eius amatoriae, quamquam breves, omnino utiles sunt. Obiit adolescens tempore Virgilii, ut indicat epigramma.

---

# DIVERSITAS

EDITIONIS LACHMANNIANAE.

---

## Lib. I.

- I, 34 *de magno praeda petenda grege] est* omittunt fragm.  
Frising. *de magno est* PEWA, *grege est* D\*).  
37 *de paupere* DWA, *e paupere* PE.  
44 *Sei licet* revocavi, cf. 1, 8, 49. II, 6, 16. *sci licet libri,*  
*si licet* vulgo.  
II, 17 *temptat* D, *tentat* ceteri.  
78 *posset* PED A, *possit* W.  
82 *diripuisse* libri, *deripuisse* Itali.  
88 *uni* Vossius, *unus* aut *vanus* libri.  
III, 14 *prospiceret* correxi, *respiceret* libri plerique, *despi-*  
*ceret* alii, *respueretque* Zwicav. I.  
18 *Saturnive* Broukhusius, *Saturni* libri, *Saturni* aut  
Itali.  
49 *At* correxi, *et* libri, *nunc* Itali.  
63 *Ac* correxi, ed. vett., *Hac* PW, *At* EDA Lachm.  
*Hic* Itali.  
73 *temptare* D, *tentare* reliqui.  
IV, 30 *alta* libri, *alba* Itali.  
39 *temptare* D, *tentare* reliqui.  
55 *afferet* libri, *offeret* Itali.  
V, 42 *meam* vulgo, *mea* libri.  
61 interpunctionem mutavi.  
VI, 12 *tunc* PE, *nunc* W, v. 13 *tunc* PEW, *tum* DA.  
45—50 mutata interpunctione uncis inclusi, cf. II, 5, 23.

---

\*) P(arisinus 7989), E(boracensis), W(ittianus), D(atanus),  
A(skewianus), C(uiacianus).

- 48 *Sanguine* et P, *Sanguineque* reliqui.  
 80 *dente* Statius, *ducta* libri.
- VII, 16 *alat* Itali, *arat* libri.  
 49 *et centum ludis* Statius, *et centum ludos* libri, *et genium ludo* Heynius. Mihi haec sic corrigenda videntur: *Huc ades ad centum ludos*.
- VIII, 11 *fuco* PEDA, *suco* W.  
 21 *temptat* D, *tental* ceteri.  
 36 *tumel* Scaliger, *timel* libri.  
 49 *Sei Marathum torques* ego correxi, *Seu Marathum torques* libri plerique, *Neu Marathum torque* Scaliger, quem editiones secutae sunt.
- IX, 25 *lingua* Hauptius, *leva* EWA, *lene* PD.  
 X, 7 Interpunctionem mutavi.  
 26 *rustica* libri plerique, *mystica* E.  
 33 *accersere* PW, *accrescere* DA, *arcescere* A, *arcescere* vulgo.  
 36 *turpis* Itali, *puppis* libri.

## Lib. II.

- I, 21 *Tunc* libri, *tum* Puccius.  
 58 *Dedi corruptam librorum scripturam. opes* Wassenberghius, *curtas auxerat hircus opes* Hauptius, *vilis tum erat hircus opes* Bergkii.
- 66 *appulso* libri, *applauso* Puccius.  
 67 *Ipse quoque inter agros* libri, *Ipse interque greges* Puccius.
- 89 *furvis* correctum in lib. nonnullis, *fulvis* lib. plerique.
- II, 9 *Cornute* PED, *Cherinte* aut *Chorinthe* WA, *Cerinthe* vulgo.
- III, 1 idem.  
 47 *At tibi* libri. Fortasse *At mihi* cum Scaligero corrigendum.  
 59 *Nota loquor* libri. Fortasse *vota* vel *vana loquor*; ego vix crediderim locum lacunosum esse.  
 61 *Sit* correxi mutata interpunctione, *At* libri.  
 62 *Terra* libri, *certa* Puccius.

- IV, 23 *focis insignia sacris* D W A, cf. I, 2, 82. *sacris ... fanis* P, *sacris ... donis* E.
- V, 4 *mea* correxit in annotatione Lachmannus, *meas* libri plerique.
- 34 *pulla ... aqua* libri h. e. sordida, stagnante, *pulsa* Itali.
- 35 *Illac* correxi, *illaque* P, *illa* ceteri.
- 67 Interpuncti post *Marpessia dixit*, non enim vocabula *Marpessia Herophile* coniungenda esse arbitror.
- 68 *grata quod admonuit* P D W A, *grataque quod monuit* E.
75. 76 et 77. 78 transposui.
- 87 *Ac* P D W A, *At* E.
- VI, 16 *Sei licet* revocavi, *scilicet* libri, *si licet* vulgo. Cf. I, 1, 44.

## Lib. III.

- I, 21 *larga* P E, *longa* D A W.
- II, 21 *velis* Itali, *ventis* libri.
- III, 2 *Multaque cum blanda* transposuit Bergkius, cf. III, 6, 46, *Blandaque cum multa* libri.
- IV, 4 *nobis* Guyetus, *vois* libri.
- 10 Interpunctionem mutavi, coniunge *hominum genus placent*.
- V, 3 *proxima* Scioppius, *maxima* libri.
- 7 *virorum* Scaliger, *deorum* libri.
- VI, 7 *durum curae genus*] Fortasse *curae, durum genus*, Bellovacensis.
- 21 *Convenit ... severos* coniecit in annotatione Lachmannus, *non venit ... severus* libri.
- 46 *sordida* libri, *perfida* coniecit Bergkius.

## Lib. IV.

- I, 1 *me* vulgo, *mea* libri, *me et* coniecit Lachmannus.
- 91 *celeremque* Ayrmannus, *celeremve* libri.
- 94 *convertere* Crusius, *contendere* libri.
- 145 Uncos, quibus Lachmannus *Ultima ... arva* incluserat, removi. Est enim post vocabulum *nec* v. 144 subaudiendum *qua* ex versu 143. *Phoebo ut tenet* Bergkius.

175 *tulerint* Bergkius, *ierint* libri, *cierint* Lachmannus.

IV, 6 *candida* Heynius, *languida* Bergkius, *pallida* libri.

VI, 16 *optat* libri, *optet* Itali.

18 Post hunc versum plene interpunxi.

19 *Sis iuveni grata: adveniet*] *Sis* C recte, invocatur enim Natalis Iuno, ut v. 7 *At tu sancta fave iuveni.* — *adveniet* E. *Si iuveni grata veniet* B W A, *gratae* in annotatione coniecit Lachmannus.

VII. *Sulpiciae* adscripsi: in libro C *Sulpicia* legitur post hoc carmen, ego praemisi.

XI, 5 *quum* correxi, *quam* D, *quid* ceteri, *si* Puccius.

XIII, 16 *tibi* libri, *mihi* Scaliger.

---

# ALBII TIBULLI

## LIBER PRIMUS.

### I.

Divitias alius fulvo sibi congerat auro  
Et teneat culti iugera multa soli,  
Quem labor assiduus vicino terreat hoste,  
Marta cui somnos classica pulsa fugent:  
Me mea paupertas vitae traducat inertī, 5  
Dum meus assiduo luceat igne focus.  
Ipse seram teneras maturo tempore vites  
Rusticus et facili grandia poma manu:  
Nec spes destituat, sed frugum semper acervos  
Praebeat et pleno pinguis musta lacu. 10  
Nam veneror, seu stipes habet desertus in agris  
Seu vetus in trivio florea sarta lapis:  
Et quodcunque mihi pomum novus educat annus,  
Libatum agricolae ponitur ante deum.  
Flava Ceres, tibi sit nostro de rure corona 15  
Spicea, quae templi pendeat ante fores:  
Pomosisque ruber custos ponatur in hortis,  
Terreat ut saeva falce Priapus aves.  
Vos quoque, felices quondam nunc pauperis agri  
Custodes, fertis munera vestra, Lares. 20  
Tunc vitula innumeros lustrabat caesa iuencos:  
Nunc agna exigui est hostia parva soli,  
Agnae cadet vobis, quam circum rustica pubes  
Clamet 'io messes et bona vina date'.  
Iam modo non possum contentus vivere parvo 25

Nec semper longae deditus esse viae,  
 Sed Canis aëstivōs ortūs vitare sub umbra  
 Arboris ad rivos praetereuntis aquae.  
 Nec tamen interdum pudeat tenuisse bidentes  
 Aut stimulo tardos increpuisse boves, 30  
 Non agnamve sinu pigeat fetumve capellae  
 Desertum oblita matre referre domum.  
 At vos exiguo pecori, furesque lupique,  
 Parcite: de magno praeda petenda grege.  
 Hic ego pastoremque meum lustrare quot annis 35  
 Et placidam soleo spargere lacte Palem.  
 Adsitis, divi, nec vos de paupere mensa  
 Dona nec e puris spernite fictilibus.  
 Fictilia antiquus primum sibi fecit agrestis  
 Pocula, de facili composuitque luto. 40  
 Non ego divitias patrum fructusque requiro,  
 Quos tulit antiquo condita messis avo:  
 Parva seges satis est, satis est, requiescere lecto  
 Sei licet et solito membra levare toro.  
 Quam iuvat immites ventos audire cubantem 45  
 Et dominam tenero detinuisse sinu  
 Aut, gelidas hibernus aquas cum fuderit Auster,  
 Securum somnos imbre iuvante sequi!  
 Hoc mihi contingat: sit dives iure, furorem  
 Qui maris et tristes ferre potest pluvias. 50  
 O quantum est auri pereat potiusque smaragdi,  
 Quam fleat ob nostras ulla puella vias.  
 Te bellare decet terra, Messala, marique,  
 Ut domus hostiles praeferat exuvias:  
 Me retinēt vinctum formosae vincla puellae, 55  
 Et sedeo duras ianitor ante fores.  
 Non ego laudari curo, mea Delia: tecum  
 Dum modo sim, quaeso segnis inersque vocer.  
 Te spectem, suprema mihi cum venerit hora,  
 Te teneam moriens deficiente manu. 60  
 Flebis et arsuro positum me, Delia, lecto,  
 Tristibus et lacrimis oscula mixta dabis.  
 Flebis: non tua sunt duro praecordia ferro

Vinc̃ta, nec in tenero stat tibi corde silex.  
 Illo non iuvenis poterit de funere quisquam 65  
 Lumina, non virgo, sicca referre domum.  
 Tu Manes ne laede meos, sed parce solutis  
 Crinibus et teneris, Delia, parce genis.  
 Interea, dum fata sinunt, iungamus amores:  
 Iam veniet tenebris Mors adoperta caput, 70  
 Iam subrepet iners aetas, neque amare decebit,  
 Dicerè nec cano blanditias capiti.  
 Nunc levis est tractanda Venus, dum frangere postes  
 Non pudet et rixas inscruisse iuvat.  
 Hic ego dux milesque bonus: vos, signa tubaeque, 75  
 Ite procul, cupidis vulnera ferte viris,  
 Ferte et opes: ego composito securus acervo  
 Despiciam dites despiciamque famem.

## II.

Adde merum vinoque novos compesce dolores,  
 Occupet ut fessi lumina victa sopor:  
 Neu quisquam multo perfusum tempora Baccho  
 Excitet, infelix dum requiescit amor.  
 Nam posita est nostrae custodia saeva puellae, 5  
 Clauditur et dura ianua firma sera.  
 Ianua difficilis dominae, te verberet imber,  
 Te Iovis imperio fulmina missa petant.  
 Ianua, iam pateas uni mihi, victa querelis,  
 Neu furtim verso cardine aperta sones. 10  
 Et mala siqua tibi dixit dementia nostra,  
 Ignoscas: capiti sint precor illa meo.  
 Te meminisse decet, quae plurima voce peregi  
 Supplice, cum posti florida sarta darem.  
 Tu quoque ne timide custodes, Delia, falle. 15  
 Audendum est: fortes adiuvat ipsa Venus.  
 Illa favet, seu quis iuvenis nova limina temptat,  
 Seu reserat fixo dente puella fores:  
 Illa docet furtim molli decedere lecto,  
 Illa pedem nullo ponere posse sono, 20



Illa viro coram nutus conferre loquaces  
 Blandaue compositis abdere verba notis.  
 Nec docet hoc omnis, sed quos nec inertia tardat  
 Nec vetat obscura surgere nocte timor.  
 En ego cum tenebris tota vagor anxius urbe,  
 . . . . .  
 Nec sinit occurrat quisquam, qui corpora ferro 25  
 Vulneret aut rapta praemia veste petat.  
 Quisquis amore tenetur, eat tutusque sacerque  
 Qualibet: insidias non timuisse decet.  
 Non mihi pigra nocent hibernae frigora noctis,  
 Non mihi, cum multa decidit imber aqua. 30  
 Non labor hic laedit, reseret modo Delia postes  
 Et vocet ad digiti me taciturna sonum.  
 Parcite luminibus, seu vir seu femina fiat  
 Obvia: celari vult sua furta Venus.  
 Neu strepitu terrete pedum, neu quaerite nomen, 35  
 Neu prope fulgenti lumina ferte face.  
 Siquis et imprudens aspexerit, occulat ille  
 Perque deos omnes se meminisse neget:  
 Nam fuerit quicumque loquax, is sanguine natam,  
 Is Venerem e rapido sentiet esse mari. 40  
 Nec tamen huic credet coniunx tuus, ut mihi verax  
 Pollicita est magico saga ministerio.  
 Hanc ego de caelo ducentem sidera vidi,  
 Fluminis haec rapidi carmine vertit iter,  
 Haec cantu finditque solum Manesque sepulcris 45  
 Elicit et tepido devocat ossa rogo:  
 Iam tenet infernas magico stridore catervas,  
 Iam iubet aspersas lacte referre pedem.  
 Cum libet, haec tristi depellit nubila caelo:  
 Cum libet, aestivo convocat orbe nives. 50  
 Sola tenere malas Medae dicitur herbas,  
 Sola feros Hecatae perdomuisse canes.  
 Haec mihi composuit cantus, quis fallere posses:  
 Ter cane, ter dictis despue carminibus.  
 Ille nihil poterit de nobis credere cuiquam, 55  
 Non sibi, si in molli viderit ipse toro.

Tu tamen abstineas aliis: nam cetera cernet  
 Omnia: de me uno sentiet ipse nihil.  
 Quid credam? nempe haec eadem se dixit amores  
 Cantibus aut herbis solvere posse meos, 60  
 Et me lustravit taedis, et nocte serena  
 Concidit ad magicos hostia pulla deos.  
 Non ego totus abesset amor, sed mutuus esset,  
 Orabam, nec te posse carere velim.  
 Ferreus ille fuit, qui, te cum posset habere, 65  
 Maluerit praedas stultus et arma sequi.  
 Ille licet Cilicum victas agat ante catervas,  
 Ponat et in capto Martia castra solo,  
 Totus et argento contextus, totus et auro,  
 Insideat celeri conspiciendus equo, 70  
 Ipse boves mea si tecum modo Delia possim  
 Iungere et in solito pascere monte pecus:  
 Et te dum liceat teneris retinere lacertis,  
 Mollis et inculta sit mihi somnus humo.  
 Quid Tyrio recubare toro sine amore secundo 75  
 Prodest, cum fletu nox vigilanda venit?  
 Nam neque tum plumae nec stragula picta soporem  
 Nec sonitus placidae ducere posset aquae.  
 Num Veneris magnae violavi numina verbo,  
 Et mea nunc poenas impia lingua luit? 80  
 Num feror incestus sedes adiisse deorum  
 Sertaque de sanctis diripuisse focis?  
 Non ego, si merui, dubitem procumbere templis  
 Et dare sacratis oscula liminibus,  
 Non ego tellurem genibus perrepere supplex 85  
 Et miserum sancto tundere poste caput.  
 At tu, qui laetus rides mala nostra, caveto  
 Mox tibi: non unus saeviet usque deus.  
 Vidi ego, qui iuvenum miseros lusisset amores,  
 Post Veneris vinclis subdere colla senem 90  
 Et sibi blanditias tremula componere voce  
 Et manibus canas fingere velle comas:  
 Stare nec ante fores puduit caraeve puellae  
 Ancillam medio detinuisse foro.

Hunc puer, hunc iuvenis turba circumterit arta, 95  
 Despuat in molles et sibi quisque sinus.  
 At mihi parce, Venus: semper tibi dedita servit  
 Mens mea: quid messes uris acerba tuas?

## III.

Ibitis Aegaeas sine me, Messala, per undas,  
 O utinam memores ipse cohorsque mei:  
 Me tenet ignotis aegrum Phaeacia terris:  
 Abstineas avidas, Mors precor atra, manus.  
 Abstineas, Mors atra, precor: non hic mihi mater 5  
 Quae legat in maestos ossa perusta sinus,  
 Non soror, Assyrios cineri quae dedat odores  
 Et fleat effusis ante sepulcra comis,  
 Delia non usquam; quae me cum mitteret urbe,  
 Dicitur ante omnes consuluisse deos. 10  
 Illa sacras pueri sortes ter sustulit: illi  
 Rettulit e triviis omina certa puer.  
 Cuncta dabant reditus: tamen est deterrita nunquam;  
 Quin fieret nostras prospiceretque vias.  
 Ipse ego solator, cum iam mandata dedissem, 15  
 Quaerebam tardas anxius usque moras.  
 Aut ego sum causatus aves aut omina dira,  
 Saturnive sacram me tenuisse diem.  
 O quotiens ingressus iter mihi tristia dixi  
 Offensum in porta signa dedisse pedem! 20  
 Audeat invito ne quis discedere Amore,  
 Aut sciat egressum se prohibente deo.  
 Quid tua nunc Isis mihi, Delia, quid mihi prosunt  
 Illa tua totiens aera repulsa manu,  
 Quidve, pie dum sacra colis, pureque lavari 25  
 Te (memini) et puro secubuisse toro?  
 Nunc, dea, nunc succurre mihi (nam posse mederi  
 Picta docet templis multa tabella tuis),  
 Ut mea votivas persolvens Delia voces  
 Ante sacras lino tecta fores sedeat 30  
 Bisque die resoluta comas tibi dicere laudes

Insignis turba debeat in Pharia.  
 At mihi contingat patrios celebrare Penates  
 Reddereque antiquo menstrua tura Lari.  
 Quam bene Saturno vivebant rege prius quam 35  
 Tellus in longas est patefacta vias!  
 Nondum caeruleas pinus contempserat undas,  
 Effusum ventis praeberatque sinum,  
 Nec vagus ignotis repetens compendia terris  
 Presserat externa navita merce ratem. 40  
 Illo non validus subiit iuga tempore taurus,  
 Non domito fraenos ore momordit equus,  
 Non domus ulla fores habuit, non fixus in agris,  
 Qui regeret certis finibus arva, lapis.  
 Ipsae mella dabant quercus, ultroque ferebant 45  
 Obvia securis ubera lactis oves.  
 Non acies, non ira fuit, non bella, nec ensem  
 Inmitti saevus duxerat arte faber.  
 At Iove sub domino caedes et vulnera semper,  
 Nunc mare, nunc leti mille repente viae. 50  
 Parce, pater. timidum non me periuria terrent,  
 Non dicta in sanctos impia verba deos.  
 Quod si fatales iam nunc explevimus annos,  
 Fac lapis incriptis stet super ossa notis:  
 'Hic iacet inmitti consumptus morte Tibullus, 55  
 Messalam terra dum sequiturque mari.'  
 Sed me, quod facilis tenero sum semper Amori,  
 Ipsa Venus campos ducet in Elysios.  
 Hic choreae cantusque vigent, passimque vagantes  
 Dulce sonant tenui gutture carmen aves, 60  
 Fert casiam non culta seges, totosque per agros  
 Floret odoratis terra benigna rosis:  
 Ac iuvenum series teneris inmixta puellis  
 Ludit, et assidue praelia miscet Amor.  
 Illic est, cuicumque rapax mors venit amanti, 65  
 Et gerit insigni myrtea sarta coma.  
 At scelerata iacet sedes in nocte profunda  
 Abdita, quam circum flumina nigra sonant:  
 Tisiphoneque impexa feros pro crinibus angues

Saevit, et huc illuc impia turba fugit:	70
Tunc niger in porta serpentum Cerberus ore	
Stridet et aeratas excubat ante fores.	
Illic lunonem temptare Ixionis ausi	
Versantur celeri noxia membra rota,	
Porrectusque novem Tityos per iugera terrae	75
Assiduas atro viscere pascit aves.	
Tantalus est illic, et circum stagna: sed acrem	
Iam iam poturi deserit unda sitim:	
Et Danaï proles, Veneris quod numina laesit,	
In cava Lethaeas dolia portat aquas.	80
Illic sit, quicumque meos violavit amores,	
Optavit lentas et mihi militias.	
At tu casta precor maneat, sanctique pudoris	
Assideat custos sedula semper anus.	
Haec tibi fabellas referat positaque lucerna	85
Deducat plena stamina longa colo,	
Ac circa gravibus pensis affixa puella	
Paulatim somno fessa remittat opus.	
Tum veniam subito, nec quisquam nuntiet ante,	
Sed videar caelo missus adesse tibi.	90
Tunc mihi, qualis eris, longos turbata capillos,	
Obvia nudato, Delia, curre pede.	
Hoc precor, hunc illum nobis Aurora nitentem	
Luciferum roseis candida portet equis.	

## IV.

'Sic umbrosa tibi contingant tecta, Priape,	
Ne capiti soles, ne noceantque nives:	
Quae tua formosos cepit sollertia? certe	
Non tibi barba nitet, non tibi culta coma est,	
Nudus et hibernae producis frigora brumae,	5
Nudus et aestivi tempora sicca Canis.'	
Sic ego: tum Bacchi respondit rustica proles,	
Armatus curva sic mihi falce deus.	
'O fuge te tenerae puerorum credere turbae:	
Nam causam iusti semper amoris habent.	10

Hic placet, angustis quod equum compescit habenis:

Hic placidam niveo pectore pellit aquam:

Hic, quia fortis adest audacia, cepit: at illi

Virgineus teneras stat pudor ante genas.

Sed ne te capiant, primo si forte negabit, 15

Taedia: paulatim sub iuga colla dabit.

Longa dies homini docuit parere leones,

Longa dies molli saxa peredit aqua:

Annus in apricis maturat collibus uvas,

Annus agit certa lucida signa vice. 20

Nec iurare time: Veneris perluria venti

Irrita per terras et freta summa ferunt.

Gratia magna Iovi: vetuit pater ipse valere,

Iurasset cupide quicquid ineptus amor:

Perque suas impune sinit Dictynna sagittas 25

Affirmes, crines perque Minerva suos.

At si tardus eris, errabis: transiet aetas.

Quam cito non segnis stat remeatque dies!

Quam cito purpureos deperdit terra colores,

Quam cito formosas populus alta comas! 30

Quam iacet, infirmæ venere ubi fata senectæ;

Qui prior Eleo est carcere missus equus!

Vidi iam iuvenem, premeret cum senior aetas,

Maerentem stultos præteriisse dies.

Crudeles divi! serpens novus exiit annos: 35

Formae non ullam fata dedere moram.

Solis aeterna est Phoebo Bacchoque iuventa:

Nam decet intonsus crinis utrumque deum.

Tu, puero quodcunque tuo temptare libebit,

Cedas: obsequio plurima vincit amor. 40

Neu comes ire neges, quamvis via longa paretur

Et Canis arenti torreat arva siti,

Quamvis praetexens picea ferrugine caelum

Venturam admittat imbrifer arcus aquam.

Vel si caeruleas puppi volet ire per undas, 45

Ipsæ levem remo per freta pelle ratem.

Nec te paeniteat duros subiisse labores

Aut opera insuetas atteruisse manus,

Nec, velit insidiis altas si claudere valles,  
 Dum placeas, humeri retia ferre negent. 50  
 Si volet arma, levi tentabis ludere dextra:  
 Saepe dabis nudum, vincat ut ille, latus.  
 Tunc tibi mitis erit, rapias tum cara licebit  
 Oscula: pugnabit, sed tamen apta dabit.  
 Rapta dabit primo, mox afferet ipse roganti, 55  
 Post etiam collo se implicuisse volet.  
 Heu male nunc artes miseras haec saecula tractant:  
 Iam tener assuevit munera velle puer.  
 At tua, qui Venerem docuisti vendere primus,  
 Quisquis es, infelix urgeat ossa lapis. 60  
 Pieridas, pueri, doctos et amate poetas,  
 Aurea nec superent munera Pieridas.  
 Carmine purpurea est Nisi coma: carmina ni sint,  
 Ex humero Pelopis non nituisset ebur.  
 Quem referent Musae, vivet, dum robora tellus, 65  
 Dum caelum stellae, dum vehet amnis aquas.  
 At qui non audit Musas, qui vendit amorem,  
 Idaeae currus ille sequatur Opis  
 Et tercentenas erroribus expleat urbis  
 Et secet ad Phrygios vilia membra modos. 70  
 Blanditiis vult esse locum Venus ipsa: querelis  
 Supplicibus, miseris fletibus illa favet.  
 Haec mihi, quae canerem Titio, deus edidit ore:  
 Sed Titium coniunx haec meminisse vetat.  
 Pareat ille suae: vos me celebrate magistrum, 75  
 Quos male habet multa callidus arte puer.  
 Gloria cuique sua est: me, qui spernentur, amantes  
 Consultant: cunctis ianua nostra patet.  
 Tempus erit, cum me Veneris praecepta ferentem  
 Deducat iuvenum sedula turba senem. 80  
 Heu heu quam Marathus lento me torquet amore!  
 Deficiunt artes, deficiuntque doli.  
 Parce, puer, quaeso, ne turpis fabula fiam,  
 Cum mea ridebunt vana magisteria.

---

## V.

Asper eram et bene discidium me ferre loquebar:  
 At mihi nunc longe gloria fortis abest.  
 Namque agor, ut per plana citus sola verbere turben,  
 Quem celer assueta versat ab arte puer.  
 Ure ferum et torque, libeat ne dicere quicquam 5  
 Magnificum post haec: horrida verba doma.  
 Parce tamen, per te furtivi foedera lecti,  
 Per Venerem quaeso compositumque caput.  
 Ille ego, cum tristi morbo defessa iaceres,  
 Te dicor votis eripuisse meis, 10  
 Ipseque te circum lustravi sulfure puro,  
 Carmine cum magico praecinuisset anus:  
 Ipse procuravi ne possent saeva nocere  
 Somnia, ter sancta deveneranda mola:  
 Ipse ego velatus filo tunicisque solutis 15  
 Vota novem Triviae nocte silente dedi.  
 Omnia persolvi: fruitur nunc alter amore,  
 Et precibus felix utitur ille meis.  
 At mihi felicem vitam, si salva fuisses,  
 Fingebam demens, sed renuente deo. 20  
 Rura colam, frugumque aderit mea Delia custos,  
 Area dum messes sole calente teret,  
 Aut mihi servabit plenis in lintribus uvas  
 Pressaque veloci candida musta pede,  
 Consuescet numerare pecus, consuescet amantis 25  
 Garrulus in dominae ludere verna sinu.  
 Illa deo sciet agricolae pro vitibus uvam,  
 Pro segete spicas, pro grege ferre dapem.  
 Illa regat cunctos, illi sint omnia curae:  
 At iuvet in tota me nihil esse domo. 30  
 Huc veniet Messala meus, cui dulcia poma  
 Delia selectis detrahat arboribus:  
 Et tantum venerata virum, hunc sedula curet,  
 Huic paret atque epulas ipsa ministra gerat.  
 Haec mihi fingebam, quae nunc Eurusque Notusque 35  
 Iactat odoratos vota per Armenios.



Saepe ego tentavi curas depellere vino:  
At dolor in lacrimas verterat omne merum.  
Saepe allam tenui: sed iam cum gaudia adirem,  
Admonuit dominae deseruitque Venus. 40  
Tunc me discedens devotum femina dixit,  
Et pudet et narrat scire nefanda meam.  
Non facit hoc verbis, facie tenerisque lacertis  
Devovet et flavis nostra puella comis.  
Talis ad Haemonium Nereis Pelea quondam 45  
Vecta est fraenato caerulea pisce Thetis.  
Haec nocuere mihi, quod adest huic dives amator:  
Venit in exitium callida lena meum.  
Sanguineas edat illa dapes atque ore cruento  
Tristia cum multo pocula felle bibat: 50  
Hanc volitent animae circum sua fata querentes  
Semper, et e tectis strix violenta canat:  
Ipsa fame stimulante furens herbasque sepulcris  
Quaerat et a saevis ossa relictæ lupis,  
Currat et inguinibus nudis ululeque per urbes, 55  
Post agat e trivis aspera turba canum.  
Evenient: dat signa deus: sunt numina amanti,  
Saevit et iniusta lege relictæ Venus.  
At tu quam primum sagæ praecepta rapacis  
Desere: nam donis vincitur omnis amor. 60  
Pauper erit praesto, tibi praesto pauper adibit  
Primus et in tenero fixus erit latere,  
Pauper in angusto fidus comes agmine turbae  
Subiicietque manus efficietque viam,  
Pauper ad occultos furtim deducet amicos 65  
Vinctaque de niveo detrahet ipse pede.  
Heu canimus frustra, nec verbis victa patescit  
Ianua, sed plena est percutienda manu.  
At tu, qui potior nunc es, mea fata timeto:  
Versatur celeri Fors levis orbe rotæ. 70  
Non frustra quidam iam nunc in limine perstat  
Sedulus ac crebro prospicit ac refugit,  
Et simulat transire domum, mox deinde recurrit  
Solutus et ante ipsas excreat usque fores.

Nescio quid furtivus amor parat. utere quaeso, 75  
Dum licet: in liquida nat tibi linter aqua.

## VI.

Semper, ut inducar, blandos offers mihi vultus,  
Post tamen es misero tristis et asper, Amor.  
Quid tibi saevitiae mecum est? an gloria magna est  
Insidias homini composuisse deum?  
Nam mihi tenduntur casses: iam Delia furtim 5  
Nescio quem tacita callida nocte foveat.  
Illa quidem tam multa negat, sed credere durum est:  
Sic etiam de me pernegat usque viro.  
Ipse miser docui, quo posset ludere pacto  
Custodes: heu heu nunc premor arte mea. 10  
Fingere tunc didicit causas, ut sola cubaret,  
Cardine tunc tacito vertere posse fores:  
Tunc succos herbasque dedi, quis livor abiret,  
Quem facit impresso mutua dente Venus.  
At tu, fallacis coniunx incaute puellae, 15  
Me quoque servato, peccet ut illa nihil.  
Neu iuvenes celebret multo sermone, caveto,  
Neve cubet laxo pectus aperta sinu,  
Neu te decipiat putu, digitoque liquorem  
Ne trahat et mensae ducat in orbe notas. 20  
Exibit quam saepe, time, seu visere dicet  
Sacra Bonae maribus non adeunda deae.  
At mihi si credas, illam sequar unus ad aras:  
Tunc mihi non oculis sit timuisse meis.  
Saepe, velut gemmas eius signumque probarem, 25  
Per causam memini me tetigisse manum:  
Saepe mero somnum peperit tibi, at ipse bibebam  
Sobria supposita pocula victor aqua.  
Non ego te laesi prudens: ignosce fatenti.  
Iussit Amor: contra quis ferat arma deos? 30  
Ille ego sum, nec me iam dicere vera pudebit,  
Instabat tota cui tua nocte canis.  
Quid tenera tibi coniuge opus? tua si bona nescis

Servare, frustra clavis inest foribus.	
Te tenet, absentes alios suspirat amores	35
Et simulat subito condoluisse caput.	
At mihi servandam credas: non saeva recuso	
Verbera, detracto non ego vincla pedum.	
Tum procul absitis, quisquis colit arte capillos,	
Effluit effuso cui toga laxa sinu:	40
Quisquis et occurret, ne possit crimen habere,	
Stet procul, aut alia stet procul ante via.	
Sic fieri iubet ipse deus, sic magna sacerdos	
Est mihi divino vaticinata sono:	
(Haec ubi Bellonae motu est agitata, nec acrem	45
Flammam, non amens verbera torta timet:	
Ipsa bipenne suos caedit violenta lacertos	
Sanguine et effuso spargit inulta deam,	
Statque latus praefixa veru, stat saucia pectus,	
Et canit eventus, quos dea magna monet.)	54
'Parcite, quam custodit Amor, violare puellam,	
Ne pigeat magno post didicisse malo.	
Attigerit, labentur opes, ut vulnere nostro	
Sanguis, ut hic ventis diripiturque cinis.'	
Et tibi nescio quas dixit, mea Delia, poenas:	55
Si tamen admittas, sit precor illa levis.	
Non ego te propter parco tibi, sed tua mater	
Me movet atque iras aurea vincit anus.	
Haec mihi te adducit tenebris multoque timore	
Coniungit nostras clam taciturna manus,	60
Haec foribusque manet noctu me affixa proculque	
Cognoscit strepitus me veniente pedum.	
Vive diu mihi, dulcis anus: proprios ego tecum,	
Sit modo fas, annos contribuisset velim.	
Te semper natamque tuam te propter amabo:	65
Quicquid agit, sanguis est tamen illa tuus.	
Sit modo casta, doce, quamvis non vitta ligatos	
Impediat crines nec stola longa pedes.	
Et mihi sint durae leges, laudare nec ullam	
Possim ego, quin oculos appetat illa meos,	70
Et siquid peccasse putet, ducarque capillis	

Inmerito pronas proripiarque vias.  
 Non ego te pulsare velim, sed, venerit iste  
 Si furor, optarim non habuisse manus:  
 Nec saevo sis casta metu, sed mente fideli: 75  
 Mutuus absenti te mihi servet amor.  
 At, quae fida fuit nulli, post victa senecta  
 Ducit inops tremula stamina torta manu  
 Firmaque conductis adnectit licia telis  
 Tractaque de niveo vellere dente putat. 80  
 Hanc animo gaudente vident iuvenumque catervae  
 Commemorant merito tot mala ferre senem,  
 Hanc Venus ex alto flentem sublimis Olympo  
 Spectat et infidis quam sit acerba monet.  
 Haec aliis maledicta cadant: nos, Delia, amoris 85  
 Exemplum cana simus uterque coma.

## VII.

Hunc cecinere diem Parcae fatalia nentes  
 Stamina non ulli dissoluenda deo;  
 Hunc fore, Aquitanas posset qui fundere gentes,  
 Quem tremeret forti milite victus Atax.  
 Evenere: novos pubes Romana triumphos 5  
 Vidit et evinctos brachia capta duces:  
 At te victrices lauros, Messala, gerentem  
 Portabat niveis currus eburnus equis.  
 Non sine me est tibi partus honos: Tarbella Pyrene  
 Testis et Oceani litora Santonici, 10  
 Testis Arar Rhodanusque celer magnusque Garumna,  
 Carnoti et flavi caerula lympha Liger.  
 An te, Cydne, canam, tacitis qui leniter undis  
 Caeruleus placidis per vada serpis aquls,  
 Quantus et ætherio contingens vertice nubes 15  
 Frigidus intonsos Taurus alat Cilicas?  
 Quid referam, ut vollet crebras intacta per urbes  
 Alba Palaestino sancta columba Syro,  
 Utque maris vastum prospectet turribus aequor  
 Prima ratem ventis credere docta Tyros, 20

Qualis et, arentes cum findit Sirius agros,  
 Fertillis aestiva Nilus abundet aqua?  
 Nile pater, quamam possim te dicere causa  
 Aut quibus in terris occuluisse caput?  
 Te propter nullos tellus tua postulat imbres, 25  
 Arida nec Pluvio supplicat herba Iovi.  
 Te canit atque suum pubes miratur Osirim  
 Barbara, Memphiten plangere docta bovem.  
 Primus aratra manu sollerti fecit Osiris  
 Et teneram ferro sollicitavit humum, 30  
 Primus inexpertae commisit semina terrae  
 Pomaque non notis legit ab arboribus.  
 Hic docuit teneram palis adiungere vitem,  
 Hic viridem dura caedere falce comam:  
 Illi iucundos primum matura saporos 35  
 Expressa incultis uva dedit pedibus.  
 Ille liquor docuit voces inflectere cantu,  
 Movit et ad certos nescia membra modos,  
 Bacchus et agricolae magno confecta labore  
 Pectora tristitiae dissoluenda dedit. 40  
 Bacchus et afflictis requiem mortalibus affert,  
 Crura licet dura compede pulsa sonent.  
 Non tibi sunt tristes curae nec luctus, Osiri,  
 Sed chorus et cantus et levis aptus amor,  
 Sed varii flores et frons redimita corymbis, 45  
 Fusa sed ad teneros lutea palla pedes  
 Et Tyriae vestes et dulcis tibia cantu  
 Et levis occultis conscia cista sacris.  
 Huc ades ad centum ludos Geniumque choreis  
 Concelebra et multo tempora funde mero: 50  
 Illius et nitido stillent unguenta capillo,  
 Et capite et collo mollia sarta gerat.  
 Sic venias hodiernae: tibi dem turis honores,  
 Liba et Mopsopio dulcia melle feram.  
 At tibi succrescat proles, quae facta parentis 55  
 Augeat et circa stet veneranda senem.  
 Nec taceat monumenta viae, quem Tuscula tellus  
 Candidaque antiquo detinet Alba Lare.

Namque opibus congesta tuis hic glarea dura  
 Sternitur, hic apta iungitur arte silex. 60  
 Te canit agricola, e magna cum venerit urbe  
 Serus inoffensum rettuleritque pedem.  
 At tu, Natalis multos celebrande per annos,  
 Candidior semper candidiorque veni.

## VIII.

Non ego celari possum, quid nutus amantis  
 Quidve ferant miti lenia verba sono.  
 Nec mihi sunt sortes nec conscia fibra deorum,  
 Praeciniť eventus nec mihi cantus avis: 5  
 ipsa Venus magico religatum brachia nodo  
 Perdocuit multis non sine verberibus.  
 Desine dissimulare: deus crudelius urit,  
 Quos videt invitos succubuisse sibi.  
 Quid tibi nunc molles prodest coluisse capillos  
 Saepeque mutatas disposuisse comas, 10  
 Quid fuco splendente genas ornare, quid ungues.  
 Artificis docta subsecuisse manu?  
 Frustra iam vestes, frustra mutantur amictus,  
 Ansaque compressos colligit arta pedes. 15  
 Illa placet, quamvis inculto venerit ore  
 Nec nitidum tarda compserit arte caput.  
 Num te carminibus, num te pallentibus herbis  
 Devovit tacito tempore noctis anus?  
 Cantus vicinis fruges traducit ab agris,  
 Cantus et iratae detinet anguis iter, 20.  
 Cantus et e curru Lunam deducere temptat,  
 Et faceret, si non aera repulsa sonent.  
 Quid queror heu misero carmen nocuisse, quid herbas?  
 Forma nihil magicis utitur auxiliis:  
 Sed corpus tetigisse nocet, sed longa dedisse 25  
 Oscula, sed femori conseruisse femur.  
 Nec tu difficilis puero tamen esse memento  
 (Persequitur poenis tristia facta Venus),  
 Munera nec poscas: det munera canus amator,  
 TIBULLUS. 2

Ut foveas molli frigida membra sinu. 30  
 Carior est auro iuvenis, cui levia fulgent  
 Ora nec amplexus aspera barba terit.  
 Huic tu candentes humero suppone lacertos,  
 Et regum magnae despiciantur opes.  
 At Venus invenit puero succumbere furtim, 35  
 Dum tumet et teneros conserit usque sinus,  
 Et dare anhelanti pugnantibus humida linguis  
 Oscula et in collo figere dente notas.  
 Non lapis hanc gemmaeque iuvant, quae frigore sola  
 Dormiat et nulli sit cupienda viro. 40  
 Heu sero revocatur amor seroque iuventa,  
 Cum vetus infecit cana senecta caput.  
 Tum studium formae est: coma tum mutatur, ut annos  
 Dissimulet viridi cortice tincta nucis:  
 Tollere tum cura est albos a stirpe capillos 45  
 Et faciem dempta pelle referre novam.  
 At tu, dum primi floret tibi temporis aetas,  
 Utore: non tardo labitur illa pede.  
 Sei Marathum torques, puero quae gloria victo est?  
 In veteres esto dura, puella, senes. 50  
 Parce precor tenero: non illi sontica causa est,  
 Sed nimius luto corpora tingit amor.  
 Vel miser absenti maestus quam saepe querelas  
 Conclit et lacrimis omnia plena madent!  
 'Quid me spernis?' ait. 'poterat custodia vinci: 55  
 Ipse dedit cupidus fallere posse deus.  
 Nota Venus furtiva mihi est, ut lenis agatur  
 Spiritus, ut nec dent oscula rapta sonum:  
 Et possum media quamvis obrepere nocte  
 Et strepitu nullo clam reserare fores. 60  
 Quid prosunt artes, miserum si spernit amantem  
 Et fugit ex ipso saeva puella toro?  
 Vel cum promittit, subito sed perfida fallit,  
 Est mihi nox multis evigilanda malis.  
 Dum mihi venturam fingo, quodcumque movetur, 65  
 Illius credo tunc sonuisse pedem.  
 Desistas lacrimare, puer: non frangitur illa,

Et tua iam fletu lumina fessa tument.  
 Oderunt, Pholoe, moneo, fastidia divi,  
 Nec prodest sanctis tura dedisse focis. 70  
 Hic Marathus quondam miseros ludebat amantes,  
 Nescius ultorem post caput esse deum:  
 Saepe etiam lacrimis fertur risisse dolentis  
 Et cupidum ficta detinuisse mora:  
 Nunc omnis odit fastus, nunc displicet illi 75  
 Quaecunque opposita est ianua dura sera.  
 At te poena manet, ni desinis esse superba.  
 Quam cupies votis hunc revocare diem!

## IX.

Quid mihi, si fueras miseros laesurus amores,  
 Foedera per divos, clam violanda, dabas?  
 Ah miser, etsi quisq; primo periuria celat,  
 Sera, tamen tacitis Poena venit pedibus.  
 Parcite, caelestes: aequum est impune licere 5  
 Numina formosis laedere vestra semel.  
 Lucra petens habili tauros adlungit aratro  
 Et durum terrae rusticus urget opus,  
 Lucra petituras freta per parentia ventis  
 Ducunt instabiles sidera certa rates: 10  
 Muneribus meus est captus puer. at deus illa  
 In cinerem et liquidas munera vertat aquas.  
 Iam mihi persolvat poenas, pulvisque decorem  
 Detrahet et ventis horrida facta coma,  
 Uretur facies, urentur sole capilli, 15  
 Deteret invalidos et via longa pedes.  
 Admonui quotiens 'auro ne pollue formam:  
 Saepe solent auro multa subesse mala.  
 Divitilis captus siquis violavit amorem,  
 Aspera est illi difficillisque Venus. 20  
 Ure meum potius flamma caput et pete ferro  
 Corpus et intorto verbere terga seca.  
 Nec tibi celandi spes sit peccare paranti:  
 Est deus, occultos qui vetat esse dolor



Ipse deus tacito permisit lingua ministro, 25  
 Ederet ut multo libera verba mero:  
 Ipse deus somno domitos emittere vocem  
 Iussit et invitos facta tegenda loqui.  
 Haec ego dicebam: nunc me flevisse loquentem,  
 Nunc pudet ad teneros procubuisse pedes. 30  
 Tunc mihi iurabas nullius divitis auri  
 Pondere, non gemmis, vendere velle fidem,  
 Non tibi si pretium Campania terra daretur,  
 Non tibi si Bacchi cura Falernus ager.  
 Illis eriperes verbis mihi sidera caeli 35  
 Lucere et puras fulminis esse vias.  
 Quin etiam flebas: at non ego fallere doctus  
 Tergebam humentes credulus usque genas.  
 Quid faciam, nisi et ipse fores in amore puellae?  
 Sed precor exemplo sit levis illa tuo. 40  
 O quotiens, verbis ne quisquam conscius esset,  
 Ipse comes multa lumina nocte tuli!  
 Saepe insperanti venit tibi munere nostro  
 Et latuit clausas post adoperta fores.  
 Tum miser interii, stulte confisus amari: 45  
 Nam poteram ad laqueos cautior esse tuos.  
 Quin etiam attonita laudes tibi mente canebam,  
 Et me nunc nostri Pieridumque pudet.  
 Illa velim rapida Vulcanus carmina flamma  
 Torreat et liquida deleat amnis aqua. 50  
 Tu procul hinc absis, cui formam vendere cura est  
 Et pretium plena grande referre manu.  
 At te, qui puerum donis corrumpere es ausus,  
 Rideat assiduus uxor inulta dolis,  
 Et cum furtivo iuvenem lassaverit usu, 55  
 Tecum interposita languida veste cubet.  
 Semper sint externa tuo vestigia lecto,  
 Et pateat cupidis semper aperta domus:  
 Nec lasciva soror dicatur plura bibisse  
 Pocula vel plures emeruisse viros. 60  
 Illam saepe ferunt convivia ducere Baccho,  
 Dum rota Luciferi provocet orta diem:

Illa nulla queat melius consumere noctem  
 Aut operum varias disposuisse vices.  
 At tua perdidicit: nec tu, stultissime, sentis, 65  
 Cum tibi non solita corpus ab arte movet.  
 Tunc putas illam pro te disponere crines  
 Aut tenues denso pectere dente comas?  
 Ista haec persuadet facies, auroque lacertos  
 Vinciat et Tyrio prodeat apta sinu. 70  
 Non tibi, sed iuveni cuidam vult bella videri,  
 Devoveat pro quo remque domumque tuam.  
 Nec facit hoc vitio, sed corpora foeda podagra  
 Et senis amplexus culta puella fugit.  
 Huic tamen accubuit noster puer: hunc ego credam 75  
 Cum trucibus Venerem iungere posse feris.  
 Blanditiasne meas aliis tu vendere es ausus,  
 Tunc aliis demens oscula ferre mea?  
 Tunc flebis, cum me vinctum puer alter habebit  
 Et geret in regno regna superba tuo. 80  
 At tua tum me poena iuvet, Venerique merenti  
 Fixa notet casus aurea palma meos.  
 'Hanc tibi fallaci resolutus amore Tibullus  
 Dedicat et grata sis, dea, mente rogat.'

## X.

Quis fuit, horrendos primus qui protulit enses?  
 Quam ferus et vere ferreus ille fuit!  
 Tum caedes hominum generi, tum praelia nata,  
 Tum brevior dirae mortis aperta via est.  
 An nihil ille miser meruit? nos ad mala nostra 5  
 Vertimus, in saevas quod dedit ille feras.  
 Divitis hoc vitium est auri. Nec bella fuerunt,  
 Faginus astabat cum scyphus ante dapes,  
 Non arces, non vallus erat, somnumque petebat  
 Securus varias dux gregis inter oves. 10  
 Tunc mihi vita foret, vulgi nec tristia nossem  
 Arma nec audissem corde micante tubam:  
 Nunc ad bella trahor, et iam quis forsitan hostis

Haesura in nostro tela gerit latere.  
 Sed patrii servate Lares: aluistis et idem, 15  
 Cursarem vestros cum tener ante pedes.  
 Neu pudeat prisco vos esse e stipite factos:  
 Sic veteris sedes incoluistis avi.  
 Tunc melius tenuere fidem, cum paupere cultu  
 Stabat in exigua ligneus aede deus. 20  
 Hic placatus erat, seu quis libaverat uvam,  
 Seu dederat sanctae spicea sarta comae:  
 Atque aliquis voti compos liba ipse ferebat  
 Postque comes purum filia parva favum.  
 At nobis aerata, Lares, depellite tela, 25  
 Hostiaque e plena rustica porcus hara.  
 Hanc pura cum veste sequar myrtoque canistra  
 Vincta geram, myrto vinctus et ipse caput.  
 Sic placeam vobis: alius sit fortis in armis,  
 Sternat et adversos Marte favente duces, 30  
 Ut mihi potanti possit sua dicere facta  
 Miles et in mensa pingere castra mero.  
 Quis furor est atram bellis accersere mortem?  
 Imminet et tacito clam venit illa pede.  
 Non seges est infra, non vinea culta, sed audax 35  
 Cerberus et Stygiae navita turpis aquae:  
 Illic percussisque genis ustoque capillo  
 Errat ad obscuros pallida turba lacus.  
 Quam potius laudandus hic est, quem prole parata  
 Occupat in parva pigra senecta casa! 40  
 Ipse suas sectatur oves, at filius agnos,  
 Et calidam fesso comparat uxor aquam.  
 Sic ego sim, liceatque caput candescere canis,  
 Temporis et prisca facta referre senem.  
 Interea Pax arva colat. Pax candida primum 45  
 Duxit araturos sub iuga panda boves,  
 Pax aluit vites et succos condidit uvae,  
 Funderet ut nato testa paterna merum:  
 Pace bidens vomerque vigent, at tristia duri  
 Militis in tenebris occupat arma situs, 50  
 Rusticus e lucoque vehit, male sobrius ipse,

Uxorem plaustro progeniemque domum.  
 Sed Veneris tunc bella calent, scissosque capillos  
 Femina perfractas conqueriturque fores:  
 Flet teneras subtusa genas, sed victor et ipse 55  
 Flet sibi dementes tam valuisse manus.  
 At lascivus Amor rixae mala verba ministrat,  
 Inter et iratum lentus utrumque sedet.  
 Ah lapis est ferrumque, suam quicumque puellam  
 Verberat: e caelo deripit ille deos. 60  
 Sit satis e membris tenuem perscindere vestem,  
 Sit satis ornatus dissoluisse comae,  
 Sit lacrimas movisse satis: quater ille beatus  
 Quo tenera irato flere puella potest.  
 Sed manibus qui saevus erit, scutumque sudémque 65  
 Is gerat et miti sit procul a Venere.  
 At nobis, Pax alma, veni spicamque teneto,  
 Perfluat et pomis candidus ante sinus.

## ALBII TIBULLI

### LIBER SECUNDUS.

#### I.

Quisquis adest, valeat: fruges lustramus et agros,  
 Ritus ut a prisco traditus extat avo.  
 Bacche, veni, dulcisque tuis e cornibus uva  
 Pendeat, et spicis tempora cinge, Ceres.  
 Luce sacra requiescat humus, requiescat arator, 5  
 Et grave suspenso vomere cesset opus.  
 Solvite vincla iugis: nunc ad praeseptia debent  
 Plena coronato stare boves capite.

Omnia sint operata deo: non audeat ulla Lanificam pensis imposuisse manum.	10
Vos quoque abesse procul iubeo, discedat ab aris, Cui tulit hesternæ gaudia nocte Venus.	
Casta placent superis: pura cum veste venite Et manibus puris sumite fontis aquam.	
Cernite, fulgentes ut eat sacer agnus ad aras Vinetaque post olea candida turba comas.	15
Dii patrii, purgamus agros, purgamus agrestes: Vos mala de nostris pellite limitibus,	
Neu seges eludat messem fallacibus herbis, Neu timeat celeres tardior agna lupos.	20
Tunc nitidus plenis confusus rusticus agris Ingeret ardenti grandia ligna foco,	
Turbaque vernarum, saturi bona signa coloni, Ludet et ex virgis extruet ante casas.	
Eventura precor: viden ut felicibus extis Significet placidos nuntia fibra deos?	25
Nunc mihi fumosos veteris proferte Falernos Consulis et Chio solvite vincla cado.	
Vina diem celebrent: non festa luce madere Est rubor, errantes et male ferre pedes.	30
Sed 'bene Messalam' sua quisque ad pocula dicat Nomen et absentis singula verba sonent.	
Gentis Aquitanae celebrer Messala triumphis Et magna intonsis gloria victor avis,	
Huc ades aspiroque mihi, dum carmine nostro Redditur agricolis gratia caelitibus.	35
Rura cano rurisque deos. his vita magistris Desuevit querna pellere glande famem:	
Illi compositis primum docuere tigillis Exiguam viridi fronde operire domum,	40
Illi etiam tauros primi docuisse feruntur Servitium et plaustro supposuisse rotam.	
Tunc victus abiere feri, tunc consita pomus, Tunc bibit irriguas fertilis hortus aquas,	
Aurea tunc pressos pedibus dedit uva liquores Mixtaque securo est sobria lympha mero.	45

Rura ferunt messes, calidi cum sideris aestu  
 Deponit flavas annua terra comas.  
 Rure levis verno flores apis ingerit alveo,  
 Compleat ut dulci sedula melle favos. 50  
 Agricola assiduo primum satiat aratro  
 Cantavit certo rustica verba pede  
 Et satur arenti primum est modulatus avena  
 Carmen, ut ornatos diceret ante deos,  
 Agricola et minio suffusus, Bacche, rubenti 55  
 Primus inexperta duxit ab arte choros.  
 Huic datus a pleno, memorabile munus, ovili  
 \*Dux pecoris hircus auxerat hircus oves.  
 Rure puer verno primum de flore coronam  
 Fecit et antiquis imposuit Laribus. 60  
 Rure etiam teneris curam exhibitura puellis  
 Molle gerit tergo lucida vellus ovis.  
 Hinc et femineus labor est, hinc pensa colusque,  
 Fusus et apposito pollice versat opus:  
 Atque aliqua assiduæ textrix operata Minervæ 65  
 Cantat, et appulso tela sonat latere.  
 Ipse quoque inter agros interque armenta Cupido  
 Natus et indomitas dicitur inter equas.  
 Illic indocto primum se exercuit arcu:  
 Hei mihi, quam doctas nunc habet ille manus! 70  
 Nec pecudes, velut ante, petit: fixisse puellas  
 Gestit et audaces perdomuisse viros.  
 Hic iuveni detraxit opes, hic dicere iussit  
 Limen ad iratae verba pudenda senem:  
 Hoc duce custodes furtim transgressa iacentes 75  
 Ad iuvenem tenebris sola puella venit  
 Et pedibus praetentat iter suspensa timore,  
 Explorat caecas cui manus ante vias.  
 Ah miseri, quos hic graviter deus urget! at ille  
 Felix, cui placidus leniter afflat Amor. 80  
 Sancte, veni dapibus festis, sed pone sagittas  
 Et procul ardentes hinc precor abde faces.  
 Vos celebrem cantate deum pecorique vocate  
 Voce: palam pecori, clam sibi quisque vocet.

Aut etiam sibi quisque palam: nam turba iocosa      85  
 Obstrepat et Phrygio tibia curva sono.  
 Ludite: iam Nox iungit equos, currumque sequuntur  
 Matris lascivo sidera fulva choro,  
 Postque venit tacitus furvis circumdatus alis  
 Somnus et incerto Somnia nigra pede.      90

---

## II.

Dicamus bona verba: venit Natalis ad aras:  
 Quisquis ades, lingua, vir mulierque, fave.  
 Urantur pia tura focis, urantur odores,  
 Quos tener e terra divite mittit Arabs.      5  
 Ipse suos Genius adsit visurus honores,  
 Cui decorent sanctas mollia sarta comas.  
 Illius puro destillent tempora nardo,  
 Atque satur libo sit madeatque mero,  
 Annuat et, Cornute, tibi, quodcunque rogabis.  
 En age, quid cessas? annuit ille: roga.      10  
 Auguror, uxoris fidos optabis amores:  
 Iam reor hoc ipsos edidicisse deos.  
 Nec tibi malueris, totum quaecunque per orbem  
 Fortis arat valido rusticus arva bove,  
 Nec tibi, gemmarum quicquid felicibus Indis      15  
 Nascitur, Eoi qua maris unda rubet.  
 Vota cadunt, utinam strepitantibus advolet alis  
 Flavaque coniugio vincula portet Amor,  
 Vincula, quae maneant semper, dum tarda senectus  
 Inducat rugas inficiatque comas.      20  
 Hic veniat Natalis avis prolemque ministret,  
 Ludat et ante tuos turba novella pedes.

---

## III.

Rura meam, Cornute, tenent villaeque puellam:  
 Ferreus est, heu heu, quisquis in urbe manet.  
 Ipsa Venus latos iam nunc migravit in agros,  
 Verbaque aratoris rustica discit Amor.

O ego, cum aspicerem dominam, quam fortiter illic 5  
 Versarem valido pingue bidente solum  
 Agricolaeque modo curvum sectarer aratrum,  
 Dum subigunt steriles arva serenda boves!  
 Nec quererer, quod sol graciles exureret artus,  
 Laederet et teneras pustula rupta manus. 10  
 Pavit et Admeti tauros formosus Apollo,  
 Nec cithara intonsae profueruntve comae,  
 Nec potuit curas sanare salubribus herbis:  
 Quicquid erat medicae vicerat artis amor.  
 Ipse deus solitus stabulis expellere vaccas  
 .....  
 Et miscere novo docuisse coagula lacte,  
 \*Lacteus et mixtus obriguisset liquor.  
 Tum fiscella levi detexta est vimine iunci, 15  
 Raraque per nexus est via facta sero.  
 O quotiens illo vitulum gestante per agros  
 Dicitur occurrens erubuisse soror!  
 O quotiens ausae, caneret dum valle sub alta,  
 Rumpere mugitu carmina docta boves! 20  
 Saepe duces trepidis petiere oracula rebus,  
 Venit et a templis irrita turba domum:  
 Saepe horrere sacros doluit Latona capillos,  
 Quos admirata est ipsa noverca prius.  
 Quisquid inornatumque caput crinesque solutos 25  
 Aspiceret, Phoebi quaereret ille comam.  
 Delos ubi nunc, Phoebe, tua est, ubi Delphica Pytho?  
 Nempe amor in parva te iubet esse casa.  
 Felices olim, Veneri cum fertur aperte  
 Servire aeternos non puduisse deos. 30  
 Fabula nunc ille est: sed cui sua cura puella est,  
 Fabula sit mavult quam sine amore deus.  
 At tu, quisquis is es, cui tristi fronte Cupido  
 Imperat ut nostra sint tua castra domo,  
 \* \* \*  
 Ferrea non Venerem, sed praedam, saecula laudant: 35  
 Praeda tamen multis est operata malis.  
 Praeda feras acies cinxit discordibus armis:



Hinc cruor, hinc caedes mors propiorque venit.  
 Praeda vago iussit geminare pericula ponto,  
 Bellica cum dubiis rostra dedit ratibus. 40  
 Praedator cupit immensos obsidere campos,  
 Ut multa innumera iugera pascat ove;  
 Cui lapis externus curae est, urbisque tumultus  
 Portatur validis mille columna iugis,  
 Claudat et indomitum moles mare, lentus ut intra 45  
 Negligat hibernas piscis adesse minas.  
 At tibi laeta trahant Samiae convivia testae  
 Fictaque Cumana lubrica terra rota.  
 Heu heu divitibus video gaudere puellas:  
 Iam veniant praedae, si Venus optat opes; 50  
 Ut mea luxuria Nemesis fluat utque per urbem  
 Incedat donis conspicienda meis.  
 Illa gerat vestes tenues, quas femina Coa  
 Texuit, auratas disposuitque vias:  
 Illi sint comites fuscī, quos India torret, 55  
 Solis et admotis inficit ignis equis:  
 Illi selectos certent praebere colores  
 Africa puniceum purpureumque Tyros.  
 Nota loquor: regnum ipse tenet, quem saepe coegit  
 Barbara gypsatos ferre catasta pedes. 60  
 Sit tibi dura seges, Nemesim qui abducis ab urbe,  
 Persolvat nulla semina terra fide.  
 Et tu, Bacche tener, iucundae consitor uvae,  
 Tu quoque devotos, Bacche, relinque lacus.  
 Haud impune licet formosas tristibus agris 65  
 Abdere: non tanti sunt tua musta, pater.  
 O valeant fruges, ne sint modo rure puellae:  
 Glans alat, et prisco more bibantur aquae.  
 Glans aluit veteres, et passim semper amarunt:  
 Quid nocuit sulcos non habuisse satos? 70  
 Tum, quibus aspirabat Amor, praebebat aperte  
 Mitis in umbrosa gaudia valle Venus.  
 Nullus erat custos, nulla exclusura dolentes  
 Ianua: si fas est, mos precor ille redi.  
 . . . . . 75

Horrida villosa corpora veste tegant.  
 Nunc si clausa mea est, si copia rara videndi,  
 Heu miserum, laxam quid iuvat esse togam?  
 Ducite: ad imperium dominae sulcabimus agros:  
 Non ego me vinclis verberibusque nego. 80

## IV.

Hic mihi servitium video dominamque paratam:  
 Iam mihi, libertas illa paterna, vale.  
 Servitium sed triste datur, teneorque catenis,  
 Et nunquam misero vincla remittit Amor, 5  
 Et seu quid merui seu quid peccavimus, urit.  
 Uror io: remove, saeva puella, faces.  
 O ego ne possim tales sentire dolores,  
 Quam mallet in gelidis montibus esse lapis,  
 Stare vel insanis cautes obnoxia ventis,  
 Naufraga quam vasti tunderet unda maris! 10  
 Nunc et amara dies et noctis amarior umbra est:  
 Omnia nam tristi tempora felle madent.  
 Nec prosunt elegi nec carminis auctor Apollo:  
 Illa cava pretium flagitat usque manu.  
 Ite procul, Musae, si non prodestis amanti: 15  
 Non ego vos, ut sint bella canenda, colo,  
 Nec refero solisque vias et qualis, ubi orbem  
 Complevit, versis Luna recurrit equis.  
 Ad dominam faciles aditus per carmina quaero:  
 Ite procul, Musae, si nihil ista valent. 20  
 At mihi per caedem et facinus sunt dona paranda,  
 Ne iaceam clausam flebilis ante domum:  
 Aut raptam suspensa focis insignia sacris:  
 Sed Venus ante alios est violanda mihi.  
 Illa malum facinus suadet dominamque rapacem 25  
 Dat mihi: sacrilegas sentiat illa manus.  
 O pereat, quicumque legit viridesque smaragdos  
 Et niveam Tyrio murice tingit ovem.  
 Hic dat avaritiae causas et Coa puellis  
 Vestis et e rubro lucida concha mari. 30

Haec fecere malas: hinc clavim ianua sensit  
 Et coepit custos liminis esse canis.  
 Sed, pretium si grande feras, custodia victa est,  
 Nec prohibent claves, et canis ipse tacet.  
 Heu quicumque dedit formam caelestis avarae, 35  
 Quale bonum multis attulit ille malis!  
 Hinc fletus rixaeque sonant, haec denique causa  
 Fecit ut infamis hic deus esset Amor.  
 At tibi, quae pretio victos excludis amantes,  
 Eripiant partas ventus et ignis opes: 40  
 Quin tua tum iuvenes spectent incendia laeti,  
 Nec quisquam flammae sedulus addat aquam.  
 Seu veniet tibi mors, nec erit qui lugeat ullus,  
 Nec qui det maestas munus in exequias.  
 At bona quae nec avara fuit, centum licet annos 45  
 Vixerit, ardentem flebitur ante rogum:  
 Atque aliquis senior veteres veneratus amores  
 Annua constructo sarta dabit tumulo  
 Et 'bene' discedens dicet 'placideque quiescas,  
 Terraque securae sit super ossa levis.' 50  
 Vera quidem moneo, sed prosunt quid mihi vera?  
 Illius est nobis lege colendus Amor.  
 Quin etiam sedes iubeat si vendere avitas,  
 Itē sub imperium sub titulumque, Lares.  
 Quicquid habet Circe, quicquid Medea veneni, 55  
 Quicquid et herbarum Thessala terra gerit,  
 Et quod, ubi indomitis gregibus Venus afflat amores,  
 Hippomanes cupidae stillat ab inguine equae,  
 Si modo me placido videat Nemesis mea vultu,  
 Mille alias herbas misceat illa, bibam. 60

## V.

Phoebe, fave: novus ingreditur tua templa sacerdos:  
 Huc age cum cithara carminibusque veni.  
 Nunc te vocales impellere pollice chordas,  
 Nunc precor ad laudes flectere verba mea.  
 triumphali devinctus tempora lauro, 5

Dum cumulant aras, ad tua sacra veni.  
 Sed nitidus pulcherque veni: nunc indue vestem  
 Sepositam, longas nunc bene pecte comas,  
 Qualem te memorant Saturno rege fugato  
 Victori laudes concinuisse Iovi. 10  
 Tu procul eventura vides, tibi deditus augur  
 Scit bene quid fati provida cantet avis,  
 Tuque regis sortes, per te praesentit aruspex,  
 Lubrica signavit cum deus exta notis:  
 Te duce Romanos nunquam frustrata Sibylla 15  
 Abdita quae senis fata canit pedibus!  
 Phoebe, sacras Messalinum sine tangere chartas  
 Vatis, et ipse precor quod canat illa doce.  
 Haec dedit Aeneae sortes, postquam ille parentem  
 Dicitur et raptos sustinuisse Lares, 20  
 Nec fore credebat Romam, cum maestus ab alto  
 Ilion arduentes respiceretque deos.  
 (Romulus aeternae nondum firmaverat urbis  
 Moenia, consorti non habitanda Remo,  
 Sed tunc pascebant herbosa Palatia vaccae 25  
 Et stabant humiles in Iovis arce casae.  
 Lacte madens illic suberat Pan ilicis umbrae  
 Et facta agresti lignea falce Pales,  
 Pendebatque vagi pastoris in arbore votum,  
 Garrula silvestri fistula sacra deo, 30  
 Fistula, cui semper decrescit arundinis ordo:  
 Nam calamus cera iungitur usque minor.  
 At qua Velabri regio patet, ire solebat  
 Exiguus pulla per vada linter aqua.  
 Illac saepe gregis ditis placitura magistro 35  
 Ad iuvenem festa est vecta puella die,  
 Cum qua fecundi redierunt munera ruris,  
 Caseus et niveae candidus agnus ovis.)  
 Impiger Aenea, volitantis frater Amoris,  
 Troica qui profugis sacra<sup>U</sup> vehis ratibus, 40  
 Iam tibi Laurentes assignat Iuppiter agros,  
 Iam vocat errantes hospita terra Lares.  
 Illic sanctus eris, cum te veneranda Numici

Unda deum caelo miserit Indigetem.	
Ecce super fessas volitat Victoria puppes,	45
Tandem ad Troianos diva superba venit.	
Ecce mihi lucent Rutulis incendia castris:	
Iam tibi praedico, barbare Turne, necem.	
Ante oculos Laurens castrum murusque Lavini est	
Albaque ab Ascanio condita longa duce.	50
Te quoque iam video, Marti placitura sacerdos	
Ilia, Vestales deseruisse focos,	
Concubitusque tuos furtim vittasque iacentes	
Et cupidî ad ripas arma relicta dei.	
Carpite nunc, tauri, de septem montibus herbas,	55
Dum licet: hic magnae iam locus urbis erit.	
Roma, tuum nomen terris fatale regendis,	
Qua sua de caelo prospicit arva Ceres,	
Quaque patent ortus et qua fluitantibus undis	
Solis anhelantes abluit amnis equos.	60
Troia quidem tunc se mirabitur et sibi dicet	
Vos bene tam longa consuluisse via.	
Vera cano: sic usque sacras innoxia laurus	
Vescar, et aeternum sit mihi virginitas.	
Haec cecinit vates et te sibi, Phoebe, vocavit,	65
lactavit fusas et caput ante comas.	
Quicquid Amalthea, quicquid Marpessia dixit,	
Herophile Phoebæ grata quod admonuit,	
Quasque Albana sacras Tiberis per flumina sortes	
Portarit sicco pertuleritque sinu,	70
(Hæc fore dixerunt belli mala signa, cometen,	
Multus ut in terras deplueretque lapis:	
Atque tubas atque arma ferunt strepitantia caelo	
Audita et lucos praecinuisse fugam,	
Et simulacra deum lacrimas fudisse tepentes	77
Fataque vocales praemonuisse boves,	78
Ipsam etiam Solem defectum lumine vidit	75
Iungere pallentes nubilus annus equos)	76
Haec fuerant olim: sed tu iam mitis, Apollo,	
Prodigia indomitæ merge sub aequoribus,	80
Et succensa sacris crepitet bene laurea flammis,	

Omine quo felix et sacer annus erit.  
 Laurus ubi bona signa dedit, gaudete coloni:  
 Distendet spicis horrea plena Ceres,  
 Oblitus et musto feriet pede rusticus uvas, 85  
 Dolia dum magni deficientque lacus.  
 Ac madidus Baccho sua festa Palilia pastor  
 Concinet: a stabulis tunc procul este lupi.  
 Ille levis stipulae solemnis potus acervos  
 Accendet, flammis transilietque sacras, 90  
 Et fetus matrona dabit, natusque parenti  
 Oscula comprehensis auribus eripiet,  
 Nec taedebit avum parvo advigilare nepoti  
 Balbaque cum puero dicere verba senem.  
 Tunc operata deo pubes discumbet in herba, 95  
 Arboris antiquae qua levis umbra cadit,  
 Aut e veste sua tendent umbracula sertis  
 Vincita, coronatus stabit et ante calix.  
 At sibi quisque dapes et festas extruet alte  
 Cespitibus mensas cespitibusque torum. 100  
 Ingeret hic potus iuvenis maledicta puellae,  
 Post modo quae votis irrita facta velit:  
 Nam ferus ille suae plorabit sobrius idem  
 Et se iurabit mente fuisse mala.  
 Pace tua pereant arcus pereantque sagittae, 105  
 Phoebe, modo in terris erret inermis Amor.  
 Ars bona: sed postquam sumpsit sibi tela Cupido,  
 Heu heu quam multis ars dedit illa malum!  
 Et mihi praecipue. iaceo cum saucius annum  
 Et faveo morbo, cum iuvat ipse dolor, 110  
 Usque cano Nemesim, sine qua versus mihi nullus  
 Verba potest iustos aut reperire pedes.  
 At tu (nam divum servat tutela poetas),  
 Praemoneo, vati parce, puella, sacro,  
 Ut Messalinum celebrem, cum praemia belli 115  
 Ante suos currus oppida victa feret,  
 Ipse gerens lauros: lauro devinctus agresti  
 Miles 'io' magna voce 'trumphe' canet.  
 Tum Messala meus pia det spectacula turbae

Et plaudat curru praetereunte pater. 120  
 Annue: sic tibi sint intonsi, Phoebe, capilli,  
 Sic tua perpetuo sit tibi casta soror.

## VI.

Castra Macer sequitur: tenero quid flet Amori?  
 Sit comes et collo fortiter arma gerat?  
 Et seu longa virum terrae via seu vaga ducent  
 Aequora, cum tellis ad latus ire volet? .  
 Ure, puer, quaeso, tua qui ferus otia liquit, 5  
 Atque iterum erronem sub tua signa voca.  
 Quod si militibus parces, erit hic quoque miles,  
 Ipse levem galea qui sibi portet aquam.  
 Castra peto, valeatque Venus valeantque puellae:  
 Et mihi sunt vires, et mihi facta tuba est. 10  
 Magna loquor, sed magnifice mihi magna locuto  
 Excutiunt clausae fortia verba fores.  
 Iuravi quotiens rediturum ad limina nunquam!  
 Cum bene iuravi, pes tamen ipse redit.  
 Acer Amor, fractas utinam tua tela sagittas, 15  
 Sei licet, extinctas aspiciamque faces!  
 Tu miserum torques, tu me mihi dira precari  
 Cogis et insana mente nefanda loqui.  
 Iam mala finissem leto, sed credula vitam  
 Spes fovet et fore cras semper ait melius. 20  
 Spes alit agricolas, Spes sulcis credit aratis  
 Semina, quae magno fenore reddat ager:  
 Haec laqueo volucres, haec captat arundine pisces,  
 Cum tenues hamos abdidit ante cibus:  
 Spes etiam valida solatur compede vinctum 25  
 (Crura sonant ferro, sed canit inter opus):  
 Spes facilem Nemesim spondet mihi, sed negat illa.  
 Hei mihi, ne vincas, dura puella, deam.  
 Parce, per immatura tuae precor ossa sororis:  
 Sic bene sub tenera parva quiescat humo. 30  
 Illa mihi sancta est, illius dona sepulcro  
 Et madefacta meis sarta feram lacrimis,

Illius ad tumultum fugiam supplexque sedebo  
Et mea cum muto fata querar cinere.  
Non feret usque suum te propter flere clientem: 35  
Illius ut verbis, sis mihi lenta veto,  
Ne tibi neglecti mittant mala somnia Manes,  
Maestaque sopitae stet soror ante torum,  
Qualis ab excelsa praeceps delapsa fenestra  
Venit ad infernos sanguinolenta lacus. 40  
Desino, ne dominae luctus renoventur acerbi:  
Non ego sum tanti, ploret ut illa semel.  
Nec lacrimis oculos digna est foedare loquaces:  
Lena nocet nobis, ipsa puella bona est.  
Lena vetat miserum Phryne furtimque tabellas . 45  
Occulto portans itque reditque sinu:  
Saepe, ego cum dominae dulces a limine duro  
Agnosco voces, haec negat esse domi:  
Saepe, ubi nox promissa mihi est, languere puellam  
Nuntiat aut aliquas extimuisse minas. 50  
Tunc morlor curis, tunc mens mihi perdita fingit,  
Quisve meam teneat, quot teneatve modis:  
Tunc tibi, lena, precor diras: satis anxia vivas,  
Moverit e votis pars quotacunque deos.

---



# ALBII TIBULLI (LYGDAMI)

## LIBER TERTIUS.

### I.

**M**artis Romani festae venere kalendae  
(Exoriens nostris hic fuit annus avis),  
Et vaga nunc certa discurrunt undique pompa  
Perque vias urbis munera perque domos:  
Dicite, Pierides, quonam donetur honore 5  
Seu mea, seu fallor, cara Neaera tamen.  
Carmine formosae, pretio capiuntur avarae:  
Gaudeat, ut digna est, versibus illa meis.  
Lutea sed niveum involvat membrana libellum,  
Pumicet et canas tondeat ante comas 10  
Summaque praetexat tenuis fastigia chartae,  
Indicet ut nomen littera facta, tuum,  
Atque inter geminas pingantur cornua frontes:  
Sic etenim comptum mittere oportet opus.  
Per vos, auctores huius mihi carminis, oro 15  
Castaliamque umbram Pieriosque lacus,  
Ite domum cultumque illi donate libellum,  
Sicut erit: nullus defluat inde color.  
Illa mihi referet, si nostri mutua cura est  
An minor, an toto pectore deciderim. 20  
Sed primum meritam larga donate salute  
Atque haec submisso dicite verba sono.  
'Haec tibi vir quondam, nunc frater, casta Neaera,  
Mittit et accipias munera parva rogat,  
Teque suis iurat caram magis esse medullis, 25  
Sive sibi coniunx sive futura soror.  
Sed potius coniunx: huius spem nominis illi  
Auferet extincto pallida Ditis aqua.'

## II.

**Q**ui primus caram iuveni carumque puellae  
 Eripuit iuvenem, ferreus ille fuit.  
 Durus et ille fuit, qui tantum ferre dolorem,  
 Vivere et erepta coniuge qui potuit.  
 Non ego firmus in hoc, non haec patientia nostro      5  
 Ingenio: frangit fortia corda dolor:  
 Nec mihi vera loqui pudor est vitaeque fateri  
 Tot mala perpressae taedia nata meae.  
 Ergo cum tenuem fuero mutatus in umbram  
 Candidaque ossa super nigra favilla teget,      10  
 Ante meum veniat longos incomperta capillos  
 Et fleat ante meum maesta Neaera rogem.  
 Sed veniat carae matris comitata dolore:  
 Maereat haec genero, maereat illa viro.  
 Praefatae ante meos Manes animamque precatæ      15  
 Perfusæque pias ante liquore manus,  
 Pars quæ sola mei superabit corporis, ossa  
 Incinctæ nigra candida veste legent,  
 Et primum annoso spargent collecta Lyæo,  
 Mox etiam niveo fundere lacte parent,      20  
 Post hæc carbæis humorem tollere velis  
 Atque in marmorea ponere sicca domo.  
 Illic quas mittit dives Panchæa merces  
 Eolique Arabes, pinguis et Assyria,  
 Et nostri memores lacrimæ fundantur eodem:      25  
 Sic ego componi versus in ossa velim.  
 Sed tristem mortis demonstret littera causam  
 Atque hæc in celebri carmina fronte notet.  
 ‘Lygdamus hic situs est: dolor huic et cura Neæræ,  
 Coniugis ereptæ, causa perire fuit.’      30

## III.

**Q**uid prodest caelum votis impluisse, Neaera,  
 Multaque cum blanda tura dedisse prece,  
 Non ut marmorei prodirem e limine tecti,

Insignis clara conspicuusque domo,  
 Aut ut multa mei renovarent iugera tauri 5  
 Et magnas messes terra benigna daret,  
 Sed tecum ut longae sociarem gaudia vitae  
 Inque tuo caderet nostra senecta sinu  
 Tunc cum permenso defunctus tempore lucis  
 Nudus Lethaea cogerer ire rate? 10  
 Nam grave quid prodest pondus mihi divitis auri,  
 Arvaque si findant pingua mille boves?  
 Quidve domus prodest Phrygiis innixa columnis,  
 Taenare sive tuis, sive Caryste tuis,  
 Et nemora in domibus sacros imitantia lucos 15  
 Aurataeque trabes marmorecumque solum?  
 Quidve in Erythraeo legitur quae litore concha  
 Tinctaque Sidonio murice lana iuvat,  
 Et quae praeterea populus miratur? in illis  
 Invidia est: falso plurima vulgus amat. 20  
 Non opibus mentes hominum curaeque levantur:  
 Nam Fortuna sua tempora lege regit.  
 Sit mihi paupertas tecum iucunda, Neaera:  
 At sine te regum munera nulla volo.  
 O niveam, quae te poterit mihi reddere, lucem! 25  
 O mihi felicem terque quaterque diem!  
 At si, pro dulci reditu quaecunque voventur,  
 Audiat aversa non meus aure deus,  
 Nec me regna iuvant nec Lydius aurifer amnis  
 Nec quas terrarum sustinet orbis opes. 30  
 Haec alii cupiant, liceat mihi paupere cultu  
 Securo cara coniuge posse frui.  
 Adsis et timidis faveas, Saturnia, votis,  
 Et faveas concha, Cypria, vecta tua.  
 Aut si fata negant reditum tristesque sorores, 35  
 Stamina quae ducunt quaeque futura neunt,  
 Me vocet in vastos amnes nigramque paludem  
 Dives in ignava luridus Orcus aqua.

---

## IV.

Dii meliora ferant, nec sint insomnia vera,  
 Quae tulit hesternā pessima nocte quies.  
 Ite procul, vani, falsumque avertite visum:  
 Desinite in nobis quaerere velle fidem.  
 Divi vera monent, venturae nuntia sortis 5  
 Vera monent Tuscis exta probata viris:  
 Somnia fallaci ludunt temeraria nocte  
 Et pavidas mentes falsa timere iubent,  
 Et natum in curas hominum genus omina noctis  
 Farre pio placant et saliente sale. 10  
 Et tamen, utcunque est, sive illi vera moneri,  
 Mendaci somno credere sive volent,  
 Efficiat vanos noctis Lucina timores  
 Et frustra inmeritum pertimuisse velit,  
 Si mea nec turpi mens est obnoxia facto 15  
 Nec laesit magnos impia lingua deos.  
 Iam Nox aetherium nigris emensa quadrigis  
 Mundum caeruleo laverat amne rotas,  
 Nec me sopierat menti deus utilis aegrae:  
 Somnus sollicitas deficit ante domos. 20  
 Tandem, cum summo Phoebus prospexit ab ortu,  
 Pressit languentis lumina sera quies.  
 Hic iuvenis casta redimitus tempora lauro  
 Est visus nostra ponere sede pedem.  
 Non illo quicquam formosius ulla priorum 25  
 Aetas, humanum nec videt illud opus.  
 Intonsi crines longa cervice fluebant,  
 Stillabat Syrio myrtea rore coma.  
 Candor erat, qualem praefert Latonia Luna,  
 Et color in niveo corpore purpureus, 30  
 Ut iuveni primum virgo deducta marito  
 Inficitur teneras ore rubente genas,  
 Et cum contexunt amarantis alba puellae  
 Lilia et autumnō candida mala rubent.  
 Ima videbatur talis illudere palla: 35  
 Namque haec in nitido corpore vestis erat.

Artis opus raræ, fulgens testudine et auro  
 Pendebat laeva garrula parte lyra.  
 Hanc primum veniens plectro modulatus eburno,  
 Felices cantus ore sonante dedit: 40  
 Sed postquam fuerant digiti cum voce locuti,  
 Edidit hæc dulci tristia verba modo.  
 'Salve, cura deum: casto nam rite poetæ  
 Phoebusque et Bacchus Pieridesque favent:  
 Sed proles Semeles Bacchus doctæque sorores 45  
 Dicere non norunt, quid ferat hora sequens:  
 At mihi fatorum leges ævique futuri  
 Eventura pater posse videre dedit.  
 Quare ego quæ dico non fallax accipe vates,  
 Quodque deus vero Cynthius ore feram. 50  
 Tantum cara tibi, quantum nec filia matri,  
 Quantum nec cupidò bella puella viro,  
 Pro qua sollicitas caelestia numina votis,  
 Quæ tibi securos non sinit ire dies,  
 Et cum te fusco somnus velavit amictu, 55  
 Vanum nocturnis fallit imaginibus,  
 Carminibus celebrata tuis formosa Neæra  
 Alterius mavult esse puella viri,  
 Diversasque suas agitat mens impia curas,  
 Nec gaudet casta nupta Neæra domo. 60  
 Ah crudele genus nec fidum femina nomen!  
 Ah pereat, didicit fallere siqua virum.  
 Sed flecti poterit: mens es mutabilis illis:  
 Tu modo cum multa brachia tende prece.  
 Sævus Amor docuit validos tentare labores, 65  
 Sævus Amor docuit verbera sæva pati.  
 Me quondam Admeti niveas pavissee iuvenças  
 Non est in vanum fabula ficta iocum:  
 Tunc ego nec cithara poteram gaudere sonora  
 Nec similes chordis reddere voce sonos, 70  
 Sed perlucenti cantus meditabar avena  
 Ille ego Latonæ filius atque Iovis.  
 Nescis quid sit amor, iuvenis, si ferre recusas  
 Immitem dominam coniugiumque ferum.

Ergo ne dubita blandas adhibere querelas:	75
Vincuntur molli pectora dura prece.	
Quod si vera canunt sacris oracula templis,	
Haec illi nostro nomine dicta refer:	
'Hoc tibi coniugium promittit Delius ipse,	
Felix hoc, alium desine velle virum.'	80
Dixit, et ignavus defluxit corpore somnus.	
Ah ego ne possim tanta videre mala.	
Nec tibi crediderim votis contraria vota	
Nec tantum crimen pectore inesse tuo:	
Nam te nec vasti genuerunt aequora ponti	85
Nec flammam volvens ore Chimaera fero	
Nec canis anginea redimitus terga caterva,	
Cui tres sunt linguae tergeminumque caput,	
Scyllaque virgineam canibus succincta figuram,	
Nec te conceptam saeva leaena tulit,	90
Barbara nec Scythiae tellus horrendave Syrtis,	
Sed culta et duris non habitanda domus	
Et longe ante alias omnes mitissima mater	
Isque pater quo non alter amabilior.	
Haec deus in melius crudelia somnia vertat	95
Et iubeat tepidos irrita ferre Notos.	

## V.

Vos tenet, Etruscis manat quae fontibus unda,	
Unda sub aestivum non adeunda Canem,	
Nunc autem sacris Baiarum proxima lymphis,	
Cum se purpureo vere remittit humus:	
At mihi Persephone nigram denuntiat horam:	5
Inmerito iuveni parce nocere, dea.	
Non ego tentavi nulli temeranda virorum	
Audax laudandae sacra docere deae,	
Nec mea mortiferis infecit pocula succis	
Dextera nec cuiquam trita venena dedit,	10
Nec nos sacrilegi templis admovimus ignes,	
Nec cor sollicitant facta nefanda meum,	
Nec nos insanae meditantes iurgia mentis	

Impia in adversos solvimus ora deos:  
 Et nondum cani nigros laesere capillos, 15  
 Nec venit tardo curva senecta pede.  
 Natalem primo nostrum videre parentes,  
 Cum cecidit fato consul uterque pari.  
 Quid fraudare iuvat vitem crescentibus uvis  
 Et modo nata mala vellere poma manu? 20  
 Parcite, pallentes undas quicumque tenetis  
 Duraque sortiti tertia regna dei.  
 Elysios olim liceat cognoscere campos  
 Lethaeamque ratem Cimmeriosque lacus,  
 Cum mea rugosa pallebunt ora senecta 25  
 Et referam pueris tempora prisca senex.  
 Atque utinam vano nequicquam terrear aestu!  
 Languent ter quinos sed mea membra dies.  
 At vobis Tuscae celebrantur numina lymphae  
 Et facilis lenta pellitur unda manu. 30  
 Vivite felices, memores et vivite nostri,  
 Sive erimus seu nos fata fuisse velint.  
 Interea nigras pecudes promittite Diti  
 Et nivei lactis pocula mixta mero.

## VI.

Candide Liber, ades (sic sit tibi mystica vitis  
 Semper, sic hedera tempora vincta feras),  
 Aufer et ipse meum pariter medicando dolorem:  
 Saepe tuo cecidit munere victus amor.  
 Care puer, madeant generoso pocula Baccho, 5  
 Et nobis prona funde Falerna manu.  
 Ite procul durum curae genus, ite labores:  
 Fulserit hic niveis Delius alitibus.  
 Vos modo proposito dulces faveatis amici,  
 Neve neget quisquam me duce se comitem: 10  
 Aut si quis vini certamen mite recusat,  
 Fallat eum tecto cara puella dolo.  
 Ille facit dites animos deus, ille ferocem  
 Contudit et dominae misit in arbitrium,

- Armenias tigres et fulvas ille leaenas 15  
 Vicit et indomitis mollia corda dedit.  
 Haec Amor et maiora valet. sed poscite Bacchi  
 Munera: quem vestrum pocula sicca iuvant?  
 Convenit ex aequo nec torvus Liber in illis,  
 Qui se quique una vina iocosa colunt: 20  
 Convenit iratus nimium nimiumque severos:  
 Qui timet irati numina magna, bibat.  
 Quales his poenas qualis quantusque minetur,  
 Cadmeae matris praeda cruenta docet.  
 Sed procul a nobis hic sit timor, illaque, siqua est, 25  
 Quid valeat laesi sentiat ira dei.  
 Quid precor ah demens? venti temeraria vota,  
 Aeriae et nubes diripienda ferant.  
 Quamvis nulla mei superest tibi cura, Neaera,  
 Sis felix, et sint candida fata tua. 30  
 At nos securae reddamus tempora mensae:  
 Venit post multos una serena dies.  
 Hei mihi, difficile est imitari gaudia falsa,  
 Difficile est tristi fingere mente iocum,  
 Nec bene mendaci risus componitur ore, 35  
 Nec bene sollicitis ebria verba sonant.  
 Quid queror infelix? turpes discedite curae:  
 Odit Lenaeus tristia verba pater.  
 Gnosia, Theseae quondam periuria linguae  
 Flevisti ignoto sola relictæ mari: 40  
 Sic cecinit pro te doctus, Minoi, Catullus  
 Ingrati referens impia facta viri.  
 Vos ego nunc moneo: felix, quicumque dolore  
 Alterius discas posse carere tuo.  
 Nec vos aut capiant pendentia brachia collo 45  
 Aut fallat blanda sordida lingua prece.  
 Etsi perque suos fallax iuravit ocellos  
 Iunonemque suam perque suam Venerem,  
 Nulla fides inerit: periuria ridet amantum  
 Iuppiter et ventos irrita ferre iubet. 50  
 Ergo quid totiens fallacis verba puellae  
 Conqueror? ite a me, seria verba, procul.



Quam vellem tecum longas requiescere noctes

Et tecum longos pervigilare dies,

Perfida nec merito nobis inimica merenti,

55

Perfida, sed, quamvis perfida, cara tamen!

Naida Bacchus amat: cessas, o lente minister?

Temperet annosum Marcia lympa merum.

Non ego, si fugiat nostrae convivia mensae

Ignotum cupiens vana puella torum,

60

Sollicitus repetam tota suspiria nocte.

Tu puer, i, liquidum fortius adde merum.

Iam dudum Syrio madefactus tempora nardo

Debueram sertis implicuisse comas.

---

# ALBII TIBULLI

## LIBER QUARTUS.

### I.

Te, Messala, canam, quanquam me cognita virtus  
Terret, ut infirmæ nequeant subsistere vires,  
Incipiam tamen. a meritis si carmina laudes,  
Deficiant: humilis tantis sim conditor actis,  
Nec tua praeter te chartis intexere quisquam 5  
Facta queat, dictis ut non maiora supersint.  
Est nobis voluisse satis, nec munera parva  
Respueris. etiam Phoebæ gratissima dona  
Cres tulit, et cunctis Baccho iucundior hospes  
Icarus, ut puro testantur sidera caelo 10  
Erigoneque Canisque, neget ne longior aetas.  
Quin etiam Alcides deus ascensurus Olympum  
Laeta Molorscheis posuit vestigia tectis,  
Parvaeque caelestis placavit mica, nec illis  
Semper inaurato taurus cadit hostia cornu. 15  
Hic quoque sit gratus parvus labor, ut tibi possim  
Inde alios aliosque memor componere versus.  
Alter dicat opus magni mirabile mundi,  
Qualis in inmenso desederit aere tellus,  
Qualis et in curvum pontus confluxerit orbem, 20  
Et vagus, e terris qua surgere nititur, aer,  
Huic et contextus passim fluat igneus aether,  
Pendentique super claudantur ut omnia caelo:  
At, quodcunque meae poterunt audere Camenae,  
Seu tibi par poterunt seu, quod spes abnuit, ultra 25  
Sive minus (certeque canent minus), omne vovemus  
Hoc tibi, nec tanto careat mihi carmine charta.  
Nam, quanquam antiquae gentis superant tibi laudes,  
Non tua maiorum contenta est gloria fama,

Nec quaeris quid quaque index sub imagine dicat, 30  
 Sed generis priscos contendis vincere honores,  
 Quam tibi maiores malus decus ipse futuris:  
 At tua non titulus capiet sub nomine facta,  
 Aeterno sed erunt tibi magna volumina versu,  
 Convenientque tuas cupidi componere laudes 35  
 Undique quique canent vincto pede quique soluto.  
 Quis potior, certamen erit: sim victor in illis,  
 Ut nostrum tantis inscribam nomen in actis.

Nam quis te maiora gerit castrisque forove?  
 Nec tamen hic aut hic tibi laus maiorve minorve, 40  
 Iusta pari premitur veluti cum pondere libra,  
 Prona nec hac plus parte sedet nec surgit ab illa,  
 Qualis, inaequatum si quando onus urget utrinque,  
 Instabilis natat alterno depressior orbe.

Nam seu diversi fremat inconstantia vulgi, 45  
 Non alius sedare queat: seu iudicis ira  
 Sit placanda, tuis poterit mitescere verbis.  
 Non Pylos aut Ithace tantos genuisse feruntur  
 Nestora vel parvae magnum decus urbis Ulixen,  
 Vixerit ille senex quamvis, dum terna per orbem 50  
 Saecula fertilibus Titan decurreret horis,  
 Ille per ignotas audax erraverit urbes,  
 Qua maris extremis tellus includitur undis.  
 Nam Ciconumque manus adversis reppulit armis,  
 Nec valuit lotos coeptos avertere cursus, 55  
 Cessit et Aetnaeae Neptunius incola rupis  
 Victa Maroneo foedatus lumina Baccho:

Vexit et Aeolios placidum per Nerea ventos:  
 Incultos adiit Laestrygonas Antiphatenque,  
 Nobilis Artacie gelida quos irrigat unda: 60  
 Solum nec doctae verterunt pocula Circes,  
 Quamvis illa foret Solis genus, apta vel herbis  
 Aptaque vel cantu veteres mutare figuras:  
 Cimmerion etiam obscuras accessit ad arcis,  
 Quis nunquam candente dies apparuit ortu, 65  
 Seu supra terras Phoebus seu curreret infra:  
<sup>v72</sup>dit, ut inferno Plutonis subdita regno

Magna deum proles levibus discurreret umbris,  
 Praeteriitque cita Sirenum litora puppi.  
 Illum inter geminae nantem confinia mortis 70  
 Nec Scyllae saevo conterruit impetus ore,  
 Cum canibus rapidas inter fera serperet undas,  
 Nec violenta suo consumpsit more Charybdis,  
 Vel si sublimis fluctu consurgeret imo,  
 Vel si interrupto nudaret gurgite pontum. 75  
 Non violata vagi sileantur pascua Solis,  
 Non amor et fecunda Atlantidos arva Calypsus,  
 Finis et erroris miseri Phaeacia tellus.  
 Atque haec seu nostras inter sunt cognita terras,  
 Fabula sive novum dedit his erroribus orbem, 80  
 Sit labor illius, tua dum facundia, maior.  
 Iam te non alius belli tenet aptius artes,  
 Qua deceat tutam castris praeducere fossam,  
 Qualiter adversos hosti defigere cervos,  
 Quemve locum ducto melius sit claudere vallo, 85  
 Fontibus ut dulces erumpat terra liquores,  
 Ut facilisque tuis aditus sit et arduus hosti,  
 Laudis et assiduo vigeat certamine miles.  
 Quis tardamve sudem melius celeremve sagittam  
 Iecerit aut lento perfregerit obvia pilo? 90  
 Aut quis equum celeremque arto compescere fraeno  
 Possit et effusas tardo permittere habenas,  
 Inque vicem modo directo contendere passu,  
 Seu libeat, curvo brevius convertere gyro,  
 Quis parma, seu dextra velit seu laeva, tueri, 95  
 Sive hac sive illac grandis venit impetus hastae  
 Amplior, aut signata cita loca tangere funda?  
 Iam simul audacis venient certamina Martis,  
 Adversisque parent acies concurrere signis,  
 Tum tibi non desit faciem componere pugnae, 100  
 Seu sit opus quadratum acies consistat in agmen,  
 Rectus ut aequatis decurrat frontibus ordo,  
 Seu libeat duplicem seiunctim cernere Martem,  
 Dexter uti laevum teneat dextrumque sinister  
 Miles sitque duplex gemini victoria casus. 105

At non per dubias errant mea carmina laudes:  
 Nam bellis experta cano. testis mihi victae  
 Fortis Iapydiae miles, testis quoque fallax  
 Pannonius, gelidas passim disiectus in Alpes  
 Testis Arupinis et pauper natus in armis, 110  
 Quem si quis videat vetus ut non fregerit aetas,  
 Terna minus Pyliae miretur saecula famae.  
 Centum fecundos Titan renovaverit annos,  
 Ipse tamen velox celerem super edere corpus  
 Gaudet equum validisque sedet moderator habenis. 115  
 Te duce non alias conversus terga domator  
 Libera Romanae subiecit colla catenae.

Nec tamen his contentus eris: maiora peractis  
 Instant, compertum est veracibus ut mihi signis,  
 Quis Amythaonius nequeat certare Melampus. 120  
 Nam modo fulgentem Tyrio subtegmine vestem  
 Indueras oriente die duce fertilis anni,  
 Splendidior liquidis cum Sol caput extulit undis  
 Et fera discordes tenuerunt flamina venti,  
 Curva nec assuetos egerunt flumina cursus, 125  
 Quin rapidum placidis etiam mare constifit undis,  
 Nulla nec aerias volucris perlabitur auras  
 Nec quadrupes densas depascitur aspera silvas,  
 Quin largita tuis sunt muta silentia votis.  
 Iuppiter ipse levi vectus per inania curru 130  
 Affuit et caelo vicinum liquit Olympum  
 Intentaque tuis precibus se praebuilt aure  
 Cunctaque veraci capite annuit: additus aris  
 Laetior eluxit structos super ignis acervos.

Quin hortante deo magnis insistere rebus 135  
 Incipe: non idem tibi sint aliisque triumphis.  
 Non te vicino remorabitur obvia Marte  
 Gallia nec latis audax Hispania terris  
 Nec fera Theraeo tellus obsessa colono,  
 Nec qua vel Nilus vel regia lympha Choaspes 140  
 Profluit aut rapidus, Cyri dementia, Gyndes  
 Aret Arecteis haud una per ostia campis,  
 Nec qua regna vago Tomyris finivit Araxe,

Impia nec saevis celebrans convivia mensis  
 Ultima vicinus Phoebus tenet arva Padaeus: 145  
 Quaque Hebrus Tanaisque Getas rigat atque Magynos,  
 Quid moror? Oceanus ponto qua continet orbem,  
 Nulla tibi adversis regio sese offeret armis.  
 Te manet invictus Romano Marte Britannus  
 Teque interiecto mundi pars altera sole. 150  
 Nam circumfuso consistit in aere tellus  
 Et quinque in partes toto disponitur orbe.  
 Atque duae gelido vastantur frigore semper:  
 Illic et densa tellus absconditur umbra,  
 Et nulla incepto perlabitur unda liquore, 155  
 Sed durata riget densam in glaciemque nivemque,  
 Quippe ubi non unquam Titan super egerit ortus.  
 At media est Phoebi semper subiecta calori,  
 Seu propior terris aestivum fertur in orbem  
 Seu celer hibernas properat decurrere luces: 160  
 Non igitur presso tellus exurgit aratro,  
 Nec frugem segetes praebent nec pabula terrae:  
 Non illic colit arva deus, Bacchusve Ceresve,  
 Nulla nec exustas habitant animalia partes.  
 Fertilis hanc inter posita est interque rigentes 165  
 Nostraque et huic adversa solo pars altera nostro,  
 Quas similis utrinque tenens vicinia caeli  
 Temperat, alter et alterius vires necat aer:  
 Hinc placidus nobis per tempora vertitur annus:  
 Hic et colla iugo didicit summittere taurus 170  
 Et lenta excelsos vitis conscendere ramos,  
 Tondeturque seges maturos annua partus,  
 Et ferro tellus, pontus confinditur aere,  
 Quin etiam structis exurgunt oppida muris.  
 Ergo, ubi praeclaros tulerint tua facta triumphos, 175  
 Solus utroque idem diceris magnus in orbe.

Non ego sum satis ad tantae praeconia laudis,  
 Ipse mihi non si praescribat carmina Phoebus.  
 Est tibi, qui possit magnis se accingere rebus,  
 Valgius: aeterno propior non alter Homero. 180  
 Languida non noster peragit labor otia, quamvis

Fortuna, ut mos est illi, me adversa fatiget.  
Nam mihi, cum magnis opibus domus alta niteret,  
Cui fuerant flavi ditantes ordine sulci  
Horrea fecundas ad deficientia messes, 185  
Cuique pecus denso pascebant agmine colles  
(Et domino satis et nimium furique lupoque),  
Nunc desiderium superest: nam cura novatur,  
Cum memor ante actos semper dolor admonet annos.  
Sed licet asperiora cadant spolierque relictis, 190  
Non te deficient nostrae memorare Camenae.  
Nec solum tibi Pierii tribuentur honores:  
Pro te vel rapidas ausim maris ire per undas,  
Adversis hiberna licet tumeant freta ventis,  
Pro te vel densis solus subsistere turmis 195  
Vel parvum Aetnaeae corpus committere flammae.  
Sum quodcunque, tuum est. nostri si parvula cura  
Sit tibi, quanta libet, si sit modo, non mihi regna  
Lydia, non magni potior sit fama Gylippi,  
Posse Meleteas nec malle vincere chartas. 200  
Quod tibi si versus noster, totusve minusve,  
Vel bene sit notus, summo vel inerret in ore,  
Nulla mihi statuent finem te fata canendi.  
Quin etiam mea tunc tumulus cum texerit ossa,  
Seu matura dies celerem properat mihi mortem, 205  
Longa manet seu vita, tamen, mutata figura  
Seu me finget equum rigidos percurrere campos  
Doctum seu tardi pecoris sim gloria taurus  
Sive ego per liquidum volucris vehar aera pennis,  
Quandocunque hominem me longa receperit aetas, 210  
Inceptis de te subtexam carmina chartis.

---

## II.

Sulpicia est tibi culta tuis, Mars magne, kalendis:  
 Spectatum e caelo, si sapis, ipse veni.  
 Hoc Venus ignoscet: at tu, violente, caveto  
 Ne tibi miranti turpiter arma cadant.  
 Illius ex oculis, cum vult exurere divos, 5  
 Accendit gēminas lampadas acer Amor.  
 Illam, quicquid agit, quoquo vestigia movit,  
 Componit furtim subsequiturque Decor.  
 Seu solvit crines, fusis decet esse capillis:  
 Seu compsit, comptis est veneranda comis. 10  
 Urit, seu Tyria voluit procedere palla:  
 Urit, seu nivea candida veste venit.  
 Talis in aeterno felix Vertumnus Olympo  
 Mille habet ornatus, mille decenter habet.  
 Sola puellarum digna est, cui mollia caris 15  
 Vellera det succis bis madefacta Tyros,  
 Possideatque, metit quicquid bene olentibus arvis  
 Cultor odoratae dives Arabs segetis  
 Et quascunque niger rubro de litore gemmas  
 Proximus Eois colligit Indus aquis. 20  
 Hanc vos, Pierides, festis cantate kalendis,  
 Et testudinea Phoebe superbe lyra.  
 Hoc solemne sacrum: multos hoc sumet in annos:  
 Dignior est vestro nulla puella choro.

## III.

Parce meo iuveni, seu quis bona pascua campi  
 Seu colis umbrosi devia montis aper,  
 Nec tibi sit duros acuisse in praelia dentes,  
 Incolumem custos hunc mihi servet Amor.  
 Sed procul abducit venandi Delia cura: 6  
 O pereant silvae, deficientque canes!  
 Quis furor est, quae mens, densos indagine colles  
 Claudentem teneras laedere velle manus?



Quidve iuvat furtim latebras intrare ferarum  
 Candidaque hamatis crura notare rubis? 10  
 Sed tamen, ut tecum liceat, Cerinthe, vagari,  
 Ipsa ego per montes retia torta feram,  
 Ipsa ego velocis quaeram vestigia cervi  
 Et demam celeri ferrea vincla cani.  
 Tunc mihi, tunc placeant silvae, si, lux mea, tecum 15  
 Arguar ante ipsas concubuisse plagas:  
 Tunc veniat licet ad casses, illaesus abibit,  
 Ne Veneris cupidae gaudia turbet, aper.  
 Nunc sine me sit nulla Venus, sed lege Dianae,  
 Caste puer, casta retia tange manu: 20  
 Et quaecunque meo furtim subrepat amori,  
 Incidat in saevas diripienda feras.  
 At tu venandi studium concede parenti,  
 Et celer in nostros ipse recurre sinus.

## IV.

Huc ades et tenerae morbos expelle puellae,  
 Huc ades, intonsa Phoebe superbe coma.  
 Crede mihi, propera: nec te iam, Phoebe, pigebit  
 Formosae medicas applicuisse manus.  
 Effice ne macies pallentes occupet artus, 5  
 Neu notet informis candida membra color,  
 Et quodcunque mali est et quicquid triste timemus,  
 In pelagus rapidis evehat amnis aquis.  
 Sancte, veni, tecumque feras, quicumque saporis,  
 Quicumque et cantus corpora fessa levant: 10  
 Neu iuvenem torque, metuit qui fata puellae  
 Votaque pro domina vix numeranda facit.  
 Interdum vovet, interdum, quod langueat illa,  
 Dicit in aeternos aspera verba deos.  
 Pone metum, Cerinthe: deus non laedit amantes. 15  
 Tu modo semper ama: salva puella tibi est.  
 Nil opus est fletu: lacrimis erit aptius uti,  
 Si quando fuerit tristior illa tibi.  
 At nunc tota tua est, te solum candida secum

Cogitat, et frustra credula turba sedet. 20  
 Phoebe, fave: laus magna tibi tribuetur in uno  
 Corpore servato restituuisse duos.  
 Iam celebrer, iam laetus eris, cum debita reddet  
 Certatim sanctis laetus uterque focis.  
 Tunc te felicem dicet pia turba deorum, 25  
 Optabunt artes et sibi quisque tuas.

## V.

Qui mihi te, Cerinthe, dies dedit, hic mihi sanctus  
 Atque inter festos semper habendus erit.  
 Te nascente novum Parcae cecinere puellis  
 Servitium et dederunt regna superba tibi.  
 Uror ego ante alias: iuvat hoc, Cerinthe, quod uror, 5  
 Si tibi de nobis mutuus ignis adest.  
 Mutuus adsit amor, per te dulcissima furta  
 Perque tuos oculos per Geniumque rogo.  
 Mane Geni, cape tura libens votisque faveto,  
 Si modo, cum de me cogitat, ille calet. 10  
 Quod si forte alios iam nunc suspirat amores,  
 Tunc precor infidos, sancte, relinque focos.  
 Nec tu sis iniusta, Venus: vel serviat aequae  
 Vinctus uterque tibi, vel mea vincla leva.  
 Sed potius valida teneamur uterque catena, 15  
 Nulla queat posthac nos soluisse dies.  
 Optat idem iuvenis quod nos, sed tectius optat:  
 Nam pudet haec illum dicere verba palam.  
 At tu, Natalis, quoniam deus omnia sentis,  
 Annue: quid refert, clamve palamve roget? 20

## VI.

Natalis Iuno, sanctos cape turis acervos,  
 Quos tibi dat tenera docta puella manu.  
 Tota tibi est hodie, tibi se laetissima compsit,  
 Staret ut ante tuos conspicienda focos.  
 Illa quidem ornandi causas tibi, diva, relegat: 5

Est tamen, occulte cui placuisse velit.  
At tu, sancta, fave, neu quis divellat amantes,  
Sed iuveni quaeso mutua vincla para.  
Sic bene compones: ullae non ille puellae  
Servire aut cuiquam dignior illa viro. 10  
Nec possit cupidos vigilans deprendere custos,  
Fallendique vias mille ministret Amor.  
Annue purpureaque veni perlucida palla:  
Ter tibi fit libo, ter, dea casta, mero.  
Praecipit et natae mater studiosa, quod optat: 15  
Illa aliud tacita, iam sua, mente rogat:  
Uritur, ut celeres urunt altaria flammae,  
Nec, liceat quamvis, sana fuisse velit.  
Sis iuveni grata: adveniet cum proximus annus,  
Hic idem votis iam vetus adsit amor. 20

---

## SULPICIA.

## VII.

Tandem venit amor, qualem texisset pudori  
Quam nudasse alicui sit mihi fama magis.  
Exorata meis illum Cytherea Camenis  
Attulit in nostrum deposuitque sinum.  
Exolvit promissa Venus: mea gaudia narret, 5  
Dicetur siquis non habuisse sua.  
Non ego signatis quicquam mandare tabellis,  
Ne legat id nemo quam meus ante, velim,  
Sed peccasse iuvat, vultus componere famae  
Taedet: cum digno fuisse ferar. 10

---

## VIII.

Invisus natalis adest, qui rure molesto  
Et sine Cerinθο tristis agendus erit.  
Dulcius urbe quid est? an villa sit apta puellae  
Atque Arretino frigidus amnis agro?  
Iam, nimium Messala mei studiose, quiescas, 5  
Non tempestivae saepe propinque viae.  
Hic animum sensusque meos abducta relinquo,  
Arbitrio quoniam non sinis esse meo.

---

## IX.

Scis iter ex animo sublatum triste puellae?  
Natali Romae iam licet esse tuo.  
Omnibus ille dies nobis natalis agatur,  
Qui nec opinanti nunc tibi forte venit.

---

## X.

Gratum est, securus multum quod iam tibi de me  
Permittis, subito ne male inepta cadam.  
Sit tibi cura togae potior pressumque

Scortum quam Servi filia Sulpicia:  
Solliciti sunt pro nobis, quibus illa dolori est, 5  
Ne cedam ignoto maxima causa toro.

---

## XI.

Estne tibi, Cerinthe, tuae pia cura puellae  
Quod mea nunc vexat corpora fessa calor?  
Ah ego non aliter tristes evincere morbos  
Optarim, quam te si quoque velle putem. 5  
At mihi quid prosit morbos evincere, quum tu  
Nostra potes lento pectore ferre mala?

---

## XII.

Ne tibi sim, mea lux, aequae iam fervida cura,  
Ac videor paucos ante fuisse dies,  
Sic quicquam tota commisi stulta iuventa,  
Cuius me fatear paenituisse magis, 5  
Hesterna quam te solum quod nocte reliqui,  
Ardorem cupiens dissimulare meum.

---

## XIII.

Nulla tuum nobis subducet femina lectum:

Hoc primum iuncta est foedere nostra Venus.

Tu modo sola places, nec iam te praeter in urbe

Formosa est oculis ulla puella meis.

Atque utinam posses uni mihi bella videri!

Displiceas aliis: sic ego tutus ero.

Nil opus invidia est, procul absit gloria vulgi:

Qui sapit, in tacito gaudeat ille sinu.

Sic ego secretis possum bene vivere silvis,

Qua nulla humano sit via trita pede.

10

Tu mihi curarum requies, tu nocte vel atra

Lumen, et in solis tu mihi turba locis.

Nunc licet e caelo mittatur amica Tibullo,

Mittetur frustra, deficientque Venus.

Haec tibi sancta tuae Iunonis numina iuro,

15

Quae sola ante alios est tibi magna deos.

Quid facio demens? heu heu mea pignora cedo.

Iuravi stulte: proderat iste timor.

Nunc tu fortis eris, nunc tu me audacius ures:

Hoc peperit misero garrula lingua malum.

20

Iam faciam quodcunque voles, tuus usque manebo,

Nec fugiam notae servitium dominae,

Sed Veneris sanctae considam vinctus ad aras.

Haec notat iniustos supplicibusque favet.

## XIV.

Rumor ait crebro nostram peccare puellam:

Nunc ego me surdis auribus esse velim.

Crimina non haec sunt nostro sine facta dolore:

Quid miserum torques, rumor acerbe? tace.



88 n 49 - B.C. 7

U. 3

**SEX. PROPERTII**  
**E L E G I A E.**

---


**EDIDIT**

**HENRICUS KEIL.**



**LIPSIAE**  
**SUMPTIBUS ET TYPIS B. G. TEUBNERI**  
**MDCCCLXVII.**





## P R A E F A T I O.

---

Quam rationem in hac Propertii editione aut secutus sim aut sequi debuerim, eos quorum interest facile intellecturos esse existimo. quare hoc praefandi negotio mihi videbar supersedere posse, nisi id suis rationibus utile esse credidisset bibliopola. de cuius commodo ne quid forte per me detraheretur, paucis rem indicare visum est.

Constat autem Propertii carmina Caroli Lachmanni et Friderici Jacobi curis ita expolita esse, ut neque e novis librorum scriptorum copiis quidquam auxilii postea peti debeat, id quod luculento exemplo nuper Hertzbergius comprobavit, neque emendando pro huius quidem editionis consilio multa mutari possint. quamvis multa enim ab illis non inconsiderate relictas sint, quorum corrigenda esset scriptura, paucis tamen tam certam paratam vidi emendationem, ut a codicum scriptura, cui magis quam volebam ipsa editionis natura adstrictus eram, discedendum esset. itaque cum is qui ante hos viginti tres annos Jacobi editione curata bene de hoc poeta meruit, nunc integram repetere priorem editionem noluisset meque ut emendatius, quantum fieri posset, exemplum pararem rogasset, operam meam, etsi exilem fore intellexi, tamen ei denegandam esse non arbitratus sum. e codicibus igitur eos quos Lachmannus elegit secutus sum, Groninganum dico et Neapolitanum; a quibus proximum quidem locum tenet Regiensis editio, quam Lachmannus addidit, et codex Mentelianus, quem ipse olim contuli, sed ita tamen proximum, ut exiguus sit horum librorum usus. is autem qui tertius illis

duobus addi solet, Bernardini Vallae liber a Francisco Puccio Florentino excerptus, haud multo certioris fidei est, quam Antonii Perreii, Angeli Colotii, aliorum excerpta; nec quidquam boni his omnibus servatum esse puto, quod non Italorum ingenio debeatur. quare ne Puccii quidem auctoritate quidquam recipere ausus sum, nisi si emendationis probabilitate commendaretur.

Coniecturis autem sive aliorum sive meis locum esse nolui, nisi eis, quae satis in se ipsis praesidii habere viderentur. cuius generis haec adscripsi exempla: I, 11, 21 *Nam mihi* scripsi pro *An mihi*; II, 3, 33 *flagrat* pro *flagret*; III, 32, 31 *Latiis Meropem Musis* pro *satiis memorem Musis* cum alios tum Schneidewinum Philol. I p. 170 secutus; IV, 6, 22 *Athamantiadae* pro *minantis aquae*, cf. Schneidew. ibid. p. 376; 14, 32 sq. *Eurus et adverso* — *Litore sub tacito* pro *Eurus in adversos* — *Litore sic tacito*; 18, 22 *tondes* pro *tondens*; 22, 15 *Et sis qua Ortygia et visenda est ora Caystri* pro *et si qua Ortygiae visenda est ora Caystri* e coniectura Hauptii Mus. Rhen. a. 1845; V, 1, 125 *Asisi* pro *asis* auctore Lachmanno; 5, 19 *pererrat* pro *perurat* e coniectura F. Jacobi Philol. II p. 459, qui praeterea in sequenti versu *ferit* — *gutta* scribendum esse coniecit. contra plurima, quae corrupta esse mihi persuasum erat, sive plures emendandi rationes probari posse videbantur, sive nulla satis placebat, sive ipsa codicum scriptura aliquo modo defendi poterat, ita ut in optimis codicibus scripta sunt relinquere, quam coniecturam substituere malui.

---

**S E X. P R O P E R T I I**  
**E L E G I A R U M**  
**L I B E R P R I M U S .**

- 1** Cynthia prima suis miserum me cepit ocellis,  
Contactum nullis ante cupidinibus.  
Tum mihi constantis delectit lumina fastus  
Et caput inpositis pressit Amor pedibus,  
**5** Donec me docuit castas odisse puellas  
Improbis et nullo vivere consilio ;  
Et mihi iam toto furor hic non deficit anno,  
Cum tamen adversos cogor habere deos.  
Milanion nullos fugiendo, Tulle, labores  
**10** Saevitiam durae contudit Iasidos.  
Nam modo Partheniis amens errabat in antris,  
Ibat et hirsutas ille videre feras,  
Ille etiam Hylaei percussus vulnere rami  
Saucius Arcadiis rupibus ingemuit.  
**15** Ergo velocem potuit domuisse puellam :  
Tantum in amore preces et benefacta valent.  
In me tardus Amor non ullas cogitat artes  
Nec meminit notas, ut prius, ire vias.  
At vos, deductae quibus est fallacia lunae  
**20** Et labor in magicis sacra piare focis,  
En agedum dominae mentem convertite nostrae  
Et facite illa meo palleat ore magis.  
Tunc ego crediderim vobis et sidera et amnes  
Posse Cytaines ducere carminibus.  
**25** Aut vos, qui sero lapsum revocatis, amici,  
Quaerite non sani pectoris auxilia.  
Fortiter et ferrum saevos patiemur et ignes,  
Sit modo libertas quae velit ira loqui.  
Ferte per extremas gentes et ferte per undas,

- 30 Quā non ulla meum femina norit iter.  
 Vos remanete, quibus facili deus annuit aures,  
 Sitis et in tuto semper amore pares.  
 In me nostra Venus noctes exercet amaras,  
 Et nullo vacuus tempore defit amor.  
 35 Hoc, moneo, vitate malum: sua quemque moretur  
 Cura, neque assueto mutet amore locum.  
 Quod si quis monitis tardas adverterit aures,  
 Heu referet quanto verba dolore mea!

- 2 Quid iuvat ornato procedere, vita, capillo  
 Et tenues Coa veste movere sinus?  
 Ant quid Orontea crines perfundere murra,  
 Teque peregrinis vendere muneribus,  
 5 Naturaeque decus mercato perdere cultu  
 Nec sinere in propriis membra nitere bonis?  
 Crede mihi, non ulla tuae est medicina figurae:  
 Nudus Amor formae non amat artificem.  
 Aspice quos summittit humus formosa colores,  
 10 Ut veniant hederæ sponte sua melius,  
 Surgat et in solis formosius arbutus antris,  
 Et sciat indociles currere lympa vias.  
 Litora nativis collucent picta lapillis  
 Et volucres nulla dulcius arte canunt.  
 15 Non sic Leucippis succendit Castora Phoebe,  
 Pollucem cultu non Hilaira soror,  
 Non, Idae et cupido quondam discordia Phoebo,  
 Eueni patriis filia litoribus,  
 Nec Phrygium falso traxit candore maritum  
 20 Aucta externis Hippodamia rotis;  
 Sed facies aderat nullis obnoxia gemmis,  
 Qualis Apelleis est color in tabulis.  
 Non illis studium vulgo conquirere amantes:  
 Illis ampla satis forma pudicitia.  
 25 Non ego nunc vereor, ne sim tibi vilior istis:  
 Uni si qua placet, culta puella sat est,  
 Cum tibi praesertim Phoebus sua carmina donet  
 Aoniamque libens Calliopea lyram,

- Unica nec desit iocundis gratia verbis,  
 30 Omnia quaeque Venus quaeque Minerva probat.  
 His tu semper eris nostrae gratissima vitae,  
 Taedia dum miserae sint tibi luxuriae.

- 3 Qualis Thesea iacuit cedente carina  
 Languida desertis Cnosia litoribus,  
 Qualis et accubuit primo Cepheia somno  
 Libera iam duris cotibus Andromede,  
 5 Nec minus assiduus Edonis fessa choreis  
 Qualis in herboso concidit Apidano,  
 Talis visa mihi mollem spirare quietem  
 Cynthia non certis nixa caput manibus,  
 Ebria cum multo traherem vestigia Baccho  
 10 Et quaterent sera nocte facem pueri.  
 Hanc ego, nondum etiam sensus deperditus omnes,  
 Molliter inpresso conor adire toro;  
 Et quamvis duplici correptum ardore iuberent  
 Hac Amor hac Liber, durus uterque deus,  
 15 Subiecto leviter positam temptare lacerto  
 Osculaque admota sumere et arma manu,  
 Non tamen ausus eram dominae turbare quietem,  
 Expertae metuens iurgia saevitiae,  
 Sed sic intentis haerebam fixus ocellis,  
 20 Argus ut ignotis cornibus Inachidos.  
 Et modo solvebam nostra de fronte corollas  
 Ponebamque tuis, Cynthia, temporibus,  
 Et modo gaudebam lapsos formare capillos,  
 Nunc furtiva cavis poma dabam manibus,  
 25 Omniaque ingrato largibar munera somno,  
 Munera de prono saepe voluta sinu;  
 Et quotiens raro duxti suspiria motu,  
 Obstupui vano credulus auspicio,  
 Ne qua tibi insolitos portarent visa timores,  
 30 Neve quis invitam cogeret esse suam:  
 Donec diversas percurrrens luna fenestras,  
 Luna moraturis sedula luminibus,  
 Compositos levibus radiis patefecit ocellos.

- Sic ait in molli fixa toro cubitum:  
 35 'Tandem te nostro referens iniuria lecto  
 Alterius clausis expulit e foribus?  
 Namque ubi longa meae consumpti tempora noctia,  
 Languidus exactis, hei mihi, sideribus?  
 O utinam tales perducas, improbe, noctes,  
 40 Me miseram quales semper habere iubes!  
 Nam modo purpureo fallebam stamine somnum,  
 Rursus et Orphee carmine fessa lyrae:  
 Interdum leviter mecum deserta querebar  
 Externo longas saepe in amore moras,  
 45 Dum me iocundis lapsam sopor inpulit alis.  
 Illa fuit lacrimis ultima cura meis.'

- 4 Quid mihi tam multas laudando, Basse, puellas  
 Mutatum domina cogis abire mea?  
 Quid me non pateris vitae quodcumque sequetur  
 Hoc magis assueto ducere servitio?  
 5 Tu licet Antiopae formam Nycteidis et tu  
 Spartanæ referas laudibus Hermionæ,  
 Et quascumque tulit formosi temporis aetas:  
 Cynthia non illas nomen habere sinet,  
 Nedum, si levibus fuerit collata figuris,  
 10 Inferior duro iudice turpis eat.  
 Haec sed forma mei pars est extrema furoris:  
 Sunt maiora, quibus, Basse, perire iuvat,  
 Ingenuus calor et multis decus artibus et quae  
 Gaudia sub tacita ducere veste libet:  
 15 Quo magis et nostros contendis solvere amores,  
 Hoc magis accepta fallit uterque fide.  
 Non in punie feres: sciet haec insana puella  
 Et tibi non tacitis vocibus hostis erit:  
 Nec tibi me post haec committet Cynthia nec te  
 20 Quaeret: erit tanti criminis illa memor  
 Et te circum omnes alias irata puellas  
 Differet: heu nullo limine carus eris.  
 Nullas illa suis contemnet fletibus aras,  
 Et quicumque sacæ, qualis, ubique, lapis.

25 Non ullo gravius temptatur Cynthia damno,  
 Quam sibi cum raptō cessat amore deus,  
 Praecipue nostro. maneat sic semper, adoro,  
 Nec quicquam ex illa quod querar inveniam.

5 Invide, tu tandem voces compesce molestas  
 Et sine nos cursu, quo sumus, ire pares.  
 Quid tibi vis, insane? meos sentire furores?  
 Infelix, properas ultima nosse mala

5 Et miser ignotos vestigia ferre per ignes  
 Et bibere e tota toxica Thessalia.  
 Non est illa vagis similis collata puellis:  
 Molliter irasci non solet illa tibi.

Quod si forte tuis non est contraria votis,  
 10 At tibi curarum milia quanta dabit.  
 Non tibi iam somnos, non illa relinquet ocellos:  
 Illa feros animis adligat una viros.

Ah mea contemptus quotiens ad limina curres,  
 Cum tibi singultu fortia verba cadent,

15 Et tremulus maestis orietur fletibus horror,  
 Et timor informem ducet in ore notam,  
 Et quaecumque voles fugient tibi verba querenti,  
 Nec poteris, qui sis aut ubi, nosse miser.

Tum grave servitium nostrae cogere puellae

20 Discere et exclusum quid sit abire domum;  
 Nec iam pallorem totiens mirabere nostrum,  
 Aut cur sim toto corpore nullus ego.

Nec tibi nobilitas poterit succurrere amanti:  
 Nescit Amor priscis cedere imaginibus.

25 Quod si parva tuae dederis vestigia culpaе,  
 Quam cito de tanto nomine rumor eris!

Non ego tum potero solatia ferre roganti,  
 Cum mihi nulla mei sit medicina mali,

Sed pariter miseri socio cogemur amore

30 Alter in alterius mutua flere sinu.

Quare, quid possit mea Cynthia, desine, Galle,  
 Quaerere: non inpune illa rogata venit.



- 6 Non ego nunc Hadriae vereor mare noscere tecum,  
Tulle, neque Aegaeo ducere vela salo,  
Cum quo Rhypaeos possim conscendere montes  
Ulteriusque domos vadere Memnonias;  
5 Sed me complexae remorantur verba puellae,  
Mutatoque graves saepe colore preces.  
Illa mihi totis argutat noctibus ignes  
Et queritur nullos esse relicta deos,  
Illa meam mihi iam se denegat, illa minatur,  
10 Quae solet ingrato tristis amica viro.  
His ego non horam possum durare querellis:  
Ah pereat, si quis lentus amare potest!  
An mihi sit tanti doctas cognoscere Athenas  
Atque Asiae veteres cernere divitias,  
15 Ut mihi deducta faciat convicia puppi  
Cynthia et insanis ora notet manibus,  
Osculaque opposito dicat sibi debita vento  
Et nihil infido durius esse viro?  
Tu patrui meritas conare antelre secures  
20 Et vetera oblitis iura refer sociis.  
Nam tua non aetas umquam cessavit amorì,  
Semper et armatae cura fuit patriae,  
Et tibi non umquam nostros puer iste labores  
Adferat et lacrimis omnia nota meis.  
25 Me sine, quem semper voluit fortuna iacere,  
Hanc animam extremae reddere nequitiae.  
Multi longinquo periere in amore libenter,  
In quorum numero me quoque terra tegat.  
Non ego sum laudi, non natus idoneus armis:  
30 Hanc me militiam fata subire volunt.  
At tu seu mollis qua tendit Ionia seu qua  
Lydia Pactoli tingit arata liquor,  
Seu pedibus terras seu pontum carpere remis  
Ibis et accepti pars eris imperii,  
35 Tum tibi si qua mei veniet non inmemor hora,  
Vivere me duro sidere certus eris.
-

- 7** Dum tibi Cadmeae dicuntur, Pontice, Thebae  
Armaque fraternae tristia militiae,  
Atque, ita sim felix, primo contendis Homero,  
Sint modo fata tuis mollia carminibus,
- 5** Nos, ut consuemus, nostros agitamus amores  
Atque aliquid duram quaerimus in dominam;  
Nec tantum ingenio, quantum servire dolori  
Cogor et aetatis tempora dura queri.  
Hic mihi conteritur vitae modus, haec mea fama est,
- 10** Hinc cupio nomen carminis ire mei.  
Me laudent doctae solum placuisse puellae,  
Pontice, et iniustas saepe tulisse minas:  
Me legat assidue post haec neglectus amator,  
Et prosint illi cognita nostra mala.
- 15** Te quoque si certo puer hic concusserit arcu,  
Quod nolim nostros eviolasse deos,  
Longe castra tibi, longe miser agmina septem  
Flebis in aeterno surda iacere situ,  
Et frustra cupies mollem componere versum,
- 20** Nec tibi subiciet carmina serus Amor.  
Tum me non humilem mirabere saepe poetam,  
Tunc ego Romanis praeferar ingeniis,  
Nec poterunt iuvenes nostro reticere sepulcro  
'Ardoris nostri magne poeta laces.'
- 25** Tu cave nostra tuo contemnas carmina fastu:  
Saepe venit magno fenore tardus Amor.
- 
- 8** Tune igitur demens, nec te mea cura moratur?  
An tibi sum gelida vilior Illyria,  
Et tibi iam tanti, quicumque est, iste videtur,  
Ut sine me vento quolibet ire velis?
- 5** Tune audire potes vesani murmura ponti  
Fortis et in dura nave iacere potes?  
Tu pedibus teneris positas fulcire pruinas,  
Tu potes insolitas, Cynthia, ferre nives?
- 10** O utinam hibernae duplicentur tempora brumae,  
Et sit iners tardis navita Vergiliis,

- Nec tibi Tyrrhena solvatur funis arena,  
 Neve inimica meas elevet aura preces,  
 Atque ego non videam tales subsidere ventos,  
 Cum tibi provectas auferet unda rates,  
 15 Et me defixum vacua patiat in ora  
     Crudelem infesta saepe vocare manu.  
 Sed quocumque modo de me, perlura, mereris,  
     Sit Galatea tuae non aliena viae,  
 Ut te felici praevecta Ceraunia remo  
 20 Accipiat placidis Oricos aequoribus.  
 Nam me non ullae poterunt corrumpere taedae,  
     Quin ego, vita, tuo limine verba querar;  
 Nec me deficient nautas rogitare citatos  
     'Dicite, quo portu clausa puella mea est?'  
 25 Et dicam 'licet Atracii consadat in oris,  
     Et licet Eleis, illa futura mea est.'  
 Hic erit, hic iurata manet, rumpantur iniqui!  
     Vicimus: assiduas non tulit illa preces.  
 Falsa licet cupidus deponat gaudia livor:  
 30 Destitit ire novas Cynthia nostra vias.  
 Illi carus ego et per me carissima Roma  
     Dicitur, et sine me dulcia regna negat.  
 Illa vel angusto mecum requiescere lecto  
     Et quocumque modo maluit esse mea,  
 35 Quam sibi dotatae regnum vetus Hippodamiae,  
     Et quas Elis opes ante pararat equis.  
 Quamvis magna daret, quamvis maiora daturus,  
     Non tamen illa meos fugit avara sinus.  
 Hanc ego non auro, non Indis flectere conchis,  
 40 Sed potui blandi carminis obsequio.  
 Sunt igitur Musae neque amanti tardus Apollo,  
     Quis ego fretus amo: Cynthia rara mea est.  
 Nunc mihi summa licet contingere sidera plantis:  
     Sive dies seu nox venerit, illa mea est,  
 45 Nec mihi rivalis certos subducit amores.  
     Ista meam norit gloria canitiem.
-

- 9 Dicebam tibi venturos, irrisor, amores  
Nec tibi perpetuo libera verba fore:  
Ecce iaces supplexque venis ad iura puellae,  
Et tibi nunc quovis imperat empta modo.  
5 Non me Chaoniae vincant in amore columbae  
Dicere, quos iuvenes quaeque puella domet.  
Me dolor et lacrimae merito fecere peritum:  
Atque utinam posito dicar amore rudis!  
Quid tibi nunc misero prodest grave dicere carmen  
10 Aut Amphioniae moenia flere lyrae?  
Plus in amore valet Mimnermi versus Homero:  
Carmina mansuetus lenia quaerit Amor.  
I quaeso et tristis istos compone libellos  
Et cane quod quaevis nosse puella velit.  
15 Quid si non esset facilis tibi copia? nunc tu  
Insanus medio flumine quaeris aquam.  
Necdum etiam palles, vero nec tangeris igni:  
Haec est venturi prima favilla mali.  
Tum magis Armenias cupies accedere tigres  
20 Et magis infernae vincula nosse rotae,  
Quam pueri totiens arcum sentire medullis  
Et nihil iratae posse negare tuae.  
Nullus Amor cuiquam facilis ita praebeuit alas,  
Ut non alterna presserit ille manu.  
25 Nec te decipiat, quod sit satis illa parata:  
Acrius illa subit, Pontice, si qua tua est,  
Quippe ubi non liceat vacuos seducere ocellos,  
Nec vigilare alio nomine cedat Amor,  
Qui non ante patet, donec manus attigit ossa.  
30 Quisquis es, assiduas ah fuge blanditias.  
Illis et silices possunt et cedere quercus,  
Nedum tu possis, spiritus iste levis.  
Quare, si pudor est, quam primum errata fateri:  
Dicere quo pereas saepe in amore levat.
- 10 O iocunda quies, primo cum testis amori  
Adfucram vestris conscius in lacrimis!

- O noctem meminisse mihi iocunda voluptas,  
O quotiens votis illa vocanda meis,  
5 Cum te complexa morientem, Galle, puella  
Vidimus et longa ducere verba mora!  
Quamvis labentes premeret mihi somnus ocellos  
Et mediis caelo Luna ruberet equis,  
Non tamen a vestro potui secedere lusu:  
10 Tantus in alternis vocibus ardor erat.  
Sed quoniam non es veritus concedere nobis,  
Accipe commissae munera laetitiae:  
Non solum vestros didici reticere dolores,  
Est quiddam in nobis maius, amice, fide.  
15 Possum ego diversos iterum coniungere amantes,  
Et dominae tardas possum aperire fores,  
Et possum alterius curas sanare recentis,  
Nec levis in verbis est medicina meis.  
Cynthia me docuit semper quaecumque petenda  
20 Quaeque cavenda forent: non nihil egit Amor.  
Tu cave, ne tristi cupias pugnare puellae  
Neve superba loqui neve tacere diu,  
Neu si quid petiit, ingrata fronte negaris,  
Neu tibi pro vano verba benigna cadant.  
25 Irritata venit, quando contemnitur illa,  
Nec meminit iustas ponere laesa minas:  
At quo sis humilis magis et subiectus amori,  
Hoc magis effecto saepe fruarere hono.  
Is poterit felix una remanere puella,  
30 Qui numquam vacuo pectore liber erit.

- 11 Ecquid te mediis cessantem, Cynthia, Baiis,  
Qua iacet Herculeis semita litoribus,  
Et modo Thesproti mirantem subdita regno  
Proxima Misenis aequora nobilibus  
5 Nostri cura subit memores ah ducere noctes?  
Ecquis in extremo restat amore locus?  
An te nescio quis simulatis ignibus hostis  
Sustulit e nostris, Cynthia, carminibus?  
Atque utinam mage te remis confisa minutis

- 10 Parvula Lucrina cymba moretur aqua,  
Aut teneat clausam tenui Teuthrantis in unda  
Alternae facilis cedere lymphæ manu,  
Quam vacet alterius blandos audire susurros  
Molliter in tacito litore compositam,
- 15 Ut solet amoto labi custode puella  
Perfida, communes nec meminisse deos;  
Non quia perspecta non es mihi cognita fama,  
Sed quod in hac omnis parte timetur amor.  
Ignosces igitur, si quid tibi triste libelli
- 20 Attulerint nostri: culpa timoris erit.  
Nam mihi non maior caræ custodia matris  
Aut sine te vitæ cura sit ulla meae.  
Tu mihi sola domus, tu, Cynthia, sola parentes,  
Omnia tu nostræ tempora lætitiæ.
- 25 Seu tristis veniam seu contra lætus amicis,  
Quicquid ero, dicam 'Cynthia causa fuit.'  
Tu modo quam primum corruptas desere Baias:  
Multis ista dabant litora discidium,  
Litora, quæ fuerant castis inimica puellis.
- 30 Ah pereant Bæiæ crimen amoris aquæ!
- 
- 12 Quid mihi desidiæ non cessas fingere crimen,  
Quod faciat nobis conscia Roma moram?  
Tam multa illa meo divisa est millia lecto,  
Quantum Hypanis Veneto dissidet Eridano,
- 5 Nec mihi consuetos amplexu nutrit amores  
Cynthia nec nostra dulcis in aure sonat.  
Olim gratus eram: non illo tempore cuiquam  
Contigit, ut simili posset amare fide.  
Invidiæ fuimus: num me deus obruit? an quæ
- 10 Lecta Prometheis dividit herba iugis?  
Non sum ego qui fueram: mutat via longa puellas.  
Quantus in exiguo tempore fugit amor!  
Nunc primum longas solus cognoscere noctes  
Cogor et ipse meis auribus esse gravis.
- 15 Felix, qui potuit præsentî flere puellæ,  
Non nihil aspersis gaudet Amor lacrimis,

Aut si despectus potuit mutare calores:  
 Sunt quoque translato gaudia servitio.  
 Mi neque amare aliam neque ab hac discedere fas  
 est:

20 Cynthia prima fuit, Cynthia finis erit.

- 13 Tu, quod saepe soles, nostro laetabere casu,  
 Galle, quod abrepto solus amore vacem.  
 At non ipse tuas imitabor, perfide, voces:  
 Fallere te numquam, Galle, puella velit.
- 5 Dum tibi deceptis augetur fama puellis,  
 Certus et in nullo quaeris amore moram,  
 Perditus in quadam tardis pallescere curis  
 Incipis et primo lapsus abire gradu.  
 Haec erit illarum contempti poena doloris:
- 10 Multarum miseras exiget una vices.  
 Haec tibi vulgares istos compescet amores,  
 Nec nova quaerendo semper amicus eris.  
 Haec ego non rumore malo, non augure doctus,  
 Vidi ego: me quaeso teste negare putes?
- 15 Vidi ego te toto vinctum languescere collo  
 Et flere iniectis, Galle, diu manibus,  
 Et cupere optatis animam deponere labris,  
 Et quae deinde meus celat, amice, pudor.  
 Non ego complexus potui diducere vestros:
- 20 Tantus erat demens inter utrosque furor.  
 Non sic Haemonio Salmonida mixtus Enipeo  
 Taenarius facili pressit amore deus,  
 Nec sic caelestem flagrans amor Herculis Heben  
 Sensit in Oetaeis gaudia prima iugis.
- 25 Una dies omnes potuit praecurrere amores:  
 Nam tibi non tepidas subdidit illa faces,  
 Nec tibi praeteritos passa est succedere fastus,  
 Nec sinet abduci: te tuus ardor agat.  
 Nec mirum, cum sit Iove digna et proxima Ladae
- 30 Et Ladae partu gratior una tribus,  
 Illa sit Inachiis et blandior heroinis,  
 Illa suis verbis cogat amare Iovem.

Tu vero quoniam semel es periturus amore,  
Utere: non alio limine dignus eras.

35 Quae tibi sit, felix quoniam novus incidit error,  
Et quodcumque voles, una sit ista tibi.

14 Tu licet abiectus Tiberina molliter unda  
Lesbia Mentoreo vina bibas opere,  
Et modo tam celeres mireris currere lintres  
Et modo tam tardas funibus ire rates,  
5 Et nemo omne satus intendat vertice silvas,  
Urgetur quantis Caucasus arboribus:  
Non tamen ista meo valeant contendere amor:  
Nescit Amor magnis cedere divitiis.  
Nam sive optatam mecum trahit illa quietem,  
10 Seu facili totum ducit amore diem,  
Tum mihi Pactoli veniunt sub tecta liquores,  
Et legitur rubris gemma sub aequoribus:  
Tum mihi cessuros spondent mea gaudia reges:  
Quae maneant, dum me fata perire volent.  
15 Nam quis divitiis adverso gaudet Amore?  
Nulla mihi tristi praemia sint Venere.  
Illa potest magnas heroum infringere vires,  
Illa etiam duris mentibus esse dolor.  
Illa neque Arabium metuit transcendere limen,  
20 Nec timet ostrino, Tulle, subire toro  
Et miserum toto iuvenem versare cubili:  
Quid relevant variis serica textilibus?  
Quae mihi dum placata aderit, non ulla verebor  
Regna nec Alcinoi munera despicere.

15 Saepe ego multa tuae levitatis dura timebam,  
Hac tamen excepta, Cynthia, perfidia.  
Aspice me quanto rapiat fortuna periclo:  
Tu tamen in nostro lenta timore venis,  
5 Et potes hesternis manibus componere crines  
Et longa faciem quaerere desidia,  
Nec minus Eois pectus variare lapillis,  
Ut formosa novo quae parat ire viro.



- At non sic Ithaci digressu mota Calypso  
 10 Desertis olim fleverat aequoribus:  
 Multos illa dies incompertis maesta capillis  
 Sederat, iniusto multa locuta salo,  
 Et quamvis numquam post haec visura dolebat  
 Illa tamen longae conscia laetitiae.  
 15 Nec sic Aesoniden rapientibus anxia ventis 17  
 Hypsipyle vacuo constitit in thalamo: 18  
 Hypsipyle nullos post illos sensit amores, 19  
 Ut semel Haemonio tabuit hospitio. 20  
 Alphesiboea suos ulta est pro coniuge fratres, 15  
 20 Sanguinis et cari vincula rupit amor. 16  
 Coniugis Euadne miseros elata per ignes 21  
 Occidit, Argivae fama pudicitiae.  
 Quarum nulla tuos potuit convertere mores,  
 Tu quoque uti fieres nobilis historia.  
 25 Desine iam revocare tuis periuria verbis,  
 Cynthia, et oblitos parce movere deos,  
 Audax alii nimium nostro dolitura periclo,  
 Si quid forte tibi durius inciderit.  
 Muta prius vasto labentur flumina ponto,  
 30 Annus et inversas duxerit ante vices,  
 Quam tua sub nostro mutetur pectore cura:  
 Sis quodcumque voles, non aliena tamen.  
 Nam mihi ne viles isti videantur ocelli,  
 Per quos saepe mihi credita perfidia est!  
 35 Hos tu iurabas, si quid mentita fuisses,  
 Ut tibi suppositis exciderent manibus:  
 Et contra magnum potes hos attollere solem,  
 Nec tremis admissae conscia nequitiae?  
 Quis te cogebat multos pallere colores  
 40 Et fletum invitis ducere luminibus?  
 Quis ego nunc pereo similes moniturus amantes  
 'O nullis tutum credere blanditiis.'  
 16 Quae fueram magnis olim patefacta triumphis,  
 Ianua Tarpeiae nota pudicitiae,  
 Cuius inaurati celebrarunt limina currus,

- Captorum lacrimis humida supplicibus,  
 5 Nunc ego, nocturnis potorum saucia rixis,  
 Pulsata indignis saepe queror manibus,  
 Et mihi non desunt turpes pendere corollae  
 Semper et exclusi signa iacere faces.  
 Nec possum infamis dominae defendere noctes  
 10 Nobilis obscenis tradita carminibus:  
 Nec tamen illa suae revocatur parcere famae,  
 Turpior et saeculi vivere luxuria.  
 Has inter gravibus cogor deflare querellis  
 Supplicis a longis tristior excubiis.  
 15 Ille meos numquam patitur requiescere postes,  
 Arguta referens carmina blanditia:  
 'Ianua vel domina penitus crudelior ipsa,  
 Quid mihi tam duris clausa taces foribus?  
 Cur numquam reserata meos admittis amores,  
 20 Nescia furtivas reddere mota preces?  
 Nullane finis erit nostro concessa dolori,  
 Tristis et in tepido limine somnus erit?  
 Me mediae noctes, me sidera prona iacentem,  
 Frigidaque Eoo me dolet aura gelu.  
 25 Tu sola humanos numquam miserata dolores  
 Respondes tacitis mutua cardinibus.  
 O utinam traiecta cava mea vocula rima  
 Percussas dominae vertat in auriculas!  
 Sit licet et saxo patientior illa Sicano,  
 30 Sit licet et ferro durior et chalybe,  
 Non tamen illa suos poterit compescere ocellos,  
 Surret et invitis spiritus in lacrimis.  
 Nunc iacet alterius felici nixa lacerto:  
 At mea nocturno verba cadunt Zephyro.  
 35 Sed tu sola mei, tu maxima causa doloris,  
 Victa meis numquam, ianua, muneribus.  
 Te non ulla meae laesit petulantia linguae,  
 Quae solet irato dicere tota loco,  
 Ut me tam longa raucum patiare querella  
 40 Sollicitas trivio pervigilare moras.  
 At tibi saepe novo deduxi carmina versu,

- Osculaque inpressis nixa dedi gradibus.  
 Ante tuos quotiens verti me, perfida, postes,  
 Debitaque occultis vota tui manibus!  
 45 Haec ille et si quae miseri novistis amantes  
 Et matutinis obstrepsit alitibus.  
 Sic ego nunc dominae vitiis et semper amantis  
 Fletibus aeterna differor invidia.

- 17 Et merito, quoniam potui fugisse puellam!  
 Nunc ego desertas alloquor alcyonas.  
 Nec mihi Cassope solito visura carinam est,  
 Omniaque ingrato litore vota cadunt.  
 5 Quin etiam absenti prosunt tibi, Cynthia, venti:  
 Aspice, quam saevas increpat aura minas.  
 Nullane placatae veniet fortuna procellae?  
 Haecine parva meum funus arena teget?  
 Tu tamen in melius saevas converte querellas:  
 10 Sat tibi sit poenae nox et iniqua vada.  
 An poteris siccis mea fata opponere ocellis,  
 Ossaque nulla tuo nostra tenere sinu?  
 Ah pereat, quicumque rates et vela paravit  
 Primus et invito gurgite fecit iter.  
 15 Nonne fuit melius dominae pervincere mores  
 (Quamvis dura, tamen rara puella fuit),  
 Quam sic ignotis circumdata litora silvis  
 Cernere et optatos quaerere Tyndaridas?  
 Illic si qua meum sepelissent fata dolorem,  
 20 Ultimus et posito staret amore lapis,  
 Illa meo caros donasset funere crines,  
 Molliter et tenera poneret ossa rosa:  
 Illa meum extremo clamasset pulvere nomen,  
 Ut mihi non ullo pondere terra foret.  
 25 At vos, aequoreae formosa Doride natae,  
 Candida felici solvite vela choro:  
 Si quando vestras labens Amor attigit undas,  
 Mansuetis socio parcite litoribus.

- 18 Haec certe deserta loca et taciturna querenti,  
 Et vacuum Zephyri possidet aura nemus :  
 Hic licet occultos proferre inpune dolores,  
 Si modo sola queant saxa tenere fidem.
- 5 Unde tuos primum repetam, mea Cynthia, fastus ?  
 Quod mihi das flendi, Cynthia, principium ?  
 Qui modo felices inter numerabar amantes,  
 Nunc in amore tuo cogor habere notam.  
 Quid tantum merui ? quae te mihi crimina mutant ?
- 10 An nova tristitiae causa puella tuae ?  
 Sic mihi te referas levis, ut non altera nostro  
 Limine formosos intulit ulla pedes.  
 Quamvis multa tibi dolor hic meus aspera debet,  
 Non ita saeva tamen venerit ira mea,
- 15 Ut tibi sim merito semper furor et tua flendo  
 Lumina delectis turpia sint lacrimis.  
 An quia parva damus mutato signa colore,  
 Et non ulla meo clamat in ore fides ?  
 Vos eritis testes, si quos habet arbor amores,
- 20 Fagus et Arcadio pinus amica deo.  
 Ah quotiens teneras resonant mea verba sub umbras,  
 Scribitur et vestris Cynthia corticibus !  
 An tua quod peperit nobis iniuria curas,  
 Quae solum tacitis cognita sunt foribus ?
- 25 Omnia consuevi timidus perferre superbae  
 Iussa neque arguto facta dolore queri.  
 Pro quo, divini fontes, et frigida rupes  
 Et datur inculto tramite dura quies ;  
 Et quodcumque meae possunt narrare querellae,
- 30 Cogor ad argutas dicere solus aves.  
 Sed qualiscumque es, resonent mihi Cynthia silvae,  
 Nec deserta tuo nomine saxa vacent.
- 19 Non ego nunc tristes vereor, mea Cynthia, Manes,  
 Nec moror extremo debita fata rogo ;  
 Sed ne forte tuo careat mihi funus amore,  
 Hic timor est ipsis durior exequiis.

- 5 Non adeo leviter nostris puer haesit ocellis,  
Ut meus oblito pulvis amore vacet.  
Illic Phylacides iocundae coniugis heros  
Non potuit caecis inmemor esse locis,  
Sed cupidus falsis attingere gaudia palmis  
10 Thessalis antiquam venerat umbra domum.  
Illic quicquid ero, semper tua dicar imago :  
Traicit et fati litora magnus amor.  
Illic formosae veniant chorus heroinae,  
Quas dedit Argivis Dardana praeda viris ;  
15 Quarum nulla tua fuerit mihi, Cynthia, forma  
Gratior et Tellus hoc ita iusta sinat.  
Quamvis te longae remorentur fata senectae,  
Cara tamen lacrimis ossa futura meis.  
Quae tu viva mea possis sentire favilla !  
20 Tum mihi non ullo mors sit amara loco.  
Quam vereor, ne te contempto, Cynthia, busto  
Abstrahat a nostro pulvere iniquus Amor,  
Cogat et invitam lacrimas siccare cadentes !  
Flectitur assiduis certa puella minis.  
25 Quare, dum licet, inter nos laetemur amantes :  
Non satis est ullo tempore longus amor.

- 20 Hoc pro continuo te, Galle, monemus amore,  
Id tibi ne vacuo defluat ex animo :  
Saepe imprudenti fortuna occurrit amanti.  
Crudelis Minyis dixerit Ascanius.  
5 Est tibi non infra speciem, non nomine dispar  
Thiodamanteo proximus ardor Hylae :  
Hunc tu, sive leges umbrosae flumina Silae,  
Sive Aniena tuos tinxerit unda pedes,  
Sive Gigantea spatia litoris ora,  
10 Sive ubicumque vago fluminis hospitio,  
Nympharum semper cupidis defende rapinis  
(Non minor Ausoniis est amor Adryasin),  
Ne tibi sit, durum, montes et frigida saxa,  
Galle, neque expertos semper adire lacus,  
15 Quae miser ignotis error perpessus in oris

- Herculis indomito fleverat Ascanio.  
 Namque ferunt olim Pagases navalibus Argo  
 Egressam longe Phasidos isse viam,  
 Et iam praeteritis labentem Athamantidos undis  
 20 Mysorum scopulis adplicuisse ratem.  
 Hic manus heroum, placidis ut constitit oris,  
 Mollia composita litora fronde tegit.  
 At comes invicti iuvenis processerat ultra,  
 Raram sepositi quaerere fontis aquam.  
 25 Hunc duo sectati fratres, Aquilonia proles,  
 Hunc super et Zetes, hunc super et Calais,  
 Oscula suspensis instabant carpere palmis,  
 Oscula et alterna ferre supina fuga.  
 Ille sub extrema pendens secluditur ala  
 30 Et volucres ramo submovet insidias.  
 Iam Pandioniae cessit genus Orithyiae:  
 Ah dolor ibat Hylas, ibat Hamadryasin.  
 Hic erat Arganthi Pegae sub vertice montis  
 Grata domus Nymphis humida Thyndasin,  
 35 Quam supra nullae pendebant debita curae  
 Roscida desertis poma sub arboribus,  
 Et circum irriguo surgebant lilia prato  
 Candida purpureis mixta papaveribus.  
 Quae modo decerpens tenero pueriliter ungui  
 40 Proposito florem praetulit officio,  
 Et modo formosis incumbens nescius undis  
 Errorem blandis tardat imaginibus.  
 Tandem haurire parat demissis flumina palmis  
 Innixus dextro plena trahens humero.  
 45 Cuius ut accensae Dryades candore puellae  
 Miratae solitos destituere choros,  
 Prolapsum leviter facili traxere liquore:  
 Tum sonitum rapto corpore fecit Hylas.  
 Cui procul Alcides iterat responsa: sed illi  
 50 Nomen ab extremis fontibus aura refert.  
 His, o Galle, tuos monitus servabis amores,  
 Formosum Nymphis credere visus Hyland.

- 21 Tu, qui consortem properas evadere casum,  
 Miles ab Etruscis saucius aggeribus,  
 Quid nostro gemitu turgentia lumina torques?  
 Pars ego sum vestrae proxima militiae.
- 5 Sic te servato, ut possint gaudere parentes,  
 Nec soror acta tuis sentiat e lacrimis.  
 Gallum per medios ereptum Caesaris enses  
 Effugere ignotas non potuisse manus,  
 Et quaecumque super dispersa invenerit ossa
- 10 Montibus Etruscis, haec sciat esse mea.
- 
- 22 Qualis et unde genus, qui sint mihi, Tulle, Penates,  
 Quaeris pro nostra semper amicitia.  
 Si Perusina tibi patriae sunt nota sepulcra,  
 Italiae duris funera temporibus,
- 5 Cum Romana suos egit discordia cives.  
 (Sit mihi praecipue pulvis Etrusca dolor:  
 Tu proiecta mei perpessa es membra propinqui,  
 Tu nullo miseri contegis ossa solo),  
 Proxima supposito contingens Umbria campo
- 10 Me genuit terris fertilis uberibus.
- 

## S E X. P R O P E R T I I

## E L E G I A R U M

## L I B E R S E C U N D U S.

- 1 Quaeritis, unde mihi totiens scribantur amores,  
 Unde meus veniat mollis in ora liber.  
 Non haec Calliope, non haec mihi cantat Apollo,  
 Ingenium nobis ipsa puella facit.
- 5 Sive lyrae carmen digitis percussit eburnis, 9  
 Miramur, faciles ut premat arte manus: 10  
 Seu vidi ad frontem sparsos errare capillos, 7  
 Gaudet laudatis ire superba comis: 8

- Sive illam Cois fulgentem incedere coccis, 5  
 10 Hoc totum e Coa veste volumen erit: 6  
 Seu cum poscentes somnum declinat ocellos,  
 Invenio causas mille poeta novas:  
 Seu nuda erepto mecum luctatur amictu,  
 Tum vero longas condimus Iliadas:  
 15 Seu quicquid fecit sive est quodcumque locuta,  
 Maxima de nihilo nascitur historia.  
 Quod mihi si tantum, Maecenas, fata dedissent,  
 Ut possem heroas ducere in arma manus,  
 Non ego Titanas canerem, non Ossan Olympo  
 20 Inpositam, ut caeli Pelion esset iter,  
 Non veteres Thebas, nec Pergama nomen Homeri,  
 Xerxis et imperio bina coisse vada,  
 Regnavit prima Remi aut animos Carthaginis altae,  
 Cimbrorumque minas et benefacta Mari:  
 25 Bellaque resque tui memorarem Caesaris, et tu  
 Caesare sub magno cura secunda fores.  
 Nam quotiens Mutinam aut civilia busta Philippos  
 Aut canerem Siculae classica bella fugae  
 Eversosque focos antiquae gentis Etruscae  
 30 Aut Ptolemaei litora capta Phari,  
 Aut canerem Aegyptum et Nilum, cum tractus in  
 urbem  
 Septem captivis debilis ibat aquis,  
 Aut regum auratis circumdata colla catenis,  
 Actiaque in Sacra currere rostra Via,  
 35 Te mea Musa illis semper contexeret armis,  
 Et sumpta et posita pace fidele caput.  
 Theseus infernis, superis testatur Achilles,  
 Hic Ixioniden, ille Menoetiaden.  
 Sed neque Phlegraeos Iovis Enceladique tumultus  
 40 Intonet angusto pectore Callimachus,  
 Nec mea conveniunt duro praecordia versu  
 Caesaris in Phrygios condere nomen avos.  
 Navita de ventis, de tauris narrat arator,  
 Enumerat miles vulnera, pastor oves,  
 45 Nos contra angusto versantes proelia lecto:



- Qua pote quisque, in ea conterat arte diem.  
 Laus in amore mori, laus altera, si datur uno  
 Posse frui: fruar o solus amore meo!  
 Si memini, solet illa leves culpae puellas  
 50 Et totam ex Helena non probat Iliada.  
 Seu mihi sint tangenda novercae pocula Phaedrae,  
 Pocula privigno non nocitura suo,  
 Seu mihi Circae pereundum est gramine, sive  
 Colchis Colchiacis urat aena focus,  
 55 Una meos quoniam praedata est femina sensus,  
 Ex hac ducentur funera nostra domo.  
 Omnes humanos sanat medicina dolores,  
 Solus amor morbi non amat artificem.  
 Tarda Philoctetae sanavit crura Machaon,  
 60 Phoenicis Chiron lumina Phillyrides,  
 Et deus extinctum Cressis Epidaurius herbis  
 Restituit patriis Androgeona focus,  
 Mysus et Haemonia iuvenis qua cuspide vulnus  
 Senserat, hac ipsa cuspide sensit opem.  
 65 Hoc si quis vitium poterit mihi demere, solus  
 Tantaleae poterit tradere poma manu:  
 Dolia virgineis idem ille repleverit urnis,  
 Ne tenera assidua colla graventur aqua:  
 Idem Caucasias solvet de rupe Promethei  
 70 Brachia et a medio pectore pellet avem.  
 Quandocumque igitur vitam mea fata reposcent  
 Et breve in exiguo marmore nomen ero,  
 Maecenas, nostrae spes invidiosa iuventae,  
 Et vitae et morti gloria iusta meae,  
 75 Si te forte meo ducet via proxima busto,  
 Esseda caelatis siste Britanna iugis,  
 Taliaque in lacrimans mutae iace verba favillae,  
 'Huic misero fatum dura puella fuit.'

---

2 Liber eram et vacuo meditabar vivere lecto,  
 At me composita pace fefellit Amor.  
 Cur hacc in terris facies humana moratur?  
 Iuppiter, ignoro pristina furta tua.

- 5 Fulva coma est longaeque manus, et maxima toto  
 Corpore, et incedit vel Iove digna soror,  
 Aut cum Dulichias Pallas spatiat ad aras,  
 Gorgonis anguiferae pectus operta comis.  
 Qualis et Ischomache Lapithae genus heroine,
- 10 Centauris medio grata rapina mero,  
 Mercurio et sanctis fertur Boebeidos undis  
 Virgineum Brimo composuisse latus.  
 Cedite iam, divae, quas pastor viderat olim  
 Idaeis tunicas ponere verticibus.
- 15 Hanc utinam faciem nolit mutare senectus,  
 Etsi Cumaeae saecula vatis aget.
- 
- 3 Qui nullam tibi dicebas iam posse nocere,  
 Haesisti, cecidit spiritus ille tuus.  
 Vix unum potes, infelix, requiescere mensem,  
 Et turpis de te iam liber alter erit.
- 5 Quaerebam, sicca si posset piscis arena  
 Nec solitus ponto vivere torvus aper,  
 Aut ego si possem studiis vigilare severis:  
 Differtur, numquam tollitur ullus amor.  
 Nec me tam facies, quamvis sit candida, cepit
- 10 (Lilia non domina sint magis alba mea;  
 Ut Maeotica nix minio si certet Hiberno,  
 Utque rosae puro lacte natant folia),  
 Nec de more comae per levia colla fluentes,  
 Non oculi, geminae, sidera nostra, faces,
- 15 Nec si qua Arabio lucet bombyce puella  
 (Non sum de nihilo blandus amator ego),  
 Quantum quod posito formose saltat Iaccho,  
 Egit ut euhantes dux Ariadna choros,  
 Et quantum, Aeolio cum temptat carmina plectro,
- 20 Par Aganippeae ludere docta lyrae,  
 Et sua cum antiquae committit scripta Corinnae  
 Carminaque Erinnēs non putat aequa suis.  
 Num tibi nascenti primis, mea vita, diebus  
 Candidus argutum sternuit omen Amor?
- 25 Haec tibi contulerunt caelestia munera divi,

- Haec tibi ne matrem forte dedisse putes.  
 Non non humani partus sunt talia dona:  
 Ista decem menses non peperere bona.  
 Gloria Romanis una es tu nata puellis:  
 30 Romana accumbes prima puella Iovi.  
 Nec semper nobiscum humana cubilia vises:  
 Post Helenam haec terris forma secunda redit.  
 Hac ego nunc mirer si flagrat nostra iuventus?  
 Pulchrius hac fuerat, Troia, perire tibi.  
 35 Olim mirabar, quod tanti ad Pergama belli  
 Europae atque Asiae causa puella fuit:  
 Nunc, Pari, tu sapiens et tu, Menelae, fuisti,  
 Tu quia poscebas, tu quia lentus eras.  
 Digna quidem facies, pro qua vel obiret Achilles:  
 40 Vel Priamo belli causa probanda fuit.  
 Si quis vult fama tabulas anteire vetustas,  
 Hic dominam exemplo ponat in arte meam.  
 Sive illam Hesperis, sive illam ostendet Eois,  
 Uret et Eoos, uret et Hesperios.
- 
- 4 His saltem ut tenear iam finibus! hei mihi si quis, 45  
 Acris ut moriar, venerit alter amor!  
 Ac veluti primo taurus detrectat aratra,  
 Post venit assueto mollis ad arva iugo,  
 5 Sic primo iuvenes trepidant in amore feroces,  
 Dehinc demiti post haec aequa et iniqua ferunt. 50  
 Turpia perpessus vates est vincla Melampus,  
 Cognitus Iphicli subripuisse boves;  
 Quem non lucra, magis Pero formosa coegit,  
 10 Mox Amythaonia nupta futura domo.  
 Multa prius dominae delicta queraris oportet, 4  
 Saepe roges aliquid, saepe repulsus eas,  
 Et saepe inmeritos corrumpas dentibus ungues,  
 Et crepitum dubio suscitet ira pede.  
 15 Nequiquam perfusa meis unguenta capillis, 5  
 Ibat et expenso planta morata gradu.  
 Non hic herba valet, non hic nocturna Cytacis,  
 Non Perimedaeae gramina cocta manus;

- Quippe ubi nec causas nec apertos cernimus ictus:  
 20 Unde tamen veniant tot mala caeca via est. 10  
 Non eget hic medicis, non lectis mollibus aeger,  
 Huic nullum caeli tempus et aura nocet:  
 Ambulat, et subito mirantur funus amici:  
 Sic est incautum, quicquid habetur amor.  
 25 Nam cui non ego sum fallaci praemia vati? 15  
 Quae mea non decies somnia versat anus?  
 Hostis si quis erit nobis, amet ille puellas:  
 Gaudeat in puero, si quis amicus erit.  
 Tranquillo tuta descendis flumine cymba:  
 30 Quid tibi tam parvi litoris unda nocet? 20  
 Alter saepe uno mutat praecordia verbo,  
 Altera vix ipso sanguine mollis erit.

- 5 Hoc verum est, tota te ferri, Cynthia, Roma  
 Et non ignota vivere nequitia?  
 Haec merui sperare? dabis mihi, perfida, poenas:  
 Et nobis aliquo, Cynthia, ventus erit.  
 5 Inveniam tamen e multis fallacibus unam,  
 Quae fieri nostro carmine nota velit  
 Nec mihi tam duris insultet moribus et te  
 Vellicet: heu sero flebis amata diu.  
 Nunc est ira recens, nunc est discedere tempus:  
 10 Si dolor abfuerit, crede, redibit amor.  
 Non ita Carpathiae variant Aquilonibus undae  
 Nec dubio nubes vertitur atra Noto,  
 Quam facile irati verbo mutantur amantes:  
 Dum licet, iniusto subtrahe colla iugo.  
 15 Nec tu non aliquid, sed prima nocte dolebis:  
 Omne in amore malum, si patiare, leve est.  
 At tu per dominae Iunonis dulcia iura  
 Parce tuis animis, vita, nocere tibi.  
 Non solum taurus ferit uncis cornibus hostem,  
 20 Verum etiam instanti laesa repugnat ovis.  
 Nec tibi periuro scindam de corpore vestem,  
 Nec mea praecclusas fregerit ira fores,  
 Nec tibi connexos iratus carpere crines

- Nec duris ausim laedere pollicibus:  
 25 Rusticus haec aliquis tam turpia proelia quaerat,  
     Cuius non hederæ circuire caput.  
     Scribam igitur, quod non umquam tua deleat aetas,  
     ‘Cynthia forma potens, Cynthia verba levis.’  
     Crede mihi, quamvis contemnas murmura famae,  
 30 Hic tibi pallori, Cynthia, versus erit.

- 6 Non ita complebant Ephyreae Laidos aedes,  
     Ad cuius iacuit Graecia tota fores,  
     Turba Menandreae fuerat nec Thaidos olim  
     Tanta, in qua populus lusit Erichthonius,  
 5 Nec, quæ deletas potuit componere Thebas,  
     Phryne tam multis facta beata viris.  
     Quin etiam falsos fingis tibi saepe propinquos,  
     Oscula nec desunt qui tibi iure ferant.  
     Me iuvenum pictae facies, me nomina laedunt,  
 10 Me tener in cunis et sine voce puer,  
     Me laedit, si multa tibi dedit oscula mater,  
     Me soror et cum quæ dormit amica simul:  
     Omnia me laedunt: timidus sum (ignosce timori)  
     Et miser in tunica suspicor esse virum.  
 15 His olim, ut fama est, vitiis ad proelia ventum est,  
     His Troiana vides funera principis.  
     Aspera Centauros eadem dementia iussit  
     Frangere in adversum pocula Pirithoum.  
     Cur exempla petam Graium? tu criminis auctor,  
 20 Nutritus duro, Romule, lacte lupae,  
     Tu rapere intactas docuisti inpune Sabinas:  
     Per te nunc Romae quidlibet audet Amor.  
     Felix Admeti coniunx et lectus Ulixis,  
     Et quaecumque viri femina limen amat.  
 25 Templâ Pudicitiae quid opus statuisset puellis,  
     Si cuius nuptae quidlibet esse licet?  
     Quæ manus obscenas depinxit prima tabellas  
     Et posuit casta turpia visa domo,

- Illa puellarum ingenuos corrumpit ocellos  
 30 Nequitiaeque suae noluit esse rudes.  
 Ah gemat, in terris ista qui protulit arte  
 Iurgia sub tacita condita laetitia.  
 Non istis olim variabant tecta figuris:  
 Tum paries nullo crimine pictus erat.
- 35 Sed non inmerito velavit aranea fanum  
 Et mala desertos occupat herba deos.
- Quos igitur tibi custodes, quae limina ponam,  
 Quae numquam supra pes inimicus eat?  
 Nam nihil invitae tristis custodia prodest:  
 40 Quam peccare pudet, Cynthia, tuta sat est.
- Nos uxor numquam, numquam diducet amica:  
 Semper amica mihi, semper et uxor eris.
- 7 Gavis es certe sublatam, Cynthia, legem,  
 Qua quondam edicta flemus uterque diu,  
 Ni nos divideret. quamvis diducere amantes  
 Non queat invitos Iuppiter ipse duos.
- 5 At magnus Caesar. sed magnus Caesar in armis:  
 Devictae gentes nil in amore valent.  
 Nam citius paterer caput hoc discedere collo,  
 Quam possem nuptae perdere amore faces.  
 Aut ego transirem tua limina clausa maritus,
- 10 Respiciens udis prodita luminibus?  
 Ah mea tum qualis caneret tibi, Cynthia, somnos  
 Tibia, funesta tristior illa tuba!
- Unde mihi patriis gnatos praebere triumphis?  
 Nullus de nostro sanguine miles erit.
- 15 Quod si vera meae comitarent castra puellae,  
 Non mihi sat magnus Castoris iret equus.  
 Hinc etenim tantum meruit mea gloria nomen,  
 Gloria ad hibernos lata Borysthenidas.  
 Tu mihi sola places: placeam tibi, Cynthia, solus:  
 20 Hic erit et patrio sanguine pluris amor.

- 8 Eripitur nobis iam pridem cara puella,  
 Et tu me lacrimas fundere, amice, vetas.  
 Nullae sunt inimicitiae nisi amoris acerbae:  
 Ipsum me iugula, lenior hostis ero.
- 5 Possum ego in alterius positam spectare læcerto?  
 Nec mea dicetur, quae modo dicta mea est?  
 Omnia vertuntur: certe vertuntur amores:  
 Vinceris aut vincis, haec in amore rota est.  
 Magni saepe duces, magni cecidere tyranni,
- 10 Et Thebae steterunt altaque Troia fuit.  
 Munera quanta dedi vel qualia carmina feci!  
 Illa tamen numquam ferrea dixit Amo.
- Ergo iam multos nimium temerarius annos,  
 Improba, qui tulerim teque tuamque domum.
- 15 Ecquandone tibi liber sum visus? an usque  
 In nostrum iacies verba superba caput?  
 Sic igitur prima moriere aetate, Properti?  
 Sed morere, interitu gaudeat illa tuo.  
 Exagitet nostros Manes, sectetur et umbras,
- 20 Insultetque rogis, calcet et ossa mea.  
 Quid? non Antigones tumulo Boeotius Haemon  
 Corruit ipse suo saucius ense latus  
 Et sua cum miserae permiscuit ossa puellae,  
 Qua sine Thebanam noluit ire domum?
- 25 Sed non effugies: mecum moriaris oportet:  
 Hoc eodem ferro stillet uterque cruor.  
 Quamvis ista mihi mors est inhonesta futura,  
 Mors inhonesta quidem, tu moriere tamen.  
 Ille etiam abrepta desertus coniuge Achilles
- 30 Cessare in tectis pertulit arma sua.  
 Viderat ille fuga fractos in litore Achivos,  
 Fervere et Hectorea Dorica castra face,  
 Viderat informem multa Patroclon arena  
 Porrectum et sparsas caede iacere comas,
- 35 Omnia formosam propter Briseida passus:

Tantus in erepto saevit amore dolor.  
At postquam sera captiva est reddita poena,  
Fortem illum Haemoniis Hectora traxit equis.  
Inferior multo cum sim vel matre vel armis,  
Mirum, si de me iure triumphat Amor?

- 9 Iste quod est, ego saepe fui, sed fors et in hora  
Hoc ipso electo carior alter erit.  
Penelope poterat bis denos salva per annos  
Vivere, tam multis femina digna procis,  
5 Coniugium falsa poterat differre Minerva,  
Nocturno solvens texta diurna dolo,  
Visura et quamvis numquam speraret Ulixem,  
Illum expectando facta remansit anus.  
Nec non exanimem amplectens Briseis Achillem  
10 Candida vesana verberat ora manu,  
Et dominum lavit maerens captiva cruentum,  
Adpositum flavis in Simoenta vadis,  
Foedavitque comas, et tanti corpus Achilli  
Maximaque in parva sustulit ossa manu,  
15 Cum tibi nec Peleus aderat nec caerula mater,  
Scyria nec viduo Deidamia tæro.  
Tunc igitur veris gaudebat Graecia natis,  
Tunc etiam felix inter et arma pudor.  
At tu non una potuisti nocte vacare,  
20 Impia, non unum sola manere diem.  
Quin etiam multo duxistis pocula risu:  
Forsitan et de me verba fuere mala.  
Hic etiam petitur, qui te prius ante reliquit:  
Di faciant, isto capta fruarè viro!  
25 Haec mihi vota tuam propter suscepta salutem,  
Cum capite hoc Stygiae iam poterentur aquae,  
Et lectum flentes circum staretur amici?  
Hic ubi tum, pro di, perfida, quisve fuit?  
Quid si longinquos retinerer miles ad Indos,  
30 Aut mea si staret navis in Oceano?  
Sed vobis facile est verba et componere fraudes:  
Hoc unum didicit femina semper opus.



- Non sic incerto mutantur flamine Syrtes,  
 Nec folia hiberno tam tremefacta Noto,  
 35 Quam cito feminea non constat foedus in ira,  
     Sive ea causa gravis, sive ea causa levis.  
 Nunc, quoniam ista tibi placuit sententia, cedam:  
     Tela, precor, pueri, promite acuta magis,  
 Figite certantes atque hanc mihi solvite vitam:  
 40 Sanguis erit vobis maxima palma meus.
- Sidera sunt testes et matutina pruina  
 Et furtim misero ianua aperta mihi:  
 Te nihil in vita nobis acceptius umquam:  
 Nunc quoque eris, quamvis sis inimica mihi:  
 45 Nec domina ulla meo ponet vestigia lecto:  
     Solutus ero, quoniam non licet esse tuum.  
 Atque utinam, si forte pios eduximus annos,  
     Ille vir in medio fiat amore lapis!
- Non ob regna magis diris cecidere sub armis  
 50 Thebani media non sine matre duces.  
 Quam, mihi si media liceat pugnare puella,  
     Mortem ego non fugiam morte subire tua.

## S E X. P R O P E R T I I

## E L E G I A R U M

## L I B E R T E R T I U S.

[II.]

- 1 Sed tempus lustrare aliis Helicon choreis, 10  
     Et campum Haemonio iam dare tempus equo.  
 Iam libet et fortes memorare ad proelia turmas  
     Et Romana mei dicere castra ducis.
- 5 Quod si deficient vires, audacia certe  
     Laus erit: in magnis et voluisse sat est.  
 Aetas prima canat Veneres, extrema tumultus.

- Bella canam, quando scripta puella mea est.  
 Nunc volo subducto gravior procedere vultu,  
 10 Nunc aliam citharam me mea Musa docet.  
 Surge, anima, ex humili iam carmine, sumite vires,  
 Pierides: magni nunc erit oris opus.  
 Iam negat Euphrates equitem post terga tueri  
 Parthorum et Crassos se tenuisse dolet:  
 15 India quin, Auguste, tuo dat colla triumpho,  
 Et domus intactae te tremit Arabiae:  
 Et si qua extremis tellus se subtrahit oris,  
 Sentiet illa tuas postmodo capta manus.  
 Haec ego castra sequar: vates tua castra canendo  
 20 Magnus ero: servent hunc mihi fata diem!
- Ut caput in magnis ubi non est tangere signis,  
 Ponitur hic imos ante corona pedes,  
 Sic nos nunc, inopes laudis conscendere carmen,  
 Pauperibus sacris vilia tura damus.  
 25 Nondum etiam Ascræos norunt mea carmina fontes,  
 Sed modo Permesi flumine lavit Amor.

- 2 Scribant de te alii vel sis ignota licebit: 11  
 Laudet, qui sterili semina ponit humo.  
 Omnia, crede mihi, secum uno munera lecto  
 Auferet extremi funeris atra dies:  
 5 Et tua transibit contemnens ossa viator,  
 Nec dicet 'cinis hic docta puella fuit.'

- 3 Quicumque ille fuit, puerum qui pinxit Amorem, 12  
 Nonne putas miras hunc habuisse manus?  
 Hic primum vidit sine sensu vivere amantes  
 Et levibus curis magna perire bona.  
 5 Idem non frustra ventosas addidit alas,  
 Fecit et humano corde volare deum;  
 Scilicet alterna quoniam iactamur in unda,  
 Nostraque non ullis permanet aura locis:  
 Et merito hamatis manus est armata sagittis,  
 10 Et pharetra ex humero Cnosia utroque iacet;

- Ante ferit quoniam, tuti quam cernimus hostem,  
 Nec quisquam ex illo vulnere sanus abit.  
 In me tela manent, manet et puerilis imago:  
 Sed certe pennas perdidit ille suas;  
 15 Evolat heu nostro quoniam de pectore nusquam  
 Assiduusque meo sanguine bella gerit.  
 Quid tibi iocundum siccis habitare medullis?  
 Si pudor est, alio traice tela tua.  
 Intactos isto satius temptare veneno:  
 20 Non ego, sed tenuis vapulat umbra mea.  
 Quam si perdideris, quis erit qui talia cantet  
 (Haec mea Musa levis gloria magna tua est),  
 Qui caput et digitos et lumina nigra puellae  
 Et canat ut soleant molliter ire pedes.

- 4 Non tot Achaemeniis armantur Susa sagittis, 13  
 Spicula quot nostro pectore fixit Amor.  
 Hic me tam graciles vetuit contemnere Musas,  
 Iussit et Ascræum sic habitare nemus,  
 5 Non ut Pieriae quercus mea verba sequantur,  
 Aut possim Ismaria ducere valle feras,  
 Sed magis ut nostro stupefiat Cynthia versu:  
 Tunc ego sim Inachio notior arte Lino.  
 Non ego sum formae tantum mirator honestae,  
 10 Nec si qua illustres femina iactat avos:  
 Me iuвет in gremio doctae legisse puellae,  
 Auribus et puris scripta probasse mea.  
 Haec ubi contigerint, populi confusa valet  
 Fabula: nam domina iudice tutus ero.  
 15 Quae si forte bonas ad pacem verterit aures,  
 Possum inimicitias tunc ego ferre Iovis.

- 5 Quaecumque igitur nostros mors claudet ocellos,  
 Accipe quae serves funeris acta mei.  
 Nec mea tunc longa spatietur imagine pompa,  
 Nec tuba sit fati vana querella mei, 20  
 5 Nec mihi tunc fulcro sternatur lectus eburno,  
 Nec sit in Attalico mors mea nixa toro.

- Desit odoriferis ordo mihi lancibus, adsint  
 Plebei parvae funeris exequiae.
- Sat mea sat magna est, si tres sint pompa libelli, 25  
 10 Quos ego Persephonaë maxima dona feram.  
 Tu vero nudum pectus lacerata sequeris  
 Nec fueris nomen lassa vocare meum,  
 Osculaque in gelidis pones suprema labellis,  
 Cum dabitur Syrio munere plenus onyx. 30
- 15 Deinde, ubi suppositus cinerem me fecerit ardor,  
 Accipiat Manes parvula testa meos,  
 Et sit in exiguo laurus super addita busto,  
 Quae tegat extincti funeris umbra locum,  
 Et duo sint versus, 'qui nunc iacet arida pulvis, 35  
 20 Unius hic quondam servus amoris erat.'  
 Nec minus haec nostri notescet fama sepulcri,  
 Quam fuerant Phthii busta cruenta viri.  
 Tu quoque si quando venies ad fata, memento  
 Hoc iter: ad lapides cana veni memores. 40
- 25 Interea cave sis nos aspernata sepultos:  
 Nonnihil ad verum conscia terra sapit.  
 Atque utinam primis animam me ponere cunis  
 Iussisset quaevis de tribus una soror!  
 Nam quo tam dubiae servetur spiritus horae? 45
- 30 Nestoris est visus post tria saecula cinis:  
 Quis tam longaevae minuisset fata senectae  
 Gallicus Iliacis miles in aggeribus?  
 Non ille Antilochi vidisset corpus humari,  
 Diceret aut 'o mors, cur mihi sera venis?' 50
- 35 Tu tamen amisso non numquam flebis amico:  
 Fas est praeteritos semper amare viros.  
 Testis, cui niveum quondam percussit Adonis  
 Venantem Idalio vertice durus aper:  
 Illis formosum iacuisse paludibus, illuc 55
- 40 Diceris effusa tu, Venus, isse coma.  
 Sed frustra mutos revocabis, Cynthia, Manes:  
 Nam mea quid poterunt ossa minuta loqui?

- 6 Non ita Dardanio gavius Atrida triumpho est, 14  
 Cum caderent magnae Laomedontis opes,  
 Nec sic errore exacto laetatus Ulixes,  
 Cum tetigit carae litora Dulichiae,  
 5 Nec sic Electra, salvum cum aspexit Oresten,  
 Cuius falsa tenens fleverat ossa soror,  
 Nec sic incolumem Minois Thesea vidit,  
 Daedaleum lino cum duce rexit iter,  
 Quanta ego praeterita collegi gaudia nocte:  
 10 Immortalis ero, si altera talis erit.  
 At dum demissis supplex cervicibus ibam,  
 Dicebar sicco vilior esse lacu.  
 Nec mihi iam fastus opponere quaerit iniquos,  
 Nec mihi ploranti lenta sedere potest.  
 15 Atque utinam non tam sero mihi nota fuisset  
 Condicio! cineri nunc medicina datur.  
 Ante pedes caecis lucebat semita nobis:  
 Scilicet insano nemo in amore videt.  
 Hoc sensi prodesse magis: contemnite, amantes:  
 20 Sic hodie veniet, si qua negavit heri.  
 Pulsabant alii frustra dominamque vocabant:  
 Mecum habuit positum lenta puella caput.  
 Haec mihi devictis potior victoria Parthis,  
 Haec spolia, haec reges, haec mihi currus erunt.  
 25 Magna ego dona tua figam, Cytherea, columna,  
 Taleque sub nostro nomine carmen erit:  
 'Has pono ante tuas tibi, diva, Propertius aedes  
 Exuvias, tota nocte receptus amans.'  
 Nunc ad te, mea lux, veniat mea litore navis  
 30 Servata: an mediis sidat onusta vadis?  
 Quod si forte aliqua nobis mutabere culpa,  
 Vestibulum iaceam mortuus ante tuum.

- 7 O me felicem! o nox mihi candida, et o tu 15  
 Lectule deliciis facte beate meis!  
 Quam multa adposita narramus verba lucerna,  
 Quantaque sublato lumine rixa fuit!

- 5 Nam modo nudatis mecum est luctata papillis,  
 Interdum tunica duxit operta moram.  
 Illa meos somno lapsos patefecit ocellos  
 Ore suo et dixit 'sicine, lente, iaces?'  
 Quam vario amplexu mutamus brachia! quantum
- 10 Oscula sunt labris nostra morata tuis!  
 Non iuvat in caeco Venerem corrumpere motu:  
 Si nescis, oculi sunt in amore duces.  
 Ipse Paris nuda fertur periisse Lacaena,  
 Cum Menelao surgeret e thalamo,
- 15 Nudus et Endymion Phoebi cepisse sororem  
 Dicitur et nuda concubuisse deae.  
 Quod si pertendens animo vestita cubaris,  
 Scissa veste meas experiere manus:  
 Quin etiam, si me ulterius provexerit ira,
- 20 Ostendes matri brachia laesa tuae.  
 Necdum inclinatae prohibent te ludere mammae:  
 Viderit haec, si quam iam peperisse pudet.  
 Dum nos fata sinunt, oculos satiemus amore:  
 Nox tibi longa venit nec reditura dies.
- 25 Atque utinam haerentes sic nos vincire catena  
 Velles, ut numquam solveret ulla dies!  
 Exemplo iunctae tibi sint in amore columbae,  
 Masculus et totum femina coniugium.  
 Errat, qui finem vesani quaerit amoris:
- 30 Verus amor nullum novit habere modum.  
 Terra prius falso partu deludet arantes,  
 Et citius nigros Sol agitabit equos,  
 Fluminaque ad caput incipient revocare liquores,  
 Aridus et sicco gurgite piscis erit,
- 35 Quam possim nostros alio transferre dolores:  
 Huius ero vivus, mortuus huius ero.  
 Quod mihi si secum tales concedere noctes  
 Illa velit, vitae longus et annus erit:  
 Si dabit haec multas, flam immortalis in illis:
- 40 Nocte una quivis vel deus esse potest.  
 Qualem si cuncti cuperent decurrere vitam  
 Et pressi multo membra iacere mero,

- Non ferrum crudele neque esset bellica navis,  
 Nec nostra Actiacum verteret ossa mare,  
 45 Nec totiens propriis circum oppugnata triumphis  
 Lassa foret crines solvere Roma suos.  
 Haec certe merito poterunt laudare minores:  
 Laeserunt nullos pocula nostra deos.  
 Tu modo, dum lucet, fructum ne desere vitae:  
 50 Omnia si dederis oscula, pauca dabis.  
 Ac veluti folia arentes liquere corollas,  
 Quae passim calathis strata natare vides,  
 Sic nobis, qui nunc magnum spiramus amantes,  
 Forsitan includet crastina fata dies.

### 8 Praetor ab Illyricis venit modo, Cynthia, terris, 16

- Maxima praeda tibi, maxima cura mihi.  
 Non potuit saxo vitam posuisse Cerauno?  
 Ah Neptune, tibi qualia dona darem!  
 5 Nunc sine me plena fiunt convivia mensa,  
 Nunc sine me tota ianua nocte patet.  
 Quare, si sapis, oblatas ne desere messes  
 Et stolidum pleno vellere carpe pecus:  
 Deinde, ubi consumpto restabit munere pauper,  
 10 Dic alias iterum naviget Illyrias.  
 Cynthia non sequitur fascēs nec curat honores,  
 Semper amatorum ponderat illa sinus.  
 At tu nunc nostro, Venus, o succurre dolori,  
 Rumpat ut assiduis membra libidinibus.  
 15 Ergo muneribus quivis mercatur amorem?  
 Iuppiter, indigna merce puella perit.  
 Semper in Oceanum mittit me quaerere gemmas  
 Et iubet ex ipsa tollere dona Tyro.  
 Atque utinam Romae nemo esset dives et ipse  
 20 Straminea posset dux habitare casa!  
 Numquam venales essent ad munus amicae,  
 Atque una fieret cana puella domo;  
 Non quia septenas noctes seiuncta cubaris,  
 Candida tam foedo brachia fusa viro,  
 25 Non quia peccaris, testor te, sed quia vulgo

- Formosis levitas semper amica fuit.  
 Barbarus excussis agit at vestigia lumbis  
 Et subito felix nunc mea regna tenet.  
 Aspice quid donis Eriphyla invenit amaris,  
 30 Arserit et quantis nupta Creusa malis.  
 Nullane sedabit nostros iniuria fletus?  
 An dolor hic vitiis nescit abesse tuis?  
 Tot iam abiere dies, cum me nec cura theatri  
 Nec tetigit Campi, nec mea Musa iuvat.  
 35 At pudeat certe, pudeat; nisi forte, quod aiunt,  
 Turpis amor surdis auribus esse solet.  
 Cerne ducem, modo qui fremitu complevit inani  
 Actia damnatis aequora militibus.  
 Hunc infamis amor versis dare terga carinis  
 40 Iussit et extremo quaerere in orbe fugam.  
 Caesaris haec virtus et gloria Caesaris haec est:  
 Illa, qua vicit, condidit arma manu.  
 Sed quascumque tibi vestes, quoscumque smaragdos,  
 Quosve dedit flavo lumine chrysolithos,  
 45 Haec videam rapidas in vanum ferre procellas,  
 Quae tibi terra, velim, quae tibi fiat aqua.  
 Non semper placidus periuros ridet amantes  
 Iuppiter et surda negligit aure preces.  
 Vidistis toto sonitus percurrere caelo  
 50 Fulminaque aethera desiluisse domo:  
 Non haec Pleiades faciunt neque aquosus Orion,  
 Nec sic de nihilo fulminis ira cadit:  
 Periuras tunc ille solet punire puellas,  
 Deceptus quoniam flevit et ipse deus.  
 55 Quare ne tibi sit tanti Sidonia vestis,  
 Ut timeas, quotiens nubilus Auster erit.
- 
- 9 Mentiri noctem, promissis ducere amantem, 17  
 Hoc erit infectas sanguine habere manus.  
 Horum ego sum vates, quotiens desertus amaras  
 Explevi noctes, fractus utroque toro.  
 5 Vel tu Tantalea moveare ad flumina sorte,  
 Ut liquor arenti fallat ab ore sitim,



- Vel tu Sisyphios licet admirere labores,  
 Difficile ut toto monte volutet onus:  
 Durius in terris nihil est quod vivat amante,  
 10 Nec, modo si sapias, quod minus esse velis.  
 Quem modo felicem invidia admirante ferebant,  
 Nunc decimo admittor vix ego quoque die.  
 Nunc iacere e duro corpus iuvat, impla, saxo,  
 Sumere et in nostras trita venena manus:  
 15 Nec licet in triviis sicca requiescere luna  
 Aut per rimosas mittere verba fores.  
 Quod quamvis ita sit, dominam mutare cavebo:  
 Tum flebit, cum in me senserit esse fidem.

10 **A**ssiduae multis odium peperere querellae: 18

- Frangitur in tacito femina saepe viro.  
 Si quid vidisti, semper vidisse negato:  
 Aut si quid doluit forte, dolere nega.  
 5 Quid si iam canis aetas mea candeat annis,  
 Et faciat scissas languida ruga genas?  
 At non Tithoni spernens Aurora senectam  
 Desertum Eoa passa iacere domo est:  
 Illum saepe suis decedens fovit in ulnis,  
 10 Quam prius adiunctos sedula lavit equos:  
 Illum ad vicinos cum amplexa quiesceret Indos,  
 Maturos iterum est quæsta redire dies.  
 Illa deos currum conscendens dixit iniquos,  
 Invitum et terris præstitit officium;  
 15 Cui maiora senis Tithoni gaudia vivi,  
 Quam gravis amisso Memnone luctus erat.  
 Cum sene non puduit talem dormire puellam  
 Et canae totiens oscula ferre comae.  
 At tu etiam iuvenem odisti me, perfida, cum sis  
 20 Ipsa anus haud longa curva futura die.  
 Quin ego deminuo curam, quod saepe Cupido  
 Huic malus esse solet, cui bonus ante fuit.

- 11 **N**unc etiam infectos demens imitare Britannos,  
 Ludis et externo tincta nitore caput?

- Ut natura dedit, sic omnis recta figura est: 26  
 Turpis Romano Belgicus ore color.  
 5 Illi sub terris fiant mala multa puellae,  
 Quae mentita suas vertit inepta comas!  
 De me, mi certe poteris formosa videri,  
 Mi formosa satis, si modo saepe venis. 30  
 An si caeruleo quaedam sua tempora fuco  
 10 Tinxerit, idcirco caerulea forma bona est?  
 Cum tibi nec frater nec sit tibi filius ullus,  
 Frater ego et tibi sim filius unus ego.  
 Ipse tuus semper tibi sit custodia lectus, 35  
 Nec nimis ornata fronte sedere velis.  
 15 Credam ego narranti, noli committere, famae:  
 Et terram rumor transilit et maria.

- 12 Etsi me invito discedis, Cynthia, Roma, 19  
 Laetor quod sine me devia rura colis.  
 Nullus erit castis iuvenis corruptor in agris,  
 Qui te blanditiis non sinat esse probam,  
 5 Nulla neque ante tuas orietur rixa fenestras,  
 Nec tibi clamatae somnus amarus erit:  
 Sola eris et solos spectabis, Cynthia, montes  
 Et pecus et fines pauperis agricolae.  
 Illic te nulli poterunt corrumpere ludi  
 10 Fanaque peccatis plurima causa tuis:  
 Illic assidue tauros spectabis arantes  
 Et vitem docta ponere falce comas,  
 Atque ibi rara feres inculto tura sacello,  
 Haedus ubi agrestis corruet ante focos,  
 15 Protinus et nuda choreas imitabere sura;  
 Omnia ab externo sint modo tuta viro.  
 Ipse ego venabor: iam nunc me sacra Dianae  
 Suscipere et Veneri ponere vota iuvat:  
 Incipiam captare feras et reddere pinu  
 20 Cornua et audaces ipse monere canes;  
 Non tamen ut vastos ausim temptare leones  
 Aut celer agrestes cominus ire sues.  
 Haec igitur mihi sit lepores audacia molles

- Excipere et stricto figere avem calamo,  
 25 Qua formosa suo Clitumnus flumina luco  
 Integit et niveos abluit unda boves.  
 Tu quotiens aliquid conabere, vita, memento  
 Venturum paucis me tibi Luciferis.  
 Sic me nec solae poterunt avertere silvae  
 30 Nec vaga muscosis flumina fusa iugis,  
 Quin ego in assidua mutem tua nomina lingua:  
 Absenti nemo non nocuisse velit.

- 13 Quid fies abducta gravius Briseide? quid fies 20  
 Anxia captiva tristius Andromacha?  
 Quidve mea de fraude deos, insana, fatigas?  
 Quid quereris nostram sic cecidisse fidem?  
 5 Non tam nocturna volucris funesta querella  
 Attica Cecropiis obstrepit in foliis,  
 Nec tantum Niobe bis sex ad busta superba  
 Sollicito lacrimas defluit a Sipylo.  
 Me licet aeratis astringant brachia nodis,  
 10 Sint mea vel Danaes condita membra domo,  
 In te ego et aeratas rumpam, mea vita, catenas,  
 Ferratam Danaes transilliamque domum:  
 De te quodcumque ad surdas mihi dicitur aures:  
 Tu modo ne dubita de gravitate mea.  
 15 Ossa tibi iuro per matris et ossa parentis  
 (Si fallo, cinis heu sit mihi uterque gravis!)  
 Me tibi ad extremas mansurum, vita, tenebras:  
 Ambos una fides auferet, una dies.  
 Quod si nec nomen nec me tua forma teneret,  
 20 Posset servitium mite tenere tuum.  
 Septima iam plenae deducitur orbita lunae,  
 Cum de me et de te compita nulla tacent:  
 Interea nobis non numquam ianua mollis,  
 Non numquam lecti copia facta tui.  
 25 Nec mihi muneribus nox ulla est empti beatas:  
 Quicquid eram, hoc animi gratia magna tui.  
 Cum te tam multi peterent, tu me una petisti:  
 Possum ego naturae non meminisse tuae?

- Tum me vel tragicae vexetis Erinyes et me  
 30 Inferno damnes, Aeace, iudicio,  
 Atque inter Tityi volucres mea poena vagetur,  
 Tumque ego Sisyphio saxa labore geram.  
 Nec tu supplicibus me sis venerata tabellis:  
 Ultima talis erit, quae mea prima fides.  
 35 Hoc mihi perpetuo ius est, quod solus amator  
 Nec cito desisto nec temere incipio.

14 Ah quantum de me Panthi tibi pagina finxit, 21

- Tantum illi Pantho ne sit amica Venus!  
 Sed tibi iam videor Dodona verior augur?  
 Uxorem ille tuus pulcher amator habet.  
 5 Tot noctes periere: nihil pudet? aspice, cantat  
 Liber: tu nimium credula sola iaces.  
 Et nunc inter eos tu sermo es, te ille superbus  
 Dicit se invito saepe fuisse domi.  
 Dispeream, si quicquam aliud quam gloria de te  
 10 Quaeritur: has laudes ille maritus habet.  
 Colchida sic hospes quondam decepit Iason:  
 Eiecta est; tenuit namque Creusa domum.  
 Sic a Dulichio iuvene est elusa Calypso:  
 Vidit amatorem pandere vela suum.  
 15 Ah nimium faciles aures praebere puellae,  
 Discite desertae non temere esse bonae.  
 Huic quoque qui restet iam pridem quaeritur alter:  
 Experta in primo, stulta, cavere potes.  
 Nos quocumque loco, nos omni tempore tecum  
 20 Sive aegra pariter sive valente sumus.

15 Scis here mi multas pariter placuisse puellas, 22

- Scis mihi, Demophoon, multa venire mala.  
 Nulla meis frustra lustrantur compita plantis,  
 O nimis exitio nata theatra meo,  
 5 Sive aliquis molli diducit candida gestu  
 Brachia seu varios incinit ore modos!  
 Interea nostri quaerunt sibi vulnus ocelli,  
 Candida non tecto pectore si qua sedet,

- Sive vagi crines puris in frontibus errant,  
 10 Indica quos medio vertice gemma tenet.  
 Quae si forte aliquid vultu mihi dura negarat,  
 Frigida de tota fronte cadebat aqua.  
 Quaeris, Demophoon, cur sim tam mollis in omnes?  
 Quod quaeris Quare non habet ullus amor.  
 15 Cur aliquis sacris laniat sua brachia cultris  
 Et Phrygis insanos caeditur ad numeros?  
 Unicuique dedit vitium natura creato:  
 Mi fortuna aliquid semper amare dedit:  
 Me licet et Thamyrae cantoris fata sequantur,  
 20 Numquam ad formosas, inuide, caecus ero.  
 Sed tibi si exiles videor tenuatus in artus,  
 Falleris: haud umquam est culta labore Venus  
 Percontere licet: saepe est experta puella  
 Officium tota nocte valere meum.  
 25 Iuppiter Alcmenae geminas requieverat Arctos  
 Et caelum noctu bis sine rege fuit,  
 Nec tamen idcirco languens ad fulmina venit:  
 Nullus amor vires eripit ipse suas.  
 Quid? cum e complexu Briseidos iret Achilles,  
 30 Num fugere minus Thessala tela Phryges?  
 Quid? ferus Andromachae lecto cum surgeret  
 Hector,  
 Bella Mycenaeae non timuere rates?  
 Ille vel hic classes poterat vel perdere muros.  
 Hic ego Pelides, hic ferus Hector ego.  
 35 Aspice, uti caelo modo sol modo luna ministret:  
 Sic etiam nobis una puella parum est.  
 Altera me cupidis teneat foveatque lacertis,  
 Altera si quando non sinit esse locum,  
 Aut si forte irata meo sit facta ministro,  
 40 Ut sciat esse aliam, quae velit esse mea.  
 Nam melius duo defendunt retinacula navim,  
 Tutius et geminos anxia mater alit.

16 Aut si es dura, nega: sin es non dura, venito.  
 Quid iuvat in nullo ponere verba loco?

Hic unus dolor est ex omnibus acer amanti, 46

Speranti subito si qua venire negat.

- 5 Quanta illum toto versant suspiria lecto,  
Cum recipi, quem non noverit illa, putat.  
Et rursus puerum quaerendo audita fatigat,  
Quem, quae scire timet, quaerere plura iubet. 50

17 Cui fuit indocti fugienda haec semita vulgi, 23

Ipsa petita lacu nunc mihi dulcis aqua est.

Ingenuus quisquam alterius dat munera servo,

Ut promissa suae verba ferat dominae?

- 5 Et quaerit totiens 'quaenam nunc porticus illam  
Integit?' et 'campo quo movet illa pedes?'  
Deinde, ubi pertuleris quos dicit fama labores  
Herculis, ut scribat 'muneris ecquid habes?'

Cernere uti possis vultum custodis amari,

- 10 Captus et inmunda saepe latere casa?  
Quam care semel in toto nox vertitur anno!

Ah pereant, si quos ianua clausa iuvat!

Contra, reiecto quae libera vadit amictu,  
Custodum et nullo septa timore, placet.

- 15 Cui saepe immundo Sacra conteritur Via socco,  
Nec sinit esse moram, si quis adire velit.  
Differet haec numquam nec poscet garrula, quod te  
Astrictus ploret saepe dedisse pater,

Nec dicet 'timeo, propera iam surgere, quaeso:

- 20 Infelix, hodie vir mihi rure venit.'  
Et quas Euphrates et quas mihi misit Orontes,  
Me capiant: nolim furta pudica tori,  
Libertas quoniam nulli iam restat amanti:  
Nullus liber erit, si quis amare volet.

18 Tu loqueris, cum sis iam noto fabula libro 24

Et tua sit toto Cynthia lecta foro:

Cui non his verbis aspergat tempora sudor?

Aut pudor ingenuus, aut reticendus amor?

- 5 Quod si tam facilis spiraret Cynthia nobis,

- Non ego nequitiae dicerer esse caput,  
 Nec sic per totam infamis traducerer urbem,  
 Urerer et quamvis, nomine verba darem.  
 Quare ne tibi sit mirum me quaerere viles:  
 10 Parcius infamant: num tibi causa levis?  
 Et modo pavonis caudae fiabella superbae  
 Et manibus dura frigus habere pila  
 Et cupit iratum talos me poscere eburnos,  
 Quaeque nitent Sacra villia dona Via.  
 15 Ah peream, si me ista movent dispendia: sed me  
 Fallaci dominae iam pudet esse iocum.
- 
- 19 Hoc erat in primis quod me gaudere iubebas?  
 Tam te formosam non pudet esse levem?  
 Una aut altera nox nondum est in amore peracta,  
 Et dicor lecto iam gravis esse tuo. 20  
 5 Me modo laudabas et carmina nostra legebas:  
 Ille tuus pennas tam cito vertit amor?  
 Contendat mecum ingenio, contendat et arte,  
 In primis una discat amare domo:  
 Si libitum tibi erit, Lernaean pugnet ad hydras 25  
 10 Et tibi ab Hesperio mala dracone ferat,  
 Tetra venena libens et naufragus ebibat undas  
 Et numquam pro te deneget esse miser  
 (Quos utinam in nobis, vita, experiare labores!):  
 Iam tibi de timidis iste superbus erit, 30  
 15 Qui nunc se in tumidum iactando venit honorem:  
 Discidium vobis proximus annus erit.  
 At me non aetas mutabit tota Sibyllae,  
 Non labor Alcidae, non niger ille dies.  
 Tu mea compones et dices 'ossa, Properti, 35  
 20 Haec tua sunt: heu heu tu mihi certus eras,  
 Certus eras heu heu, quamvis nec sanguine avito  
 Nobilis et quamvis haud ita dives eras.'  
 Nil ego non patiar, numquam me iniuria mutat:  
 Ferre ego formosam nullum onus esse puto. 40  
 25 Credo ego non paucos ista periisse figura,  
 Credo ego sed multos non habuisse fidem.

- Parvo dilexit spatio Minoida Theseus,  
 Phyllida Demophoon, hospes uterque malus.  
 Iam tibi Iasonia nota est Medea carina 45  
 30 Et modo servato sola relictā viro.  
 Dura est, quae multis simulatum fingit amorem,  
 Et se plus uni si qua parare potest.  
 Noli nobilibus, noli conferre beatīs:  
 Vix venit, extremo qui legat ossa die. 50  
 35 Ii tibi nos erimus: sed tu potius precor ut me  
 Demissis plangas pectora nuda comis.

- 20 Unica nata meo pulcherrima cura dolori, 25  
 Excludit quoniam sors mea Saepe veni,  
 Ista meis flet notissima forma libellis,  
 Calve, tua venia, pace, Catulle, tua.  
 5 Miles depositis annosus secubat armis,  
 Grandaevique negant ducere aratra boves,  
 Putris et in vacua requiescit navis arena,  
 Et vetus in templo bellica parma vacat:  
 At me ab amore tuo deducet nulla senectus,  
 10 Sive ego Tithonus sive ego Nestor ero.  
 Nonne fuit satius duro servire tyranno  
 Et gemere in tauro, saeve Perille, tuo?  
 Gorgonis et satius fuit obdurescere vultu,  
 Caucasias etiam si pateremur aves.  
 15 Sed tamen obsistam: teritur rubigine mucro  
 Ferreus et parvo saepe liquore silex:  
 At nullo dominae teritur sub limine amor, qui  
 Restat et inmerita sustinet aure minas.  
 Ultro contemptus rogat et peccasse fatetur  
 20 Laesus et invitis ipse redit pedibus.  
 Tu quoque, qui pleno fastus adsumis amore,  
 Credule, nulla diu femina pondus habet.  
 An quisquam in mediis persolvit vota procellis,  
 Cum saepe in portu fracta carina natet?  
 25 Aut prius infecto deponit praemia cursu,  
 Septima quam metam triverit ante rota?  
 Mendaces ludunt flatus in amore secundi:



- Si qua venit sero, magna ruina venit.  
 Tu tamen interea, quamvis te diligat illa,  
 30 In tacito cohibe gaudia clausa sinu.  
 Namque in amore suo semper sua maxima cuique  
 Nescio quo pacto verba nocere solent.  
 Quamvis te persaepe vocet, semel ire memento:  
 Invidiam quod habet, non solet esse diu.  
 35 At si saecula forent antiquis grata puellis,  
 Essem ego, quod nunc tu: tempore vincor ego.  
 Non tamen ista meos mutabunt saecula mores:  
 Unusquisque sua noverit ire via.  
 At vos, qui officia in multos revocatis amores,  
 40 Quantum sic cruciat lumina vestra dolor!  
 Vidistis pleno teneram candore puellam,  
 Vidistis fusco, ducit uterque color:  
 Vidistis quandam Argiva prodire figura,  
 Vidistis nostras, utraque forma rapit:  
 45 Illaque plebeio vel sit sandicis amictu,  
 Haec atque illa mali vulneris una via est;  
 Cum satis una tuis insomnia portet ocellis,  
 Una sit et culvis femina multa mala.

- 21 Vidi te in somnis fracta, mea vita, carina 26  
 Ionio lassas ducere rore manus,  
 Et quaecumque in me fueras mentita fateri,  
 Nec iam humore graves tollere posse comas,  
 5 Qualem purpureis agitatam fluctibus Hellen,  
 Aurea quam molli tergore vexit ovis.  
 Quam timui, ne forte tuum mare nomen haberet,  
 Atque tua labens navita fieret aqua!  
 Quae tum ego Neptuno, quae tum cum Castore fratri,  
 10 Quaeque tibi excepi tum, dea Leucothoe?  
 At tu, vix primas extollens gurgite palmas,  
 Saepe meum nomen iam peritura vocas.  
 Quod si forte tuos vidisset Glaucus ocellos,  
 Esses Ionii facta puella maris,  
 15 Et tibi ob invidiam Nereides increpitarent,  
 Candida Nesaeae, caerula Cymothoe.

Sed tibi subsidio delphinum currere vidi,  
 Qui, puto, Arioniam vexerat ante Iyram.  
 Iamque ego conabar summo me mittere saxo,  
 20 Cum mihi discussit talia visa metus.

22 Nunc admirentur quod tam mihi pulchra puella  
 Serviat et tota dicar in urbe potens.  
 Non, si Cambysae redeant et flumina Croesi,  
 Dicat 'de nostro surge, poeta, toro.'  
 5 Nam mea cum recitat, dicit se odisse beatos: 25  
 Carmina tam sancte nulla puella colit.  
 Multum in amore fides, multum constantia prodest:  
 Qui dare multa potest, multa et amare potest.  
 Seu mare per longum mea cogitet ire puella,  
 10 Hanc sequar et fidos una aget aura duos. 30  
 Unum litus erit sopitis unaque tecto  
 Arbor, et ex una saepe bibemus aqua,  
 Et tabula una duos poterit componere amantes,  
 Prora cubile mihi seu mihi puppis erit.  
 15 Omnia perpetiar: saevus licet urgeat Eurus 35  
 Velaque in incertum frigidus Auster agat,  
 Quicumque et venti miserum vexastis Ulixen  
 Et Danaum Euboico litore mille rates,  
 Et qui movistis duo litora, cum rudis Argus  
 20 Dux erat ignoto missa columba mari. 40  
 Illa meis tantum non umquam desit ocellis,  
 Incendat navem Iuppiter ipse licet.  
 Certe isdem nudi pariter iactabimur oris:  
 Me licet unda ferat, te modo terra tegat.  
 25 Sed non Neptunus tanto crudellis amori, 45  
 Neptunus fratri par in amore Iovi.  
 Testis Amymone, latices cum ferret, in Argis  
 Compressa et Lernae pulsa tridente palus.  
 Iam Deus amplexu votum persolvit, at illi  
 30 Aurea divinas urna profudit aquas. 50  
 Crudelem et Boream rapta Orithyia negavit:  
 Hic deus et terras et maria alta domat.  
 Crede mihi, nobis mitescet Scylla nec umquam

Alternante vorans vasta Charybdis aqua,  
 35 Ipsaque sidera erunt nullis obscura tenebris: 55  
 Purus et Orion, purus et Haedus erit.  
 Quod mihi si ponenda tuo sit corpore vita,  
 Exitus hic nobis non inhonestus erit.

23 At vos incertam, mortales, funeris horam 27  
 Quaeritis, et qua sit mors aditura via,  
 Quaeritis et caelo, Phoenicum inventa, sereno,  
 Quae sit stella homini commoda quaeque mala,  
 5 Seu pedibus Parthos sequitur seu classe Britannos,  
 Et maris et terrae caeca pericla viae;  
 Rursus et oblectum fletis capiti esse tumultum,  
 Cum Mavors dubias miscet utrimque manus,  
 Praeterea domibus flammam, domibusque ruinas,  
 10 Neu subeant labris pocula nigra tuis.  
 Solus amans novit, quando periturus et a qua  
 Morte, neque hic Boreae flabra neque arma timet.  
 Iam licet et Stygia sedeat sub arundine remex,  
 Cernat et infernae tristia vela ratis:  
 15 Si modo damnatum revocaverit aura puellae,  
 Concessum nulla lege redibit iter.

24 Iuppiter, affectae tandem miserere puellae: 28  
 Tam formosa tuum mortua crimen erit.  
 Venit enim tempus, quo torridus aestuat aer,  
 Incipit et sicco fervere terra Cane.  
 5 Sed non tam ardoris culpa est neque crimina caeli,  
 Quam totiens sanctos non habuisse deos.  
 Hoc perdit miseras, hoc perdidit ante puellas:  
 Quicquid iurarunt, ventus et unda rapit.  
 Num sibi collatam doluit Venus ipsa paremque?  
 10 Prae se formosis invidiosa dea est.  
 An contempta tibi Iunonis templa Pelasgae?  
 Palladis aut oculos ausa negare bonos?  
 Semper, formosae, non nostis parcere verbis.  
 Hoc tibi lingua nocens, hoc tibi forma dedit.  
 15 Sed tibi vexatae per multa pericula vitae

Extremo, veniet mollior hora die.

Io versa caput primos mugiverat annos:

Nunc dea, quae Nili flumina vacca bibit.

Ino etiam prima terris aetate vagata est:

20 Hanc miser inplorat navita Leucotheen.

Andromede monstribus fuerat devota marinis:

Haec eadem Persei nobilis uxor erat.

Callisto Arcadios erraverat ursa per agros:

Haec nocturna suo sidere vela regit.

25 Quod si forte tibi properarint fata quietem,

Ille sepulturae fata beata tuae:

Narrabis Semelae, quo sit formosa periclo,

Credet et illa suo docta puella malo,

Et tibi Maeonias inter heroidas omnis

30 Primus erit nulla non tribuente locus.

Nunc, utcumque potes, fato gere saucia morem:

Et deus et durus vertitur ipse dies.

Hoc tibi vel poterit, coniunx, ignoscere Iuno:

Frangitur et Iuno, si qua puella perit.

25 Deficiunt magico torti sub carmine rhombi, 35

Et iacet extincto laurus adusta foco,

Et iam Luna negat totiens descendere caelo,

Nigraque funestum concinit omen avis.

5 Una ratis fati nostros portabit amores

Caerulea ad infernos velificata lacus. 40

Si non unius, quaeso, miserere duorum.

Vivam, si vivet: si cadet illa, cadam.

• Pro quibus optatis sacro me carmine damno:

10 Scribam ego 'per magnum salva puella Iovem,'

Ante tuosque pedes illa ipsa adoperta sedebit, 45

Narrabitque sedens longa pericula sua.

26 Haec tua, Persephone, maneat clementia, nec tu,

Persephones coniunx, saevior esse velis.

Sunt apud infernos tot milia formosarum:

Pulchra sit in superis, si licet, una locis. 50

5 Vobiscum est Iope, vobiscum candida Tyro,

PROPERTIUS.

Vobiscum Europe nec proba Pasiphae,  
 Et quot Troia tulit vetus et quot Achaia formas  
 Et Phoebi et Priami diruta regna senis:  
 Et quaecumque erat in numero Romana puella, 55  
 10 Occidit: has omnis ignis avarus habet.  
 Nec forma aeternum aut cuiquam est fortuna pe-  
 rennis:

Longius aut propius mors sua quemque manet.  
 Tu quoniam es, mea lux, magno dimissa periclo,  
 Munera Dianae debita redde choras, 60  
 15 Redde etiam excubias divae nunc, ante iuvencae,  
 Votivas noctes et mihi solve decem.

27 Extrema, mea lux, cum potus nocte vagarer, 29  
 Nec me servorum duceret ulla manus,  
 Obvia, nescio quot pueri, mihi turba minuta  
 Venerat (hos vetuit me numerare timor),  
 5 Quorum alii faculas, alii retinere sagittas,  
 Pars etiam visa est vincla parare mihi.  
 Sed nudi fuerant. quorum lascivior unus,  
 'Arripite hunc,' inquit, 'nam bene nostis eum:  
 Hic erat, hunc mulier nobis irata locavit.'  
 10 Dixit, et in collo iam mihi nodus erat.  
 Hic alter iubet in medium propellere, et alter,  
 'Intereat, qui nos non putat esse deos!  
 Haec te non meritum totas expectat in horas:  
 At tu nescio quas quaeris, inepte, fores.  
 15 Quae cum Sidoniae nocturna ligamina mitrae  
 Solverit atque oculos moverit illa graves,  
 Adflabunt tibi non Arabum de gramine odores,  
 Sed quos ipse suis fecit Amor manibus.  
 Parcite iam, fratres, iam certos spondet amores,  
 20 Et iam ad mandatam venimus ecce domum.'  
 Atque ita mi iniecto dixerunt rursus amictu  
 'I nunc et noctes disce manere domi.'  
 Mane erat, et volui, si sola quiesceret illa,  
 Visere: et in lecto Cynthia sola fuit.  
 25 Obstupui: non illa mihi formosior umquam

Visa, neque ostrina cum fuit in tunica,  
Ibat et hinc castae narratum somnia Vestae,

Neu sibi neve mihi quae nocitura forent:

Talis visa mihi somno dimissa recenti.

30 Heu quantum per se candida forma valet!

'Quo tu matutinus,' ait, 'speculator amicae?

Me similem vestris moribus esse putas?

Non ego tam facilis: sat erit mihi cognitus unus,

Vel tu vel si quis verior esse potest.

35 Apparent non ulla toro vestigia presso,

Signa voluptatis, nec iacuisse duos.

Aspice, ut in toto nullus mihi corpore surgat

Spiritus admisso notus adulterio.'

Dixit, et opposita propellens savia dextra

40 Prosilit in laxa nixa pedem solea.

Sic ego tam sancti custode recludor amoris:

Ex illo felix nox mihi nulla fuit.

28 Quo fugis ah demens? nulla est fuga: tu licet 30  
usque

Ad Tanain fugias, usque sequetur Amor.

Non si Pegaseo vecteris in aere dorso,

Nec tibi si Persel moverit ala pedes,

5 Vel si te sectae rapiant talaribus aerae,

Nil tibi Mercurii proderit alta via.

Instat semper Amor supra caput, instat amanti

Et gravis ipse super libera colla sedet.

Excubat ille acer custos et tollere numquam

10 Te patietur humo lumina capta semel.

Et iam si pecces, deus exorabilis ille est,

Si modo praesentis viderit esse preces.

Ista scnes licet accusent convivia duri:

Nos modo propositum, vita, teramus iter.

15 Illorum antiquis onerentur legibus aures:

Hic locus est, in quo, tibia docta, sonas,

Quae non iure vado Maeandri iacta natasti,

Turpia cum faceret Palladis ora tumor.

Num iam, dura, paras Phrygias nunc ire per undas

- 20 Et petere Hyrcani litora nota maris,  
 Spargere et alterna communes caede Penates  
 Et ferre ad patrios praemia dira Lares?  
 Una contentum pudeat me vivere amica?  
 Hoc si crimen erit, crimen Amoris erit:  
 25 Mi nemo obiciat. libeat tibi, Cynthia, mecum  
 Roscida muscosis antra tenere iugis.  
 Illic aspicias scopulis haerere sorores  
 Et canere antiqui dulcia furta Iovis,  
 Ut Semela est combustus, ut est deperditus Io,  
 30 Denique ut ad Troiae tecta volarit avis.  
 Quod si nemo extat, qui vicerit alitis arma,  
 Communis culpa cur reus unus agor?  
 Nec tu virginibus reverentia moveris ora:  
 Hic quoque non nescit quid sit amare chorus;  
 35 Si tamen Oeagri quaedam compressa figura  
 Bistonis olim rupibus accubuit.  
 Hic ubi me prima statuent in parte choreae  
 Et medius docta cuspide Bacchus erit,  
 Tum capiti sacros patiar pendere corymbos:  
 40 Nam sine te nostrum non valet ingenium.

- 29 Quaeris, cur veniam tibi tardior. aurea Phoebi 31  
 Porticus a magno Caesare aperta fuit.  
 Tota erat in speciem Poenis digesta columnis,  
 Inter quas Danaï femina turba senis.  
 5 Hic equidem Phoebus visus mihi pulchrior ipso  
 Marmoreus tacita carmen hiare lyra:  
 Atque aram circum steterant armenta Myronis,  
 Quattuor artifices, vivida signa, boves.  
 Tum medium claro surgebat marmore templum  
 10 Et patria Phoebus carius Ortygia.  
 In quo Solis erat supra fastigia currus,  
 Et valvae, Libyci nobile dentis opus,  
 Altera deiectos Parnasi vertice Gallos,  
 Altera maerebat funera Tantalidos.  
 15 Deinde inter matrem deus ipse interque sororem  
 Pythius in longa carmina veste sonat.

- 30** Qui videt, is peccat: qui te non viderit ergo, **32**  
Non cupiet: facti crimina lumen habet.  
Nam quid Praenesti dubias, o Cynthia, sortes,  
Quid petis Aeaei moenia Telegoni?  
5 Curve te in Herculeum deportant esseda Tibur?  
Appia cur totiens te via ducit anus?  
Hoc utinam spatium loco, quodcumque vacabis,  
Cynthia! nam tibi me credere turba vetat,  
Cum videt accensis devotam currere taedis  
10 In nemus et Triviae lumina ferre deae.  
Scilicet umbrosis sordet Pompeia columnis  
Porticus aulacis nobilis Attalicis,  
Et creber platanis pariter surgentibus ordo,  
Flumina sopito quaeque Anione cadunt,  
15 Tot leviter lymphis tota crepitantibus urbe  
Cum subito Triton ore recondit aquam.  
Falleris, ista tui furtum via monstrat amoris:  
Non urbem, demens, lumina nostra fugis:  
Nil agis, insidias in me componis inanes,  
20 Tendis iners docto retia nota mihi.  
Sed de me minus est: famae iactura pudicae  
Tanta tibi miserae, quanta mereris, erit.  
Nuper enim de te nostras me laedit ad aures  
Rumor et in tota non bonus urbe fuit.  
25 Sed tu non debes inimicae credere linguae:  
Semper formosis fabula poena fuit.  
Non tua deprenso damnata est fama veneno:  
Testis eris puras, Phoebe, videre manus.  
Sin autem longo nox una aut altera lux  
30 Consumpta est, non me crimina parva movent.  
Tyndaris externo patriam mutavit amore  
Et sine decreto viva reducta domum est.  
Ipsa Venus quamvis corrupta libidine Martis  
Non minus in caelo semper honesta fuit,  
35 Quamvis Ida Parim pastorem dicat amasse  
Atque inter pecudes accubuisse deam.  
Hoc et Hamadryadum spectavit turba sororum



- Silenique senes et pater ipse chori,  
 Cum quibus Idaeo legisti poma sub antro,  
 40 Supposita excipiens Naica dona manu.  
 An quisquam in tanto stuprorum examine quaerit  
 'Cur haec tam dives? quis dedit? unde dedit?'  
 O nimium nostro felicem tempore Romam,  
 Si contra mores una puella facit!  
 45 Haec eadem ante illam impune et Lesbia fecit:  
 Quae sequitur, certe est invidiosa minus.  
 Qui quaerit Tatios veteres duosque Sabinos,  
 Hic posuit nostra nuper in urbe pedem.  
 Tu prius et fluctus poteris siccare marinos  
 50 Altaque mortali deligere astra manu,  
 Quam facere, ut nostrae nolint peccare puellae:  
 Hic mos Saturno regna tenente fuit,  
 Et cum Deucalionis aquae fluxere per orbem,  
 Et post antiquas Deucalionis aquas.  
 55 Dic mihi, quis potuit lectum servare pudicum,  
 Quae dea cum solo vivere sola deo?  
 Uxorem quondam magni Minois, ut aiunt,  
 Corrupti torvi candida forma bovis.  
 Nec minus aerato Danae circumdata muro  
 60 Non potuit magno casta negare deo.  
 Quod si tu Graias tuque es imitata Latinas,  
 Semper vive meo libera iudicio.

### 31 Tristia iam redeunt iterum sollemnia nobis: 33

- Cynthia iam noctes est operata decem:  
 Atque utinam pereat, Nilo quae sacra tepente  
 Misit matronis Inachis Ausoniis!  
 5 Quae dea tam cupidos totiens divisit amantes?  
 Quaecumque illa fuit, semper amara fuit.  
 Tu certe Iovis occultis in amoribus, Io,  
 Sensisti, multas quid sit inire vias,  
 Cum te iussit habere puellam cornua Iuno  
 10 Et pecoris duro perdere verba sono.  
 Ah quotiens quernis laesisti frondibus ora!  
 Mansisti stabulis abdita pasta tuis.

- An, quoniam agrestem detraxit ab ore figuram  
Iuppiter, idcirco facta superba dea es?
- 15 An tibi non satis est fuscis Aegyptus alumnis?  
Cur tibi tam longa Roma petita via est?  
Quidve tibi prodest viduas dormire puellas?  
Sed tibi, crede mihi, cornua rursus erunt,  
Aut nos e nostra te, saeva, fugabimus urbe:
- 20 Cum Tiberi Nilo gratia nulla fuit.  
At tu, quae nostro nimium placata dolore es,  
Noctibus his vacui ter faciamus iter.  
Non audis et verba sinis mea ludere, cum iam  
Flectant Icarii sidera tarda boves.
- 25 Lenta bibis: mediae nequeunt te frangere noctes.  
An nondum est talos mittere lasa manus?  
Ah pereat, quicumque meracas repperit uvas  
Corrupitque bonas nectare primus aquas!  
Icare Cecropiis merito iugulate colonis,
- 30 Pampineus nosti quam sit amarus odor.  
Tu quoque o Eurytion vino Centaure peristi,  
Nec non Ismario tu, Polypheme, mero.  
Vino forma perit, vino corrumpitur aetas,  
Vino saepe suum nescit amica virum.
- 35 Me miserum, ut multo nihil est mutata Lyaeo!  
Iam bibe: formosa es: nil tibi vina nocent,  
Cum tua praependent demissae in pocula sertae  
Et mea deducta carmina voce legis.  
Largius effuso madeat tibi mensa Falerno,
- 40 Spumet et aurato mollius in calice.  
Nulla tamen lecto recipit se sola libenter:  
Est quiddam, quod vos quaerere cogat Amor.  
Semper in absentis felicior aestus amantes:  
Elevat assiduos copia longa viros.
- 32 Cur quisquam faciem dominae iam credit amico? 34  
Sic erepta mihi paene puella mea est.  
Expertus dico, nemo est in amore fidelis:  
Formosam raro non sibi quisque petit.
- 5 Polluit ille deus cognatos, solvit amicos

- Et bene concordēs tristia ad arma vocat.  
Hospes in hospitium Menelao venit adulter:  
Colchis et ignotum nonne secuta virum est?  
Lynceū, tunc meam potuisti tangere curam?  
10 Perfide, nonne tuae tum cecidere manus?  
Quid si non constans illa et tam certa fuisset?  
Posses in tanto vivere flagitio?  
Tu mihi vel ferro pectus vel perde veneno:  
A domina tantum te modo tolle mea.  
15 Te socium vitae, te corporis esse licebit,  
Te dominum admitto rebus, amice, meis:  
Lecto te solum, lecto te deprecor uno:  
Rivalem possum non ego ferre Iovem.  
Ipse meas solus, quod nil est, aemulor umbras,  
20 Stultus, quod stulto saepe timore tremo.  
Una tamen causa est, qua crimina tanta remitto,  
Errabant multo quod tua verba mero.  
Sed numquam vitae fallit me ruga severae:  
Omnes iam norunt, quam sit amare bonum.  
25 Lynceus ipse meus seros insanit amores.  
Solum te nostros laetor adire deos.  
Quid tua Socraticis tibi nunc sapientia libris  
Proderit aut rerum dicere posse vias?  
Aut quid Erechthei tibi prosunt carmina lecta?  
30 Nil iuvat in magno vester amore senex.  
Tu Latiis Meropem Musis imitere Philetam  
Et non inflati somnia Callimachi.  
Nam cursus licet Aetoli referas Acheloi,  
Fluxerit ut magno fractus amore liquor,  
35 Atque etiam ut Phrygio fallax Maeandria campo  
Errat et ipsa suas decipit unda vias,  
Qualis et Adrasti fuerit vocalis Arion,  
Tristis ad Archemori funera victor equus:  
Non magna Amphiaraeae tibi fata quadrigae  
40 Prosint aut Capanei grata ruina Iovi.  
Desine et Aeschyleo componere verba cothurno,  
Desine et ad molles membra resolve choros.  
Incipe iam angusto versus includere torno,

- Inque tuos ignes, dure poeta, veni.  
 45 Tu non Antimacho, non tutior ibis Homero:  
 Despicit et magnos recta puella deos.  
 Sed non ante gravi taurus succumbit aratro,  
 Cornua quam validis haeserit in laqueis,  
 Nec tu tam duros per te patieris amores:  
 50 Trux tamen a nobis ante domandus eris.  
 Harum nulla solet rationem quaerere mundi,  
 Nec cur fraternis Luna laboret equis,  
 Nec si post Stygias aliquid restaverit undas,  
 Nec si consulto fulmina missa tonent.  
 55 Aspice me, cui parva domi fortuna relicta est,  
 Nullus et antiquo Marte triumphus avi,  
 Ut regnem mixtas inter conviva puellas  
 Hoc ego, quo tibi nunc elevor, ingenio.  
 Me iuvat hesternis positum languere corolla,  
 60 Quem tetigit iactu certus ad ossa deus,  
 Actia Virgilium custodis litora Phoebi,  
 Caesaris et fortes dicere posse rates,  
 Qui nunc Aeneae Troiani suscitât arma  
 Iactaque Lavinis moenia litoribus.  
 65 Cedite Romani scriptores, cedite Graii:  
 Nescio quid maius nascitur Iliade.  
 Tu canis umbrosi subter pineta Galaesi  
 Thyrsin et attritis Daphnin arundinibus,  
 Utque decem possint corrumpere mala puellas,  
 70 Missus et inpressis haedus ab uberibus.  
 Felix, qui viles pomis mercaris amores!  
 Huic licet ingratae Tityrus ipse canat:  
 Felix intactum Corydon qui temptat Alexin  
 Agricolae domini carpere delicias!  
 75 Quamvis ille sua lassus requiescat avena,  
 Laudatur facilis inter Hamadryadas.  
 Tu canis Ascraci veteris praecepta poetae,  
 Quo seges in campo, quo viret uva iugo.  
 Tale facis carmen, docta testudine quale  
 80 Cynthius inpositis temperat articulis.  
 Non tamen haec ulli venient ingrata legenti,

- Sive in amore rudis sive peritus erit.  
 Nec minor his animis aut, si minor, ore canorus  
 Ausuris indocto carmine cessit olor.  
 85 Haec quoque perfecto ludebat Iasone Varro,  
 Varro Leucadiae maxima flamma suae.  
 Haec quoque lascivi cantarunt scripta Catulli,  
 Lesbica quis ipsa notior est Helena.  
 Haec etiam docti confessa est pagina Calvi,  
 . 90 Cum caneret miserae funera Quintiliae.  
 Et modo formosa quam multa Lycoride Gallus  
 Mortuus inferna vulnera lavit aqua!  
 Cynthia quin etiam versu laudata Properti,  
 Hos inter si me ponere Fama volet.

## S E X. P R O P E R T I I E L E G I A R U M

### L I B E R Q U A R T U S .

III

- 1 Callimachi Manes et Coi sacra Philetæ,  
 In vestrum, quaeso, me sinite ire nemus.  
 Primus ego ingredior puro de fonte sacerdos  
 Italica per Graios orgia ferre choros.  
 5 Dicite, quo pariter carmen tenuastis in antro,  
 Quove pede ingressi, quamve bibistis aquam?  
 Ah valeat, Phoebum quicumque moratur in armis!  
 Exactus tenui pumice versus eat,  
 Quo me Fama levat terra sublimis, et a me  
 10 Nata coronatis Musa triumphat equis,  
 Et mecum in curru parvi vectantur Amores,  
 Scriptorumque meas turba secuta rotas.  
 Quid frustra missis in me certatis habenis?  
 Non datur ad Musas currere lata via.  
 15 Multi, Roma, tuas laudes annalibus addent,  
 Qui finem imperii Bactra futura canent.  
 Sed, quod pace legas, opus hoc de monte sororum

- Detulit intacta pagina nostra via.  
 Mollia, Pegasides, date vestro sertae poetae:  
 20 Non faciet capiti dura corona meo.  
 At mihi quod vivo detraxerit invida turba,  
 Post obitum duplici fenore reddet Honos.  
 Omnia post obitum fingit maiora vetustas,  
 Maius ab exequiis nomen in ora venit.  
 25 Nam quis equo pulsas abiegnosceret arces,  
 Fluminaque Haemonio cominus isse viro,  
 Idaeum Simoenta Iovis cunabula parvi,  
 Hectora per campos ter maculasse rotas?  
 Delphobumque Helenumque et Polydamanta et in  
 armis  
 30 Qualemcumque Parin vix sua nosset humus.  
 Exiguo sermone fores nunc, Ilion et tu  
 Troia bis Oetaei numine capta dei.  
 Nec non ille tui casus memorator Homerus  
 Posteritate suum crescere sensit opus.  
 35 Meque inter seros laudabit Roma nepotes:  
 Illum post cineres auguror ipse diem.  
 Ne mea contempto lapis indicet ossa sepulcro,  
 Provisum est Lycio vota probante deo.  
 Carminis interea nostri redeamus in orbem,  
 40 Gaudeat ut solito tacta puella sono.  
 Orphea detinuisse feras et concita dicunt. 2  
 Flumina Threicia sustinuisse lyra:  
 Saxa Cithaeronis Thebas agitata per artem  
 Sponte sua in muri membra coisse ferunt:  
 45 Quin etiam, Polypheme, fera Galatea sub Aetna 5  
 Ad tua rorantes carmina flexit equos:  
 Miremur, nobis et Baccho et Apolline dextro  
 Turba puellarum si mea verba colit?  
 Quod non Taenariis domus est mihi fulta columnis,  
 50 Nec camera auratas inter eburna trabes, 10  
 Nec mea Phaeacas aequant pomaria silvas,  
 Non operosa rigat Marcius antra liquor;  
 At Musae comites et carmina cara legenti,  
 Et defessa choris Calliopea meis.

- 55 Fortunata, meo si qua est celebrata libello! 15  
 Carmina erunt formae tot monimenta tuae.  
 Nam neque Pyramidum sumptus ad sidera ducti,  
 Nec Iovis Elei caelum imitata domus,  
 Nec Mausolei dives fortuna sepulcri
- 60 Mortis ab extrema condicione vacant. 20  
 Aut illis flamma aut imber subducet honores,  
 Annorum aut ictu pondera victa ruent.  
 At non ingenio quaesitum nomen ab aevo  
 Excidet: ingenio stat sine morte decus.
- 
- 2 Visus eram molli recubans Heliconis in umbra, 3  
 Bellerophonteï qua fuit humor equi,  
 Reges, Alba, tuos et regum facta tuorum,  
 Tantum operis, nervis hiscere posse meis,
- 5 Parvaeque tam magnis admoram fontibus ora,  
 Unde pater sitiens Ennius ante bibit,  
 Et cecini Curios fratres et Horatia pila,  
 Regiaeque Aemilia vecta tropaea rate,  
 Victricesque moras Fabii pugnamque sinistram
- 10 Cannensem et versos ad pia vota deos,  
 Hannibalemque Lares Romana sede fugantes,  
 Anseris et tutum voce fuisse Iovem;  
 Cum me Castalia speculans ex arbore Phoebus  
 Sic ait aurata nixus ad antra lyra:
- 15 'Quid tibi cum tali, demens, est flumine? quis te  
 Carminis heroi tangere iussit opus?  
 Non hic ulla tibi speranda est fama, Properti:  
 Mollia sunt parvis prata terenda rotis,  
 Ut tuus in scamno iactetur saepe libellus,
- 20 Quem legat expectans sola puella virum.  
 Cur tua praescripto sevecta est pagina gyro?  
 Non est ingenii cymba gravanda tui.  
 Alter remus aquas, alter tibi radat arenas:  
 Tutus eris: medio maxima turba mari est.'
- 25 Dixerat, et plectro sedem mihi monstrat eburno,  
 Qua nova muscoso semita facta solo est.  
 Hic erat affixis viridis spelunca lapillis,

- Pendebantque cavis tympana pumicibus.  
 Ergo Musarum et Sileni patris imago  
 30 Fictilis et calami, Pan Tegeaeae, tui,  
 Et Veneris dominae volucres, mea turba, columbae  
 T'ingunt Gorgonio Punica rostra lacu,  
 Diversaeque novem sortitae rura puellae  
 Exercent teneras in sua dona manus.  
 35 Haec hederas legit in thyrsos, haec carmina nervis  
 Aptat, at illa manu textit utraque rosam.  
 E quarum numero me contigit una dearum:  
 Ut reor a facie, Calliopea fuit:  
 'Contentus nivels semper vectabere cynis,  
 40 Nec te fortis equi ducet ad arma sonus.  
 Nil tibi sit rauco praeconia classica cornu  
 Flare nec Aonium cingere Marte nemus,  
 Aut quibus in campis Mariano proelia signo  
 Stent et Teutonicas Roma refringat opes,  
 45 Barbarus aut Suevo perfusus sanguine Rhenus  
 Saucia maerenti corpora vectet aqua.  
 Quippe coronatos alienum ad limen amantes  
 Nocturnaeque canes ebria signa fugae,  
 Ut per te clausas sciat excantare puellas,  
 50 Qui volet austeros arte ferire viros.'  
 Talia Calliope, lymphisque a fonte petitis  
 Ora Philetaea nostra rigavit aqua.

- 3 Arma deus Caesar dites meditatur ad Indos, 4  
 Et freta gemmiferi findere classe maris.  
 Magna, viri, merces: parat ultima terra triumphos:  
 Tigris et Euphrates sub tua iura fluent:  
 5 Sera, sed Ausoniis veniet provincia virgis:  
 Adsuescent Latio Partha tropaea Iovi.  
 Ite agite, expertae bello date lintea prorae  
 Et solitum armigeri ducite munus equi.  
 Omina fausta cano: Crassos clademque piate:  
 10 Ite et Romanae consulite historiae.  
 Mars pater et sacrae fatalia lumina Vestae,  
 Ante meos obitus sit, precor, illa dies,



- Qua videam spoliis oneratos Caesaris axes,  
 Ad vulgi plausus saepe resistere equos,  
 15 Inque sinu carae nixus spectare puellae  
 Incipiam et titulis oppida capta legam,  
 Tela fugacis equi et braccati militis arcus  
 Et subter captos arma sedere duces.  
 Ipsa tuam serva prolem, Venus: hoc sit in aevum,  
 20 Cernis ab Aenea quod superesse caput.  
 Praeda sit haec illis, quorum meruere labores:  
 Me sat erit Sacra plaudere posse Via.

- 4 **P**acis Amor deus est, pacem veneramur amantes. 5  
 Stant mihi cum domina proelia dura mea:  
 Nec tamen invisio pectus mihi carpitur auro,  
 Nec bibit e gemma divite nostra sitis,  
 6 Nec mihi mille iugis Campania pinguis aratur,  
 Nec miser aera paro clade, Corinthe, tua.  
 O prima infelix fingenti terra Prometheo!  
 Ille parum cauti pectoris egit opus:  
 Corpora disponens mentem non vidit in arte.  
 10 Recta animi primum debuit esse via.  
 Nunc maris in tantum vento iactamur, et hostem  
 Quaerimus, atque armis nectimus arma nova.  
 Haud ullas portabis opes Acherontis ad undas:  
 Nudus ad infernas, stulte, vehere rates.  
 15 Victor cum victis pariter miscebitur umbris:  
 Consule cum Mario, capte Iugurtha, sedes.  
 Lydus Dulichio non distat Croesus ab Iro:  
 Optima mors, Parcae quae venit acta die.  
 Me iuvat in prima coluisse Helicon a iuventa  
 20 Musarumque choris implicuisse manus:  
 Me iuvat et multo mentem vincere Lyaeo  
 Et caput in verna semper habere rosa.  
 Atque ubi iam Venerem gravis interceperit aetas,  
 Sparserit et nigras alba senecta comas,  
 25 Tum mihi naturae libeat perdiscere mores,  
 Quis deus hanc mundi temperet arte domum,  
 Qua venit exoriens, qua deficit, unde coactis

- Cornibus in plenum menstrua luna redit,  
 Unde salo superant venti, quid flamine captet  
 30 Eurus, et in nubes unde perennis aqua,  
 Sit ventura dies, mundi quae subruat arces,  
 Purpureus pluvias cur bibit arcus aquas,  
 Aut cur Perrhaebi tremuere cacumina Pindi,  
 Solis et atratis luxerit orbis equis,  
 35 Cur serus versare boves et plaustra Bootes,  
 Pleiadum spisso cur coit igne chorus,  
 Curve suos fines altum non exeat aequor,  
 Plenus et in partes quattuor annus eat,  
 Sub terris sint fura deum et tormenta Gigantum,  
 40 Tisiphones atro si furit angue caput,  
 Aut Alcmaeoniae fursae aut ieiunia Phinei,  
 Num rota, num scopuli, num sitis inter aquas,  
 Num tribus infernum custodit faucibus antrum  
 Cerberus, et Tityo iugera pauca novem,  
 45 An ficta in miseris descendit fabula gentes,  
 Et timor haud ultra quam rogos esse potest.  
 Exitus hic vitae superet mihi: vos, quibus arma  
 Grata magis, Crassi signa referte domum.

- 5 Dic mihi de nostra, quae sentis, vera puella: 6  
 Sic tibi sint dominae, Lygdame, dempta iuga.  
 Num me laetitia tumefactum fallis inani,  
 Haec referens, quae me credere velle putas?  
 5 Omnis enim debet sine vano nuntius esse,  
 Maioremque timens servus habere fidem.  
 Nunc mihi, si qua tenes, ab origine dicere prima  
 Incipe: suspensis auribus ista bibam.  
 Sicine eam incomptis vidisti flere capillis?  
 0 Illius ex oculis multa cadebat aqua?  
 Nec speculum strato vidisti, Lygdame, lecto?  
 Ornabat niveas nullane gemma manus?  
 Et maestam teneris vestem pendere lacertis,  
 Scriniaque ad lecti clausa iacere pedes?  
 15 Tristis erat domus, et tristes sua pensa ministrae  
 Carpebant, medio nebat et ipsa loco,

- Humidaque inpressa siccabat lumina lana,  
 Rettulit et querulo iurgia nostra sono ?  
 'Haec te teste mihi promissa est, Lygdame, merces ?
- 20 Est poenae servo rumpere teste fidem.  
 Ille potest nullo miseram me linquere facto,  
 Aequalem nulla dicere habere domo.  
 Gaudet me vacuo solam tabescere lecto.  
 Si placet, insultet, Lygdame, morte mea.
- 25 Non me moribus illa, sed herbis improba vicit:  
 Staminea rhombi ducitur ille rota.  
 Illum turgentis ranae portenta rubetae  
 Et lecta exectis anguibus ossa trahunt.  
 Et strigis inventae per busta iacentia plumae,
- 30 Cinctaque funesto lanea vitta toro.  
 Si non vana canunt mea somnia, Lygdame, testor,  
 Poena erit ante meos sera, sed ampla, pedes,  
 Patris et in vacuo texetur aranea lecto:  
 Noctibus illorum dormiet ipsa Venus.'
- 35 Quae tibi si veris animis est quæsta puella,  
 Hac eadem rursus, Lygdame, curre via  
 Et mea cum multis lacrimis mandata reporta,  
 Iram, non fraudes esse in amore meo.  
 Me quoque consimili inpositum torquerier igni
- 40 Iurabo et bis sex integer esse dies.  
 Quod mihi si tanto felix concordia bello  
 Extiterit, per me, Lygdame, liber eris.
- 
- 6 Ergo sollicitae tu causa, pecunia, vitae es: 7  
 Per te inmatuum mortis aditus iter.  
 Tu vitis hominum crudelia pabula praebes:  
 Semina curarum de capite orta tuo.
- 5 Tu Paetum ad Pharios tendentem linthea portus  
 Obruis insano terque quaterque mari.  
 Nam dum te sequitur, primo miser excidit aevo  
 Et nova longinquis piscibus esca natat,  
 Et mater non iusta plac dare debita terrae
- 10 Nec pote cognatos inter humare rogos,  
 Sed tua nunc volucres astant super ossa marinae,

- Nunc tibi pro tumulo Carpathium omne mare est.  
 Infelix Aquilo, raptae timor Orithyiae,  
 Quae spolia ex illo tanta fuere tibi ?
- 15 Aut quidnam fracta gaudes, Neptune, carina ?  
 Portabat sanctos alveus ille viros.  
 Paete, quid aetatem numeras ? quid cara natanti  
 Mater in ore tibi est ? non habet unda deos.  
 Nam tibi nocturnis ad saxa ligata procellis
- 20 Omnia detrito vincula fune cadunt.  
 Sunt Agamemnonias testantia litora curas,  
 Quae notat Argynni poena Athamantiadae.  
 Hoc iuvene amisso classem non solvit Atrides,  
 Pro qua mactata est Iphigenia mora.
- 25 Reddite corpus humo, positâque in gurgite vita  
 Pactum sponte tua, vilis harena, tegas,  
 Et quotiens Paeti transibit nauta sepulcrum,  
 Dicat 'et audaci tu timor esse potes.'  
 Ite, rates curvas et leti texite causas :
- 30 Ista per humanas mors venit acta manus.  
 Terra parum fuerat satis, adiecimus undas :  
 Fortunae miseras auximus arte vias.  
 Ancora te teneat, quem non tenuere Penates ?  
 Quid meritum dicas, cui sua terra parum est ?
- 35 Ventorum est, quodcumque paras : haud ulla carina  
 Consenuit, fallit portus et ipse fidem.  
 Natura insidians pontum substravit avaris :  
 Ut tibi succedat, vix semel esse potest.  
 Saxa triumphales fregere Capharea puppes,
- 40 Naufraga cum vasto Graecia tracta salo est.  
 Paullatim socium iacturam flevit Ulixes,  
 In mare cui soliti non valere doli.  
 Quod si contentus patrio bove verteret agros,  
 Verbaque duxisset pondus habere mea,
- 45 Viveret ante suos dulcis conviva Penates,  
 Pauper, at in terra, nil ubi flare potest.  
 Non tulit hic Pactus stridorem audire procellae  
 Et duro teneras laedere fune manus,  
 Sed Chio thalamo aut Oricia terebintho
- PROPERTIUS.

- 50 Et fultum pluma versicolore caput.  
 Huic fluctus vivo radicitus abstulit unguem,  
 Et miser invisam traxit hiatus aquam:  
 Hunc parvo ferri vidit nox improba ligno.  
 Paetus ut occideret, tot coiere mala.
- 55 Flens tamen extremis dedit haec mandata querellis,  
 Cum moribunda niger clauderet ora liquor:  
 'Di maris Aegaei quos sunt penes aequora, Venti,  
 Et quaecumque meum degravat unda caput,  
 Quo rapitis miseros tenerae lanuginis annos?
- 60 Attulimus longas in freta vestra manus.  
 Ah miser alcyonum scopulis adfigar acutis:  
 In me caeruleo fuscina sumpta deo est.  
 At saltem Italiae regionibus advehat aestus:  
 Hoc de me sat erit si modo matris erit.'
- 65 Subtrahit haec fantem torta vertigine fluctus;  
 Ultima quae Pacto voxque diesque fuit.  
 O centum aequoreae Nereo genitore puellae,  
 Et tu materno tacta dolore Theti,  
 Vos decuit lasso supponere brachia mento:
- 70 Non poterat vestras ille gravare manus.  
 At tu, saeve Aquilo, numquam mea vela videbis:  
 Ante fores dominae condar oportet iners.

7 Dulcis ad hesternas fuerat mihi rixa lucernas, 8

- Vocis et insanae tot maledicta tuae.  
 Cur furibunda mero mensam propellis et in me  
 Proicis insana cymbia plena manu?
- 5 Tu vero nostros audax invade capillos  
 Et mea formosis unguibus ora nota,  
 Tu minitare oculos subiecta exurere flamma,  
 Fac mea rescisso pectora nuda sinu.  
 Nimirum veri dantur mihi signa caloris:
- 10 Nam sine amore gravi femina nulla dolet.  
 Quae mulier rabida iactat convicia lingua,  
 Et Veneris magnae volvitur ante pedes.  
 Custodum gregibus circa seu stipat euntem,  
 Seu sequitur medias, Maenas ut icta, vias,

- 15 Seu timidam crebro dementia somnia terrent,  
 Seu miseram in tabula picta puella movet;  
 His ego tormentis animi sum verus aruspex,  
 Has didici certo saepe in amore notas.  
 Non est certa fides, quam non iniuria versat:
- 20 Hostibus eveniat lenta puella meis.  
 Inmorso aequales videant mea vulnera collo:  
 Me doceat livor mecum habuisse meam.  
 Aut in amore dolere volo aut audire dolentem,  
 Sive meas lacrimas sive videre tuas:
- 25 Tecta superciliis si quando verba remittis,  
 Aut tua cum digitis scripta silenda notas.  
 Odi ego, quum numquam pungunt suspiria somnos:  
 Semper in irata pallidus esse velim.  
 Dulcior ignis erat Paridi, cum Graia per arma
- 30 Tyndaridi poterat gaudia ferre suae.  
 Dum vincunt Danai, dum restat barbarus Hector,  
 Ille Helenae in gremio maxima bella gerit.  
 Aut tecum aut pro te mihi cum rivalibus arma  
 Semper erunt: in te pax mihi nulla placet.
- 35 Gaude, quod nulla est aequae formosa: doleres,  
 Si qua foret: nunc sis iure superba licet.  
 At tibi, qui nostro nexisti retia lecto,  
 Sit socer aeternum nec sine matre domus.  
 Cui nunc si qua data est furandae copia noctis,
- 40 Offensa illa mihi, non tibi amica, dedit.

- 8 Maecenas, eques Etrusco de sanguine regum, 9  
 Intra fortunam qui cupis esse tuam,  
 Quid me scribendi tam vastum mittis in aequor?  
 Non sunt apta meae grandia vela rati.
- 5 Turpe est, quod nequeas, capiti committere pondus  
 Et pressum inflexo mox dare terga genu.  
 Omnia non pariter rerum sunt omnibus apta,  
 Fama nec ex aequo ducitur ulla iugo.  
 Gloria Lysippo est animosa effingere signa,
- 10 Exactis Calamis se mihi iactat equis,  
 In Veneris tabula summam sibi ponit Apelles,

- Parrhasius parva vindicat arte locum,  
 Argumenta magis sunt Mentoris addita formae,  
 At Myos exiguum flectit acanthus iter,  
 15 Phidiacus signo se Iuppiter ornat eburno,  
 Praxitelen propria vindicat urbe lapis.  
 Est quibus Eleae concurrit palma quadrigae,  
 Est quibus in celeres gloria nata pedes;  
 Hic satus ad pacem, hic castrensibus utilis armis:  
 20 Naturae sequitur semina quisque suae.  
 At tua, Maecenas, vitae praecepta recepi,  
 Cogor et exemplis te superare tuis.  
 Cum tibi Romano dominas in honore secures  
 Et liceat medio ponere iura foro,  
 25 Vel tibi Medorum pugnaces ire per hostes  
 Atque onerare tuam fixa per arma domum,  
 Et tibi ad effectum vires det Caesar et omni  
 Tempore tam faciles insinuentur opes,  
 Parcis et in tenues humilem te colligis umbras:  
 30 Velorum plenos subtrahis ipse sinus.  
 Crede mihi, magnos aequabunt ista Camillos  
 Iudicia et venies tu quoque in ora virum,  
 Caesaris et famae vestigia iuncta tenebis:  
 Maecenatis erunt vera tropaea fides.  
 35 Non ego velifera tumidum mare findo carina:  
 Tota sub exiguo flumine nostra mora est.  
 Non flebo in cineres arcem sedisse paternos  
 Cadmi nec septem proelia clade pari,  
 Nec referam Scaetas et Pergama Apollinis arces,  
 40 Et Danaum decimo vere redisse rates,  
 Moenia cum Graio Neptunia pressit aratro  
 Victor Palladiae ligneus artis equus.  
 Inter Callimachi sat erit placuisse libellos  
 Et cecinisse modis, Coe poeta, tuis.  
 45 Haec pueros urant, haec urant scripta puellas,  
 Meque deum clament et mihi sacra ferant.  
 Te duce vel Iovis arma canam caeloque minantem  
 Coeum et Phlegraeis Oromedonta iugis,  
 Celsaque Romanis decerpta palatia tauris

- 50   Ordinar et caeso moenia firma Remo,  
 Eductosque pares silvestri ex ubere reges,  
       Crescet et ingenium sub tua iussa meum,  
 Prosequar et currus utroque ab litore ovariantes,  
       Parthorum astutae tela remissa fugae,  
 55   Castraque Pelusi Romano subruta ferro,  
       Antonique graves in sua fata manus.  
 Mollis tu coeptae fautor cape lora iuventae,  
       Dexteraque inmissis da mihi signa rotis.  
 Hoc mihi, Maecenas, laudis concedis, et a te est,  
 60   Quod ferar in partes ipse fuisse tuas.

- 9   Mirabar, quidnam misissent mane Camenae,   10  
       Ante meum stantes sole rubente torum.  
 Natalis nostrae signum misere puellae  
       Et manibus faustos ter crepuere sonos.  
 5   Transeat hic sine nube dies, stent aere venti,  
       Ponat et in sicco molliter unda minas.  
 Aspiciam nullos hodierna luce dolentes,  
       Et Niobes lacrimas supprimat ipse lapis,  
 Alcyonum positis requiescant ora querellis,  
 10   Increpet absumptum nec sua mater Itym;  
       Tuque, o cara mihi, felicibus edita pennis,  
       Surge et poscentes iusta precare deos.  
 Ac primum pura somnum tibi discute lympa  
       Et nitidas presso pollice finge comas:  
 15   Dein, qua primum oculos cepisti veste Properti,  
       Indue nec vacuum flore relinque caput,  
       Et pete, qua polles, ut sit tibi forma perennis,  
       Inque meum semper stent tua regna caput.  
 Inde coronatas ubi ture piaveris aras,  
 20   Luxerit et tota flamma secunda domo,  
       Sit mensae ratio, noxque inter pocula currat,  
       Et crocino naris murreus unguat onyx,  
       Tibia nocturnis succumbat rauca choreis,  
       Et sint nequitiae libera verba tuae,  
 25   Dulciaque ingratos adimant convivia somnos,  
       Publica vicinae perstrepat aura viae:



- Sit sors et nobis talorum interprete iactu,  
 Quem gravibus pennis verberet ille puer.  
 Cum fuerit multis exacta trientibus hora,  
 30 Noctis et instituet sacra ministra Venus,  
 Annua solvamus thalamo sollemnia nostro,  
 Natalisque tui sic peragamus iter.

- 10 Quid mirare, meam si versat femina vitam 11  
 Et trahit addictum sub sua iura virum,  
 Criminaque ignavi capitis mihi turpia fingis,  
 Quod nequeam fracto rumpere vincla iugo ?  
 5 Venturam melius praesagit navita mortem,  
 Vulneribus didicit miles habere metum.  
 Ista ego praeterita iactavi verba iuventa :  
 Tu nunc exemplo disce timere meo.  
 Colchis flagrantis adamantina sub iuga tauros  
 10 Egit et armigera proelia sevit humo,  
 Custodisque feros clausit serpentis hiatus,  
 Iret ut Aesonias aurea lana domos.  
 Ausa ferox ab equo quondam oppugnare sagittis  
 Maeotis Danaum Penthesilea rates ;  
 15 Aurea cui postquam nudavit cassida frontem,  
 Vicit victorem candida forma virum.  
 Omphale in tantum formae processit honorem,  
 Lydia Gygaeo tincta puella lacu,  
 Ut, qui pacato statuisset in orbe columnas,  
 20 Tam dura traheret mollia pēnsa manu.  
 Persarum statuit Babylona Semiramis urbem,  
 Ut solidum cocto tolleret aggere opus,  
 Et duo in adversum missi per moenia currus  
 Ne possent tacto stringere ab axe latus,  
 25 Duxit et Euphratem medium, qua condidit arces,  
 Iussit et imperio subdere Bactra caput.  
 Nam quid ego heroas, quid raptē in crimina divos ?  
 Iuppiter infamat seque suamque domum.  
 Quid, modo quae nostris opprobria vexerat armis  
 30 Et famulos inter femina trita suos  
 Coniugis obsceni pretium Romana poposcit,

- Moenia et addictos in sua regna patres?  
 Noxia Alexandria, dolis aptissima tellus,  
 Et totiens nostro Memphi cruenta malo,  
 35 Tres ubi Pompeio detraxit harena triumphos!  
 Tollet nulla dies hanc tibi, Roma, notam.  
 Issent Phlegraeo melius tibi funera campo,  
 Vel tua si socero colla daturus eras.  
 Scilicet incesti meretrix regina Canopi  
 40 (Una Philippeo sanguine adusta nota)  
 Ausa Iovi nostro latrantem opponere Anubim,  
 Et Tiberim Nili cogere ferre minas,  
 Romanamque tubam crepitanti pellere sistro,  
 Baridos et contis rostra Liburna sequi,  
 45 Foedaque Tarpeio conopia tendere saxo,  
 Iura dare et statuas inter et arma Mari.  
 Quid nunc Tarquinii fractas iuvat esse secures,  
 Nomine quem simili vita superba notat,  
 Si mulier patienda fuit? cape, Roma, triumphum,  
 50 Et longum Augusto salva precare diem.  
 Fugisti tamen in timidi vaga flumina Nili:  
 Accepere tuae Romula vincla manus.  
 Brachia spectavi sacris admorsa colubris,  
 Et trahere occultum membra soporis iter.  
 55 'Non hoc, Roma, fui tanto tibi cive verenda',  
 Dixit, 'et assiduo lingua sepulta mero.'  
 Septem urbs alta iugis, toto quae praesidet orbi,  
 Femineas timuit territa Marte minas.  
 Hannibalis spolia et victi monimenta Syphacis  
 60 Et Pyrrhi ad nostros gloria fracta pedes,  
 Curtius expletis statuit monimenta lacunis,  
 At Decius misso proelia rupit equo,  
 Coclitis abscissos testatur semita pontes,  
 Est cui cognomen corvus habere dedit.  
 65 Haec di condiderant, haec di quoque moenia ser-  
 vant:  
 Vix timeat salvo Caesare Roma Iovem.  
 Nunc ubi Scipiadae classes, ubi signa Camilli,  
 Aut modo Pompeia Bospore capta manu?

Leucadius versas acies memorabit Apollo.

- 70 Tantum operis belli sustulit una dies.  
At tu, sive petes portus seu, navita, linques,  
Caesaris in toto sis memor Ionio.

# 11 Postume, plorantem potuisti linqvere Gallam, 12

- Miles et Augusti fortia signa sequi?  
Tantine ulla fuit spoliati gloria Parthi,  
Ne fañeres Galla multa rogante tua?
- 5 Si fas est, omnes pariter pereatis avari,  
Et quisquis fido praetulit arma toro!  
Tu tamen iniecta tectus, vesane, lacerna  
Potabis galea fessus Araxis aquam.  
Illa quidem interea fama tabescet inani,
- 10 Haec tua ne virtus fiat amara tibi,  
Neve tua Medae laetentur caede sagittae,  
Ferreus aurato neu cataphractus equo,  
Neve aliquid de te flendum referatur in urna:  
Sic redeunt, illis qui cecidere locis.
- 15 Ter quater in casta felix o Postume Galla,  
Moribus his alia coniuge dignus eras.  
Quid faciet nullo munita puella timore,  
Cum sit luxuriae Roma magistra suae?  
Sed securus eas: Gallam non munera vincent,
- 20 Duritiaeque tuae non erit illa memor.  
Nam quocumque die salvum te fata remittent,  
Pendeat collo Galla pudica tuo.  
Postumus alter erit miranda coniuge Ulixes.  
Non illi longae tot nocuere morae,
- 25 Castra decem annorum, et Ciconum mons Ismara,  
Calpe,  
Exustaeque tuae mox, Polypheme, genae,  
Et Circes fraudes, lotosque herbaeque tenaces,  
Scyllaque et alternas scissa Charybdis aquas,  
Lampetis Ithacis verubus mugisse iuencos
- 30 (Paverat hos Phoebos filia Lampetie),  
Et thalamum Aeaeae flentis fugisse puellae,  
Totque hiemis noctes totque natasse dies,

Nigrantisque domos animarum intrasse silentum,  
Sirenum surdo remige adisse lacus,  
35 Et veteres arcus leto renovasse procorum,  
Errorisque sui sic statuisse modum.  
Nec frustra, quia casta domi persederat uxor.  
Vincit Penelopes Aelia Galla fidem.

12 Quaeritis, unde avidis nox sit pretiosa puellis, 13

Et Venere exhaustae damna querantur opes.  
Certa quidem tantis causa et manifesta ruinis:  
Luxuriae nimium libera facta via est.  
5 Inda cavis aurum mittit formica metallis,  
Et venit e rubro concha Erycina salo,  
Et Tyrus ostrinos praebet Cadmea colores,  
Cinnamon et multi pastor odoris Arabs.  
Haec etiam clausas expugnant arma pudicas,  
10 Quaeque gerunt fastus, Icarioti, tuos:  
Matrona incedit census induta nepotum  
Et spolia opprobrii nostra per ora trahit.  
Nulla est poscendi, nulla est reverentia dandi,  
Aut si qua est, pretio tollitur ipsa mora.  
15 Felix Eois lex funeris una maritis,  
Quos Aurora suis rubra colorat equis.  
Namque ubi mortifero iacta est fax ultima lecto,  
Uxorum fuis stat pia turba comis,  
Et certamen habent leti, quae viva sequatur  
20 Coniugium: pudor est non licuisse mori.  
Ardent victrices et flammae pectora praebent,  
Inponuntque suis ora perusta viris.  
Hic genus infidum nuptarum, hic nulla puella  
Nec fida Euadne nec pia Penelope.  
25 Felix agrestum quondam pacata iuventus,  
Divitiae quorum messis et arbor erant.  
Illis munus erat decussa Cydonia ramo  
Et dare puniceis plena canistra rubis,  
Nunc violas tondere manu, nunc mixta referre  
30 Lilia virgineos lucida per calathos,  
Et portare suis vestitas frondibus uvas

- Aut variam plumae versicoloris avem.  
 His tum blanditiis furtiva per antra puellae  
 Oscula silvicollis empta dedere viris.  
 35 Hinnulei pellis totos operibat amantes,  
 Altaque nativo creverat herba toro,  
 Pinus et incumbens lentas circumdabat umbras,  
 Nec fuerat nuda poena videre deas,  
 Corniger atque dei vacuam pastoris in aulam  
 40 Dux aries saturas ipse reduxit oves,  
 Dique deaeque omnes, quibus est tutela per agros,  
 Praebant vestris verba benigna focis:  
 'Et leporem, quicumque venis, venaberis, hospes,  
 Et si forte meo tramite quaeris avem:  
 45 Et me Pana tibi comitem de rupe vocato,  
 Sive petes calamo praemia, sive cane.'  
 At nunc desertis cessant sacraria lucis:  
 Aurum omnes victa iam pietate colunt.  
 Auro pulsa fides, auro venalia iura,  
 50 Aurum lex sequitur, mox sine lege pudor.  
 Torrida sacrilegum testantur limina Brennum,  
 Dum petit intonsi Pythia regna dei:  
 At mons laurigero concussus vertice diras  
 Gallica Parnasus sparsit in arma nives.  
 55 Te scelus accepto Thracis Polymestoris auro  
 Nutrit in hospitio non, Polydore, pio.  
 Tu quoque, ut auratos gereres, Eriphyla, lacertos,  
 Dilapsis nusquam est Amphiaras equis.  
 Proloquar, atque utinam patriae sim verus aruspex!  
 60 Frangitur ipsa suis Roma superba bonis.  
 Certa loquor, sed nulla fides: neque enim Ilia quon-  
 dam  
 Verax Pergameis Maenas habenda malis.  
 Sola Parim Phrygiae fatum componere, sola  
 Fallacem patriae serpere dixit equum.  
 65 Ille furor patriae fuit utilis, ille parenti:  
 Experta est veros irrita lingua deos.
-

- 13** Multa tuae, Sparte, miramur iura palaestrae, **14**  
 Sed mage virginiei tot bona gymnasii,  
 Quod non infames exercet corpore ludos  
 Inter luctantes nuda puella viros,  
**5** Cum pila velocis fallit per brachia iactus,  
 Increpat et versi clavis adunca trochi,  
 Pulverulentaque ad extremas stat femina metas,  
 Et patitur duro vulnera pancratis,  
 Nunc ligat ad caestum gaudentia brachia loris,  
**10** Missile nunc disci pondus in orbe rotat,  
 Gyrum pulsat equis, niveum latus ense revincit,  
 Virgineumque cavo protegit aere caput,  
 Qualis Amazonidum nudatis bellica mammis  
 Thermodontiacis turba lavatur aquis,  
**15** Et modo Taygeti, crines adpersa pruina,  
 Sectatur patrios per iuga longa canes;  
 Qualis et Eurotae Pollux et Castor harenis,  
 Hic victor pugnans, ille futurus equis,  
 Inter quos Helene nudis capere arma papillis  
**20** Fertur nec fratres erubuisse deos:  
 Lex igitur Spartana vetat secedere amantes,  
 Et licet in triviis ad latus esse suae,  
 Nec timor aut ulla est clausae tutela puellae  
 Nec gravis austeri poena cavenda viri.  
**25** Nullo praemisso de rebus tute loquaris  
 Ipse tuis: longae nulla repulsa morae.  
 Non Tyriae vestes errantia lumina fallunt,  
 Est neque odoratae cura molesta comae.  
 At nostra ingenti vadit circumdata turba,  
**30** Nec digitum angusta est inseruisse via,  
 Nec quae sint facies nec quae sint verba rogandi,  
 Invenias: caecum versat amator iter.  
 Quod si iura fores pugnansque imitata Laconum,  
 Carior hoc esses tu mihi, Roma, bono.

- 14** Sic ego non ullos iam norim in amore tumultus, **15**  
 Nec veniat sine te nox vigilanda mihi:

- Ut mihi praetextae pudor est velatus amictu,  
Et data libertas noscere amoris iter,  
6 Illa rudes animos per noctes conscia primas  
Inbuit heu nullis capta Lycinna datis.  
Tertius haud multo minus est cum ducitur annus:  
Vix memini nobis verba coisse decem.  
Cuncta tuus sepelivit amor, nec femina post te  
10 Ulla dedit collo dulcia vincla meo.  
Testis erit Dirce tam vero crimine saeva,  
Nycteos Antiopen accubuisse Lyco.  
Ah quotiens pulchros ussit regina capillos,  
Molliaque inmittens fixit in ora manus!  
15 Ah quotiens famulam pensis oneravit iniquis,  
Et caput in dura ponere iussit humo!  
Saepe illam inmundis passa est habitare tenebris,  
Vilem ieiunae saepe negavit aquam.  
Iuppiter, Antiopae nusquam succurris habenti  
20 Tot mala? corrumpit dura catena manus.  
Si deus es, tibi turpe tuam servire puellam.  
Invocet Antiope quem nisi vincita Iovem?  
Sola tamen, quaecumque aderant in corpore vires,  
Regales manicas rupit utraque manu.  
25 Inde Cithaeronis timido pede currit in arces.  
Nox erat, et sparso triste cubile gelu.  
Saepe vago Asopi sonitu permota fluentis  
Credebat dominae pone venire pedes.  
Et durum Zethum et lacrimis Amphiona mollem  
30 Experta est stabulis mater abacta suis.  
Ac veluti, magnos cum ponunt aequora motus,  
Eurus et adverso desinit ire Noto,  
Litore sub tacito sonitus rarescit arenae,  
Sic (cadit inflexo lapsa puella genu)  
35 Sera, tamen pietas: natis est cognitus error.  
Digne Iovis natos qui tueare senex,  
Tu reddis pueris matrem, puerique trahendam  
Vinxerunt Dircen sub trucis ora bovis.  
Antiope, cognosce Iovem: tibi gloria Dirce  
40 Ducitur in multis mortem habitura locis.

Prata cruentantur Zetho, victorque canebat  
 Paean Amphion rupe, Aracynthe, tua.  
 At tu non meritam parcas vexare Lycinnam:  
 Nescit vestra ruens ira referre pedem.  
 45 Fabula nulla tuas de nobis concitet aures:  
 Te solam et lignis funeris ustus amem.

15 Nox media, et dominae mihi venit epistola no- 16  
 strae:

Tibure me missa iussit adesse mora,  
 Candida qua geminas ostendunt culmina turres,  
 Et cadit in patulos lymphæ Anienæ lacus.  
 5 Quid faciam? obductis committam mœne tenebris,  
 Ut timeam audaces in mea membra manus?  
 At si distulero hæc nostro mandata timore,  
 Nocturno fletus saevior hoste mihi.  
 Peccaram semel, et totum sum pulsus in annum:  
 10 In me mansuetas non habet illa manus.  
 Nec tamen est quisquam, sacros qui lædat amantes:  
 Scironis media sic licet ire via.  
 Quisquis amator erit, Scythicis licet ambulet oris:  
 Nemo adeo, ut noceat, barbarus esse volet.  
 15 Luna ministrat iter, demonstrant astra salebras,  
 Ipse Amor accensas percutit ante faces,  
 Saeva canum rabies morsus avertit hiantis:  
 Huic generi quovis tempore tuta via est.  
 Sanguine tam parvo quis enim spargatur amantis  
 20 Improbus? exclusis fit comes ipsa Venus.  
 Quod si certa meos sequerentur funera casus,  
 Talis mors pretio vel sit emenda mihi.  
 Adferet hæc unguenta mihi sertisque sepulcrum  
 Ornabit custos ad mea busta sedens.  
 25 Di faciant, mea ne terra locet ossa frequenti,  
 Qua facit assiduo tramite vulgus iter:  
 Post mortem tumuli sic infamantur amantum:  
 Me tegat arborea devia terra coma,  
 Aut humer ignotæ cumulis vallatus arenae:  
 30 Non iuvat in media nomen habere via.



**16** Nunc, o Bacche, tuis humiles advolvimur aris: **17**

Da mihi pacato vela secunda, pater.

Tu potes insanae Veneris compescere fastus,  
Curarumque tuo fit medicina mero.

**5** Per te iunguntur, per te solvuntur amantes:

Tu vitium ex animo dilue, Bacche, meo.

Te quoque enim non esse rudem testatur in astris  
Lyncibus ad caelum vecta Ariadna tuis.

Hoc mihi, quod veteres custodit in ossibus ignes,

**10** Funera sanabunt aut tua vina malum.

Semper enim vacuos nox sobria torquet amantes,  
Spesque timorque animum versat utroque modo.

Quod si, Bacche, tuis per fervida tempora donis  
Accersitus erit somnus in ossa mea,

**15** Ipse seram vites pangamque ex ordine colles,

Quos carpant nullae me vigilante ferae.

Dum modo purpureo spument mihi dolia musto,

Et nova pressantis inquinet uva pedes,

Quod superest vitae per te et tua cornua vivam,

**20** Virtutisque tuae, Bacche, poeta ferar.

Dicam ego maternos Aetnaeo fulmine partus,

Indica Nysaeis arma fugata choris,

Vesanumque nova nequiquam in vite Lycurgum,

Pentheos in triplices funera grata greges,

**25** Curvaeque Tyrrhenos delphinum corpora nautas

In vada pampinea desiluisse rate,

Et tibi per mediam bene olentia flumina Naxon,

Unde tuum potant Naxia turba merum.

Candida laxatis onerato colla corymbis

**30** Cinget Bassaricas Lydia mitra comas,

Levis odorato cervix manabit olivo,

Et feries nudos veste fluente pedes.

Mollia Dircaeae pulsabunt tympana Thebae,

Capripedes calamo Panes hiantes canent,

**35** Vertice turrigero iuxta dea magna Cybebe

Tundet ad Idaeos cymbala rauca choros.

Ante fores templi crater antistitis auro

Libatum fundens in tua sacra merum.  
 Haec ego non humili referam memoranda cothurno,  
 40 Qualis Pindarico spiritus ore tonat.  
 Tu modo servitio vacuum me siste superbo  
 Atque hoc sollicitum vince sopore caput.

17 Clausus ab umbroso qua ludit pontus Averno, 18  
 Fumida Baiarum stagna tepentis aquae,  
 Qua iacet et Troiae tubicen Misenus arena,  
 Et sonat Herculeo structa labore via,  
 5 Hic, ubi, mortalis dextra cum quaereret urbes,  
 Cymbala Thebano concrepuere deo,  
 At nunc invisae magno cum crimine Baiae,  
 Quis deus in vestra constitit hostis aqua?  
 His pressus Stygias vultum demisit in undas,  
 10 Errat et in vestro spiritus ille lacu.  
 Quid genus aut virtus aut optima profuit illi  
 Mater, et amplexum Caesaris esse focos?  
 Aut modo tam pleno fluitantia vela theatro  
 Et per maternas omnia gesta manus?  
 15 Occidit, et misero steterat vigesimus annus:  
 Tot bona tam parvo clausit in orbe dies.  
 I nunc, tolle animos et tecum finge triumphos,  
 Stantiaque in plausum tota theatra iuvent,  
 Attalicas supera vestes, atque omnia magnis  
 20 Gemmea sint ludis: ignibus ista dabis.  
 Sed tamen huc omnes, huc primus et ultimus ordo:  
 Est mala, sed cunctis ista terenda via est.  
 Exoranda canis tria sunt latrantia colla,  
 Scandenda est torvi publica cymba senis.  
 25 Ille licet ferro cautus se condat et aere,  
 Mors tamen inclusum protrahit inde caput.  
 Nireia non facies, non vis exemit Achillem,  
 Croesum aut, Pactoli quas parit humor, opes.  
 Hic olim ignaros luctus populavit Achivos,  
 30 Atridae magno cum stetit alter amor.  
 At tibi, nauta, pias hominum qui tralcis umbras,  
 Huc animae portent corpus inane tuae,

Qua Siculae victor telluris Claudius et qua  
Caesar ab humana cessit in astra via.

- 18** Obicitur totiens a te mihi nostra libido : **19**  
 Crede mihi , vobis imperat ista magis.  
 Vos, ubi contempti rupistis frena pudoris,  
 Nescitis captae mentis habere modum.  
**5** Flamma per incensas citius sedetur aristas,  
 Fluminaque ad fontis sint reditura caput,  
 Et placidum Syrtes portum et bona litora nautis  
 Praebeat hospitio saeva Malea suo,  
 Quam possit vestros quisquam reprehendere cursus  
**10** Et rapidae stimulos frangere nequitiae.  
 Testis, Cretaei fastus quae passa iuveni  
 Induit abiegnae cornua falsa bovis:  
 Testis Thessalico flagrans Salmonis Enipeo,  
 Quae voluit liquido tota subire deo.  
**15** Crimen et illa fuit patria succensa senecta  
 Arboris in frondes condita Myrrha novae.  
 Nam quid Medae referam quo tempore matris  
 Iram natorum caede piavit amor?  
 Quidve Clytaemnestrae, propter quam tota Mycenis  
**20** Infamis stupro stat Pelopea domus?  
 Tuque, o Minoa venumdata Scylla figura,  
 Tondes purpurea regna paterna coma.  
 Hanc igitur dotem virgo desponderat hosti:  
 Nise, tuas portas fraude reclusit Amor.  
**25** At vos, innuptae, felicius urite taedas:  
 Pendet Cretaea tracta puella rate.  
 Non tamen inmerito Minos sedet arbiter Orci:  
 Victor erat quamvis, aequus in hoste fuit.
- 19** Credis eum iam posse tuae meminisse figurae, **20**  
 Vidisti a lecto quem dare vela tuo?  
 Durus, qui lucro potuit mutare puellam!  
 Tantine in lacrimis Africa tota fuit?  
**5** At tu, stulta, deos, tu fingis inania verba.  
 Forsitan ille alio pectus amore terat.

Est tibi forma potens, sunt castae Palladis artes,  
Splendidaque a docto fama refulget avo,  
Fortunata domus, modo sit tibi fidus amicus.

10   Fidus ero: in nostros curre, puella, toros.

20 Nox mihi prima venit: primae date tempora noctis: 13

Longius in primo, Luna, morare toro: 14

Tu quoque, qui aestivos spatiosius exigis ignes, 11

Phoebe, moraturae contrahe lucis iter. 12

5 Foedera sunt ponenda prius signandaque iura 15

Et scribenda mihi lex in amore novo.

Haec Amor ipse suo constringet pignera signo:

Testis sidereae tota corona deae.

Quam multae ante meis cedent sermonibus horae,

10   Dulcia quam nobis concitet arma Venus! 20

Namque ubi non certo vincitur foedere lectus,

Non habet ultores nox vigilanda deos,

Et quibus inposuit, solvit mox vincla libido:

Contineant nobis omina prima fidem.

15 Ergo, qui pactas in foedera ruperit aras, 25

Pollueritque novo sacra marita toro,

Illi sint quicumque solent in amore dolores,

Et caput argutae praebeat historiae,

Nec flenti dominae patefiant nocte fenestrae:

20   Semper amet, fructu semper amoris egens. 30

21 Magnum iter ad doctas proficisci cogor Athenas,  
Ut me longa gravi solvat amore via.

Crescit enim assidue spectando cura puellae:

Ipse alimenta sibi maxima praebeat amor.

5 Omnia sunt temptata mihi, quacumque fugari

Possit: at ex omni me premit ipse deus.

Vix tamen aut semel admittit, cum saepe negavit:

Seu venit, extremo dormit amicta toro.

Unum erit auxilium: mutatis Cynthia terris

10   Quantum oculis, animo tam procul ibit amor.

Nunc agite, o socii, propellite in aequora navem,

PROPERTIUS.

- Remorumque pares ducite sorte vices,  
Iungiteque extremo felicia lintea malo:  
Iam liquidum nautis aura secundat iter.
- 15 Romanae turres et vos valeatis amici,  
Qualiscumque mihi tuque puella vale.  
Ergo ego nunc rudis Hadriaci vehar aequoris hospes,  
Cogar et undisonos nunc prece adire deos.  
Deinde per Ionium vectus cum fessa Lechaeo
- 20 Sedarit placida vela phaselus aqua,  
Quod superest, sufferte pedes, properate laborem,  
Isthmos qua terris arcet utrumque mare.  
Inde ubi Piraei capient me litora portus,  
Scandam ego Theseae brachia longa viae.
- 25 Illic vel studiis animum emendare Platonis  
Incipiam aut hortis, docte Epicure, tuis,  
Persequar aut studium linguae, Demosthenis arma,  
Librorumque tuos, docte Menandre, sales;  
Aut certe tabulae capient mea lumina pictae
- 30 Sive ebore exactae seu magis aere manus;  
Aut spatia annorum aut longa intervalla profundi  
Lenibunt tacito vulnera nostra sinu:  
Seu moriar, fato, non turpi fractus amore,  
Atque erit illa mihi mortis honesta dies.
- 22 Frigida tam multos placuit tibi Cyzicus annos,  
Tulle, Propontiaca qua fluit Isthmos aqua,  
Dindymus, et sacrae fabricata iuvenca Cybebae,  
Raptorisque tulit qua via Ditis equos;
- 5 Si te forte iuvant Helles Athamantidos urbes,  
Nec desiderio, Tulle, movere meo.  
Tu licet aspicias caelum omne Atlanta gerentem,  
Sectaque Persea Phorcidos ora manu,  
Geryonae stabula et luctantum in pulvere signa
- 10 Herculis Antaeique Hesperidumque choros,  
Tuque tuo Colchum propellas remige Phasin,  
Pellacaeque trabis totum iter ipse legas,  
Qua rudis Argoa natat inter saxa columba  
In faciem prorae pinus adacta novae,

- 15 Et sis, qua Ortygia et visenda est ora Caystri,  
 Et qua septenas temperat unda vias;  
 Omnia Romanae cedent miracula terrae:  
 Natura hic posuit, quicquid ubique fuit.  
 Armis apta magis tellus, quam commoda noxae:  
 20 Famam, Roma, tuae non pudet historiae.  
 Nam quantum ferro, tantum pietate potentes  
 Stamus: victrices temperat ira manus.  
 Hic Anio Tiburne fluis, Clitumnus ab Umbro  
 Tramite, et aeternum Marcius humor opus,  
 25 Albanus lacus et socia Nemorensis ab unda,  
 Potaque Pollucis lympa salubris equo.  
 At non squamoso labuntur ventre cerastae,  
 Italia portentis nec fluit unda novis,  
 Non hic Andromedae resonant pro matre catenae,  
 30 Nec tremis Ausonias, Phoebe fugate, dapes,  
 Nec cuiquam absentes arserunt in caput ignes  
 Exitium nato matre movente suo,  
 Penthea non saevae venantur in arbore Bacchae,  
 Nec solvit Danaas subdita cerva rates,  
 35 Cornua nec valuit curvare in pellice Iuno  
 Aut faciem turpi dedecorare bove,  
 Arboreasque cruces Sinis, et non hospita Gratis  
 Saxa, et curvatas in sua fata trabes.  
 Haec tibi, Tulle, parens, haec est pulcherrima sedes,  
 40 Hic tibi pro digna gente petendus honos,  
 Hic tibi ad eloquium cives, hic ampla nepotum  
 Spes et venturae coniugis aptus amor.

- 23 Ergo tam doctae nobis periire tabellae,  
 Scripta quibus pariter tot periire bona.  
 Has quondam nostris manibus detriverat usus,  
 Qui non signatas iussit habere fidem.  
 5 Illae iam sine me norant placare puellas  
 Et quaedam sine me verba diserta loqui.  
 Non illas fixum caras effecerat aurum:  
 Vulgari buxo sordida cera fuit.  
 Qualescumque mihi semper mansere fideles,

- 10 Semper et effectus promeruerē bonos.  
Forsitan haec illis fuerant mandata tabellis:  
Irascor, quoniam es, lente, moratus heri.  
An tibi nescio quae visa est formosior? an tu  
Non bene de nobis crimina ficta iacis?
- 15 Aut dixit: venies hodie, cessabimus una:  
Hospitium tota nocte paravit Amor,  
Et quaecumque dolens reperit non stulta puella,  
Garrula cum blandis dicitur hora dolis.  
Me miserum, his aliquis rationem scribit avarus
- 20 Et ponit duras inter ephemeridas.  
Quas si quis mihi rettulerit, donabitur auro.  
Quis pro divitiis ligna retenta velit?  
I puer, et citus haec aliqua propone columna,  
Et dominum Esquiliis scribe habitare tuum.
- 
- 24 Falsa est ista tuae, mulier, fiducia formae,  
Olim oculis nimium facta superba meis.  
Noster amor tales tribuit tibi, Cynthia, laudes:  
Versibus insignem te pudet esse meis.
- 5 Mixtam te varia laudavi saepe figura,  
Ut, quod non esses, esse putaret amor,  
Et color est totiens roseo collatus Eoo,  
Cum tibi quaesitus candor in ore foret:  
Quod mihi non patris poterant avertere amici,
- 10 Eluere aut vasto Thessala saga mari.  
Haec ego, non ferro, non igne coactus, et ipsa  
Naufragus Aegaea vera fatebar aqua.  
Correptus saevo Veneris torrebar ahenō:  
Vinctus eram versas in mea terga manus.
- 15 Ecce coronatae portum tetigere carinae,  
Traiectae Syrtes, ancora iacta mihi est.  
Nunc demum vasto fessi resipiscimus aestu,  
Vulneraque ad sanum nunc coiere mea.  
Mens bona, si qua dea es, tua me in sacraria dono.
- 20 Exciderant surdo tot mea vota Iovi.

- 25 **R**isus eram positus inter convivia mensis,  
 Et de me poterat quilibet esse loquax.  
 Quinque tibi potui servire fideliter annos:  
 Ungue meam morso saepe querere fidem.
- 5 Nil moveor lacrimis, ista sum captus ab arte:  
 Semper ab insidiis, Cynthia, flere soles.  
 Flebo ego discedens, sed fletum iniuria vincet:  
 Tu bene conveniens non sinis ire iugum.  
 Limina iam nostris valeant lacrimantia verbis,
- 10 Nec tamen irata ianua fracta manu.  
 At te celatis aetas gravis urgeat annis,  
 Et veniat formae ruga sinistra tuae.  
 Vellere tum cupias albos a stirpe capillos  
 Ah speculo rugas increpitante tibi,
- 15 Exclusa inque vicem fastus patiare superbos,  
 Et quae fecisti, facta queraris anus.  
 Has tibi fatalis cecinit mea pagina diras.  
 Eventum formae disce timere tuae.

## SEX. PROPERTII ELEGIARUM

### LIBER QUINTUS. IV

- 1 **H**oc, quodcumque vides, hospes, qua maxima Roma  
 est,  
 Ante Phrygem Aenean collis et herba fuit:  
 Atque ubi Navali stant sacra Palatia Phoebos,  
 Euandri profugae concubuerunt boves.
- 5 Fictilibus crevere deis haec aurea templa,  
 Nec fuit opprobrio facta sine arte casa,  
 Tarpeiusque pater nuda de rupe tonabat,  
 Et Tiberis nostris advena bubus erat.  
 Quo gradibus domus ista Remi se sustulit, olim
- 10 Unus erat fratrum maxima regna focus.



- Curia, praetexto quae nunc nitet alta Senatu,  
Pellitos habuit, rustica corda, patres.  
Buccina cogebat priscos ad verba Quirites:  
Centum illi in prato saepe Senatus erat.
- 15 Nec sinuosa cavo pendebant vela theatro,  
Pulpita sollemnis non oluere crocos.  
Nulli cura fuit externos quaerere divos,  
Cum tremeret patrio pendula turba sacro,  
Annuaque accenso celebrare Parilia faeno,
- 20 Qualia nunc curto lustra novantur equo.  
Vesta coronatis pauper gaudebat asellis,  
Ducebant macrae vilia sacra boves.  
Parva saginati lustrabant compita porci,  
Pastor et ad calamos exta litabat ovis.
- 25 Verbera pellitus saetosa movebat arator,  
Unde licens Fabius sacra Lupercus habet.  
Nec rudis infestis miles radiabat in armis:  
Miscebant usta proelia nuda sude.  
Prima galeritus posuit praetoria Lycmon,
- 30 Magnaque pars Tatio rerum erat inter oves.  
Hinc Titiens Ramnesque viri Luceresque coloni,  
Quattuor hinc albos Romulus egit equos.  
Quippe suburbanae parva eminus urbe Bovillae  
Et, qui nunc nulli, maxima turba Gabi,
- 35 Et stetit Alba potens, albae suis omine nata,  
Hac, ubi Fidenas longe erat ire vias.  
Nil patrium nisi nomen habet Romanus alumnus:  
Sanguinis altricem non pudet esse lupam.  
Huc melius profugos misisti, Troia, penates.
- 40 O quali vecta est Dardana puppis ave!  
Iam bene spondebant tunc omnia, quod nihil illam  
Laeserat abiegni venter apertus equi,  
Cum pater in gnati trepidus cervice pependit,  
Et verita est humeros urere flamma pios.
- 45 Tunc animi venere Deci Brutique secures,  
Vexit et ipsa sui Caesaris arma Venus,  
Arma resurgentis portans victricia Troiae:  
Felix terra tuos cepit, Iule, deos;

- Si modo Avernalis tremulae cortina Sibyllae  
 50 Dixit Aventino rura pianda Remo,  
 Aut si Pergameae sero rata carmina vatis  
 Longaevum ad Priami vera fuere caput,  
 'Vertite equum, Danaï, male vincitis: Ilia tellus  
 Vivet, et huic cineri Iuppiter arma dabit.'  
 55 Optima nutricum nostris Iapa Martia rebus,  
 Qualia creverunt moenia lacte tuo!  
 Moenia namque pio conor disponere versu:  
 Ille mihi, quod nostro est parvus in ore sonus!  
 Sed tamen exiguo quodcumque e pectore rivi  
 60 Fluxerit, hoc patriae serviet omne meae.  
 Ennius hirsuta cingat sua dicta corona:  
 Mi folia ex hedera porrige, Bacche, tua,  
 Ut nostris tumefacta superbiat Umbria libris,  
 Umbria Romani patria Callimachi.  
 65 Scandentes si quis cernet de vallibus arces,  
 Ingenio muros aestimet ille meo.  
 Roma, fave, tibi surgit opus, date candida cives  
 Omina, et inceptis dextera cantet avis.  
 Sacra diesque canam et cognomina prisca locorum:  
 70 Has meus ad metas sudet oportet equus.  
 'Quo ruis imprudens, vage, dicere fata, Properti?  
 Non sunt ah dextro condita fila colo.  
 Aversis Musis cantas, aversus Apollo:  
 Poscis ab invita verba pigenda lyra.  
 75 Certa feram certis auctoribus: haud ego vates  
 Nescius aerata signa movere pila.  
 Me creat Archytæ soboles Babylonius Horops  
 Horon et a proavo ducta Conone domus.  
 Di mihi sunt testes non degenerasse propinquos,  
 80 Inque meis libris nil prius esse fide.  
 Nunc pretium fecere deos et fallitur auro  
 Iuppiter, obliquae signa iterata rotæ.  
 Felicesque Iovis stellas Martisque rapacis  
 Et grave Saturni sidus in omne caput,  
 85 Quid moveant Pisces animosaque signa Leonis,  
 Lotus et Hesperia quid Capricornus aqua,

- Dicam: Troia cades et Troica Roma resurges,  
Et maris et terrae longa sepulcra canam.  
Dixi ego, cum geminos produceret Arria natos,  
90 (Illa dabat natis arma vetante deo)  
Non posse ad patrios sua pila referre Penates:  
Nempe meam firmant nunc duo busta fidem.  
Quippe Lupercus, equi dum saucia protegit ora,  
Heu sibi prolapso non bene cavet equo:  
95 Gallus at, in castris dum credita signa tuetur,  
Concidit ante aquillae rostra cruenta suae.  
Fatales pueri, duo funera matris avarae,  
Vera, sed invito, contigit ista fides.  
Idem ego, cum Cinarae traheret Lucina dolores  
100 Et facerent uteri pondera lenta moram,  
Iunonis votum facite inpetrabile, dixi:  
Illa parit: libris est data palma meis.  
Hoc neque harenosum Libyae Iovis explicat antrum  
Aut sibi commissos fibra locuta deos,  
105 Aut si quis motas cornicis senserit alas,  
Umbrave quae magicis mortua prodit aquis.  
Aspicienda via est caeli verusque per astra  
Trames et ab zonis quinque petenda fides.  
Exemplum grave erit Calchas: namque Aulide solvit  
110 Ille bene haerentes ad pia saxa rates:  
Idem Agamemnoniae ferrum cervice puellae  
Tinxit, et Atrides vela cruenta dedit:  
Nec rediere tamen Danaï: tu diruta fletum  
Supprime et Euboicos respice, Troia, sinus.  
115 Nauplius ultores sub noctem porrigit ignes  
Et natat exuviis Graecia pressa suis.  
Victor Oiliade, rape nunc et dilige vatem,  
Quam vetat avelli veste Minerva sua.  
Hactenus historiae: nunc ad tua devehar astra:  
120 Incipe tu lacrimis aequus adesse novis.  
Umbria te notis antiqua Penatibus edit,  
(Mentior? an patriae tangitur ora tuae?)  
Qua nebulosa cavo rorat Mevania campo,  
Et lacus aestivis intepet Umber aquis,

- 125 Scandentisque Asisi consurgit vertice murus,  
 Murus ab ingenio notior ille tuo.  
 Ossaque legisti non illa aetate legenda  
 Patris et in tennes cogeris ipse Lares :  
 Nam tua cum multi versarent rura iuveni,  
 130 Abstulit exultas pertica tristis opes.  
 Mox ubi bulla rudi demissa est aurea collo,  
 Matris et ante deos libera sumpta toga,  
 Tum tibi pauca suo de carmine dictat Apollo  
 Et vetat insano verba tonare foro.  
 135 At tu finge elegos, fallax opus, haec tua castra,  
 Scribat ut exemplo cetera turba tuo.  
 Militiam Veneris blandis patiere sub armis  
 Et Veneris pueris utilis hostis eris.  
 Nam tibi victrices quascumque labore parasti,  
 140 Eludet palmas una puella tuas :  
 Et bene cum fixum mento discusseris uncum,  
 Nil erit hoc, rostro te premet ansa suo.  
 Illius arbitrio noctem lucemque videbis :  
 Gutta quoque ex oculis non nisi iussa cadet.  
 145 Nec mille excubiae nec te signata iuvabunt  
 Limina : persuasae fallere rima sat est.  
 Nunc tua vel mediis puppis luctetur in undis,  
 Vel licet armatis hostis inermis eas,  
 Vel tremefacta cavo tellus diducat hiatum,  
 150 Octipedis Cancris terga sinistra time.'

- 2 Quid mirare meas tot in uno corpore formas ?  
 Accipe Vertumni signa paterna dei.  
 Tuscus ego et Tuscis orior, nec paenitet inter  
 Proelia Volsinios deseruisse focos.  
 5 Haec me turba iuvat, nec templo laetor eburno :  
 Romanum satis est posse videre forum.  
 Hac quondam Tiberinus iter faciebat, et aiunt  
 Remorum auditos per vada pulsa sonos :  
 At postquam ille suis tantum concessit alumnis,  
 10 Vertumnus verso dicor ab amne deus.  
 Seu, quia vertentis fructum praecepimus anni,

- Vertumni rursus creditur esse sacrum.  
Prima mihi variat liventibus uva racemis,  
Et coma lactenti spicea fruge tumet.
- 15 Illic dulces cerasos, hic auctumnalia pruna  
Cernis et aestivo mora rubere die.  
Insitor hic solvit pomosa vota corona,  
Cum pirus invito stipite mala tulit.  
Mendax fama nocet: alius mihi nominis index:
- 20 De se narranti tu modo crede deo.  
Opportuna mea est cunctis natura figuris:  
In quamcumque voles verte, decorus ero.  
Indue me Cois, flam non dura puella:  
Meque virum sumpta quis neget esse toga?
- 25 Da falcem et torto frontem mihi comprime faeno,  
Iurabis nostra gramina secta manu.  
Arma tuli quondam et, memini, laudabar in illis:  
Corbis in inposito pondere messor eram.  
Sobrius ad lites: at cum est inposta corona,
- 30 Clamabis capiti vina subisse meo.  
Cinge caput mitra, speciem furabor Iacchi:  
Furabor Phoebi, si modo plectra dabis.  
Cassibus inpositis venor: sed harundine sumpta  
Faunus plumoso sum deus aucupio.
- 35 Est etiam aurigae species Vertumnus et eius,  
Traicit alterno qui leve pondus equo.  
Suppetat hoc, pisces calamo praedabor, et ibo  
Mundus demissis institor in tunicis.  
Pastorem ad baculum possum curare vel idem
- 40 Sirpiculis medio pulvere ferre rosam.  
Nam quid ego adiciam, de quo mihi maxima fama est,  
Hortorum in manibus dona probata meis?  
Caeruleus cucumis tumidoque cucurbita ventre  
Me notat et iunco brassica vincta levi,
- 45 Nec flos ullus hiat pratis, quin ille decenter  
Inpositus fronti langueat ante meae.  
At mihi, quod formas unus vertebat in omnes,  
Nomen ab eventu patria lingua dedit;  
Et tu, Roma, meis tribuisti praemia Tuscis,

- 50 Unde hodie vicus nomina Tuscus habet,  
 Tempore quo sociis venit Lycomedius armis  
 Atque Sabina feri contudit arma Tati.  
 Vidi ego labentes acies et tela caduca,  
 Atque hostes turpi terga dedisse fugae.  
 55 Sed facias, divum sator, ut Romana per aevum  
 Transeat ante meos turba togata pedes.  
 Sex superant versus: te, qui ad vadimonia curris,  
 Non moror: haec spatilis ultima meta meis.  
 Stipes acernus eram, properanti falce dolatus,  
 60 Ante Numam grata pauper in urbe deus.  
 At tibi, Mamuri, formae caelator ahenae,  
 Tellus artifices ne terat Osca manus,  
 Qui me tam docilis potuisti fundere in usus.  
 Unum opus est, operi non datur unus honos.

- 3 Haec Arethusa suo mittit mandata Lycotae,  
 Cum totiens absis, si potes esse meus.  
 Si qua tamen tibi lecturo pars oblita deerit,  
 Haec erit e lacrimis facta litura meis:  
 5 Aut si qua incerto fallit te littera tractu,  
 Signa meae dextrae iam morientis erunt.  
 Te modo viderunt iteratos Bactra per ortus,  
 Te modo munito Noricus hostis equo,  
 Hibernique Getae, pictoque Britannia curru,  
 10 Ustus et Eoa discolor Indus aqua.  
 Haecne marita fides et pactae sunt mihi noctes,  
 Cum rudis urgenti brachia victa dedi?  
 Quae mihi deductae fax omen praetulit, illa  
 Traxit ab everso lumina nigra rogo,  
 15 Et Stygio sum sparsa lacu, nec recta capillis  
 Vittata est: nupsi non comitante deo.  
 Omnibus heu portis pendent mea noxia vota:  
 Textitur haec castris quarta lacerna tuis.  
 Occidat, inmerita qui carpsit ab arbore vallum  
 20 Et struxit querulas rauca per ossa tubas,  
 Dignior obliquo funem qui torqueat Ocno,  
 Aeternusque tuam pascit, aselle, famem.

- Dic mihi, num teneros urit lorica lacertos?  
Num gravis inbelles atterit hasta manus?  
25 Haec noceant potius, quam dentibus ulla puella  
Det mihi plorandas per tua colla notas.  
Diceris et macie vultum tenuasse: sed opto,  
E desiderio sit color iste meo.  
At mihi cum noctes induxit vesper amaras,  
30 Si qua relictæ iacent, osculor arma tua.  
Tum queror in toto non sidere pallia lecto,  
Lucis et auctores non dare carmen aves.  
Noctibus hibernis castrensia pensa laboro  
Et Tyria in radios vellera secta suos,  
35 Et disco, qua parte fluat vincendus Araxes,  
Quot sine aqua Parthus milia currat equus,  
Cogor et e tabula pictos ediscere mundos,  
Qualis et hæc docti sit positura dei,  
Quæ tellus sit lenta gelu, quæ putris ab aestu,  
40 Ventus in Italiam qui bene vela ferat.  
Adsidet una soror, curis et pallida nutrix  
Peierat hiberni temporis esse moras.  
Felix Hippolyte nuda tulit arma papilla  
Et textit galea barbara molle caput.  
45 Romanis utinam patuissent castra puellis!  
Essem militiæ sarcina fida tuæ,  
Nec me tardarent Scythiæ iuga, cum pater altæ  
Africus in glaciem frigore nectit aquas.  
Omnis amor magnus, sed aperto in coniuge maior:  
50 Hanc Venus, ut vivat, ventilat ipsa facem.  
Nam mihi quo? Poenis tibi purpura fulgeat ostris  
Crystallusque meas ornet aquosa manus.  
Omnia surda tacent, rarisque adsueta kalendis  
Vix aperit clausos una puella lares,  
55 Glaucidos et catulæ vox est mihi grata querentis:  
Illa tui partem vindicat una toro.  
Flore sacella tego, verbenis compita velo,  
Et crepat ad veteres herba Sabina focos.  
Sive in finitimo gemit stans noctua tigno,  
60 Seu voluit tangi parca lucerna mero,

- Illa dies hornis caedem denuntiat agnis,  
 Succinctique calent ad nova lucra popae.  
 Ne, precor, ascensis tanti sit gloria Bactris,  
 Raptave odorato carbasa lina duci,  
 65 Plumbea cum tortae sparguntur pondera fundae,  
 Subdolus et versis increpat arcus equis.  
 Sed, tua sic domitis Parthae telluris alumnis  
 Pura triumphantis hasta sequatur equos,  
 Incorrupta mei conserva foedera lecti.  
 70 Hac ego te sola lege redisse velim,  
 Armaque cum tulero portae votiva Capenae,  
 Subscribam 'salvo grata puella viro.'

- 4 Tarpeium nemus et Tarpeiae turpe sepulcrum  
 Fabor et antiqui limina capta Iovis.  
 Lucus erat felix hederoso conditus antro,  
 Multaque nativis obstrepit arbor aquis,  
 5 Silvani ramosa domus, quo dulcis ab aestu  
 Fistula poturas ire iubebat oves.  
 Hunc Tatius fontem vallo praecingit acerno,  
 Fidaque suggesta castra coronat humo.  
 Quid tum Roma fuit, tubicen vicina Curetis  
 10 Cum quateret lento murmure saxa Iovis,  
 Atque ubi nunc terris dicuntur iura subactis,  
 Stabant Romano pila Sabina foro?  
 Murus erant montes: ubi nunc est Curia septa,  
 Bellicus ex illo fonte bibebat equus.  
 15 Hinc Tarpeia deae fontem libavit: at illi  
 Urgebat medium fictilis urna caput.  
 Et satis una malae potuit mors esse puellae,  
 Quae voluit flammis fallere, Vesta, tuas?  
 Vidit harenosis Tatium proludere campis  
 20 Pictaque per flavas arma levare iubas:  
 Obstupuit regis facie et regalibus armis,  
 Interque oblitus excidit urna manus.  
 Saepe illa inmeritae causata est omina lunae,  
 Et sibi tingendas dixit in amne comas:  
 25 Saepe tulit blandis argentea lilia Nymphis,



- Romula ne faciem laederet hasta Tati:  
Dumque subit primo Capitolia nubila fumo,  
Rettulit hirsutis brachia secta rubis,  
Et sua Tarpeia residens ita flevit ab arce  
30 Vulnera, vicino non patienda Iovi:  
'Ignes castrorum et Tatiæ prætoria turmae  
Et formosa oculis arma Sabina meis,  
O utinam ad vestros sedeam captiva Penates,  
Dum captiva mei conspicer ora Tati.  
35 Romani montes et montibus addita Roma  
Et valeat probro Vesta pudenda meo.  
Ille equus, ille meos in castra reponet amores,  
Cui Tatius dextras collocat ipse iubas.  
Quid mirum in patrios Scyllam saevisse capillos,  
40 Candidaque in saevos inguina versa canes?  
Prodita quid mirum fraterni cornua monstri,  
Cum patuit lecto stamine torta via?  
Quantum ego sum Ausoniis crimen factura puellia,  
Improba virgineo lecta ministra foco!  
45 Pallados extinctos si quis mirabitur ignes,  
Ignoscat: lacrimis spargitur ara meis.  
Cras, ut rumor ait, tota pugnabitur urbe:  
Tu cave spinosi rorida terga iugi.  
Lubrica tota via est et perfida: quippe tacentes  
50 Fallaci celat limite semper aquas.  
O utinam magicæ nossem cantamina Musæ!  
Haec quoque formoso lingua tulisset opem.  
Te toga picta decet, non quem sine matris honore  
Nutrit inhumanae dura papilla lupae.  
55 Sic hospes pariamve tua regina sub aula,  
Dos tibi non humilis prodita Roma venit.  
Si minus, at raptæ ne sint iupune Sabinae:  
Me rape et alterna lege repende vices.  
Commissas acies ego possum solvere: nuptæ,  
60 Vos medium palla foedus inite mea.  
Adde Hymenæe modos, tubicen fera murmura  
conde:  
Credite, vestra meus molliet arma torus.

- Et iam quarta canit venturam buccina lucem,  
 Ipsaque in Oceanum sidera lapsa cadunt.
- 65 Experiar somnum, de te mihi somnia quaeram.  
 Fac venias oculis umbra benigna meis.  
 Dixit, et incerto permisit brachia somno,  
 Nescia vae furis accubuisse novis.
- Nam Vesta, Iliacae felix tutela favillae,  
 70 Culpam alit et plures condit in ossa faces.  
 Illa ruit, qualis celerem prope Thermodonta  
 Strymonis absisos fertur aperta sinus.  
 Urbi festus erat, dixere Parilia patres,  
 Hic primus coepit moenibus esse dies,
- 75 Annua pastorum convivia, lusus in urbe,  
 Cum pagana madent fercula delictis,  
 Cumque super raros faeni flammantis acervos  
 Traicit immundos ebria turba pedes.  
 Romulus excubias decrevit in otia solvi
- 80 Atque intermissa castra silere tuba.  
 Hoc Tarpeia suum tempus rata convenit hostem:  
 Pacta ligat, pactis ipsa futura comes.  
 Mons erat ascensu dubius festoque remissus:  
 Nec mora, vocales occupat ense canes.
- 85 Omnia praebebant somnos: sed Iuppiter unus  
 Decrevit poenis invigilare tuis.  
 Prodiderat portaeque fidem patriamque iacentem,  
 Nubendique petit, quem velit ipse, diem.  
 At Tatius (neque enim sceleri dedit hostis ho-  
 norem)
- 90 'Nube,' ait, 'et regni scande cubile mei.'  
 Dixit, et ingestis comitum super obruit armis.  
 Haec, virgo, officiis dos erat apta tuis.  
 A duce Tarpeia mons est cognomen adeptus:  
 O vigil, iniuste praemia sortis habes.
- 5 Terra tuum spinis obducatur, lena, sepulcrum,  
 Et tua, quod non vis, sentiat umbra sitim,  
 Nec sedeant cineri Manes, et Cerberus ultor  
 Turpia ieiuno terreat ossa sono.

- 5 Docta vel Hippolytum Veneri mollire negantem,  
Concordique toro pessima semper avis,  
Penelopen quoque neglecto rumore mariti  
Nubere lascivo cogeret Antinoo.  
Illa velit, poterit magnès non ducere ferrum
- 10 Et volucris nidis esse noverca suis.  
Quippe et, Collinas ad fossam moverit herbas,  
Stantia currenti diluerentur aqua.  
Audax cantatae leges inponere lunae  
Et sua nocturno fallere terga lupo,
15. Posset et intentos astu caecare maritos,  
Cornicum inmeritas eruit ungue genas,  
Consuluitque striges nostro de sanguine et in me  
Hippomanes fetae semina legit equae.  
Exorabat opus verbis, ceu blanda pererrat
- 20 Saxosamque terit sedula culpa viam:  
‘Si te Eoa Dorozantum iuvat aurea ripa,  
Et quae sub Tyria concha superbit aqua,  
Eurypylique placet Coae textura Minervae  
Sectaque ab Attalicis putria signa toris,
- 25 Seu quae palmiferae mittunt venalia Thebae,  
Murreaque in Parthis pocula cocta focis,  
Sperne fidem, provolve deos, mendacia vincant,  
Frangere et damnosae iura pudicitiae.  
Et simulare virum pretium facit: utere causis:
- 30 Maior dilata nocte recurret amor.  
Si tibi forte comas vexaverit utilis ira,  
Post modo mercata pace premendus erit.  
Denique ubi amplexu Venerem promiseris empto,  
Fac simules pueros Isidis esse dies.
- 35 Ingerat Apriles Iole tibi, tundat Amycle  
Natalem Maiis Idibus esse tuum.  
Supplex ille sedet: posita tu scribe cathedra  
Quidlibet: has artes si pavet ille, tenes.  
Semper habe morsus circa tua colla recentes,
- 40 Litis alternis quos putet esse datos.  
Nec te Medae delectent probra sequacis  
(Nempe tulit fastus ausa rogare prior),

- Sed potius mundi Thais pretiosa Menandri,  
 Cum ferit astutos comica moecha Getas.  
 45 In mores te verte viri: si cantica iactat,  
 I comes et voces ebria iunge tuas.  
 Ianitor ad dantes vigilet: si pulset inanis,  
 Surdus in obductam somniet usque seram.  
 Nec tibi displiceat miles non factus amori,  
 50 Nauta nec attrita si ferat aera manu,  
 Aut quorum titulus per barbara colla pependit,  
 Caelati medio cum saluere foro.  
 Aurum spectato, non quae manus adferat aurum.  
 Versibus auditis quid nisi verba feres?  
 55 Quid iuvat ornato procedere, vita, capillo  
 Et tennes Coa veste movere sinus?  
 Qui versus, Coae dederit nec munera vestis,  
 Istius tibi sit surda sine aere lyra.  
 Dum vernat sanguis, dum rugis integer annus,  
 60 Utere, ne quid cras libet ab ore dies.  
 Vidi ego odorati victura rosaria Paesti  
 Sub matutino cocta iacere Noto.  
 His animum nostrae dum versat Acanthis amicae,  
 Per tennes ossa sunt numerata cutes.  
 65 Sed cape torquatae, Venus o regina, columbae  
 Ob meritum ante tuos guttura secta focos.  
 Vidi ego rugoso tussim concreescere collo,  
 Sputaque per dentes ire cruenta cavos,  
 Atque animam in tegetes putrem expirare paternas:  
 70 Horruit argenti pergula curta foco.  
 Exequiae fuerant rari furtiva capilli  
 Vincula et inmundo pallida mitra situ  
 Et canis in nostros nimis experrecta dolores,  
 Cum fallenda meo pollice clatra forent.  
 75 Sit tumulus lenae curto vetus amphora collo:  
 Urgeat hunc supra vis, caprifice, tua.  
 Quisquis amas, scabris hoc bustum caedito saxis,  
 Mixtaque cum saxis adice verba mala.

- 6** Sacra facit vates: sint ora faventia sacris,  
 Et cadat ante meos icta iuvenca focos.  
 Cera Philetæis certet Romana corymbis,  
 Et Cyrenæas urna ministret aquas.  
**5** Costum molle date et blandi mihi turis honores,  
 Terque focum circa laneus orbis eat.  
 Spargite me lymphis, carmenque recentibus aris  
 Tibia Mygdoniis libet eburna cadis.  
 Ite procul fraudes, alio sint aere noxæ:  
**10** Pura novum vati laurea mollit iter.  
 Musa, Palatini referemus Apollinis aedem:  
 Res est, Calliope, digna favore tuo.  
 Caesaris in nomen ducuntur carmina: Caesar  
 Dum canitur, quaeso, Iuppiter ipse vaces.  
**15** Est Phoebi fugiens Athamana ad litora portus,  
 Qua sinus Ioniæ murmura condit aquae,  
 Actia Iuleae pelagus monumenta carinae,  
 Nautarum votis non operosa via.  
 Huc mundi colere manus: stetit aequore moles  
**20** Pineæ, nec remis aequa favebat avis.  
 Altera classis erat Teucro damnata Quirino,  
 Pilaque feminea turpiter acta manu:  
 Hinc Augusta ratis plenis Iovis omine velis  
 Signaque iam patriæ vincere docta suae.  
**25** Tandem acies geminos Nereus lunarat in arcus,  
 Armorum radiis picta tremebat aqua,  
 Cum Phoebus linquens stantem se vindice Delon  
 (Nam tulit iratos mobilis una Notos)  
 Astitit Augusti puppim super, et nova flamma  
**30** Luxit in obliquam ter sinuata facem.  
 Non ille attulerat crines in colla solutos  
 Aut testudineae carmen inerme lyrae,  
 Sed quali aspexit Pelopeum Agamemnona vultu,  
 Egessitque avidis Dorica castra rogis,  
**35** Aut qualis flexos solvit Pythona per orbem  
 Serpentem, inbelles quem timere lyrae.  
 Mox ait 'o longa mundi servator ab Alba,

- Auguste, Hectoreis cognite maior avia,  
 Vince mari: iam terra tua est: tibi militat arcus,  
 40 Et favet ex humeris hoc onus omne meis.  
 Solve metu patriam, quae nunc te vindice freta  
 Inposuit prorae publica vota tuae.  
 Quam nisi defendes, murorum Romulus augur  
 Ire Palatinas non bene vidit aves.  
 45 Et nimium remis audent proh turpe Latinis  
 Principe te fluctus regia vela pati.  
 Nec te, quod classis centenis remiget alis,  
 Terreat: invito labitur illa mari:  
 Quodque vehunt prorae Centaurica saxa minantis,  
 50 Tigna cava et pictos experire metus.  
 Frangit et attollit vires in milite causa;  
 Quae nisi iusta subest, excutit arma pudor.  
 Tempus adest, committerates: ego temporis auctor  
 Ducam laurigera Iulia rostra manu.  
 55 Dixerat, et pharetrae pondus consumit in arcus:  
 Proxima post arcus Caesaris hasta fuit.  
 Vincit Roma fide Phoebi: dat femina poenas:  
 Sceptra per Ionias fracta vehuntur aquas.  
 At pater Idalio miratur Caesar ab astro:  
 60 'Sum deus, et nostri sanguinis ista fides.'  
 Prosequitur cantu Triton, omnesque marinae  
 Plausuerunt circa libera signa deae.  
 Illa petit Nilum cymba male nixa fugaci,  
 Hoc unum, iusso non moritura die.  
 65 Di melius! quantus mulier foret una triumphus,  
 Ductus erat per quas ante Iugurtha vias.  
 Actius hinc traxit Phoebus monimenta, quod eius  
 Una decem vicit missa sagitta rates.  
 Bella satis cecini: citharam iam poscit Apollo  
 70 Victor et ad placidos exiit arma choros.  
 Candida nunc molli subeant convivia luco,  
 Blanditiaeque fluant per mea colla rosae,  
 Vinaque fundantur praelis elisa Falernis,  
 Terque lavet nostras spica Cilissa comas.  
 75 Ingenium potis irritet Musa poetis:

- Bacche, soles Phoebo fertilis esse tuo.  
 Ille paludosos memoret servire Sicambros,  
 Cepheam hic Meroen fuscaque regna canat,  
 Hic referat sero confessum foedere Parthum:  
 80 'Reddat signa Remi, mox dabit ipse sua:  
 Sive aliquid pharetris Augustus parcat Eois,  
 Differat in pueros ista tropaea suos.  
 Gaude, Crasse, nigras si quid sapis inter harenas:  
 Ire per Euphraten ad tua busta licet.'  
 85 Sic noctem patera, sic ducam carmine, donec  
 Iniciat radios in mea vina dies.

- 7 Sunt aliquid Manes: letum non omnia finit,  
 Luridaque evictos effugit umbra rogos.  
 Cynthia namque meo visa est incumbere fulcro,  
 Murmur ad extremae nuper humata viae,  
 5 Cum mihi somnus ab exequiis penderet amoris,  
 Et quererer lecti frigida regna mei.  
 Eosdem habuit secum, quibus est elata, capillos,  
 Eosdem oculos: lateri vestis adusta fuit,  
 Et solitum digito beryllon adederat ignis,  
 10 Summaque Lethaeus triverat ora liquor:  
 Spirantisque animos et vocem misit: at illi  
 Pollicibus fragiles increpuere manus:  
 'Perfide nec cuiquam melior sperande puellae,  
 In te iam vires somnus habere potest?  
 15 Iamne tibi exciderant vigilacis furta Suburae  
 Et mea nocturnis trita fenestra dolis?  
 Per quam demisso quotiens tibi fune pependi,  
 Alterna veniens in tua colla manu!  
 Saepe Venus trivio commissa est, pectore mixto  
 20 Fecerunt tepidas pallia nostra vias.  
 Foederis heu taciti! cuius fallacia verba  
 Non audituri diripuerunt Noti.  
 At mihi non oculos quisquam inclamavit euntis:  
 Unum inpetrassem te revocante diem:  
 25 Nec crepuit fissa me propter harundine custos,  
 Laesit et obiectum tegula curta caput.

- Denique quis nostro curvum te funere vidit,  
Atram quis lacrimis incaluisse togam?  
Si piguit portas ultra procedere, at illuc  
30 Iussisses, lectum lentius ire meum.  
Cur ventos non ipse rogis, ingrata, petisti?  
Cur nardo flammae non oluere meae?  
Hoc etiam grave erat, nulla mercede hyacinthos  
Inicere et fracto busta piare cado.  
35 Lygdamus uratur, candescat lamina vernae:  
Sensi ego, cum insidiis pallida vina bibi.  
At Nomas arcanas tollat versuta salivas:  
Dicet damnatas ignea testa manus.  
Quae modo per viles inspecta est publica noctes,  
40 Haec nunc aurata cyclade signat humum  
Et graviora rependit iniquis pensa quasillis,  
Garrula de facie si qua locuta mea est:  
Nostraque quod Petale tulit ad monimenta coronas,  
Codicis immundi vincula sentit anus:  
45 Caeditur et Lalage tortis suspensa capillis,  
Per nomen quoniam est ausa rogare meum.  
Te patiente meae conflavit imaginis aurum,  
Ardente e nostro dotem habitura rogo.  
Non tamen insector, quamvis mereare, Properti:  
50 Longa mea in libris regna fuere tuis.  
Iuro ego Fatorum nulli revolubile carmen,  
Tergeminusque canis sic mihi molle sonet,  
Me servasse fidem. si fallo, vipera nostris  
Sibilet in tumultis et super ossa cubet.  
55 Nam gemina est sedes turpem sortita per amnem,  
Turbaque diversa remigat omnis aqua.  
Una Clytaemnestrae stuprum vehit, altera Cressae  
Portat mentitae lignea monstra bovis.  
Ecce coronato pars altera vecta phaselo,  
60 Mulcet ubi Elysias aura beata rosas,  
Qua numerosa fides, quaque aera rotunda Cybebes  
Mitratisque sonant Lydia plectra choris.  
Andromedeque et Hypermnestre sine fraude ma-  
ritae



- Narrant, historiae pectora nota suae:  
 65 Haec sua maternis queritur vivere catenis  
 Brachia nec meritas frigida saxa manus:  
 Narrat Hypermnestre magnum ausas esse sorores,  
 In scelus hoc animum non valuisse suum.  
 Sic mortis lacrimis vitae sanamus amores:  
 70 Celo ego perfidiae crimina multa tuae.  
 Sed tibi nunc mandata damus, si forte moveris,  
 Si te non totum Doridos herba tenet:  
 Nutrix in tremulis ne quid desideret annis  
 Parthenie: patuit, nec tibi avara fuit.  
 75 Deliciae meae Latris, cui nomen ab usu est,  
 Ne speculum dominae porrigat illa novae.  
 Et quoscumque meo fecisti nomine versus,  
 Ure mihi: laudes desine habere meas.  
 Pelle hederam tumulo, mihi quae pugnante corymbo  
 80 Mollia contortis adligat ossa comis.  
 Pomosis Anio qua spumifer incubat arvis,  
 Et numquam Herculeo numine pallet ebur,  
 Hic carmen media dignum me scribe columna,  
 Sed breve, quod currens vector ab urbe legat:  
 85 "Hic Tiburtina iacet aurea Cynthia terra:  
 Accessit ripae laus, Aniene, tuae."  
 Nec tu sperne piis venientia somnia portis:  
 Cum pia venerunt somnia, pondus habent.  
 Nocte vagae ferimur, nox clausas liberat umbras,  
 90 Errat et abiecta Cerberus ipse sera.  
 Luce iubent leges Lethaea ad stagna reverti.  
 Nos vehimur, vectum nauta recenset onus.  
 Nunc te possideant aliae: mox sola tenebo:  
 Mecum eris, et mixtis ossibus ossa teram.'  
 95 Haec postquam querula mecum sub lite peregit,  
 Inter complexus excidit umbra meos.
- 
- 8 Disce, quid Esquillas hac nocte fugarit aquosas,  
 Cum vicina novis turba cucurrit agris.  
 Lanuvium annosi vetus est tutela draconis,  
 Hic ubi tam rarae non perit hora morae,

- 5 Qua sacer abripitur caeco descensus hiatu,  
Qua penetrat (virgo, tale iter omne cave)  
Ieiuni serpentis honos, cum pabula poscit  
Annua et ex ima sibila torquet humo.  
Talia demissae pallent ad sacra puellae,  
10 Cum temere anguino creditur ore manus.  
Ille sibi admotas a virgine corripit escas:  
Virginis in palmis ipsa canistra tremunt.  
Si fuerint castae, redeunt in colla parentum,  
Clamantque agricolae 'fertilis annus erit.'  
15 Huc mea detonsis avecta est Cynthia mannis:  
Causa fuit Iuno, sed mage causa Venus.  
Appia dic, quaeso, quantum te teste triumphum  
Egerit effusis per tua saxa rotis,  
Turpis in arcana sonuit cum rixa taberna;  
20 Si sine me, famae non sine labe meae.  
Spectaculum ipsa sedens primo temone pependit,  
Ausa per inpuros frena movere locos.  
Serica nam taceo volsi carpenta nepotis  
Atque armillatos colla Molossa canes,  
25 Qui dabit immundae venalia fata saginae,  
Vincet ubi crasas barba pudenda genas.  
Cum fieret nostro totiens iniuria lecto,  
Mutato volui castra movere toro.  
Phyllis Aventinae quaedam est vicina Dianae,  
30 Sobria grata parum: cum bibit, omne decet.  
Altera Tarpeios est inter Teia lucos,  
Candida, sed potae non satis unus erit.  
His ego constitui noctem lenire vocatis  
Et Venere ignota furta novare mea.  
35 Unus erat tribus in secreta lectulus herba.  
Quaeris concubitus? inter utramque fui.  
Lygdamus ad cyathos vitrique aestiva supellex  
Et Methymnaei Graeca saliva meri.  
Nile, tuus tibicen erat, crotalistria Phyllis,  
40 Et facilis spargi munda sine arte rosa,  
Nanus et ipse suos breviter concretus in artus  
Iactabat truncas ad cava buxa manus.

- Sed neque suppletis constabat flamma lucernis,  
 Recidit inque suos mensa supina pedes.
- 45 Me quoque per talos Venerem quaerente secundos  
 Semper damnosi subsiluire canes.  
 Cantabant surdo, nudabant pectora caeco:  
 Lanuvii ad portas, hei mihi, solus eram;  
 Cum subito rauci sonuerunt cardine postes,
- 50 Et levia ad primos murmura facta Lares.  
 Nec mora, cum totas resupinat Cynthia valvas,  
 Non operosa comis, sed furibunda decens.  
 Pocula mi digitos inter cecidere remissos,  
 Palluerantque ipso labra soluta mero.
- 55 Fulminat illa oculis et quantum femina saevit,  
 Spectaculum capta nec minus urbe fuit.  
 Phyllidos iratos in vultum conicit unguēs:  
 Territa vicinas Teia clamat aquas.  
 Lumina sopitos turbant elata Quirites,
- 60 Omnis et insana semita nocte sonat.  
 Illas direptisque comis tunicisque solutis  
 Excipit obscurae prima taberna viae.  
 Cynthia gaudet in exuviis victrixque recurrit  
 Et mea perversa sauciat ora manu
- 65 Inponitque notam collo morsuque cruentat,  
 Praecipueque oculos, qui meruere, ferit.  
 Atque ubi iam nostris lassavit brachia plagis,  
 Lygdamus ad plutei fulcra sinistra latens  
 Eruitur, geniumque meum prostratus adorat.
- 70 Lygdame, nil potui: tecum ego captus eram.  
 Supplicibus palmis tum demum ad foedera veni,  
 Cum vix tangendos praebuilt illa pedes,  
 Atque ait 'admissae si vis me ignoscere culpae,  
 Accipe, quae nostrae formula legis erit.
- 75 Tu neque Pompeia spatlabere cultus in umbra,  
 Nec cum lascivum sternet harena forum.  
 Colla cave inflectas ad summum obliqua theatrum  
 Aut lectica tuae sidat aperta morae.  
 Lygdamus in primis, omnis mihi causa querellae,
- 80 Veneat et pedibus vincula bina trahat.'

Indixit leges: respondi ego 'legibus utar.'

Riserat imperio facta superba dato.

Dein quemcumque locum externae tetigere puellae,

Sufflit et pura limina tergit aqua,

85 Imperat et totas iterum mutare lucernas,

Terque meum tetigit sulfuris igne caput.

Atque ita mutato per singula pallia lecto

Despondi, et toto solvimus arma toro.

9 Amphitryoniades qua tempestate iuencos

Egerat a stabulis, o Erythea, tuis,

Venit ad invictos pecorosa Palatia montes,

Et statuit fessos fessus et ipse boves,

5 Qua Velabra suo stagnabant flumine, quaque

Nauta per urbanas velificabat aquas.

Sed non infido manserunt hospite Caco

Incolumes: furto polluit ille Iovem.

Incola Cacus erat, metuendo raptor ab antro,

10 Per tria partitos qui dabat ora focos.

Hic, ne certa forent manifestae signa rapinae,

Aversos cauda traxit in antra boves,

Nec sine teste deo: furem sonuere iuenci,

Furis et inplacidas diruit ira fores.

15 Maenaliō iacuit pulsus tria tempora ramo

Cacus, et Alcides sic ait: 'ite boves,

Herculis ite boves, nostrae labor ultime clavae,

Bis mihi quaesitae, bis mea praeda, boves,

Arvaeque mugitu sancite boaria longo:

20 Nobile erit Romae pascua vestra forum.'

Dixerat, et sicco torret sitis ora palato,

Terraque non ullas feta ministrat aquas.

Sed procul inclusas audit ridere puellas.

Lucus ab umbroso fecerat orbe nemus,

25 Femineae loca clausa deae fontesque piandos,

Impune et nullis sacra relecta viris.

Devia puniceae velabant limina vittae,

Putris odorato luxerat igne casa,

Populus et longis ornabat frondibus aedem,

- 30 Multaque cantantes umbra tegebat aves.  
 Huc ruit in siccam congesto pulvere barbam  
 Et iacit ante fores verba minora deo :  
 'Vos precor, o luci sacro quae luditis antro,  
 Pandite defessis hospita fana viris.
- 35 Fontis egens erro circaque sonantia lymphis,  
 Et cava suscepto flumine palma sat est.  
 Audistisne aliquem, tergo qui sustulit orbem ?  
 Ille ego sum: Alciden terra recepta vocat.  
 Quis facta Herculeae non audit fortia clavae
- 40 Et numquam ad natas irrita tela feras,  
 Atque uni Stygias homini luxisse tenebras ?  
 [Accipite: haec fesso vix mihi terra patet.]  
 Quid, si Iunoni sacrum faceretis amarae ?  
 Non clausisset aquas ipsa noverca suas.
- 45 Sin aliquam vultusque meus saetaeque leonis  
 Terrent et Libyco sole perusta coma,  
 Idem ego Sidonia feci servilia palla  
 Officia et Lydo pensa diurna colo,  
 Mollis et hirsutum cepit mihi fascia pectus,
- 50 Et manibus duris apta puella fui.'  
 Talibus Alcides, at talibus alma sacerdos,  
 Puniceo canas stamine vincta comas :  
 'Parce oculis, hospes, lucoque abscede verendo :  
 Cede aegedum et tuta limina linque fuga.
- 55 Interdicta viris metuenda lege piatur,  
 Quae se submota vindicat ara casa.  
 Magno Tiresias aspexit Pallada vates,  
 Fortia dum posita Gorgone membra lavat.  
 Di tibi dent alios fontes: haec lympa puellis
- 60 Avia secreti limitis una fuit.'  
 Sic anus: ille humeris postes concussit opacos,  
 Nec tulit iratam ianua clausa sitim.  
 At postquam exhausto iam flumine vicerat aestum,  
 Pont vix siccis tristia iura labris.
- 65 'Angulus hic mundi nunc me mea fata trahentem  
 Accipit: haec fesso vix mihi terra patet.  
 Maxima quae gregibus devota est ara repertis,

- Ara per has,' inquit, 'maxima facta manus,  
 Haec nullis umquam pateat veneranda puellis,  
 70 Herculis eximii ne sit inulta sitis.'  
 Sancte pater salve, cui iam favet aspera Iuno:  
 Sancte, velis libro dexter inesse meo.  
 Hunc, quoniam manibus purgatum sanxerat orbem,  
 Sic Sanctum Tatiae composuere Cures.

- 10 Nunc Iovis incipiam causas aperire Feretri  
 Armaque de ducibus trina recepta tribus.  
 Magnum iter ascendo, sed dat mihi gloria vires:  
 Non iuvat e facili lecta corona iugo.  
 5 Inbuis exemplum primae tu, Romule, palmae  
 Huius et exuvio plenus ab hoste redis,  
 Tempore quo portas Caeninum Acronta petentem  
 Victor in eversum cuspide fundis equum.  
 Acron Herculeus Caenina ductor ab arce,  
 10 Roma, tuis quondam finibus horror erat.  
 Hic spolia ex humeris ausus sperare Quirini  
 Ipse dedit, sed non sanguine sicca suo.  
 Hunc videt ante cavas librantem spicula turres  
 Romulus et votis occupat ante ratis:  
 15 'Iuppiter, haec hodie tibi victima corruiet Acron.'  
 Voverat, et spoliū corrui ille Iovi.  
 Urbis virtutisque parens sic vincere suevit,  
 Qui tulit aprico frigida castra Lare.  
 Idem eques et frenis, idem fuit aptus aratris,  
 20 Et galea hirsutis compta lupina iubis,  
 Picta neque inducto fulgebat parma pyropo:  
 Praebabant caesi baltea lenta boves.  
 Cossus at insequitur Veientis caede Tolumni,  
 Vincere cum Veios posse laboris erat,  
 25 Nec dum ultra Tiberim belli sonus, ultima praeda  
 Nomentum et captae iugera terna Corae.  
 O Veii veteres, et vos tum regna fuistis,  
 Et vestro posita est aurea sella foro:  
 Nunc intra muros pastoris buccina lenti  
 30 Cantat, et in vestris ossibus arva metunt.

- Forte super portae dux Veius astitit arcem  
 Colloquiumque sua fretus ab urbe dedit:  
 Dumque aries murum cornu pulsabat ahenò,  
 Vineà qua ductum longa tegebat opus,  
 35 Cossus ait 'forti melius concurrere campo.'  
 Nec mora fit, plano sistit uterque gradum.  
 Di Latias iuvare manus, desecta Tolumni  
 Cervix Romanos sanguine lavit equos.  
 Claudius a Rheno traiectos arcuit hostes,  
 40 Belgica cum vasti parma relata ducis  
 Virдумari. genus hic Rheno iactabat ab ipso,  
 Nobilis erectis fundere gesa rotis.  
 Illi virgatis iaculantis ab agmine braccis  
 Torquis ab incisa decidit unca gula.  
 45 Nunc spolia in templo tria condita: causa Feretri,  
 Omne quod certo dux ferit ense, ducem;  
 Seu quia victa suis humeris haec arma ferebant,  
 Hinc Feretri dicta est ara superba Iovis.

- 11 Desine, Faulle, meum lacrimis urgere sepulcrum:  
 Panditur ad nullas ianua nigra preces.  
 Cum semel infernas intrarunt funera leges,  
 Non exorato stant adamante viae.  
 5 Te licet orantem fuscae deus audiat aulae:  
 Nempe tuas lacrimas litòra surda bibent.  
 Vota movent superos: ubi portitor aera recepit,  
 Obserat herbosos lurida porta rogos.  
 Sic maestae cecinere tubae, cum subdita nostrum  
 10 Detraheret lecto fax inimica caput.  
 Quid mihi coniugium Paulli, quid currus avorum  
 Profuit aut famae pignora tanta meae?  
 Num minus inmites habui Cornelia Parcas?  
 En sum, quod digitis quinque levatur, onus.  
 15 Damnatae noctes et vos vada lenta paludes,  
 Et quaecumque meos implicat unda pedes,  
 Immatura licet, tamen huc non noxia veni:  
 Det pater hic umbrae mollia iura meae.

- Aut si quis posita iudex sedet Aeacus urna,  
20 In mea sortita vindicet ossa pila:  
Adsideant fratres, iuxta Minoida sellam  
Eumenidum intento turba severa foro:  
Sisyphe, mole vaces, taceant Ixionis orbes,  
Fallax Tantaleo corripiare liquor,  
25 Cerberus et nullas hodie petat improbus umbras,  
Et iaceat tacita lapsa catena sera.  
Ipsa loquar pro me: si fallo, poena sororum  
Infelix humeros urgeat urna meos.  
Si cui fama fuit per avita tropaea decori,  
30 Afra Numantinos regna loquuntur avos,  
Altera maternos exaequat turba Libones,  
Et domus est titulis utraque falsa suis.  
Mox, ubi iam facibus cessit praetexta maritis,  
Vinxit et acceptas altera vitta comas,  
35 Iungor, Paulle, tuo sic discessura cubili:  
In lapide hoc uni nupta fuisse legar.  
Testor maiorum cineres tibi, Roma, verendos,  
Sub quorum titulis, Africa, tonsa iaces,  
Et Persen proavi simulantem pectus Achillis  
40 Quique tuas proavo fregit Achille domos,  
Me neque censurae legem moluisse nec ulla  
Labe mea vestros erubuisse focos.  
Non fuit exuviis tantis Cornelia damnum:  
Quin erat et magnae pars imitanda domus.  
45 Nec mea mutata est aetas, sine crimine tota est:  
Viximus insignes inter utramque facem.  
Mi natura dedit leges a sanguine ductas,  
Ne possem melior iudicis esse metu.  
Quaelibet austeras de me ferat urna tabellas:  
50 Turpior assessu non erit ulla meo,  
Vel tu, quae tardam movisti fune Cybeben,  
Claudia, turritae rara ministra deae,  
Vel cui, commissos cum Vesta reposceret ignes,  
Exhibuit vivos carbasus alba focos.  
55 Nec te, dulce caput, mater Scribonia, laesi:  
In me mutatum quid nisi fata velis?



- Maternis laudor lacrimis urbisque querellis,  
Defensa et gemitu Caesaris ossa mea.  
Ille sua nata dignam vixisse sororem  
60 Increpat, et lacrimas vidimus ire deo.  
Et tamen emerui generosos vestis honores,  
Nec mea de sterili facta rapina domo.  
Tu, Lepide, et tu, Paulle, meum post fata levamen,  
Condita sunt vestro lumina nostra sinu.  
65 Vidimus et fratrem sellam geminasse curulem,  
Consule quo facto tempore rapta soror.  
Filia, tu specimen censurae nata paternae,  
Fac teneas unum nos imitata virum,  
Et serie fulcite genus: mihi cymba volenti  
70 Solvitur aucturis tot mea fata meis.  
Haec est feminei merces extrema triumphî,  
Laudat ubi emeritum libera fama rogum.  
Nunc tibi commendo communia pignora natos:  
Haec cura et cineri spirat inusta meo.  
75 Fungere maternis vicibus, pater: illa meorum  
Omnis erit collo turba ferenda tuo.  
Oscula cum dederis tua flentibus, adice matris:  
Tota domus coepit nunc onus esse tuum.  
Et si quid doliturus eris, sine testibus illis:  
80 Cum venient, siccis oscula falle genis.  
Sat tibi sint noctes, quas de me, Paulle, fatiges,  
Somniaque in faciem credita saepe meam:  
Atque ubi secreto nostra ad simulacra loqueris,  
Ut responsurae singula verba iace.  
85 Seu tamen adversum mutarit ianua lectum,  
Sederit et nostro cauta noverca toro,  
Coniugium, pueri, laudate et ferte paternum:  
Capta dabit vestris moribus illa manus.  
Nec matrem laudate nimis: collata priori  
90 Vertet in offensas libera verba suas.  
Seu memor ille mea contentus manserit umbra  
Et tanti cineres duxerit esse meos,  
Discite venturam iam nunc sentire senectam,  
Caelibis ad curas nec vacet ulla via.

